

中國文學史

錢基博 著









錢基博著

中國文學史
下



中華書局



第六編 近代文學

自序

自來論文章者，多侈談漢魏唐宋，而罕及明代。獨會稽李慈銘極言明人詩文，超絕宋元恒蹊，而未
有勦發。自我觀之：中國文學之有明，其如歐洲中世紀之有文藝復興乎？明太祖開基江淮，以逐胡元，
還我河山；用夏變夷，右文稽古，士大夫爭自濯磨。而文則奧博排界，力追秦漢，以矯歐、蘇、曾、王之平
熟；而宋濂、劉基驛驢開道，以著何、李、王、李之先鞭。詩則雄邁高亮，出入漢、魏、盛唐，以救宋詩之粗
硬，革元風之纖濃；而高啓、李東陽後先繼軌，以爲何、李、王、李開山。曲則明太祖導揚高則誠《琵琶》
一記，盡洗胡元古魯兀刺之風，而易之以南詞之纏綿頓挫。至八股文，則利祿之途，俗稱時文者也。然
唐順之、歸有光縱橫軼蕩，則以古文爲時文，力求返虛入渾，積健爲雄；雖與詩古文體氣不同，而反本修
古一也。然則明文學者，實宋元文學之極王而厭，而漢魏盛唐之拔戟復振，彈古調以洗俗響，厭庸膚而
求奧衍，體制儘別，歸趣無殊。此則僕師心自得，而《明史》序《文苑傳》者之所未及知也。顧論文者，則
狙桐城家言之緒論，而極稱歸氏，妄庸七子。不知明有何李之復古，以矯唐宋八家之平熟；猶唐有韓
柳之復古，以救漢、魏、六朝之縛靡；有往必復，亦氣運之自然。明有唐順之歸有光輩，振八家之墜緒以
與七子相撐拄；不過如唐之有裴度段文昌等，與韓柳爲異，以揚六朝之頽波耳。而一代文章之正宗，固
別有在也。

又論者以錢謙益文章爲穢爲雜，此亦拾桐城家之唾餘，而不免求全之毀。錢氏以明代文章鉅公，而冠清貳臣傳之首，人品自是可議。至於極推歐陽修，以爲真得太史公血脈，而下開歸氏；又翹歸氏以追配唐宋大家，因校刻《震川集》而序之以發其指；然後知桐城家言之治古文，由歸氏以踵歐陽而窺太史公；姚鼐遂以歸氏上繼唐宋八家，而爲《古文辭類纂》一書，胥出錢氏之緒論，有以啓其塗轍也。特其爲文章，盛氣縟語，錯綜奇偶，七子之習湔洗不盡，自與桐城之清真雅澹而得歸氏之潔適者異趣。然以視湘鄉曾國藩之爲文，從姚鼐入手，而益探源揚馬，複字單誼，雜廁其間，務爲厚集其氣，使聲采炳煥，而戛焉有聲者，何必不與錢氏後先同符？錢氏從王李入，而不從王李出；湘鄉從姚氏入，而不從姚氏出；自出變化，以不殊暖於一先生之言，亦何必此之爲是，而彼之爲非？然世論不敢薄湘鄉，而務集謗於錢氏，多見其不知類也，此與以耳食者何以異。

至於談詩者，則多爲朱彝尊《明詩綜》所囿，而以錢氏《列朝詩集》爲口實。不知朱氏以《明詩綜》而詆《列朝詩集》，譬如蠹生於木，還食其木。何者？《列朝詩集》，《明詩綜》之底本也，何焯嘗惡而揭發之。不過文人矜誕，好謗前輩耳。詩至晚明，鍾譚異軍別張，錢氏朱氏皆所不喜，竟陵遂爲謗府。而夷考其實，鍾譚之詩，蹊徑別開，斬以幽冷救七子之絢爛，而爲秀峭以矯公安之容易，詩道窮而必變，亦如肥魚大肉，饜飫之過，而不得不思菜羹也。其詩出入中晚唐郊、島、皮、陸之間，么絃側調，亦有淵源，避熟就生，人自少見多怪耳。要之盛唐李杜，摹擬勢盡，厭故喜新，人情皆然。王士禎《唐賢三昧集》不取李杜一首，何嘗不與鍾譚所選《唐詩歸》同指？而士禎詩爲秀麗疏朗，鍾譚出以幽深孤峭，皆欲以偏師制勝。或詆鍾譚格局未完，雕鐫愈工，不知真氣彌傷，然士禎縹渺取神，風華富有，亦病性情不

真。而一尸亡國之大誦，一爲盛世之元音，豈非所遭之時有幸不幸耶？

僕懷此久，未有以發。商務印書館主人屬爲撰論。用布所蓄，以俟論定。而讀《四庫提要》著錄明人詩文集，覩記所及，每有尋聲逐響之談，并爲隨事舉正以著於篇。中華民國二十二年六月三日，無錫錢基博。



第一章 明文

第一節 總論

近代文學之有明，如近古文學之有唐，蓋承前代文學之極王而厭以別開風氣者也。明有何景明、李夢陽之復古以矯唐宋八家之庸懦，猶唐有韓愈、柳宗元之復古以救漢、魏、六朝之縟靡。唐有裴度、段文昌等揚六朝之頹波，亦與明有唐順之、歸有光輩振八家之墜緒，仿佛差似。大抵宋元以來，文以平正雅馴爲宗，其究漸流於庸膚。庸膚之極，不得不變而求奧衍。何李之起，文以沉博奧峭爲尚，其極漸流於虛僞。虛僞之過，不得不返而求平實。張一弛，蓋理勢之自然。然漢魏之聲，由此高論於後世，而與韓愈、歐陽修爭長；唐宋之文運，於是平變，遷流以至晚明。錢謙益、艾南英準北宋之矩矱，張溥、陳子龍擷東漢之芳華，旂鼓相當而文，亦斐然有彩。明文源流，大抵如此。今博考諸家之集，參以衆論，錄其著者。

第二節 楊維禎 宋濂附張孟兼 劉基附王禕徐一夔胡翰蘇平仲

明太祖起自畎畝，開國文臣，首稱金華宋濂字景濂；次則青田劉基字伯溫。其時前朝文學家，風流照映，獨推會稽鐵崖楊維禎字廉夫爲首，其生平行事已見於前。有大名於時。詩擅一時之雄，號鐵崖體。其爲詩以奇譎兀莽，自闢町畦；而文則文從字順，演迤澄泓。傳有《東維子文集》三十一卷，附錄一卷

《四部叢刊》景印江南圖書館藏鳴野山房鈔本，其中文二十八卷。維楨遨嬉同塵，而自謂無所浼於世也。

維楨文有《竹夫人傳》以見志曰：

夫人，竹氏，名茹，字珍瓊，號抱節君。吳先爲孤告君之子曰智，諫武王伐紂，不聽，遂不食周粟，餓於首陽山。且死，以其族告曰：「吾不食死。百年後，當有不食飲者爲吾女氏以救世之渴熱，然未嘗如鎖子婦之墮其節也。」越若干世，爲宋之元祐年，果生夫人。夫人生而瘠如箴器，成將作匠之羅織，巧慧其中，玲瓏空洞無他腸。又善滑稽圓轉，雖與人狎，其情逸，亦如木偶氏。諸夫人皆無蠡斯分，而善之者，則無內荒長舌之禍也。嘗見聘趙氏，充家奴畜之。豫章黃太史庭堅聞其作詩雪之，以爲：「總臂體膝，辱夫人；而況又奴之乎？」夫人亦犯而不校。夫人自以家世素貧，終恥屈身於人。鉛華眉黛，弗之御矣；荆釵棘簪之微，一皆棄斥。而王后嬪妃下至公卿百執事，無不器重之。召亦無不往，然所在抱節，終身未嘗少污其潔。先是得長生久視術於異娥氏，用能辟穀導引以應鼻祖氏之言。其蹤跡詭秘，當炎而出，方秋節遁去，或謂尸解，不知其終。

史氏曰：莊周稱：「姑射山有神人，肌膚若冰雪，綽約若處子。」夫人豈其流亞歟？惟其辟穀不食飲，故老不死，人疑爲女仙。後人有見於葛陂者，與壺丈人同蛻去云。

其辭坦迤，絕無雕藻淫豔之態。維楨之爲《鹿皮子文集序》曰：「言有高而弗當，義有奧而弗通，若是者，後世有傳焉？無有也。又況言龐而弗律，義淫而無軌者乎？」是其爲文，言求有當而合于文律，義求能通而避淫僻。宋濂誌其墓，謂：「非先秦兩漢弗之學，久與俱化，見諸論撰，如觀商敦周彝，雲雷成文，而

寒光橫逸，奪人目睛，」則有過情之譽矣。維楨之文，雖其志在力駕宋人而卒未能力破宋人之藩籬，氣暢而詞適，亦不墮惡道，尚未能與韓柳爭長，而比之於先秦兩漢之文，則不相類。故其文故與宋濂同其沖融清邁夷猶耳。惟維楨詞筆瘦拗，而濂則才章富健，則又不同。

元末文章以浦陽吳萊字立夫、浦江柳貫字道傳、金華黃潛字晉卿爲一朝之後勁。而宋濂初從萊學，又學於貫與潛，其授受具有源流。自少至老，未嘗一日去書卷，於學無所不通，下筆纚纚不能自休。及事明太祖，在朝郊社宗廟山川百神之典，朝會宴享律曆衣冠之制，四裔貢賦賞勞之儀，旁及元勳巨卿碑記刻石之辭，咸以委濂，屢推爲開國文臣之首。士大夫造門乞文者後先相踵。外國貢使亦知其名，每問宋先生無恙。高麗、安南、日本至出兼金購文集。修《元史》，充總裁官。累官翰林院學士，四方學者悉稱爲「太史公」，不以姓氏。爲文章醇深演迤，而乏裁剪之功，體流沿而不返，詞枝蔓而不修，此其短也。吳萊特氣縱橫，筆情閎肆，論者謂他人患其淺陋，而萊獨患其宏博。濂則得法於萊，而以才多爲累，亦與同譏。惟萊雄嶄矯舉而失之矜張，濂則敷腴朗暢而不免冗蕪，顧筆力道足以自振，故不以冗蕪爲病。傳有《宋學士文集》七十五卷（《四部叢刊》影印明正德間張潛刻本，內分《鑾坡集》，即《翰苑前集》、《翰苑後集》，又《翰苑續集》、《翰苑別集》、《芝園集》、《芝園後集》、《朝京稿》），又《宋文憲全集》五十三卷，卷首四卷（清嘉慶間嚴榮刻本）。其爲《竹溪逸民傳》曰：

竹溪逸民者，幼治經，長誦百家言，造文蔚茂喜馳騁，聲聞燁燁起薦紳間。意功名可以赤手致。忽抵掌於几曰：「人生百歲，能幾旦暮？所難遂者適意爾，他尚何恤哉！」乃戴青霞冠，披白鹿裘，不復與塵事接。所居近大溪，篁竹脩脩然生。當明月高照，水光激灑，共月爭清輝。逸民輒腰

短簫，乘小舫，蕩漾空明中，簫聲挾秋氣爲豪，直入無際，宛轉若龍鳴深泓，絕可聽。簫已，逸民叩舷歌曰：「吹玉簫兮弄明月，明月照兮頭成雪。頭成雪兮將奈何，白漚起兮衝素波。」人見之，數曰：「是誠世外人也。欲常見且不可得，況狎而近之乎！」性嗜鞠，種之滿園，顧視若孩嬰，黃花一開，獨引觴對酌，日入不倦。人讓其留物。怒曰：「舉世無知我，知我惟此花爾。一息自怡，尚可謂滯於物耶？」復愛梅，梅孕綠萼微吐，赤脚踏雪中若溫，見輒凝視移時，目不瞬，且大言曰：「知我者惟鞠，鞠已謝我去，幸汝梅繼之。汝梅脫又謝我去，我當上白鶴山采五芝耳！」白鶴山蓋溪上諸峰云。

逸民年五十，益恬泊無所繫，間私謂其友曰：「吾於世味愈孤矣，將漁於山樵於水矣。」其友疑其誕。逸民曰：「樵於水，志豈在薪？漁於山，志豈在魚？是無所利也。無所利，樂矣。子以予果滯於梅與鞠耶？」君子以其語近道，有類於古隱者，相與傳其事。逸民所未嘗言，則無從知之矣。逸民，陳姓，洄其名，烏傷人。

史官曰：昔者李白與孔巢父等六人隱居徂徠山，世仰之以爲不可狎近，因號爲竹溪六逸。寥寥七百年後，而逸民亦以竹溪自名，若出一轍。豈聞風而興起歟？縱曰其地或殊，人之衆獨有異，高風絕塵，照映後先，其安有不同者歟？士之沉酣聲利而弗返者，盍亦知所自警歟！夫自范蔚宗著《後漢書》以隱逸登諸史傳，歷代取法而莫之廢者，其意又豈無所激歟？雖然，逸民之自爲則善矣。

或以濂一代文宗，比之宋之有歐陽修，而文章實非其倫。歐陽態有餘妍，而出之容與閒易。濂則筆無

剽肆，而好爲縱橫馳驟。歐裕於養，濂逞其才。劉基負氣甚豪，明太祖嘗以文學之臣爲問。基對曰：「當今文章第一，輿論所屬，實在翰林學士臣濂。其次臣基，不敢他有所讓，又次則太常丞臣孟兼。孟兼，張氏，名丁，以字行，浦江人，傳有《白石山房逸稿》二卷（南京龍蟠里圖書館藏有鈔本）；其詩文溫雅清麗，而奇氣燁然，不可掩抑，亦以追蹤於濂。宜基有以亟稱之也。」

劉基雄邁有奇氣，而宋濂自命儒者。然基鍊氣入道，而不爲濂之泛濫，又造辭欲潔，亦不如濂之曼衍。濂蛟騰鳳起，其文瞻，基劍氣珠光，其辭嶄。清臣修《明史·基傳》，稱：「基所爲文章，氣昌而奇。」奇則有之，昌非所尚。而《四庫全書提要》則曰：「濂文雍容渾穆，如天閑良驥，魚魚雅雅，自中節度。基文神鋒四出，如千金駿足，飛騰飄瞥，驀澗注坡，雖皆極天下之選，而以德以力，則有間矣。」此亦似是而非之論。其實濂閑放若有餘肆，差似雍容，未爲渾穆。而基則斂抑如恐絕塵，自中節度，豈欲飛騰。一肆一道，其大較也。基博通古今，文章精卓，傳有《誠意伯劉文成公文集》二十卷（《四部叢刊》影印明隆慶壬申刻本，又清乾隆丙子刻本）；其中《郁離子》二卷，雜文六卷。而《郁離子》者，在元季屏居青田山時所著之書，發憤而有作，正名察治，託物取譬，以自命一家言者也。其辭曰：

楚太子以梧桐之實養梟而冀其鳳鳴焉。春申君曰：「是梟也，生而殊性，不可易也。食何與焉？」朱英聞之，謂春申君曰：「君知梟之不可以食易其性而爲鳳矣。而君之門下，無非狗偷鼠竊亡賴之人也，而君寵榮之，食之以玉食，薦之以珠履，將望之以國士之報。以臣觀之，亦何異乎以梧桐之食養梟而冀其鳳鳴也？」春申君不寤，卒爲李園所殺，而門下之士無一人能報者。（《千里

郁離子曰：「豺之智，其出於庶獸者乎？嗚呼！豈獨獸哉，人之無知也，亦不如之矣。故豺之力，非虎敵也，而獨見焉則避；及其朋之來，則相與犄角之。盡虎之力，得一豺焉，未暇顧其後也，而犄之者至矣。虎雖猛，其奚以當之？長平之役，以四十萬之衆，投戈甲而受死，惟其知之不如豺而已。」（《魯般篇》）

瓠里子自吳歸粵。相國使人送之，曰：「使自擇官舟以渡。」送者未至，於是舟泊於蒔者以千數，瓠里子欲擇之而不能識。送者至，問之曰：「舟若是多也，惡乎擇？」對曰：「甚易也。但視其蔽篷折槽而破帆者，即官舟也。」從而得之。瓠里子仰天歎曰：「今之治政，其亦以民爲官民歟？則愛之者鮮矣。宜其敝也。」（《靈丘丈人篇》）

楚有養狙以爲生者，楚人謂之狙公。旦日必部分衆狙於庭，使老狙率以之山中，求草木之實，賦什一以自奉，或不給，則加鞭撻焉。羣狙皆畏苦之，弗敢違也。一日，有小狙謂衆狙曰：「山之果，公所樹歟？」曰：「否也，天生也。」曰：「非公不得而取歟？」曰：「否也，皆得而取也。」曰：「然則吾何假於彼而爲之役乎？」言未既，衆狙皆寤。其夕，相與伺狙公之寢，破柵毀押，取其積相攜而入於林中，不復歸。狙公卒餒而死。

郁離子曰：「世有以術使民而無道揆者，其如狙公乎？惟其昏而未覺也。一旦有開之，其術窮矣。」（《瞽瞍篇》）

孽搖之虛有鳥焉，一身而九頭，得食則八頭皆爭，呀然而相銜，灑血飛毛，食不得入咽，而九頭皆傷。海鳥觀而笑之曰：「胡不思九口之食同歸於一腹乎，而奚其爭也？」（《省敵篇》）

辭譎而義貞，指小而喻大。其他《九難》、仿《七發》、道麗得枚乘之體，會稽山水諸記，幽秀有柳州之意，其音清越，殊勝濂也。義烏王禕字子充，與濂偕總裁修《元史》。太祖謂濂曰：「浙東人才，惟卿與王禕。才思之雄，禕不如卿。學問之博，卿不如禕。」傳有《王忠文公集》二十四卷（南京龍蟠里圖書館藏有明萬曆刊本）。而濂爲之序，稱：「其文凡三變：初年所作，幅程廣而運化宏。壯年出遊之後，氣象益以沉雄。暨四十以後，乃渾然天成，條理不爽。」則亦服禕之深矣。禕嘗薦天台徐一夔字大章者同修《元史》。一夔不出，而有《與禕論修史書》，誦者稱其有鑒裁。傳有《始豐集》十四卷（南京龍蟠里圖書館藏有鈔配明初刻本）。又濂鄉人胡翰字仲子，從吳萊學，與濂同門，其文亦爲黃潛柳實所稱，傳有《胡仲子集》十卷（南京龍蟠里圖書館藏有明洪武刻本），其中文九卷，持論多切世用，文章與宋濂王禕相上下。而濂獨亟稱蘇平仲，以爲不求似古人，而未嘗不似也。平仲，名伯衡，亦濂鄉人。濂以翰林學士承旨致仕。太祖問代者。濂對曰：「臣鄉人蘇伯衡學博行修，文詞蔚瞻有法。」傳有《蘇平仲集》十六卷（《四部叢刊》景印明正統壬戌本）。而濂序其書曰：「精博而不粗澀，敷腴而不苛縟。」蓋文章蹊徑與濂同，故相契合如此。而濂與基，皆不安爲宋人之文。明之有濂基以開何李之復古，猶唐之有燕（張說）許（蘇頌）以爲韓柳之前茅也。

第三節 方孝孺附解籍

寧海方孝孺，字希直，一字希古，從宋濂學，濂門下知名士皆出其下。先輩胡翰、蘇伯衡亦自謂弗如。孝孺顧末視文藝，恆以明王道、致太平爲己任，欲以駕軼漢唐，銳復三代，而毅然自命之氣，

發揚蹈厲，時露於筆墨之間。其文章縱橫豪放，頗出入南北宋蘇軾陳亮之間，與濂同其瞻肆，而不同其枝碎。濂宏博而不免緩散，所病在取徑太闊大，遺詞太繁縟，未能渾灝流轉，故不如孝孺之直抒欲言，縱筆所之，疏快成片段也。傳有《遜志齋集》二十四卷（《四部叢刊》影印明嘉靖辛酉刻本）。感物寫懷，每有悲天閔人之意。錄《蚊對》曰：

天台生困暑，夜卧絺帷中。童子持翫颺於前，適甚，就睡。久之，童子亦睡，投翫倚牀，其音如雷。生驚寤，以爲風雨且至也，抱膝而坐。俄而耳旁聞有飛鳴聲，如歌如訴，如怨如慕，拂肱刺肉，撲股嚼面，毛髮盡豎，肌肉欲顫，兩手交拍，掌溼如汗，引而嗅之，赤血腥然。大愕不知所爲，蹴童子，呼曰：「吾爲物所苦，亟起索燭照。」燭至，絺帷盡張，蚊數千皆集幃旁，見燭亂散，如蝗如蠅，利觜飮腹，充亦圓紅。生罵童子曰：「此非嚼吾血者耶？皆爾不謹，褰帷而放之入。且彼異類也，防之苟至，烏能爲人害？」童子拔蒿束之，置火於端，其烟勃鬱，左麾右旋，繞牀數匝，逐蚊出門。復於生曰：「可以寢矣，蚊已去矣。」生乃拂席將寢，呼天而歎曰：「天胡產此微物而毒人乎？」

童子聞之，啞爾笑曰：「子何待己之太厚，而尤天之太固也？夫覆載之間，二氣絪縕，賦形受質，人物是分。大之爲犀象，怪之爲蛟龍，暴之爲虎豹，馴之爲麋鹿與庸狔，羽毛而爲禽，裸身而爲人，爲蟲，莫不皆有所養，雖巨細修短之不同，然寓形於其中則一也。自我而觀之，則人貴而物賤。自天地而觀之，果孰貴而孰賤耶？今人乃自貴其貴，號爲長雄，水陸之物，有生之類，莫不高羅而卑網，山貢而海供，蛙鼃莫逃其命，鴻雁莫匿其蹤。其食乎物者，可謂泰矣，而物獨不可食於人耶？且茲夕蚊一舉喙，即號天而訴之。使物爲人所食者，亦皆呼號告於天，則天之罰人，又當何如耶？且

物之食於人，人之食於物，異類也，猶可言也。而蚊且猶畏謹恐懼，白晝不敢露其形，瞰人之不見，乘人之困怠，而後有求焉。今有同類者，啜粟而飲湯同，畜妻而育子同也，衣冠儀貌，無不同者，白晝儼然乘其同類之間而陵之，吮其膏而鹽其腦，使其餓踣於草野，離流於道路，呼天之聲相接也，而且無恤之者。今子一爲蚊所嗜，而寢輒不安，聞同類之相嗜而若無聞，豈君子先人後身之道耶？」天台生於是投枕於地，叩心太息，披衣出戶，坐以終夕。

頓挫瀏亮，一洗宋濂冗滯之敝，不得不有出藍之譽也。孝孺既以不事成祖誅死，其文章亦禁不行。門人王稔藏遺稿，宣德（宣宗年號）間始稍傳播。原本凡三十卷，拾遺十卷，附錄一卷，乃黃孔昭謝鐸所編。世所傳二十四卷本，則正德（武宗年號）中顧璘守台州時所重刊也。

吉水解縉，字大紳，與孝孺同輩，而才氣放逸，下筆不能自休，當時有才子之目。迄今委巷流傳其少年宿慧諸事，多鄙誕不經，傳有《解學士文集》十卷（南京龍蟠里圖書館藏有明嘉靖刻本）。其奏議如《大庖西封事》、《白李善長冤》諸篇，俱明白剴切，有孝孺之風。大抵宋濂劉基，飽更世難，其辭斂，其意深。縉及孝孺新進用事，其文激，其氣銳。

第四節 楊士奇附楊榮黃淮金幼孜 楊溥

太祖之世，運當開國，多峭健雄博之文。成祖而後，太平日久，爲臺閣雍容之作。作者遞興，皆沖融演迤，不矜才氣，而泰和楊士奇名寓（以字行）、建安楊榮字勉仁、石首楊溥字弘濟並世當國，歷相仁宗、宣宗、英宗三朝，黼黻承平，中外翕然稱三楊。推士奇文章特優，一時制誥碑版，出其手者爲多。仁

宗雅好歐陽修文。士奇文平正紆餘，時論稱其仿佛。後來館閣著作，沿爲流派，所謂臺閣體是也。傳有《東里全集》九十卷，別集四卷（南京龍蟠里圖書館中藏有明天順刊本）。錄《沈學士墓碑》曰：

嗚呼！此吾友翰林學士沈公之墓。沈世家松江華亭。上考諱德輝，嘗爲郡史，平反冤獄百數十人，鄉稱長者。妣宋氏。考諱易，仕爲諮議參軍，無幾，棄官養親，而授徒里中，惇行倫誼，集《五倫詩》以教學者，而甘貧樂義，人號苦節先生。妣顧氏，有善德。二子：長即公，諱度，字民則。次榮，字民望。公天資溫雅敦實，自幼嗜學，博涉經史。洪武中，郡邑交舉文學，弗就。坐累謫雲南，跋涉萬里，處患難，其中裕然。時同謫者多名人，卒於公交。達官重帥，爭欲迎致公館下。岷王具禮幣聘之。既至，屢進直言，居無幾，辭去。都督瞿能知賢下士，延於家塾爲弟子師，旦暮躬請益焉。其入京師也，以公偕行。

時太宗皇帝初臨外，命翰林舉賢才。今禮部尚書江陵楊公爲編修，以公名上，擢翰林典籍。方時，制敕填委，既視草，學士以下，率分書之。上獨覽公書稱善。一時翰林善書，如解大紳之真行草，胡光大之行草，滕用亨之篆八分，王汝玉、梁用行之真、楊文遇之行，皆知名當世；而解及公之書，獨爲上所愛。凡玉冊金簡，用之宗廟朝廷，藏祕府，施四裔，刻諸貞石，傳於後世，一切大制作，必命公書。公之書婉麗飄逸，雍容矩度，兼篆八分，八分尤高古，渾然漢意。而日侍清密無間，賞賜二品金織衣，新製象笏，鏤公氏名，塗金以賜。以其弟與子皆善書，皆官之近侍；父子兄弟，並榮於朝。古今以書遭承寵遇，莫或加公。書蓋公一藝耳。爲文章，尚興致，平淡雅則，不爲浮靡。事上必盡誠，被顧問必以正對。由典籍陞檢討，復陞修撰，遂陞侍講學士奉直大夫。仁宗皇帝賜詩

命，進協正庶尹，贈其考奉直大夫協正庶尹，翰林侍講學士，其妣宜人。予誥歸焚黃，賜鈔給驛傳。宣宗皇帝臨御，進翰林學士，奉政大夫。年踰七十，再上章乞致仕歸，不聽。

公事親孝，與弟榮友愛相篤終身，與人交，久益敬。爲人貞靜不苟附。初入翰林，鄉人有爲大宗伯者，得君，有氣勢赫赫，朝士希進者日奔走其門。公以故舊獨自守，未嘗輕造，間或邀公，輒以禮辭，士論高之。閒暇，閉戶焚香，鳴琴賦詩以自樂，人號自樂先生。襟宇澄澹，風韻蕭散，所好惟載籍法書，名畫古器，自題其齋居曰樂琴書處，雜列花卉奇石。高人韻士至，必具觴酌，或吟或弈，意度翛然。所作詩文有《滇南稿》、《隨筆錄》、《西清餘暇》、《自樂稿》，藏於家。年七十有八。一日微疾，猶作《和王行儉詹事小洞天詞》，明日捐館，宣德甲寅十月二十二日也。訃聞，上遣禮部郎中陳謨賜祭，給驛舟歸喪，命有司營葬。元配顧，贈宜人。繼陳。子二：芹，先十五年卒。藻，中書舍人，陞右大理寺副。孫男二：潮，秀敏好學，先十年卒。次源。女三：長歸俞珙，餘在室。曾孫男一。士奇與公同入翰林，相交三十有三年，最相得。其歿也，蓋哭之慟。於是榮及藻求予表墓。予忍以衰朽而忘情老友哉？敬爲之表。

遣言措意，切近的當，然遽以擬歐陽修，亦似少過。歐陽氣逸韻流，意態無窮。士奇言盡而意止，趣味不長。只是紆徐委備，無艱難勞苦之態，所以得歐陽之髣髴，然亦以啓冗弱之病。歐陽意有餘於詞，故耐咀味，士奇詞或饒於意，不免蕪弱也。

楊榮與士奇同主一代之文柄，而傳有《楊文敏集》二十五卷（南京龍蟠里圖書館藏有明正統刻本）。其文章雍容平易，體格與士奇略同。雖無深湛幽渺之思，縱橫馳驟之才足以震耀一世，而透迤有度，醇

實不炫。其他永嘉黃淮字宗豫，有《省愆集》二卷（南京龍蟠里圖書館藏有明正統刊本）。新淦金幼孜名善（以字行），有《金文靖集》十卷（南京龍蟠里圖書館藏有明弘治間刻本），春容雅步，頗亦肩隨。蓋其時天下康樂，故廊廟廣颺，具有氣象，操觚者亦不知也。

楊溥以弘識雅操驂駕三楊，而刻意適古，力摹昌黎，而不以文名，其集亦不傳。觀所爲《承恩堂記》曰：

皇上嗣登天寶，嘉念蒼生，期底雍熙，圖任老成人，彌綸治化，少師吏部尚書蹇公實爲之冠。宣德七年秋，詔有司，若曰：「予有輔臣，專自先朝，偉著德望，暨於今啓沃居多。予於庶政咨焉，予於庶官審焉。克允克諧，實惟其人。欲新厥居以稱予優禮之意，其繪圖以進。」有司明日以圖進，弗稱。又明日更爲圖進，弗稱。上乃自規畫授有司。乃卜地於都城東南，厥位維陽，厥土維剛，董材於肆，厥木維良，厥石維貞，陶瓦維堅，乃卜日之吉鳩工，哀高以平，築虛以實，引繩縮板，以垣厥周。乃建厥堂，翼之以室，乃闢厥路，重之以門，贊之贊之，塗之沐之，不踰月告成。祀先有廟，禮賓有館，庖有廚，汲有井，有庫有廩，以儲以牧。輪奐咸美，百用具備。復命大臣燕飲以落之，肴核酒醴，咸出大官。

公謂翰林學士楊溥曰：「昔晉獻文子成室，諸大夫發焉。當時善頌善禱者見稱於君子。子何以語我？」溥不敢以不敏辭，乃酌而祝曰：「惟天佑國家，乃實以賢哲簡昇平格，復錫以壽，若周之畢公，策名文武之世，相成王，相康王，永光周室。公歷四朝，進位師保，享高年，輔聖天子丕隆太平之運。溥於斯爲國家賀。」又酌而祝曰：「明盛之世，惠歸之德，君子享多福，而民咸樂其樂。是

以錫馬蕃庶，晝日三接，乃惟康侯。溥於斯爲天下蒼生賀。」又酌而祝曰：「福善之報，惟有德於民者爲盛。古昔名臣輔君致治，實功允德，乎達神明，身被光榮，澤流子孫，與國同久。《詩》曰：『惟其有之，是以似之。』溥於斯爲公賀！」公酌而復曰：「聖天子之恩篤不敢忘。子亦可謂善頌者矣。」謹名其室曰承恩堂，請書此以爲記。

取材結體，摹誥範頌，有意矜練，又是一格；而與士奇、榮之汗漫演進者不同。雖出以平實雅淡，而矜持少變化，光燄不長。然何李之前軌也。

第五節 李東陽附邵寶

茶陵李東陽，字賓之，歷相孝宗、武宗，工爲文章，朝廷大著作，多出其手。自明興以來，宰臣以文章領袖搢紳者，楊士奇後，東陽而已。傳有《懷麓堂集》一百卷，其中文稿六十卷，文章在難易之間，視士奇爲刻意，而語未堅卓，比宋濂稍安閒，而意則膚泛。《明史》以典雅流麗稱之，不免譽非其實。然其爲之工者，亦能春容盡意，無矯揉造作之致，故能繼蹤士奇而主文章之壇坫。錄《甲申十同年圖詩序》曰：

《甲申十同年圖》一卷，蓋吾同年進士之在朝者九人，與南京來朝者一人而十，會於太子太保刑部尚書吳興閔公朝瑛之第，圖焉者也。圖分爲三曹，自卷首而觀，其高顙多髯，髯強半白，袖手右嚮而側坐者，爲南京戶部尚書公安王公用敬。微髯，鬢斑白，爲肩高聳，背若有負而中坐者，爲吏部左侍郎泌陽焦公孟陽。微髯，多鬢，白髭髭不受櫛，面骨後層起，左向坐，右手持一冊，冊半啓

閉者，爲禮部右侍郎掌國子祭酒事黃巖謝公鳴治。又一曹，微鬚頰面，笑齒欲露，左手握帶，右嚮而半者，工部尚書郴州曾公克明。虎頭方面，大目豐準，鬚髯微白而長，右手攜牙牌，左握帶，中左坐者，閔公也。白鬚，黎面，面老皺，兩手握帶，中右坐者，工部右侍郎秦和張公時達。無鬚，頰面，聳肩袖手而危坐，且左顧者，都察院左都御史浮梁戴公廷珍。又一曹，爲戶部右侍郎益都陳公廉夫者，面微長且頰，眉濃，髮半白，稍右嚮而坐。爲兵部尚書華容劉公時雍者，面微方而長，鬚髮皓白，左手握帶，右手按膝而中坐。予則面微長而臞，髭數莖，白且盡，中若有隱憂，右手持一卷如授簡狀，坐而嚮左，居卷最後者，是也。九人者，皆畫工面對手貌，概得其形模意態。惟焦公奉使南國，弗及會，預留其舊所圖者而取之，故僅得其半而已。是日謝公倡爲詩，吾八人者皆和。焦公歸亦和焉。

傳有之：「物之不齊，物之情也。」十者數之成，而亦數之漸。以吾十人者，得之於四十年之餘，良不爲少。然以二百五十人者，而不能二十之一，則謂之多，亦不可也。以年論之：閔公年七十有四，張公少二歲，曾公又少二歲，謝焦二公又少一歲，劉、戴、陳、王四公又遞少一歲。予於同年爲最少，今年五十有七，亦已就衰。追憶曩時之少者壯者，使猝然而逢之，若不相識也。且以地以姓論之，無一同者。以官，則六部之與都察院，其署與職，亦莫能以皆同。蓋所謂「不齊」者如此。然揔志效力，各執其事，以贊揚政化，期弼天下於熙平之域，則未始不同。語有之：「人心不同，有如其面。」今固不可以貌論也。又何爵齒族里之足云乎？孔子論成人，以「久要不忘」爲次，而廉知勇藝，「文之禮樂」者爲至。茲九人者之才之行，彙征類聚，建功業於天下，固將以大有成。惟予蹇劣

無似，方懼名實之不副，而是心也，不敢以相負也。然則今日之會，豈徒爲聚散離合，時考而世講之具哉？唐九老之在香山，宋五老之在睢陽，歌詩宴會，皆出於休退之後。今吾十人者，皆有國事吏責，故其詩於和平優裕之間，猶有思職勤事之意。他日功成身退，各歸其鄉，顧不得交倡迭和，鳴太平之樂以續前朝故事，則是詩也，未必非寄情寓意之地也。因萃而序之以各藏於其家。

閔公名珪，張公名逵，曾公名鑑，謝公名鐸，焦公名芳，劉公名大夏，戴公名珊，王公名軾，陳公名清，今各以字舉。而余則太子太保戶部尚書謹身殿大學士長沙李東陽寶之也。進士舉於天順之八年，會則於弘治十六年癸亥三月二十五日，越翼日，乃序。

意度嫺雅，步驟謹嚴，集中如此者不多見也。好文章，尤獎成後進，推挽才彥，學士大夫出其門者，卒粲然有所成就。

無錫邵寶字二泉，鄉試出東陽之門，故其詩文矩度，皆宗法東陽。東陽於其詩文亦極推獎，曾作《信難》一篇以贈，稱：「其集出入經史，蒐羅傳記，該括情事，摹寫景物，以極其所欲言，而無冗字長語，辛苦不怡之色，若欲進於古之人。」且以歐陽修之知蘇軾爲比。傳有《容春堂集》六十六卷（南京龍蟠里圖書館藏有明嘉靖刻本）。其文邊幅少狹，而部勒有度，易而不率，暢而不蕪，體近東陽而無其末流冗闊膚廓之失，亦卓然以成一家者矣。

第六節 李夢陽 何景明附 康海 王九思 王廷相

慶陽李夢陽字獻吉，起自窮邊，而才思雄鷲，卓然以復古自命。弘治時，李東陽以宰相主文柄，翕

然爲天下宗。夢陽亦嘗執贄焉，獨譏其萎弱，倡言「文必秦漢，詩必盛唐。」非是者弗道。與何景明、徐禎卿、邊貢、康海、王九思、王廷相號七才子，而夢陽爲之魁。傳有《空同集》六十六卷，南京龍蟠里圖書館藏有明萬曆刊本，盛氣矜心，欲駕八家而上之。其文則故作聾牙，範經鑄子，以艱深文其淺易。而雄邁之氣，足以振啾緩，生撰之句，足以矯平熟，風氣鼓盪，觀聽變易，所謂「雖以無道行之，必可畏也。」錄《禹廟碑》曰：

李子遊於禹廟之臺，鑒長河之防，孤城故宮，平沙四漫，遐盼故流，北盡碣石，九派湮淤，雲草浩浩。於是愴然而悲曰：「嗟乎！予於是知王霸之功也。霸之功驩，久之疑。王之功忘，久之思。昔者禹之治水也，導川爲陸，易軌爲寧，地以之平，天以之成。去巢就廬，而粒而耕，生生至今者，固其功也，所謂萬世永賴者也。然問之耕者弗知，粒者弗知，廬者弗知，陸者弗知。故曰「王之功忘」。譬之天生物而物忘之，泳者忘其川，棲者忘其枝，民者忘其聖人，非忘之也，不知之也，不知自忘。及其苗也，號呼而祈恤，於是智者則指之所從來，而廟者興矣。河盟津東也，蹇曠肆悍，勢猶建瓴，隄堰一決，數郡魚鼈。於是昏墊之民，匍匐詣廟，稽首號曰：「王在，吾奚役斯？」所謂思也。故不忘不大，不思不深。深莫如地，大莫如王，天之道也。霸者非不功也，然不能使之不忘，而不能使之不疑。何也？不忘者小，小則近，近則淺，淺則疑，如秦穆賜食善馬肉者酒是也。夫天下未聞有廟桓文者也，故曰「子觀禹廟而知王霸之功也。」或問湯文不廟。李子曰：「聖人各有其至：堯仁舜孝，禹功湯義，文王之忠，周公之才，孔子之學，是也。夫功者，切於苗故，是故獨廟禹。」

是時監察御史澶州王子會按江南，登臺四顧，乃亦愴然而悲曰：「嗟乎。余於是而知功之言微也。吾少也覽，嘗躡州城，眺滄渤，南目大梁之墟，乃今歷三河，攬淮泗，極洪流而盡滔滔，使非有神者主之，桑而海者久矣，尚能粒耶、耕耶、廬耶？能軋者寧耶、川者陸耶？嗟乎！予於是而知功之言微也。所謂「微禹吾其魚」者耶？所謂「美載勤而不德」者耶？」於是飭所司葺其廟，而屬李子碑焉。王子，名溱，以嘉靖元年春按江南，明年秋，代去。乃李子則爲迎送神辭三章，俾祭者歌之以侑神焉。其辭曰：

天門兮顯闢，赫赫兮雲吐。竊黃屋兮陸離，靈總總兮上下。羌若來兮儵不見，不見兮奈何？望美人徒怨苦，橫四海兮怒波。絙絃兮鐃鼓，神不來兮誰怒。執河伯兮顛戮，飭陽侯兮清

路。靈輦兮來至，風泠泠兮堂戶。舞我兮我醕，尸既飽兮顏酡。惠我人兮乃土乃粒，日云暮兮尸奈何？風九河兮濤暮雲，噓噓兮昏雨。王駕鳳兮騷文魚，龍翼翼兮兩旗。悵佳期兮難屢，

心有愛兮易離。愛君兮思君，肴芳兮酒芬，君歸來兮庇吾民。

不懈及古，力求拔俗，大率類是。然不免瑯琊傷元氣，未能渾成天然。楊士奇李東陽以曄緩見餘力，而或儒不能以自振，燕不能以自裁。李夢陽何景明以生奧得古致，而卒澀不能以自運，格不能以自吐。儻知此之所以得，即徵彼之所爲失，亦文章得失之林也。

信陽何景明字仲默，與李夢陽俱倡爲復古之學。夢陽最雄駿。景明稍後出，相與頡頏。然二人天分各殊，規模不同。夢陽才雄而氣盛，故枵張其詞。景明慮詳而力緩，故斂抑其氣。而未脫盡古人畦封以造於渾化則一，斯摹擬之蹊逕也。景明傳有《大復集》三十八卷（清乾隆間何氏重刻本咸豐重刻

本。錄《師問》曰：

有問於何子者曰：「今之師，何如古之師也？」何子曰：「古也有師，今也無師。」然則今之所謂師者何稱也？曰：「今之所謂師也，非古之所謂師也。其名存，其實亡，故曰無師。」曰：「古之師可得聞歟？」曰：「古者教之法：曰性，曰倫。性則仁、義、禮、智、信是也；倫則君臣、父子、兄弟、長幼、朋友是也。於是而學焉以由之曰道，學焉以得之曰德，用之而足以舉於天下曰業。是故古之師，將以盡性也，明倫也，則其道德而蓄其業也，是謂古之師也。」曰：「何謂今之師？」曰：「今之師，舉業之師也。執經授書，分章截句，屬題比類，纂摘簡略，剽竊程式，傳之口耳，安察心臆，叛聖棄古，以會有利。是故今之師，速化苟就之術，干榮要利之媒也。」

曰：「師止是二者乎？」曰：「否，不止是也。漢有經師，作訓詁以傳一家之業者也；君子有尚之。唐宋以來，有詩文師，辨體裁，繩格律，審音響，啓辭發藻，較論工鄙，咀嚼齒牙，媚悅耳目者也；然而壯夫猶羞稱之。故道德師爲上，次有經師，次有詩文師，次有舉業師。師而至於舉業，其卑而可羞者，未有過焉者也。」曰：「然則廢舉業已乎？」曰：「何可廢也？今之取士之制也，士進用之階也。」曰：「是既不可廢，子何謂其卑而可羞也？」曰：「吾所謂卑而可羞者，非其制使然也，師舉業者之敝也。古之師之教者，立廉恥之節，守禮義之閑，不重貴富，不羞貧賤，不詘身於威武，不失志於患難，故上樂得人而用之。夫今獨不欲得是人用哉？顧以身求之，勢爲難也，故以言觀之，以言觀之，故有科舉之制。豈逆其師之教弟子之學，乃以爲利之門也？」

嘗見今之爲其子弟求師，及其子弟之願學者，口訪耳探，有告之曰：「某，高官也。其前，高第

也。其舉業，則精也。其師之。」於是雖千里從之也。又告之曰：「某，未有高官也，未有高第也。其道德則可師也。」於是雖比舍弗從之矣。夫巫醫樂工與凡百工相師法以習其技藝，所以求食也，安有士相師以求食而可爲也？此吾所謂卑而可羞者也。」曰：「若是則何如而可也？」曰：「今之舉業，所習者固古聖人之言也，因其言，求其道，修之內而不願乎其外，達則行之，困則存之，興斯教也，安知今之師非古之師哉？」問者於是避席曰：「今日乃承益我以師之說。」

景明志操耿介，尚節義，鄙榮利，與夢陽並有國士風。兩人爲詩文，初相得甚懽，名成之後，互相詆謔。夢陽主摹倣，而景明則主創造，各樹堅壘不相下。兩人交游，亦遂分左右袒。景明之才，本遜夢陽，而其文章閒雅穩稱，不如夢陽之奇崛博奧，而亦無夢陽張脈憤興之敝。然天下語詩文，必並稱何李，又與邊貢、徐禎卿並稱四傑。

邊貢，字廷實，歷城人，有《華泉集》十四卷，徐禎卿，字昌穀，吳縣人，有《迪功集》六卷，皆以詩名，而文非所長。七子之中，惟武功康海字德涵，文章岸異，何景明異，厥驅邁，李夢陽謝其雄渾，筆力天矯。有《對山集》十卷。其擬《廷臣論寧夏事狀》及《鑄錢論》諸篇，尤洞爽軒闢，稱心而談，雖不如夢陽之邁鍊，然其逸氣往來，儻然自異，固在夢陽之割剝秦漢者上也。鄆縣王九思，字敬夫，有《漢波集》十六卷，自序稱：「始爲翰林時，詩學靡麗，文體萎弱，其後德涵、獻吉導予易其習。獻吉改正予詩藁，而文由德涵改正者尤多」云云。詩體文格，差得二人髣髴。然詩之富健，不及夢陽。文之粗率，尤甚於海。虎賁貌似，無足貴爾。儀封王廷相，字子衡，傳有《王氏家藏集》六十八卷，其詩文列名七子之中，而軌轍相循，亦不出北地信陽門戶云。

第七節 王守仁 楊慎

何李復古之聲既高，天下從風而靡，以艱深鉤棘，相與剽剽古人，求附壇坫。而於時有大儒出焉，曰餘姚王守仁字伯安，特以致良知紹述宋儒象山陸氏之學。而發爲文章，緣筆起趣，明白透快，原本蘇軾，上同楊士奇李東陽之容易，而力裁其冗濫；下開唐順之歸有光之寬衍，而不強立間架。初與李何諸人倡和，後大有所悟，斷然棄去，社中人皆深惜之，曰：「學如韓柳，不過文人，辭如李杜，不過詩人，惟志心性之學，以顏閔爲期者，乃人間第一等德業也。」身繫風氣之中，而文在風氣以外，直抒胸臆，沛然有餘，不斤斤於格律法度之間，而不支不蔓，稱心出之，儻亦致良知之形諸文章者耶？傳有《王文成全書》三十八卷，《四部叢刊》影印明隆慶間謝廷傑刻本，清光緒間浙江書局刻本，其中《文錄》五卷，《別錄》十卷。錄《寄楊邃菴閣老書》曰：

前日嘗奉啓，計上達。自明公進秉機密，天下士夫忻忻然動顏相慶，皆爲太平可立致矣。門下鄙生獨切生憂，以爲猶甚難也。亨屯傾否，當今之時，舍明公無可以望者，則明公雖欲逃避乎此，將亦有所不能。然而萬斛之舵，操之非一手，則緩急折旋，豈能盡如己意。臨事不得專操舟之權，而債事乃與同覆舟之罪，此鄙生之所謂難也。夫不專其權，而漫同其罪，則莫若預逃其任；然在明公，亦既不能逃矣。逃之不能，專又不得，則莫若求避其罪，然在明公，亦終不得避矣。天下之事，果遂卒無所爲歟？夫惟身任天下之禍，然後能操天下之權。操天下之權，然後能濟天下之患。當其權之未得也，其致之甚難，而其歸之也，則操之甚易。萬斛之舵，平時從而爭操之者，以

利存焉。一旦風濤顛沛，變起不測，衆方皇惑震喪，救死不遑，而誰復與爭操乎？於是起而專之，衆將恃以無恐，而事因以濟。苟亦從而委靡焉，固淪胥以溺矣。故曰「其歸之也，則操之甚易」者，此也。

古之君子，洞物情之向背而握其機，察陰陽之消長以乘其運，是以動必有成而吉無不利。伊且之於商周，是矣。其在漢唐，蓋亦庶幾乎此者。雖其學術有所不逮，然亦足以定國本而安社稷，則亦斷非後世偷生苟免者之所能也。夫權者，天下之大利大害也，小人竊之以成其惡，君子用之以濟其善，固君子之不可一日去，小人之不可一日有者也。欲濟天下之難，而不操之以權，是猶倒持太阿而授人以柄，希不割矣。故君子之致權也有道，本之至誠以立其德，植之善類以多其輔，示之以無不容之量以安其情，擴之以無所競之心以平其氣，昭之以不可奪之節以端其向，神之以不可測之機以攝其奸，形之以必可賴之智以收其望，坦然爲之以下上之，退然爲之後以先之，是以功蓋天下而莫之嫉，善利萬物而莫與爭。此皆明公之能事，素所蓄而有者，惟在倉卒之際，身任天下之禍，決起而操之耳。夫身任天下之禍，豈君子之得已哉？既當其任，知天下之禍將終不能免也，則身任之而已，身任之，而後可以免於天下之禍。小人不知禍之不可以倖免，而百詭以求脫，遂致釀成大禍，而已亦卒不能免。故任禍者，惟忠誠憂國之君子能之，而小人不能也。某受知門下，不能效一得之愚以爲報，獻其芹曝，惟鑒其忱悃而憫其所不逮，幸甚。

守仁未講學時先與同輩學作詩文，故講學之後，其往來論學書及奏疏，皆紆徐委備，如曉事人語，洞徹中邊。雖識見之高，學力之到，然其得力，未始不在少年時一番簡練揣摩也。（寄楊遂菴閣老書）

集中題下注癸未，按年譜，爲嘉靖二年，守仁五十二歲作。條達疏暢，如水到渠成，自然洞瀾，所謂「文章老更成」也。而其早年之作，亦有摹擬爲古，未臻於渾化者。如《黃樓夜濤賦》、《文尾署弘治甲子，爲弘治十七年，時守仁三十三歲。而《卧馬塚記》、《賓陽堂記》、《重修月潭寺建公館記》、《玩易窩記》諸篇，題下注戊辰，則正德三年，守仁三十七歲。是時學道未成，而刻意爲文，吐詞命意，力求適古，想與何李爲聲氣之求耶？然氣疏以達，不如夢陽之矜重，而亦無其僻澀聱牙之病。簡鍊醇雅，波瀾氣焰未極，倣奇偉麗之觀，而春容爾雅，無艱難勞苦之態，條達疏暢，故天性也。至《濬河記》題下注乙酉，爲嘉靖四年，守仁五十四歲時作，亦簡鍊以爲古者。然抑遏蔽掩，斂氣爲勁，亦與夢陽之叫囂恣肆者不同，然故集中之別出機杼者矣。余故特表而出之。

與何李諸子交遊接席，而文章不在聲氣之中者，曰王守仁，曰新都楊慎字用修。然慎與守仁，蹊逕亦不同。守仁春容疏快，體出宋人，於楊士奇李東陽爲近，而不同楊李之庸膚。慎則博奧奇麗，推本秦漢，與何景明李夢陽略同，而不爲何李之僻澀。蓋皆卓然有以自樹立於斯文絕續之會，而不苟徇風氣，亦不故爲違異者也。慎幼警敏，十一歲能詩，十二歲擬作《古戰場文》、《過秦論》，長老驚異。入京賦《黃葉詩》，李東陽見而嗟賞，令受業門下，而文章肆力於古，不落東陽窠臼；傳有《升菴集》八十一卷，南京龍蟠里圖書館藏有明萬曆刻本，又有乾隆六十年養拙山房重刻本。明世記誦之博，著作之富，推慎爲第一。然論說考證，往往恃其強識，不及檢核原書，而恃氣求勝，證佐不足，輒造古書以實之，因蒐考婦人弓足，遂造《漢雜事祕辛》，以爲起於後漢也。其文曰：

建和元年四月丁亥，保林殉殉以丙戌詔書下中常侍趙曰：「朕聞河洲窈窕，明辟思服。擇賢作

儻，隆代所先。故大將軍乘氏忠侯商所遺少女，有貞靜之德，流聞禁掖。其與姁並詣商第，周視動止，審悉幽隱，其毋諱匿。朕將採焉。」姁即與超以詔書趨詣商第。第內謹譟。食時，商女女瑩從中閤細步到寢。姁與超如詔書周視動止，俱合法相。超留外舍，姁以詔書如瑩燕處，屏斥接待，閉中閤子。

時日晷薄辰，穿照蜃窗，光送著瑩面上，如朝霞和雪，豔射不能正視，目波澄鮮，眉嫵連卷，朱口皓齒，修耳懸鼻，輔屬頤頤，位置均適。姁尋脫瑩步搖，伸髻度髮，如黝髹可鑑，圍手八盤，墜地加半。握已，乞緩私小結束。瑩面發頰抵攔。姁告瑩曰：「官家重禮，借見朽落，緩此結束，當加鞠翟耳。」瑩泣數行下，閉目轉面內向。姁爲手緩，捧著日光，芳氣噴襲，肌理膩潔，拊不留手。規前方後，築脂刻玉。胸乳菽發，臍容半寸許珠。私處墳起，爲展兩股，陰溝渥丹，火齊欲吐；「此守禮謹嚴處女也。」約略瑩體，血足榮膚，膚足飾肉，肉足冒骨。長短合度，自顙至底，長七尺一寸，肩廣一尺六寸，臀視肩廣減三寸，自肩至指，長各二尺七寸，指去掌四寸，肖十竹萌削也；髀至足長三尺二寸，足長八寸，蹠跗豐妍，底平指斂，約縑迫袜，收束微如禁中。久之，不得音響。姁令催謝「皇帝萬年」。瑩乃徐拜，稱「皇帝萬年」，若微風振簫，幽鳴可聽。不痔不瘍，無黑子創陷及口鼻腋私足諸過。「臣妾姁女賤愚慙，言不宣心，書不符合，謹祕緘，昧死以聞。」時夜漏三下，太后猶御壽安殿，發絨歡喜，顧語帝曰：「吾入宮後知有幼妹，然中外隔闕，目所未見，不謂爭達如爾。」明日詔下有司議禮。有司奏曰：「謹按《春秋》，迎王后於紀，在途則稱后。故大將軍乘氏忠侯商女，今大將軍參錄尚書事乘氏侯冀女弟，膺紹聖善，舊協潛邸。結婚之際，有命既集。宜備禮章，時進微幣，

請下三公太常按禮儀。奏可，一準孝惠皇帝納后故事。」

楊慎序稱《漢雜事》一卷，得於安寧州土知州董氏；卷首有「祕辛」二字不可解，要是卷帙甲乙名目。然《御覽》諸書，亦有《漢雜事》，而略不及此；按之《後漢書》，事實乖刺不相應，卽慎所僞作也。特以多見古書，含英咀華，事儘淫豔，文極樸古，不見鄙穢，吐屬馨逸，賢於何李諸家窒塞艱澀、不可句讀者遠已！

第八節 王世貞附李攀龍 宗臣附吳國倫

明代文章，自前後七子而大變。前七子以李夢陽爲冠；何景明附翼之。後七子以歷城李攀龍字于麟者爲倡；太倉王世貞字元美者應和之。後攀龍先逝，而世貞名位日昌，聲氣日廣，著述日富，壇坫遂躋攀龍上。然尊李夢陽，排李東陽，重振前七子之旗鼓者，攀龍實先登之梟也。其持論謂：「文自西京，詩自天寶而下，俱無足觀。」於本朝獨推李夢陽。而世貞與謝榛、宗臣、梁有譽、徐中行、吳國倫翕然和之，非是則詆爲宋學。諸人多少年，才高氣銳，視當世無人，互相標榜，號七才子。攀龍才思勁鷲，名最高，獨心重世貞；天下亦并稱王李，又與何景明李夢陽並稱何、李、王、李。第世貞聲華意氣駕出何景明。而攀龍才思識力遠遜李夢陽。何者？才不如夢陽之大，斯氣不能以自運；學不如夢陽之深，故句不能以自造；而割剝秦漢，生砌硬填，徒見詰屈其詞，塗飾其字。傳有《滄溟集》三十卷，附錄一卷（南京龍蟠里圖書館藏有明隆慶刻本，又有清道光重刻本）。其中文十六卷，聲牙棘口，讀者至不能終篇。而世貞則亟稱之曰：「李于鱗如商彝周鼎，海外環寶，身非三代人與波斯胡，可重不可議。」然其辭愈古，其

章彌碎。其氣愈矜，其意彌隱。世貞始與攀龍狎主文盟，攀龍歿，獨操柄二十年，才最大，地望最顯，令聞廣譽，籠蓋海內。其持論「文必西漢，詩必盛唐，大曆以後書勿讀」，一本攀龍。而讀其文，奇桀自喜，出之沛然，記事文尤蔚跂，反復低昂，不似《滄溟集》兀臬也！《嘉靖以來首輔傳》詞氣鏗甸，髣髴《史》、《漢》，使人精神振發，第字句剽襲，往往不能帖妥，斯則攀龍之同調，而何李之嗣響也已。傳有《弇州山人四部稟》一百七十四卷，《續稿》二百七卷（南京龍蟠里圖書館藏有明世經堂刻本），又有《弇山堂別集》一百卷（廣州局刻本）。自來文集之富，未有過於世貞者。錄《華孟達集序》曰：

無錫有華孟達者，一日而以書數百言自通，且贄其詩若文三卷，曰：「今天下稱龍門者必以子。夫龍門者，其左右夾上造霄漢，西來之流，徑萬里而下，束三級，齒石成霜雪，噫聲成霆霹。倍尋之鯉一過之，則神靈起於鬚鬣間；上帝饗之，爵爲應龍。乃不佞之鯉則異是。子幸而汰之乎？吾將去而攻吾疾。其又幸而姑誌之乎？吾將去而益煉吾質以俟乎他日。」

余既異其言，爲之稍讀其書，而中有與共宗人往復者，亦類是云。宗人而好慕爲古文辭，則從史爲古文辭，其欲梓行之，則勿敢也，曰：「吾且折衷於衡藝者。遠而左、馬、莊、屈、建安、杜、李，吾師之。近而北地、濟南，吾儀之。然無若王子之當吾世也，吾其從折衷矣。」余益異之，乃爲竟其詩若文。詩體出入中古，躡長慶而躡永嘉，清楚冲夷，有悠然自賞之味。文筆尤峻潔，裁之，則駟、邕之小言也；暢之，則昌黎、河東之順軌也；乃尺牘蕭蕭乎人意表矣。夫此孟達境也，孟達之爲識，逾是境而三舍矣，毋乃猶有待者才也。其才能及境矣，毋乃猶有待者學也。夫學者，充才者也。才者，趣識者也。吾姑誌之，而孟達姑聽之。雖然，孟達以吾言而信可也，是亦且梓而行矣。其所以

行者何也？對授人以彈射也。

昔者文信侯爲《呂覽》，布之咸陽市，而榜其上曰：「有能增損一字者，予千金。」而人莫敢增損也。其識者竊笑之矣。異代子雲聞而詫曰：「惜不以我往，將席卷其金以歸。」則又笑之。其所以笑者何也？爲文信侯之挾詐，而子雲之見事晚也。今孟達居貧賤，而名未即就，不足以膏人之耳目而易其真。天下而信之，則真信也。其猶有彈射者，皆孟達之不朽地也，是何世之爲孟達龍門者衆也？孟達亟稱有郁人文者，其鯉耶？其龍門耶？請質之而不以非，則置弁焉。

是世貞之學秦漢而臻於渾化者，節節頓挫，不矜奇辭奧句，而字字若履危崖而下，落紙乃遲重絕倫，得古人道峻之致，而不襲奧僻之詞，學秦漢者當以此爲法。而《明史》以「藻飾太甚」爲世貞病，此或論其詩耳。若就文論文，則摹秦仿漢之中，自有灑氣行乎其間，抑揚爽朗；如《書應生事》一篇，遙逸橫生，於詰屈之中，發揮奇趣；何可以摹擬二字一筆抹殺耶？所以世貞之與攀龍，摹擬秦漢同；而所爲摹擬則異。攀龍祇剽其字句，世貞時得其胎息。然七子之學，得於詩者較深，得於文者頗淺；故其詩多自成家，而古文則鉤章棘句，剽襲秦漢之面貌者，比比皆是，故不獨一攀龍。若乃跌宕俊逸，不徒以鉤章棘句爲能事者，七子中，惟世貞。

其次則興化宗臣字子相，傳有《宗子相集》十五卷（南京龍蟠里圖書館藏有明嘉靖刻本），文筆疎爽，無剽剗填砌之習。錄《報劉一丈書》曰：

數千里外，得長者時賜一書以慰長想，即亦甚幸矣，何至更辱餽遺，則不才益將何以報焉？書中情意甚殷，即長者之不忘老父，知老父之念長者深也。至以「上下相孚，才德稱位」語不才，則不

才有深感焉。夫才德不稱，固自知之矣。至於不孚之病，則尤不才爲甚。

且今之所謂「孚」者何哉？日夕策馬，候權者之門，門者故不入，則甘言媚詞，作婦人狀，袖金以私之。即門者持刺入，而主人又不即出見，立廡中僕馬之間，惡氣襲衣袖，即飢寒毒熱不可忍，不去也。抵暮，則前所受贈金者，出報客曰：「相公倦，謝客矣。客請明日來。」即明日又不敢不來，夜披衣坐，聞雞鳴，即起盥櫛，走馬抵門。門者怒曰：「爲誰？」則曰：「昨日之客來。」則又怒曰：「何客之勤也，豈有相公此時出見客乎？」客心恥之，強忍而與言曰：「亡奈何矣，姑容我入。」門者又得所贈金，則起而入之。又立向所立廡中。幸主者出，南面召見，則驚走匍匐階下。主者曰「進！」則再拜，故遲不起，起則上所上壽金。主者故不受，則固請；主者故固不受，則又固請，然後命吏納之，則又再拜。又固遲不起，起則五六揖始出。出揖門者曰：「官人幸顧我，他日來，幸無阻我也。」門者答揖。大喜奔出，馬上遇所交識，即揚鞭語曰：「適自相公家來，相公厚我厚我！」且虛言狀。即所交識，亦心畏相公厚之矣。相公又稍稍語人曰：「某也賢，某也賢。」聞者亦心計交贊之。此世所謂「上下相孚」也。長者謂僕能之乎！

前所謂權門者，自歲時伏臘一刺之外，即經年不往也。間道經其門，則亦掩耳閉目，躍馬疾走過之，若有所追逐者。斯則僕之褊衷，以此長不見悅於長吏。僕則愈益不顧也。每大言曰：「人生有命，吾惟守分而已！」長者聞之，得無厭其爲迂乎？鄉園多故，不能不動客子之愁。至於長者之抱才而困，則又令我愴然有感。天之與先生者甚厚，無論長者不欲輕棄之，即天意亦不欲長者之輕棄之也。幸寧心哉！

淋漓噴薄，無復摹秦仿漢之習，而感慨中出恢詭，乃極似太史公《游俠列傳敘》、《楊惲報孫會宗書》。至其《西門》、《西征》、《二曾夜談》諸記，則摹擬之迹未化，而氣體便形窘拘，然紆徐委備，雅健有度，絕無叫囂矜張之態，斯則攀龍之所不如者已。

臨清謝榛，字茂秦，傳有《四溟集》十卷（明俞憲編《盛明百家詩》中有之），詩獨有名。長興徐中行，字子興，傳有《天目山堂集》二十卷，附錄一卷（南京龍蟠里圖書館藏有明萬曆刊本）。興國吳國倫，字明卿，於七子中最老壽，後死，好客輕財，聲名藉甚。求名之士，不東走太倉，則西走與國。世貞歿，國倫猶無恙，傳有《甌鵲洞稟》五十四卷，續稟二十七卷，亦夥頤沈沈者也。

第九節 王慎中 茅坤 唐順之 歸有光

何、李、王、李後先炫耀，方以鉤棘塗飾相高。而有人焉，獨以歐曾相撐拄，章妥句適，雍容和雅，卓然以名家者，曰晉江王慎中字道思。慎中爲文，初主秦漢，襲何李之論，謂東京下無可取，已悟歐曾作文之法，乃盡焚舊作，一意師倣，尤得力於曾鞏。唐順之初不服，久亦變而從之。天下稱之曰王唐。家居問業者踵至。李攀龍王世貞後起，力排之，卒不能掩，亦猶何景明李夢陽之於李東陽，能掩而勝之，終不能擠而廢之也。而攀龍亦慎中提學山東時所取士。慎中傳有《遵巖集》二十五卷。有李東陽之演迤詳贍，而無其庸音膚詞。得曾鞏之醇厚典碩，而饒有悠情逸韻。錄《送程龍峯郡博致仕序》曰：

嘉靖二十二年，制當黜陟天下百司，庶職罷罷者凡若干人。而吾泉州儒學教授程君龍峯名在，有疾之籍，當致其事以去。程君在學，方修廢起墜，蒐遺網失，以興學成材爲任。早作晏休，不少

情怠。耳聰目明，智長力給，非獨精爽有餘，意氣未衰，至於耳目之所營注，手足之所蹈持，該涉器數而周旋儀等，纖煩勞瘁，莫不究殫勝舉。不知司枋者奚所考而名其爲疾也。黜陟之典，將論賢不肖以馭廢置。人之有疾與否，則有命焉，賢不肖之論非可倚此以爲斷也；況於名其爲疾者，乃非疾乎？人之賢不肖藏於心術，效於治行，其隱微難見而形似易惑，故其論常至於失實，非若有疾與否可以形決而體定也。今所謂疾者，其失若此，則於賢不肖之論，又可知矣。此余所以深有感也。

又有異焉，古者憲老而不乞言。師也者，所事也，非事人也，所謂「以道得民」者是也。責其筋力之強束，課其骸骨之武健，是所以待猥局冗司之末也。古之事師也，其飲食，於飯患其噎，於載患其哽，而祝之也；其居處，於坐則有几，於行則有杖，皆所以事師而修其輔贏掇疴之具。未聞以疾而罷之也。古之道，其不可行於今乎！程君之僚與其所教諸生皆恨程君之去，謂其非疾也。余故論今之失而及古之誼，使知程君雖誠有疾，亦不可使去也。君去矣，斂其所學以教鄉之子弟。徜徉山水之間，步履輕翔，放飯決肉，饗饌自喜。儻有訝而問者，「君胡無疾」也？聊應之曰：「昔者疾而今愈矣，不亦可乎！」

優游緩衍而不矜張作態，繁簡廉肉不失法，人後餘韻悠然，戲笑甚於怒罵，是悟歐曾作文之法者也。以視七子之氣嘶響囂，作如許張致者，真覺春容大雅矣。

歸安茅坤，字順甫，少喜爲文，每謂當跌宕激射似太史公。嘗夢共太史公抽書石室，面爲指畫，唐以後若薄不足爲者。及從唐順之遊。順之乃疾折之曰：「唐之韓，猶漢之馬遷；宋之歐、曾、二蘇，猶唐之韓子。不得致其至，而何輕議爲也！」久而從其說，則以爲：「唐韓愈、柳宗元、宋歐陽修、曾鞏、蘇氏

兄弟之於漢馬遷，大略琴瑟祝嘏，調各不同，而其得萬物之情以肆於心，則一也。近代以來，學士大夫之操觚爲文章，無慮數十百家，其以雲吻露噙，虎嘯驚攫之材，揚聲藝林者，亦星見踵出。然於僕所謂萬物之情，或在置而未及也。嗟乎！隋唐之文，其患在靡而弱；而退之出而振之，固已難矣。迺若近代之文，其患在勦而賡；有志者苟欲出而振之，而其爲力也，不尤戛戛乎其難矣哉？「顧所蘄嚮在太史公，其次韓愈。而謂：『昌黎之奇，於碑誌尤爲峻削。予竊疑其於太史公之旨，或屬一間，以其盛氣招挾，幅尺峻而韻折少也。太史公所爲《史記》百三十篇，除世所傳褚先生別補十一篇外，其他帝王世系或多舛訛，制度沿革或多遺佚，忠賢本末或多放失，而要之指次古今，出入風騷。譬之韓白提兵而戰河山之間，當其壁壘部曲，旌旗鉦鼓，左提右挈，中權後勁，起伏變化，若一夫劍舞於曲旃之上，而無不如意者。西京以來，千年絕調也。班固《漢書》嚴密過之，而所當疎宕邁逸，令人讀之，杳然神遊於雲幢羽衣之間，所可望而不可挹者，予竊疑班掾猶不能登其堂而洞其竅也，而況其下者乎！唐以來，獨韓昌黎爲文，極力鑱畫，不可不謂之同工也。問按《順宗皇帝實錄》與《秦始皇本紀》，讀之復不相及，抑可概見其微矣。」而明以來，學者知由韓歐沿洄以溯太史公，而定清三百年文章之局者，坤實有開山之功也。王慎中優游經術，得歐陽修曾鞏之法。而坤則疏宕邁逸，有蘇軾王安石之態，傳有《白華樓藏稟》十一卷，《續稟》十五卷，《吟稟》八卷，《玉芝山房稟》二十二卷，《耄年錄》七卷。錄《與查近川太常書》曰：

林卧既久，遂成懶癖。春來讀歲書，始知浮生已四十九。因憶解印綬五六年，別兄京兆來，則又八九年。僕束髮來所深交如兄者能幾？荏苒離愁，倏若羽馳如此。問抽鏡對之，髮雖未莖白，漸索矣；顏亦漸黝且搞矣。嚮之所欲附兄輩馳驅四方，數按古名賢傳記所載當世功業，輒自謂未

必不相及，氣何盛也，而今何如哉！頃者侯董甥之使自京邑還，得兄與施驗封書，大略並嗟僕日月之如流，林壑之久滯，謂一切書問，不當與中朝之士遂絕，非肉骨心腎之愛，何以及此。甚且一二知己，或如漢之人所以嘲子雲者，面嘆僕曰：「某，今之賢者也。彼方位肘腋，中外之士所藉以引擢者若流水；若獨流滯中林者，殆以世皆尚黑，而子獨白耳。」僕笑而不應。而使自兄所來，辱兄口諭之，亦且云云。嗟乎！兄愛矣，而未之深思也。

僕嘗讀韓退之所誌《柳子厚墓銘》，痛子厚一斤不復，以其中朝之士，無援之者。今之人或以是罪子厚，氣岸過峻，故人不爲援。以予思之，他鉅人名卿，以子厚不能爲脂韋滑澤，遂疎而置之，理固然耳；獨怪退之於子厚，以文章相頡頏於時，其相知之誼不爲不深，觀其於敍子厚以柳易播，其於友朋間，若欲爲歎歔而流涕者。退之由考功晉列卿，抑嘗光顯於朝矣。當是時，退之稍肯出氣力謁公卿間，如《三上宰相書》十之一二焉，子厚未必窮且死於粵也。退之不能援之於綰帶而交之時，而顧弔之於墓草且宿之後，抑過矣。然而子厚以彼之才且美，使如今之市人攫十金之利者，鳧嗟蒲伏以自媚於當世，雖無深交如退之，文章之知如退之，當亦未必終擯且零落以至於此。而今卒若爾者，寸有所獨長，尺有所獨短。子厚寧飲瘴於鉅錡之潭，而不能遣一使於執政者之側；寧以文章與椎髻卉服之夷相牛馬，而不能奴請於二三故知如退之輩者；彼亦中有所自將故也。後之人寧能盡笑而非之耶？吾故於退之所誌子厚墓，未嘗不欲移其所以弔子厚者而唁且詰乎退之也。然子厚在當時，其所同劉夢得附王叔文輩，蓋已陷於世之公議然耳。

後有士，其文章之盛，雖或不逮，而平生所從吏州郡及佩印千里之間，文武將吏，未嘗不憐其

能而悲其罷官之無從者。假令有當世之交如退之，官不特考功，顯不特列賜；其他所引擢天下之士踵相接也。其獨嗔子厚所不能，而爲之耳無聞、目無見乎？抑亦憐其文章不遽在子厚下，故所並聲而馳者，其官業所奮猶炯然其在世之耳目，或不當終擯而萎翳之也，將矜其過，引其不能，而移其所引擢他人者而爲之力乎？噫！僕至此，亦可投筆而自嘲矣，又何必人之嘲我爲也？適遣使護少弟某謁選京邑，當過兄所問起居，且思有以復兄之口諭云云也。不覺嘔吐至此。幸兄共一二知己，度僕生平之交，其文章之深，氣力之厚，有如子厚之於退之者乎？脫或過焉，幸以其勿獨嘆子厚而少爲之異言而請也。退之苟有知，未必不自悔恨於九原也已。何如何如？

坤爲古文，刻意學司馬遷韓愈而不能，乃似蘇王。最心折唐順之。順之喜唐宋諸大家文，所著《文編》，唐宋人自韓、柳、歐、三蘇、曾、王八家外，無所取。故坤選《八大家文鈔》以與《史記鈔》相表裏，《文鈔》行而《文編》廢。鄉里小生無不知茅鹿門（坤別號），以《八大家文鈔》也。而唐宋八大家之目自此始。

武進唐順之，字應德，學問淵博，自天文地理樂律兵法以至句股壬奇之術，無不精研。其文章法度，具見《文編》一書，所錄上自秦漢以來，而大抵從唐宋門庭沿溯以入，分體排纂，蓋清姚鼐《古文辭類纂》之所昉，而闢清代三百年文學之逕塗者也。雖義例不免踏駁，進退亦多失據，不及姚氏纂之矜慎，然葦路之功，不可沒也。嘗謂漢以前之文，未嘗無法而未嘗有法，法寓於無法之中，故其爲法也密而不可窺。唐與宋之文，不能無法，而能毫釐不失乎法，以有法爲法，故其爲法也嚴而不可犯。其言皆妙解文理。而所自爲文章，則渾茫演迤，庶幾滅盡針綫迹，以躋於無法，而洮汰鍛鍊之功，或有未暇。蓋其中年自詭講學，而又不能忘情用世，又其學博而雜，自以爲從業者不啻其裁也。傳有《荊川集》十八

卷（清康熙間唐氏刻本。光緒間武進盛氏《常州先哲叢書》重刻康熙本。又《四部叢刊》影印明萬曆刻本十七卷，外集三卷。又江寧局本十二卷）。集中書牘最多，大半庸言心性，多涉禪宗，而喜爲語錄鄙俚之言，殊爲不取。惟《答曾石塘總制第二書》，感慨振發，學韓愈與鄂州柳中丞書，遜其雄邁，而言外見諷，意思深長，則故過之。其他序記諸作，則多簡雅清深，不失大家矩矱。而傳誌表墓之文，最爲可觀。其尤著名者，《敘沈希儀廣右戰功》一篇，至八千二百言，古今推爲奇作。其中敘次歷歷如繪，備極聲色，《明史·沈希儀傳》采之，焯有生氣。然自捕韋扶諫以下，稍嫌支蔓。所記誘縛岑金事，雖曲折盡情，而亦拉雜有小說氣。且此兩事皆不得謂之「戰功」，若改其題爲「書事」，則無病矣。其它敘事謹嚴，確有史裁；而於故舊之際，情韻不匱，抑揚往復，上接歐陽修，下開歸有光，在有明中葉，屹然爲一大宗。錄《陽谷吳公傳》曰：

公名傑，字士奇，武進人也。其爲醫始公之高祖肇。父寧，贈太醫院判。公之學，自青烏氏書、風角、雲氣、占經、李虛中子平之術、金丹內外秘訣，無所不通，醫特其一技耳。然竟以醫至大官。其於醫，精究古方書而善脈。其治病，不純主古方書，而一切以脈消息之，有初若與證相反，而卒無不效者，其餘奇疾尤效也。弘治間，以明醫徵至京師，遂以醫遊諸公卿間。公醫既精，而儀觀磊落，闊達善談說，穎然見鋒鐸。於是諸公卿爭迎致爲上客。京師諸老醫與公同時所徵諸郡國醫，莫不望風下之。是時都御史王鉞鎮大同，奏乞吳某調治邊軍。未及行，御史顏頤壽、給事中李良度皆奏言：「吳某宜在供奉，不宜棄之邊地。」下禮部。禮部尚書集所徵郡國醫，試之，卒無踰公者。故事，高等入御藥房，中等入院，最下遣還郡，而當遣者若干人。公爲之請曰：「國家三四十

年，纔一徵醫耳。若等幸被徵，又待次都下十餘年，而又遣還，誠流落可憫。願不入御藥房，而與若等同入院。」尚書義而許之。

正德幾年，掌院事李宗周竟薦公入御藥房，而同薦者凡八人。有與宗周同官爭權者，因左右讒之上曰：「宗周所薦多私人，且通賄，實不能醫。」上曰：「吾當自試之。」時上病喉痹，遂按名召公，一藥而愈。上喜甚，數曰：「有醫若此，乃不以醫朕耶！」因厚賜公，詰責讒者，而謂宗周爲忠。公自是得幸於上。每病，未嘗不屬公，公治之，未嘗不立愈。一日，上獵射還，憊甚，感血疾，公進犀角湯愈，命進一官，賜彪虎衣一。上嘗幸虎園，虎騰而驚，公療之愈，命進一官，賜銀五十兩，表裏一。頃之，試馬，御馬監腹卒痛，公進理中湯立愈，賜繡春刀一，銀三十兩。自是上所游幸，公必從。嘗侍上卧，至以肩荷上，或摩撫玉體，有不以屬左右近幸而以屬公。其分御膳啖公，有左右近幸所不能得，而公得之。自醫士十日而遷御醫，自御醫三月而遷院判。凡一愈病，則一遷，爲院判當遷者數矣。公固讓，三年而遷院使。上親寵益篤，嘗欲以禁衛銜公，賜蟒衣。公謝曰：「臣以藥囊侍陛下，此非臣職也。」上乃止。

某年上南巡。公以醫諫，且泣曰：「聖體尚未安，不宜遽行。」上怒曰：「汝醫官也，敢乎！」叱左右掖出。公留京師。駕行至淮，漁於清江浦，遂病。還臨清，夢見公，急遣校尉召公。公馳至臨清，見上。上泣曰：「而不憶我耶？」公亦泣。遂扈從還通州。時權彬握兵在左右，見上病，一旦不諱，懼誅，欲據窟穴爲亂，力請復幸宣府。公脈已驚甚，言諸大奄曰：「疾亟矣，幸可及還內耳！」脫至宣府不諱，吾與若輩即死，寧有葬地乎！」奄以爲然，乘間百方說上。上意動。而彬亦數從公視

問：「上病何如？」卽詭言曰：「且愈矣！勿憂也！」已而駕還京師崩。彬坐誅。毅皇崩之幾月，而公亦致仕去矣。既致仕，留居京師，遣其二子徧從翰林諸名公游。壬辰，子希孟舉進士，以才廉掙給事中，於是以恩進公階朝列大夫。甲午，子希魯舉於鄉。

自某年，公還武進，稍葺室廬，治田園爲終焉之計。公既老，居鄉，不復爲人治病。而親戚故人有奇症，或病危甚，衆醫所不治者，乃以請公。公亦間往，往則應手愈。居閒誦老莊氏書，益究金丹內外祕訣，以冀所謂長生者。其自號陽谷，谷者，谷神也。或曰「陽谷，海東仙人所廬。」歲時與里中故人雅歌彈碁飲酒爲樂，酒酣，數語及毅皇時事，出所賜衣物，未嘗不泫然流涕也。久之，希孟爲廣信知府，懇乞致仕歸養。歸數月而公卒。公每自詫得丹訣，指其小腹，謂人曰：「此中有物矣。」先卒之一日，余往候公。公紫色瑩然如平生。希孟曰：「唐翰林在。」公點頭。卒時，神氣不亂，整衣端坐，口云「好好」，遂卒。年七十有八。嗟乎，公信多奇矣哉！希孟居鄉有志嚮，師事徐養齋先生而友余。余是以得備聞公之行事爲傳，而敘公在毅皇時事獨詳焉，以見公之遭遇，以俟國史傳方技者有考云。

順之爲文之以唐宋爲法，實自王慎中發之。然慎中按部就班，蘄乎毫釐不失法，而順之則欲以法寓於無法之中，雖文章時有利鈍，而一洗比擬間架，描頭畫角之習。顧不語人以求工文字。每謂：「兩漢而下，文之不如古者，豈其所謂繩墨轉折之精之不盡如哉？本色不如也。秦漢以前，儒家者有儒家本色，至如老莊家有老莊本色，縱橫家有縱橫家本色，名家、墨家、陰陽家皆有本色。雖其爲術也駁，而莫不皆有一段千古不可磨滅之見。是以老家必不肯勦儒家之說，縱橫必不肯借墨家之談，各自其本色而鳴，

之爲言，其所言者，其本色也，是以精光注焉，而其言遂不泯於世。唐宋而下，文人莫不語性命，談治道，滿紙炫然，一切自託於儒家。然非其涵養畜聚之素，非真有一段千古不可磨滅之見，而影響勦說，蓋頭竊尾，如貧人借富人之衣，莊農作大賈之飾，極力裝做，醜態盡露，是以精光杼焉，而其言遂不久湮廢。然則秦漢而上，雖其老、墨、名、法、雜家之說而猶傳，今諸子之書是也。唐宋而下，雖其一切語性命、談治道之說，而亦不傳，歐陽永叔所見唐《四庫書目》百不存一焉者是也。僕居閒偶想起宇宙間有一二事，人人見慣而絕是可笑者，其屠沽細人有一碗飯吃，其死後則必有一篇墓誌。其達官貴人與中科第人稍有名目在世間者，其死後則必有一部詩文刻集，如生而飯食、死而棺槨之不可缺。此事非特三代以上所無，雖秦漢以前亦絕無此事。幸而所謂墓誌與詩文集者，皆不久泯滅，然其往者滅矣，而在者尚滿屋也。若皆存在世間，即使以大地爲架子，亦安頓不下矣。此等文字，儻家藏人畜者，盡舉祖龍手段作用一番，則南山煤炭竹木盡減價矣。可笑可笑！聞者慨然。蓋精神意量，有在筆墨蹊逕之外者矣。

王世貞紹述李攀龍之說，以秦漢之文倡率天下。而唐順之則從唐宋門庭沿洄以溯秦漢。晚乃殫絕文字，無意與世貞拄撐。崑山歸有光字熙甫稍後起，而名位不顯，獨抱唐宋諸家遺集，與二三弟子講授於荒江老屋之間，毅然出其言論以與世貞相駁難，至詆之爲「荒唐巨子」。世貞大憾。迨於晚年，乃始心折，題有光遺集，贊曰：「風行水上，渙爲文章。風定波息，如水相忘。千載有公，繼韓歐陽。」雖以世貞之高名盛氣，而有光拔軼易軼以屹自樹立，開清桐城之文，而妙出以紆徐。其文由歐陽修以幾太史公，雖無雄直之氣，驅邁之勢，而獨得史公之神韻。傳有《震川文集》三十卷，別集十卷（清康熙間歸

莊刻本，《四部叢刊》影印歸莊刻本，光緒間歸氏重刻本。發於親舊及人微而語無忌者，蓋多近古之文，至事關天屬，其尤善者，不事修飾，而情辭并得，使覽者惻然有隱，其氣韻蓋得之史公。而或者亦譏之曰：「彼其所爲抑揚吞吐，情韻不置者，苟裁之以義，或皆可以不陳。浮芥舟以縱送於蹶潏之水，不復憶天下有曰海濤者也。」特於不要緊之題，說不要緊之話，卻自風神疏淡，是於太史公深有會處。蓋有光以前，上而名公碩卿，下而美人名士之奇聞雋語，剴心怵目，乃以廁文人學士之筆。至有光出，而專致力於家常瑣屑之描寫。其尤惻惻動人者，如《先妣事略》、《歸府君墓誌銘》、《周弦齋壽序》、《寒花葬志》、《項脊軒記》諸文，焯亡念存，極摯之情，而寫以極淡之筆，覩物懷人，此意境人人所有，此筆妙人人所無，而所以成其爲震川之文，開韓、柳、歐、蘇未闢之境者也。錄《項脊軒記》曰：

項脊軒，舊南閤子也。室僅方丈，可容一人居。百年老屋，塵泥滲漉，雨澤下注，每移案顧視，無可置者。又北向，不能得日，日過午已昏。余稍爲修葺，使不上漏。前闔四窗，垣牆周庭，以當南日，日影反照，室始洞然。又雜植蘭桂竹木於庭，舊時欄楯，亦遂增勝。借書滿架，偃仰嘯歌，冥然兀坐，萬籟有聲，而庭階寂寂，小鳥時來啄食，人至不去。三五之夜，明月半牆，桂影斑駁，風移影動，珊珊可愛。然余居於此，多可喜，亦多可悲。

先是庭中通南北爲一，迨諸父異爨，內外多置小門，牆往往而是。東犬西吠，客踰庖而宴。雞棲於廳。庭中始爲籬，已爲牆，凡再變矣。家有老嫗，嘗居於此。嫗，先大母婢也，乳二世。先妣撫之甚厚。室西連於中閤。先妣嘗一至，嫗每謂余曰：「某所，而母立於茲。」嫗又曰：「汝姊在吾懷，呱呱而泣，娘以指扣門扉曰：『兒寒乎？欲食乎？』吾從板外相爲應答。」語未畢，余泣，嫗亦泣。余

自束髮讀書軒中。一日，大母過余曰：「吾兒，久不見若影，何竟日默默在此，大類女郎也？」比去，以手闔門，自語曰：「吾家讀書久不效，兒之成則可待乎？」頃之，持一象笏至，曰：「此吾祖太常公，宣德間執此以朝。他日，汝當用之。」瞻顧遺迹，如在昨日，令人長號不自禁。軒東故嘗爲廚，人往，從軒前過。余扃牖而居，久之，能以足音辨人。軒凡四遭火，得不焚，殆有神護者。

項脊生曰：「蜀清守丹穴，利甲天下，其後秦皇帝築女懷清臺。劉玄德與曹操爭天下，諸葛孔明起隆中。方二人之昧昧於一隅也，世何足以知之？余區區處敗屋中，方揚眉瞬目，謂有奇景，人知之者，其謂與陷井之蛙何異？」

余既爲此志，後五年，吾妻來歸，時至軒中，從吾問古事，或憑几學書。吾妻歸寧，述諸小妹語曰：「聞姊家有閣子，且何謂閣子也？」其後六年，吾妻死，室壞不修。其後二年，余久卧病無聊，乃使人復葺南閣子，其制稍異於前。然自後，余多在外，不常居。庭有枇杷樹，吾妻死之年所手植也，今已亭亭如蓋矣。

楊士奇與有光同一學歐陽修。然士奇寬衍而傷於膚，辭繁情隱。有光優游而歸之潔，言簡旨永。蓋一如香蕉之熟而過爛，而一則諫果之味回於甘，有寥寥短章而逼真《史記》者，乃其最高淡處。如《項脊軒後記》，所以寄其悼亡之思，著墨不多，蕭然高寄，而有絃外之音。又如《寒花葬志》曰：

婢，魏孺人媵也。嘉靖丁酉五月四日死，葬虛邱，事我而不卒，命也夫！婢初媵時，年十歲，垂雙鬟，曳深綠布裳。一日，天寒，燕火煮勑薺熟，婢削之盈甌。余入自外，取食之。婢持去不與。魏孺人笑之。孺人每令婢倚几旁飯。卽飯，目眶冉冉動，孺人又指余以爲笑。回思是時，奄忽便已

十年。吁，可悲也已。

皆所謂「於不要緊之題，說不要緊之話，卻自風神疏淡者也。然有光之文，高者在神境，而稍病虛，聲幾欲下，亦有近俚而傷於繁者。特自何李崇茁軋之習，號爲力追周秦，王李重揚其波，天下從風靡。而有光一切刮磨，不事塗飾，而選言有序，不刻畫而足以昭物情，與古作者合符，而後來者取則焉，可不謂之特立獨行之士乎哉！

第十節 袁宏道附徐渭袁宗道 鍾惺 譚元春

方何、李、王、李之極盛，茅坤唐順之以疏快救板重，王慎中歸有光以潔適變奧古，此變而得其正者也。山陰徐渭字文長，公安袁宏道字中郎以清真藥瑣琢，而不免纖窈，則江湖才子之惡調也。竟陵鍾惺字伯敬，譚元春字友夏，以幽冷裁庸縛，而仍歸澀僻，又山林充隱之賡格也。一則漫無持擇，一又過爲尖新，雖蹊逕不同，而要之好行小慧，以便空疏不學則一。此變而不得其正者也。

當嘉靖時，王李倡七子社，謝榛獨以布衣被擯。渭自以諸生不得意，憤其以軒冕壓韋布，誓不入二人黨。歿二十年，袁宏道游越中，得渭殘帙，以示祭酒陶望齡，相與激賞，刻以行世。傳有《徐文長集》三十卷，中多代總督胡宗憲之作。其文則源出蘇軾，唐順之、茅坤諸人皆相推挹，獨不得志於王李，遂不在聲氣之中。而宏道爲之傳曰：「文有卓識，氣沈而法嚴，不以模擬損才，不以議論傷格，韓曾之流亞也。文長既雅不與時調合，當時所謂騷壇主盟者，文長皆叱而奴之，故其名不出於越。悲夫。」然渭本俊才，不幸而學問未充，聲名太早，一爲權貴所知，遂任情放誕。及乎時移事易，侘傺窮愁，益放言高

論，不復問古人法度爲何物，祇見爲調靡而機利而已，何所謂氣沈而法嚴也？然故公安一派之濫觴矣。宜宏道有以亟稱之也。

宏道與兄宗道字伯修，弟中道字小修，並有才名，時稱三袁。先是王李之學盛行，遂以仿漢摹唐轉移一代之風氣，迨其末流漸成僞體，塗澤字句，鉤棘篇章，萬喙一音，陳因相厭。於是三袁乘其弊而排抵之，而宗道實倡其說。於唐好白樂天，於宋好蘇軾，名其齋曰白蘇。至宏道益矯以清新輕俊，傳有《袁中郎集》四十卷，然戲謔嘲笑，間雜俚語。錄《拙效傳》曰：

家有四鈍僕：一名冬，一名東，一名威，一名奎。

冬，即余僕也，掀鼻削面，藍睛虬鬚，色若繡鐵。嘗從余武昌，偶令過鄰生處，歸失道，往返數十迴，見他僕過者，亦不問，時年已四十餘。余偶出，見其淒涼四顧，如欲哭者，呼之，大喜過望。性嗜酒。一日，家方煮醪，冬乞得一盞，適有他役，即忘之案上，爲一婢子竊食盡，煮酒者憐之，與酒如前。冬僂僂突間，爲薪焰所著，一烘而過，鬚眉幾火。家人大笑，仍與他酒一瓶。冬甚喜，挈瓶沸湯中，俟暖即飲，偶爲湯所濺，失手墮瓶，竟不得一口，瞠目而出。嘗令開門，門樞稍緊，極力一推，身隨門闕，頭顱觸地，足過頂上。舉家大笑。今年隨至燕邸，與諸門隸嬉遊半載，問其姓名，一無所知。

東貌亦古，然稍有諛氣，少役於伯修。伯修聘繼室時，令至城市餅，家去城百里，吉期已迫，約以三日歸。日晡不至，家嚴同伯修門外望，至夕，見一荷擔從柳隄來者，東也。家嚴大喜，亟引至舍，釋擔視之，僅得蜜一甕，問「餅何在」。東曰：「昨至城，偶見蜜價賤，遂市之。餅價貴，未可市。」

也。」時約以明日納禮，竟不得行。

戚、奎皆三弟僕。戚常刈薪，跪而縛之，力過繩斷，拳及其胸，悶絕仆地，半日始甦。奎貌若野獐，年三十尚未冠，髮後攢作一紐，如大繩狀。弟與錢市帽，奎忘其紐。及歸，束髮加帽，眼鼻俱入帽中，駭歎竟日。一日，至比舍，犬逐之，即張空拳相角，如與人文藝也，竟啗其指。其痴絕皆此類。

然余家狡獪之僕，往往得過，獨四拙頗能守法。其狡獪者相繼逐去，資身無策，多不過一二年，不免凍餒，而四拙以無過坐而衣食，主者諒其無他，計口而授之粟，唯恐其失所也。噫，亦足以見拙者之效矣。

不事修飾，其意在變板重爲輕巧，變粉飾爲本色，致天下耳目於一新，學者多舍王李而從之，目爲公安體。然王李猶根於學問，公安則惟恃聰明；其尤甚者，輕薄以爲風趣，矜誕以爲弔詭。而金聖歎一派之放誕滅裂以自命才子，未必非公安階之厲也。學王李者，不過與堅以贗古。而學公安者，乃至矜其小慧，反道而敗德，名爲救王李之弊，而弊又甚焉。其後王李風漸息，而鍾譚之說大熾！

鍾譚者，鍾惺譚元春也。惺貌寢，羸不勝衣，爲人嚴冷不喜接俗客，由此得謝人事，肆力爲文章。其宗旨具見所輯《周文歸》、《宋文歸》，與論詩同一蹊逕，點逗一二新雋字句，矜爲奇祕。周文質與，宋文暢適，而惺一切以纖巧之法選之，以佻薄之語評之，撮新標奇，亦時有發。其文集不見，觀所爲《遊武夷山記》，潔情秀韻，頗工刻畫，亦以幽秀孤峭，性與境稱也。然有雋語而無快筆，不免失之枝碎，亦以生平著意字句，而無篇章之功也。其辭曰：

入閩，自崇安縣南至省會八百餘里，周始於山。去縣三十里之裴村，隔溪望，形神獷譎，疑不

爲山，疑不爲山，而山之習者創，恆者奇，人始作山想，欣然思一至者，武夷山也。山之情候在溪，溪九曲，山或應或違，而無所不相關。往往用舟，由一至九，終武夷遊事。而自縣南來者，去山十里，有水簾洞最勝。洞在山之萬年宮左，而北接口，乃與一曲諸峯鈎連，異嶺同勝，如兩人背立，遊宜從此始。或曰：「七曲有徑，可達此洞。」則其離合斷續之故，又不可問也。

余以天啓三年癸亥歸楚，則路先裴村，度溪，憩山于萬年宮，雖欲始水簾洞而不能。爲二月初八日，友人商梅送余至此，曰：「遊武夷，右之右之耳。」蓋九曲在宮右故也。大要宮在山爲郵舍，在他處已作深山，然大王與幔亭二峯，似處宮後，入卽見之，入舟始一曲而正立溪左，莊甚。迤邐至二曲，乃更枕藉，傍小峯軒舉作態，然遊者皆以爲一曲中物也。而一曲所有之峯，如大小觀音與獅子，與二曲之玉女，入舟皆見，舟行稍遠，則獅子沒，三峯去一爲二；又遠，則小觀音沒，二復爲一，然三峯不以出沒爲有無也。玉女屢遷多姿，一曲之未至，與三四之已過者，心目延返皆不能忘，於此雖欲專屬二曲而不能也。然二曲用此爲標。標三曲者，峯不可數，小藏爲最。四曲者不可數，大藏爲最，其下有卧龍潭焉。標五曲者不可數，仙掌、大隱、屏接筍爲最。六曲則天游觀左右之，晚對蒼屏、三教、大小城、高巖爲最，若一曲之大王、幔亭，二曲之玉女也。

余初八日之遊，至六曲止。第以舟行，而二曲之靈巖、一線天、虎嘯巖諸處，不能往，住非輿行六七里不可，如是則以二曲專一日，亦不爲過。而念齋甚，是夜天遊觀之月，居高及茲，當爲溪山之鑑，宿無良於此者。出舟，仰小藏壁中仙船，而至乃繞其背，至卧龍潭。潭在大藏峯下，九曲之水，清無隱鱗，雖淺亦自可，而此水以潭名，極爲靜深，淵淵然如不恆流焉。由此趨平林渡，未終五

曲，以輿代舟。尋太隱屏，朱晦翁書院在焉，當諸曲之中，溪山所會也，翁自有記。接筍峯雁次相綴，書院在峯前，而雲窩在其後。雲窩者，陳少司馬省所營。公，長樂人，住山十二年，因崖割勝，居處門庭，部署歷歷，法趣相生，使後至者有鳩借鵲巢之思焉。余留詩見志。乃循仙掌峯，曲折緣流，步夕陽空翠而上，由石門上天遊觀。是夜宿焉。類接筍峯，地高天近，雲水烟霜，俱化爲月，月光所往，未見其止，始知身在山中。與商子亭中坐立相對，惟恐其旦。旦則登一覽臺，臺高於觀，三曲之水，反在其下，見大王峯，復莊甚。

降復開舟，蓋初九日也。意當從五曲始，不知六、七曲邊際，已銷付仙掌筍輿中，舟待於七曲久矣。乃從此入舟，以故六曲之蒼屏、上下城、高岩、小桃源，俱未及問焉。標七曲者爲北廊巖、天壺峯。八曲爲鼓子、三教峯、百花莊。九曲爲寒巖、靈峯。觀恬目愉，趣佳處領其要而已。行至九曲，徑夷神曠，有出山之意。念巖壁之散處溪左右，爲舟所未及，舟至而步未及至者，雅不欲以既倦之心目償之。乃回舟。棹聲未滅，已過天遊觀，誦謝康樂「空翠難強名」之句，望昨夜所坐立亭子，危仄似非可著足處。仙掌雖一峯，橫據甚廣，籠映可數曲，緣壁甫窮，遂發五、六曲之舟，有以也。將達五曲，步至接筍峯下，欲登而不敢，必陳力進止。由一小門入，入得一亭，可憩，其絕頂有雞胸岩，受趾以外，深不見底，以絙度，而峯本不甚高，依壁爲木梯，級不盈尺，凡七十級，而余以病後不能，有詩云：「自歎來偏晚，非關上獨難」，謂遊山須及時，興日進而具日減，年所爲也。一道土手茶葉，躡梯下，步甚安，承飲焉。山中人以種茶代耕，茶惟接筍爲妙。輿而舟，舟而又輿，返尋六曲之蒼屏峯城、高巖，巖半廬一僧，僧亦山中所少也。輿而又舟，度溪，問所謂小桃源者。按圖：舊

有石堂寺，宋天聖間中夜風雨所陷之石，倚垂者爲洞，墜者爲梁，水聲出洞梁中戛戛者爲澗，凡爲石門者二。既進，乃有田園廬舍，桑麻雞犬，不知其山中也。幽險之極，得坦曠者，反以爲異。武夷可居，無過此者。入舟，過四、三曲，玉女、大王諸峯，數面成故。返宿萬年宮，遊事可終。念山中宿處，高莫如天遊，深莫如虎嘯，乃捨舟橫斜行六七里許，問靈巖。巖不甚高，石覆如廊，洞如比屋，堂巖略具。檐牙所交，天光入隙，廣不踰寸，長百之如線者，一線天也。橫有隙，由一洞又穿一洞，既至，寒吹如晚如秋者，風洞也。望衡對宇，可往可來者，伏羲洞也。日暮矣，返宿虎嘯巖。巖高於靈巖，立而微類以覆綴壁之屋，僧居之，屋亦瓦，然終古不知有雨。是夜，月光如水，使人欲汎，余詩所謂「置身星月上，魄濯水烟中」者是也。

明日，由二曲入舟，尋止止庵。山中無桃花，大要爲茶所奪，惟靈巖以往及止止庵，稍燦燦若瓶中物。還萬年宮，具威儀而行。左行十里，道旁得一門如竇，易筍輿而入，坦步二里許，丹霞及火焰三峯桀豎，上亂烟日，羣峯夾之，徑漸仄，兩壁相拒，如行三峽中。水間關扼於石，紆直不自由者，爲潤而不能爲溪。而昇者亦跳而頻濟，石益束，厥勢始交，交則爲洞如小桃源，而大且險倍之。洞窮徑出，復有天日，乃觀水簾洞石壁。壁高而頻，故所覆甚遠。去壁數百武，晴日陰暄，霧飛如雨。久之，始知流從壁上來，屋掛於壁，欄周之，拾級憑欄，如人執噴壺往來絕頂。滴漉如絲，東西遊移，或東西分，弱不能自主，恆聽於風。洞以水得名。峯勢雄整，而水之思理反細，聲光微處，最宜靜者，非浮氣人聽睹所及也。余初不知水簾洞與武夷已隔一溪，相去又十里，何以相隸。既而悟異人頻濟處，已還度溪，原未嘗隔也。鍾子往返武夷三日，覺遠望疑不爲山者，身到處無非山。

山不知有曲，溪爲之。溪不自謂曲之必九，泛溪者爲之。水簾洞與武夷，一而二，二而一，自縣南來者，宜以此爲遊事之始。來者甚銳，望九曲不能待，姑俟其歸，則韻者如食已飫，俗者如倦欲寢，故竟亦過而不問也。商子導余，決計以水簾洞終武夷遊事，爲月之初十日。

文見《武夷山志》。考其時，乃惺丁憂去職，枉道而爲此。昔蘇氏軾轍兄弟去喪，禁斷詩文，再期之內，不著一字。而惺素稱嚴冷，具至性，何乃不如二蘇之放曠者歟？況登山何事，聞訃何時，而竟優遊爲之耶？顧譚元春撰《墓銘》，不爲隱避，不爲微詞，反稱其哀樂奇到，非俗儒所能測。噫！三年之喪，天下之通喪也，豈不俗人之所能免歟？

譚元春最喜讀酈道元《水經注》，刻有評本，雖識墮小慧，而趣絕恆蹊，意想所營，頗多創得。而爲文章，亦得力焉，模山范水。傳有《譚友夏合集》二十三卷。中《鵲灣文草》九卷，傳誌諸篇，立言無體，幾爲笑柄，多類稗官。而書牘序言，頗有意致。銘辭游記，尤可取裁；敘泉石之奇，能超形想；寫友朋之樂，足散人懷。銘或具體於東坡，記多得力於酈注，潔情雋致，亦自足多，然有好句而無完篇。今最其文之佳者：如《遊玄嶽記》，有曰：「澗上置橋，高壁成城，相圍如一甕。樹色徹上下。波聲爲石所迫，人不能細語；桃花方自千仞落，亦作水響。」又曰：「衆山紛紛委於壑，松柏如隨其山下伏，偃然與荇藻無異。」《遊南嶽記》，有曰：「入丹霞寺，棟宇飄搖，若欲及客之身。自此以上，雲霧傲居，冬夏一氣，屋往往莫能自堅。」又曰：「指隔山上封寺，道有級路，趾斜垂若蟻緣。人與雲遇於途，雲不畏人。趾窮，坦然得寺，亭午弄旭，澹若夕照。」又曰：「上祝融峯頂，數人各據一石。晴漾其裏，雲縫其外，上如海，下如天，幻冥一色，心目無主，覺萬丈之下，漠漠送聲。」又曰：「久之，雲動。有頃，後雲追前雲，不及，遂失隊。萬

雲乘其罇，繞山左飛。飛盡日現，天地定位，下界山爭以青翠供奉。四峯皆莫能自起，遠湖近江，皆作絲縷白。」又曰：「宿上封寺，雲有去者。星月雍然，聲聲不壯。」又曰：「善遊嶽者先望。善望嶽者逐步所移而望之，雨望於淥口，月望於山門，皆不見。都市乃得見之，深於雲一紙耳。將抵衡，觸望莊栗，空中欲分天。又望於縣之郊菴，雲頂一二片定者，的的見縹碧。又望於道中，萬嶺皆可數，然是前山，非郊菴所望縹碧者也。」《初遊烏龍潭記》，有曰：「有舟自鄰家出，與閣上相望者，往來秋色。」《再遊烏龍潭記》有曰：「電與電相後先。電光煜煜入水中，深入丈尺，而吸其波光以上於雨，作金銀珠圓影，良久乃已。」《三遊烏龍潭記》，有曰：「殘陽接月，晚霞四起，朱光下射，紅在蓮葉下起，已而盡潭皆頰，明霞作底。」此皆寫景之妙者也。

《退谷（鍾惺別號）墓誌銘》，有曰：「退谷改南時，僦秦淮一水閣，閉門讀史。每遊人午夜棹回，曲倦酒盡，兩岸寂不聞聲。而猶有一燈熒熒，守筆墨不收者，窺窗視之，則嗒然退谷也。」《三十四舅氏墓誌銘》，有曰：「農暇或一至予家，問吾母安否。夏月稻登場，必貽以新。仲秋月圓酒熟，必寄予兄弟。每過予家，則教以安分行樂。予兄弟往拜舅室，見其與婦喬孺人，子女四五人，所畜童婢二人，料理雞醵牛圈，屋茆酌繒，寬然無辱於擔石之中。應酬不煩，王稅不遽，貴不知敬，富不知義。若以今世士大夫稍能知苦樂安危者，聞舅氏事，豈有不竊歎者哉！」《求母氏五十文說》，有曰：「春兄弟六人，百畝之田，三尺之童，母乘其俱出析之，曰：『非兒曹意也。吾見魏氏數世同居，子孫不知世務，卒以此憤懦落其家聲，徒存義名，無補門戶。且吾所爲析者，使諸婦不凌雜耳，其母妹兄弟同食如故，人直供一日。』薄暮取酒相對，談學業世事。母亦喜出聽，自出餅餌蔬醴，佐春兄弟啖。兄弟中有求益者。母喜曰：『吾見

汝曹爭食，家中長若此可矣！」此皆寫情之真者也。

至銘贊之佳，如《端石研銘》曰：「無旁無足，無口無目。墨易生如蓄，水自出如瀑。大人書之金如玉，野人書之石如木。」《連環研銘》曰：「石田蒼蒼，一區二唐。」《女士程辟支所繡觀音頌》曰：「騰騰白光，一鍼所始。何以竟之？既結旋委。稽首審聽，瓶搖新水。春閨無怨，絲絲神理。幅帛莫增，捫如其指。送大士行，月出烟止。」《宋繡觀世音讚》曰：「我聞繡佛，慎哉劈絲。離朱晨曦，目午則疲。蓮花瓣瓣，紫竹枝枝。視手中線，觀音在茲。」名章迴句，處處間起，與鍾惺齊名，亦以易天下之耳目，有竟陵體之稱。然竟陵特以詩著，而文章亦自成一格。公安結調太熟，而竟陵又過生新。公安造語近俚，竟陵構篇不完。公安無絮情，而竟陵乏遠韻。若夫言擇雅馴，文忌枝碎，結調在生熟之間，而餘味包篇章之外者，其惟歸有光乎，其惟歸有光乎！

第十一節 錢謙益 艾南英附羅記

有導揚歸有光之學，以自振拔於王李，而滿洗不淨者，曰常熟錢謙益，字受之。自言：年十六七歲，已好陵獵爲古文，李夢陽《空同》、王世貞《弇山》二集，爛翻背誦，暗中摸索，能了知其紙；搖筆自喜，欲與驅駕。父世揚見之曰：「此唐荊川所謂三歲孩作老人形耳。」而謙益自若。爲舉子，偕李長衡，視所作。長衡笑曰：「子他日當爲李王輩流。」謙益驚曰：「李王而外，尚有文章乎？」長衡爲言唐宋大家，與李王迥別，而略指其所以然。謙益爲之心動。既而從練川二三長者得聞歸有光之緒論，與近代王李剿賊之病。客從臨川來，湯顯祖寄聲相勉曰：「本朝文，自空同已降，皆文之輿臺也。古文自有真，勿漫視

宋濂。」於是始覃精研思，刻意學唐宋古文，因以及金元元好問、虞集諸家，而尤喜歐陽修《五代史記》，以爲「真得太史公血脈，而下開震川」。如震川之《李羅村行狀》、《趙汝淵墓誌》，雖歐公復生，何以過此？以震川追配唐宋大家，其於介甫子由，殆有過之，而與古人參會於毫芒妙忽之間也。士生於斯世，尚能知宋元大家之文，可以與兩漢同流，不爲王李所漸滅。震川之功，豈不偉哉！「因校刻《震川集》而序之。蓋清桐城家言之治古文者，胥由有光以踵歐陽而闡太史公，姚鼐遂以有光上繼唐宋八家而爲《古文辭類纂》一書，何莫非謙益之緒論，有以啓其塗轍也。

特謙益自爲文章，則以早年寢饋於《空同》、《弁山》者深，而洗伐不盡。有光之文，順理成章，自然雋永深折。謙益之文，盛氣纏語，不免峻厲矜肆。楊士奇、李東陽氣體闊大，而骨力甚平；其流爲庸熟。而謙益則又骨力開張，而脈理不細；其弊爲矜誕。然楊李所謂雍容之音，詎耐咀味；而謙益妙有嚙殺之節，時能激發。傳有《初學集》一百十卷（《四部叢刊》景印明崇禎癸未刻本），又清宣統間吳江薛鳳昌遼漢齋鉛排本），《有學集》五十卷（《四部叢刊》景印清康熙甲辰刻本），又宣統間薛鳳昌鉛排本）。錄《瞿目篇贈華徵君仲通》曰：

周室東遷後，垂二百年，蠻夷交侵，三綱淪替。生斯世也，俛俛乎無所之，胥天下皆瞽人矣。孔子出，作《春秋》以相之，左目日，右目月，視爲晝，瞑爲夜，故曰「聖人者，時人之目也。」吾於斯世，得二瞽人焉！《春秋》未作，得一人焉，曰師曠。詩不云乎：「蠹爾荆蠻，大邦爲讎。」齊桓公以懸車束馬之餘威，憑陵方漢，膠舟之間，委諸水濱。子野，一瞽工耳；驟歌南風，知楚師之不競，何其神也。管夷吾死，楚氛蔽華夏，惟師曠爲有目，焉得瞽？《春秋》既作，得一人焉，曰左丘明。史不云：

乎！「丘明失明，厥有《國語》。」言「天道，徵人事，採毫末，貶纖介，如抉目之金鉞，如照世之寶玉。」左丘明恥之，「孔子蓋三歎焉。孔子，時人之目也。左丘明，以孔子爲目者也。萬古長夜，《春秋》復旦，魯君子之四目，至今炯如也，焉得瞽？由是推之，自《春秋》以後二千餘年，暴於秦，亂於五代，僭於耶律、蒙古、完顏，稽天吞日，萬倍荆蠻；於其中不瞽不盲者有幾人哉！瞽者兩目眖矣，猶恐人之一目眖也，汲汲然思厚其膜，滋其眇，又集矢以中之，胥天下拍肩取道而後已。秦始皇之於高漸離，畏忌而瞶其目，亦猶是也。雖然，始皇瞶漸離之目，自以爲無患矣；近不瞶胡亥、趙高、李斯之目，遠不能瞶陳涉、吳廣、劉季、項羽之目，所謂「千秋萬歲，傳之無窮」者，亦終如瞽者之摸象，歸於何有，則亦可爲一笑而已矣。

梁溪華仲通，懷文抱質，魯君子之徒也；不幸而有喪明之疾。鉛槧削筆，尊周王魯，未嘗一息而忘《春秋》之志也。居環堵之室，詠歌先王之風，曳杖抱膝，聲滿戶牖，徐而聽之，泣銅盤，彈翎雀，湫乎攸乎，如師曠之驟歌南風而有餘思也。仲通居瞽瞽之世，以有目取憎，天之瞶其目也，所以全仲通也。屏居內視，玄覽中區，目光如炬，庶幾半頭天眼；此人之所不能憎，而天之所不能瞶者也。雖有百始皇，如仲通何！吾於師曠、丘明二瞽之後，竊取仲通以配之曰：「此宇宙間三有目人也。」不亦可乎！仲通今年六十，人爭引唐文昌以城南復明爲祝。而余則誦元遺山之詩曰：「無窮白日青天在，自有先生引鏡時。」以爲天之所不能瞶者，復明與否，非所急也。作《瞶目篇》以貽之。誠益目觀明社之屋，而不能死；又以身事新朝，微文見意，時有弦外之音，而出以諛諛。清帝恨之，遂禁其集不得行。然在明清易代之際，江以南言文章者，必以謙益爲巨擘焉。

東鄉艾南英，字千子，起於江西，亦衍歸有光之說以斥王世貞，而與謙益相應和。自李夢陽之說出，而學者剽竊班、馬、李、杜。自世貞之集出，學者遂剽竊世貞。南英每痛切言之曰：「後生小子不必讀書，不必作文。但架上有《弇州前後四部稟》，每遇應酬，頃刻裁割，便可成篇。驟讀之，無不濃麗鮮華，絢爛奪目，細案之，一腐套耳。」傳有《天慵子全集》十卷（有清康熙道光兩種刊本）。其文學歐陽修，然根柢少薄，模擬有迹。錄《重刻羅文肅公集序》曰：

有明文章之盛，莫盛於太祖朝。劉文成、宋文憲、王文忠、陶姑執輩，不獨帷幄議論，佐聖神文武，佑啓後人之謨烈，而文章亦遂爲當代之冠。至於蘇平仲、高季迪、解大紳、方希古，或專以詩文，或兼有節義，後先二祖之世。雖由草昧開天，士崇實學，不惑於流俗苟且之見，亦由唐宋大家之流風遺韻，典型未遠。洪永而後，文章淩衰矣。楊文貞、王文成雖卓然自成一家，而兩公以相業事功，不專名文章；風矩所激，後進無由覩其標指。一時文章之權，無所主持。於是弘治之世，邪說始興，至勸天下士無讀唐以後書，又曰「非三代兩漢之書不讀」。驕心盛氣，不復考韓歐大家立言之旨。又以所持既狹，中無實學，相率取司馬遷、班固摘其句字，分門纂類，因仍附和。太倉、歷下兩生，持北地之說而又過之。持之愈堅，流弊愈廣。後生相習爲腐勦，至於今而未已。

天祐斯文，篤生豪傑。南城圭峯羅文肅公當邪說始興之時，矯俗自立，力追古大家體裁，當時以爲直逼柳州。天下後進，讀公之集，始知刻厲爲文，不襲陳言，不厭薄韓柳，以爲可師，皆公之力也。《易》曰：「碩果不食，」其公之謂歟？公歿且百年，爲北地之徒者，日歸於腐敗，而公之文愈著。天下言文之士，由當代而溯韓柳氏者，必以公爲小宗。然後知後世之公論，作者之精神，有以致之。

也。公所爲文，在翰林應酬之作爲多，較之宋文憲、方希古、蘇平仲輩，雖篇幅謹嚴，稍遜前人之寬博，至其冥思入微，命詞遣意，境界一新，其師摹得力，自柳子《愚谿》諸記而來，卽起方宋於九原，未敢多讓。加以力持風節，嘗諫言官諍外戚之獄，爲吏部侍郎，因羣盜竊發，疏請早建儲貳以繫屬人心。家居卻寧庶人餽遺。蓋方正學之風節，《大庖西封事》之遺概，庶幾似之！予旣序選公集，列之有明大家，而復因其玄孫栗口之請，序其全。公集刻盱郡，刻南國子監。此本較二刻稍備。近武進尚書洪澳孫公復有選本，然吾不樂其與北地並推也。

羅文肅公者，南城羅玘，字景鳴，與何李同時，而不涉聲氣，著有《圭峯文集》三十卷。其文規撫韓愈，夏獨造，多抑掩其意，迂折其詞，所爭在句法奇險之間，而磊落嶽崎，有意作態，不能如韓愈之渾噩。艾南英模放歐陽，而生吞活剥，亦落膚勦，不能如歸有光之神逸。以視李夢陽、王世貞之模秦仿漢，亦復魯衛之政，何必此之爲是而彼之爲非。學秦漢文之落窠臼，而不免於膚勦者，李夢陽、王世貞也。學唐宋文之落窠臼，而壹出於摹擬者，羅玘、艾南英也。錢謙益學歐陽修，面目全不似，而錯綜震蕩，亦有氣概。而艾南英學歐陽修，字句似，而拘攣繫著，絕無神彩。獨論文諸書，抑揚爽朗，頗盡利鈍，而《與陳子龍書》，尤極峻厲。

第十二節 張溥 陳子龍

方明之季，艾南英倡豫章社，衍歸有光等之說而暢其流。而華亭陳子龍字卧子者，則結幾社，承王世貞等之說而濫其溢。是時，太倉張溥字天如、張采字受先共學齊名，號婁東二張，集吳中名士相與復。

古學，而溥爲主盟，編有《漢魏六朝百三家集》一百十八卷，名其文社曰復社。而子龍則與同里夏允彝等倡幾社相應和，以昭明《文選》爲門庭。而子龍最爲雄桀，天才迅發，好上下古今，切合時務，而敷以藻艷。艾南英至雲間，抗顏南面。惟子龍以少年與之爭。南英主理學，子龍主議論；南英主秦漢，子龍主魏晉；互持不相下，至於攘臂，要其獨主所見，不肯雷同，亦足以自豪也。早爲警麗，晚而趨於平淡，悔其少作，則南英亦爲降心相推焉。錄《橫雲山石壁銘》曰：

橫雲山者，松之屏蔽。其山偃臥懸隆，平削削麓。含泉窟石，氣理頑秀，鑿山消精，歲積齒齒，蓋僻迴殘壤，遺寄者絕其盤遊，荒荒莫紀。有石壁焉，削成巋峙，膚色黃赭，方數十丈，猿鳥莫度。下臨石池，巉岫筍起。右轉而北，石貌橫出，兩峯交會，中澗深寂。澗末委潭，測之以綆，未及垂止。斯亦方內之遼跡，淺境之壯觀矣。環壁包池，則李氏之園在焉。既翦叢棘，遂有堂宇。濯漑以俟雨，植楓而綴秋。涉冬之陽，李氏攜客信宿。落葉零翠，寒山凍青，風消夕醉，月照宵遊，辨隔浦之歸漁，習空山之嘯鬼，橫覽淒惻，悲涼莫罄。壁立峴峴，類兮千古。乃作銘曰：

石髓凝風，雲堆乾雨。穴鎖龍符，壁開靈斧。蘿篆玄文，薜留青嫵。滑磴凝猿，頽峯礙羽。泉覆羣月，天空一秋。飛霜鳥路，結霧僊樓。碧摩儻莽，紅落浮游。澗鬼恆聚，石鼠常遊。竹響無羈，草香不掃。風墮巖危，波搖木矯。地骨黃初，山眉黛老。矗望當星，潛看逼昊。寶乳欲法，擇沙若明。傍嶧虎瞰，陰瀨蛟擎。嶽堂中鎮，湍橋宛縈。主情燕豫，客性崢嶸。考義古甘，攬時欣賞。酒寄懷深，詩安心蕩。擊火浮煙，緣溪拾橡。夜黑虛嶠，幽魂下上。

語出生撰，調操險急，有李夢陽之奧古，而謝其剽襲，同王世貞之絢爛，而出以卓鍊。雄駿驅邁不如李

王，而短峭精悍亦非李王所及。李王之文，排募陵厲而出之，故渾灝流轉之勢盛。子龍之文，刮磨琢鍊而出之，故遒峭峻險之意多。其後崢嶸極而歸平淡，如所爲《仙都山志》，絕去雕飾，而突起紆行，峭收縵迴，章妥句適，而出以千鍾百鍊。牢籠百態，曠如也，奧如也，雖柳州不加焉。陳子龍道麗驚挺，歸有光簡澹雋永，二子之文，吾未知所先後也。顧餘姚黃宗義黎州與子龍交契，而所選《明文授讀》，不登子龍一篇，自來選家，亦罕有及之者，寧得謂之知言哉？惜其文不多見耳。

張溥高名盛氣，以漢魏爲東南倡，而筆力凡近，所爲《五人墓記》，急轉直落，有意數太史公之跌宕激射，而提不起，放不下，欲爲雄駿而曾不能以疏快，且不得與艾南英比，調已靡矣。其稍入奧者，則又堆垛襲積，拮據古語，而意涉於晦，不可以句讀者，亦往往有焉。桐城方以智字密之，貴公子，而撰《文章薪火》，以唐宋大家爲東南倡，特議論好爲穿鑿。然玄黃之會，文多僞體，而雲間以華，桐城以樸，差有宗尚。陳子龍之於東漢，含英咀華，所得者多。而以智志於馬、班、韓、歐，則寢饋不深。後來西泠十子陸儼胡輩出於雲間，而駢儷之體日雅。戴名世、方苞輩大昌桐城，而散體之文以潔。貞下起元，固始基之矣。

第二章 明詩附詞

第一節 總論

自來文人好標榜，詩人爲多，而明之詩人尤甚。以詩也者，易能難精，而門徑多歧，又不能別黑白而定一尊，於是不求其實，相競於名，樹職志、立門戶。明太祖時，吳則有北郭十子，爲高啓、楊基、張羽、徐貴、余堯臣、王行、宋克、呂敏、陳則、釋道衍。越則有會稽二肅，謂唐肅、謝肅。粵則有南園五子，爲徐黃、黃哲、王佐、李德、趙介。閩則有十子，爲林鴻、王恭、王偁、高廷禮、陳亮、鄭定、王褒、唐泰、周玄、黃玄。景帝時，有景泰十才子，爲劉溥、湯胤績、蘇平、蘇正、沈愚、晏鐸、王淮、鄒亮、蔣主忠、王貞慶。孝宗時，有前七子，爲李夢陽、何景明、徐禎卿、邊貢、王廷相、康海、王九思；七子中，去王廷相，加朱應登、顧璘、陳沂、鄭善夫，號十子。世宗時，有嘉靖八才子，爲李開先、王慎中、唐順之、陳束、趙時春、任瀚、熊過、呂高。有後七子，爲李攀龍、王世貞、謝榛、梁有譽、宗臣、徐中行、吳國倫。後五子，爲張九一、張嘉胤、汪道昆、余曰德、魏裳、廣五子，爲盧柟、歐大任、俞允文、李先芳、吳維嶽；續五子，爲黎民表、王道行、石星、趙用賢、朱多燬、宋五子，爲屠隆、胡應麟、李維禎、吳旦、李時行。而梁有譽、歐大任、黎民表、吳旦、李時行，又爲南園後五先生。神宗時，有嘉定四先生，爲程嘉燧、李流芳、婁堅、唐時升。又有公安派，則袁宗道、袁宏道、袁中道，竟陵派，爲鍾惺、譚元春。然此百十人中，沒世有稱者，不過三、四十人。而極其流變，則在振唐格以革元風，矯纖濃而爲雄道。元末明初，楊維禎最爲巨擘，然險怪做昌谷，

妖麗出溫李，以之自成一家則可，究非康莊大道。劉基獨標骨幹，時能規撫杜韓。而高啓則才氣超邁，音節響亮，出入於漢、魏、六朝、唐、宋諸家，而自出新意，振元末纖穠編麗之習，而開何李復古之風，博大昌明，泱泱乎開國之氣象也。要之明初詩人，以二公爲冠，袁凱、楊基次之，張以寧、徐賁、張羽又次之，其以高、楊、張、徐爲明初四家，固不若是班也。永樂以還，崇尚臺閣體。李東陽力挽頹波。何李七子，起而振之，詩遂復歸於正。而李夢陽雄渾悲壯，鼓盪飛揚，何景明秀朗俊逸，回翔馳驟，同一憲章少陵，而所造各異，駸駸乎一代之盛，有非徐禎卿、邊貢、王廷相、王九思、康海所可及者。而其時楊慎負高明伉爽之才，空所倚傍，拔戟於李何之外而自成一隊。薛憲、高叔嗣並以沖淡爲宗，華察希韋柳之風，皇甫沖得晉宋之意，亦正嘉時之爾雅者也。後七子：王世貞樂府古體，卓爾名家，李攀龍七言近體，高華矜貴。未嘗不各有所長，但其它鍛煉未純，摹古大甚。而謝榛、吳國倫、徐中行、宗臣、梁有譽等輔之，沿襲雷同，致來攻擊之口。於是一變爲公安之輕雋，再變爲竟陵之僻澀，三變爲陳繼儒、程嘉燧之纖佻，而每況愈下矣。議者或極推嘉燧，刻論李何，究不過爲門戶之見耳。萬曆以來，高攀龍雅淡清真，得陶公意趣，陳子龍懇關榛蕪，上窺正始，斯爲不染時趨者矣。明詩源流，大抵如此。今博考諸家之集，參以衆論，錄其著者。

第二節 楊維禎 劉基 高啓

易代之際，楊維禎詩名蓋代，號鐵崖體，而樂府其尤擅場者也。樂府始於漢武，後遂以官署之名，爲篇章之名。其初郊祀等歌，依律製詩，橫吹諸曲，採詩協律，與古詩原不甚分。後乃聲調迴殊，與詩

異格，或擬舊譜，或製新題，輾轉日增，體裁百出。大抵奇矯始於鮑照，變化極於李白，幽豔奇詭，別出蹊徑，歧於李賀。元之季年，多效溫庭筠體，柔媚旖旎，全類小詞。維楨以橫絕一世之才，乘其弊而力矯之，根柢於青蓮昌谷，縱橫排募，自闢町畦，傳有《鐵崖古樂府》十六卷（《四部叢刊》影印明成化間本），其高者或突過古人，其下者亦多墮入魔趣，故文采照映一時，而彈射者亦復四起。錄兩章。

湖中女

湖中水，滑如脂。湖中女，夫容姿。湖中小藥蕩蓮葉，唱得吳王白雪詞。輕裾利屐踏雁足，爲客高歌激明目。生年不作人家婦，東人西人換恩主。主家薄倖非三從，歸來抱瑟彈孤鴻。君不見，東家女伴粗且醜，嫁得比鄰呼何忸（讀作鍾）。

五湖游

鴨夷湖上水仙舟，舟中仙人十二樓。桃花春水連天浮，七十二黛吹落天外如青瀉。道人謫世三千秋，手把一枝青玉蚪。東扶海日紅桑樛，海風約住吳王洲。吳王洲前校水戰，水犀十萬如浮漚。水聲一夜入臺沼，麋鹿已無臺上游。歌吳歎，舞吳劍，招鴨夷兮狎陽侯。樓船不須到蓬丘，西施鄭旦坐兩頭。道人卧舟吹鐵笛，仰看青天天倒流。商老人，橘幾奔？東方生，桃幾偷？精衛塞海成甌窰。海盪氓山漂羈體。胡爲不飲成春愁。

維楨詩以奇逸矯變凌跨一世，特其才務馳騁，意務新異，不免滋末流之弊。宋濂撰《維楨墓誌》稱：「其於詩尤號名家，震盪陵厲，駸駸將逼盛唐；驟閱之，神出鬼歿，不可察其端倪。」而《答章秀才論詩書》，則曰：「近來學者類多自高，操觚未能成章，輒闊視前古爲無物，故其所作往往猖狂無倫，以揚沙走

石爲豪，而不復知有純和沖粹之意，可勝歎哉！」意似爲維楨發也，則固不無微詞矣。

崇德貝瓊，字廷琚，從學於維楨，而其言曰：「立言不在蕪絕刻峭，而平衍爲可觀，不在荒唐險怪，而豐腴爲可樂。」蓋雖出於維楨之門，而宗旨頗不相襲者也。傳有《清江貝先生集》四十一卷（《四部叢刊》影印明洪武刻本），其中詩集十卷，錄《經故內》：

山中玉殿盡蒼苔，天子蒙塵豈復回。地脈不從滄海斷，潮聲猶上浙東來。百年禁樹知誰惜，三月官花尚自開。此日登臨解題賦，白頭庾信不勝哀！

其詩溫厚之中，自然高秀；不同維楨之力爲奇矯也。

青田劉基，字伯溫，銳意摹古，獨標高格。不同于楊維禎以樂府擅聲，構新題爲古體，辭華洗伐不盡。而劉基則力追杜韓，而出以沈鬱頓挫，遂開明三百年風氣。而樂府高於古詩，古詩高於近體，五言近體又高於七言。元詩態濃而語纖，劉基幹之以風力，辭意非常，骨氣奇高，感慨同劉越石，險峻出韓退之，錯綜震盪，謝靈運《鄴中詩》所謂「劉楨卓犖偏人，而文最有氣，所得頗經奇」者也。若《二鬼》一篇，直欲破劉叉之膽矣。錄《雜詩》：

小魚頭如針，大魚鬣如松，小大各生育，孰私天地功？坤靈發淫怒，溟海簸驚風。大魚食小魚，陂池爲之空。陂空水亦竭，小大相唼喙。但見灌莽間，顛骨成崆嶺。殘膏飫螻蟻，孰辨鯨與鱖？

人生如浮雲，飄搖無根蒂，昨暮青山阿，今朝滄海澨。風波無定時，淪頭難爲計。是中苟不夷，曷問耿與賈？申胥存楚國，仲連卻秦帝；此士雖則亡，英名千萬世。

鷹本是鷲鳥，爪利翮勁疾，胡爲化爲鳩，鈍拙無與匹？棲遲荆棘間，粒啄營口實。暮啼牆角雨，朝啼屋頭日。昔爲衆鳥畏，今爲衆鳥啞。運命苦不常，孰爲金石質？

急雨漲潢潦，溝池成五湖。青蛙與耿鼃，得意鳴相呼；自謂樂無似，至足不求餘。蓬萊有玄鶴，曾見東海枯，清夜唳長風，哀音繞天衢。使我起太息，黑髮變霜鬚。

惟豺知祭獸，獺亦知祭魚。豺獺有報本，人道當何如？華堂飫玉食，盜賊塞中途。那能不自愧，而以耀庸愚？吁嗟千載下，枯骨空專車。

天地若大甕，萬物生其腹。人猶腹中蟲，蠢蠢隨化育。鑽攻無時休，臟腑爲翻覆。帝青調元氣，豈不畏戎毒？蟠然命滌蕩，汗下兼湧衄。蚩蚩自狂獺，渲沸交殺戮。何當瞑眩定，風止水歸瀆？鑄鐵作鋤犁，春耕待秋熟。

言在耳目之內，情寄八荒之表；雅壯而多風，造語奇偉，如千金駿足，飛騰飄瞥，驀澗注坡，不如維楨之有意奇詭，而自然高騖；一則文人之偏師出奇，一爲志士之憂時託憤。是故非奇逸之難，有其胸次爲難也。

長洲高啓，字季迪，天才高逸，獨爲明開國詩人之冠。其於詩擬漢魏似漢魏，擬六朝似六朝，擬唐似唐，擬宋似宋，凡古人之所長，無不兼之，傳有《詩集》十八卷（《四部叢刊》影印明景泰元年徐庸刻《大全集》本，清雍正六年桐鄉金檀集注之文瑞樓刊本，近上海文瑞樓書莊影印文瑞樓原刊本），一洗元詩纖麗膚縟之習，而返之於古，啓實爲有力。然得名太早，殞折太速，未能鎔鑄變化，自爲一家，故備有古人之格，而反不能名啓爲何格，此則天實限之，非啓過也。特其摹仿古調之中，自有精神意象存乎其

問。錄《憶昨行寄吳中諸故人》。

憶昨結交豪俠客，意氣相傾無促戚。十年離亂如不知，日費黃金出游劇。狐裘蒙茸欺北風，霹靂應手鳴雕弓。桓王墓下沙草內，彷彿地似遼城東。馬行雪中四蹄熱，流影欲追飛隼滅。歸來笑學曹景宗，生擊黃獐飲其血。臯橋秦娘雙翠娥，喚來尊前爲我歌。白日欲沒奈愁何！迴潭水綠春始波，此中夜遊樂更多。月出東山白雲裏，照見船中笛聲起。驚鷗飛過片片輕，有似梅花落江水。天峯最高明日登，手接飛鳥攀危藤，龍門路黑不可上，松風吹滅巖中燈。衆客欲歸我不能，更度前嶺緣峻嶒。遠攜茗器下相候，喜有白首楞伽僧。館娃離宮已爲寺，香逕無人欲愁思。醉題高壁墨如鴉，一半欹斜不成字。夫差城南天下稀，狂遊累日忘卻歸。座中爭起勸我酒，但道飲此無相違。自從飄零各江海，故舊如今幾人在？荒烟落日野烏啼，寂寞青山顏亦改。須知少年樂事偏，當飲豈得言無錢。我今齒髮雖未老，豪健已覺難如前。去日已去不可止，來日方來猶可喜。古來達士有名言，只說「人生行樂耳」。

頓挫瀏亮，自選定其詩爲《缶鳴集》，而王禕序而評之曰：「季迪之詩，雋逸而清麗，如秋空飛隼，盤旋百折，招之不肯下。又如碧水夫渠，不假雕飾，儵然塵外，有君子之風焉。」明初吳下多詩人，啓與楊基、張羽、徐賁稱四傑，以配唐王楊盧駱云。基，字孟載，傳有《眉菴集》十二卷（南京龍蟠里圖書館藏有影寫明重刊成化本）。其詩頗沿元季纖穠之習，不如啓之沖雅邁鍊，然其五言古詩，風格頗上。羽，字來儀，傳有《靜居集》四卷（南京龍蟠里圖書館藏有鈔明萬曆刊本）。其律詩意取俊逸，失之平熟；而五言古體，低昂婉轉，殊有瀏亮之作。至於歌行，筆力雄放，音節諧暢，足以方駕於啓而爲一時之豪。賁，

字幼文，傳有《北郭集》十卷（南京龍蟠里圖書館藏有影寫明成化刊本）。其詩才氣不及高、楊、張，而法律謹嚴，字句熨貼，長篇短什，並首尾溫麗，於三家別爲一格。然唐四傑以材章麗贍爲美，而明四傑以風骨騰騫爲高，故龍頭不得不屬啓也。華亭袁凱，字景文，以《白燕詩》得名，時稱袁白燕。啓贈詩曰：「清新還似我，雄健不如他。」傳有《海叟集》四卷（南京龍蟠里圖書館藏有明萬曆刊本，又清光緒癸巳年徐氏觀自得齋刊本）。而何景明序謂：「明初詩人，以凱爲冠。」蓋凱古體多學《文選》，近體多學杜甫，與景明持論頗契，故有此語也。景明又極稱：「歌行得杜之體。」然傷乎直，殊少變化。七言斷句，在李庶子、劉賓客間，高啓、楊基俱不及也。然吳詩尚風骨。而閩派講格調，其詩派禰三唐而溯宋元，善詩者稱十才子，而福清林鴻字子羽者推巨擘焉。十才子者，閩鄭定、侯官王褒、唐泰、長樂高棅、王恭、陳亮、永福王偁及鴻弟子周元、黃元，時人目爲二元者也。鴻論詩，大指謂「漢魏骨氣雖雄，而菁華不足。晉祖玄虛。宋尚條暢。齊梁以下，但務春華，少秋實。惟唐作者可謂大成。然貞觀尚習故陋，神龍漸變常調，開元天寶間聲律大備，學者當以是爲楷式。」閩人言詩者，率本於鴻，傳有《鳴盛集》四卷，宗法唐人，繩趨尺步，而無鷹揚虎視之致。「袁凱《海叟集》專學杜，而鴻《鳴盛集》專學唐，蓋能極力摹擬，不但字面句法，併其題目亦效之，開卷驟視，宛若舊本。然細味之，求其流出肺腑，卓爾自立者，指不能一再屈也。」李東陽云。

第三節 李東陽 李夢陽 何景明 徐禎卿 楊慎

詩必盛唐以上，李夢陽、何景明所以高唱復古也。然李東陽實有開山之功。東陽宏獎羣英，力追

正始，由其天材穎異，長短豐約，高下疾徐，滔滔莽莽，惟意所如。其自序謂：「耳目所接，與況所寄，左觸右激，發乎言而成聲，雖欲止之，有不可得而止者。」此自得之言也。錄《靈壽杖歌》。

吾聞武當之山四萬二千丈，半在雲根半天上。不知三十六宮何處稱絕奇，產出靈樛非一狀。蛟螭盤擎露頭角，熊經樹類虎山脚。根蟠節錯相糾纏，含風飽雲經炎寒。九年洪水之水浸不殺，十日之日暴烈何時乾。梯懸蹬接跬步不可上，誰采青壁紅琅玕。見之羨者不容口，錫以嘉名曰靈壽。爪之不入行有聲，金可同堅石同久。吾家此物舊所有，神與相扶鬼爲守。自從病足跛曳不得前，已覺山林落吾手。一病經旬不出門，手中此杖嗟猶存。下牀歛足立不定，此時託子以爲命。不顧四體無微疴，但願謝病歸山阿。左扶右策夾以二童子，下可涉園徑，上可陵陂陀。願栽萬木截萬杖，窮崖陰谷生森羅。靈兮壽兮此物倘可致，直遣四海赤子頭俱皤。

縱橫跌宕，能盤硬語，極意規撫少陵，何必李夢陽《空同集》耶？而夢陽輕之，何也？近體雅馴清激，律圓而調響，亦深得唐意。錄《遊岳麓寺》。

危峯高瞰楚江干，路在羊腸第幾盤。萬樹松杉雙徑合，四山風雨一僧寒。平沙淺草連天遠，落日孤城隔水看。薊北湘南俱入眼，鷓鴣聲裏獨凭欄。

永樂以後詩，臺閣體平熟，而理學諸公則近俚，得東陽起而振之，如老鶴一鳴，喧啾俱廢。後李夢陽、何景明繼起，廓而大之，駸駸乎一代之盛矣。李夢陽、何景明文必秦漢，詩必盛唐以上。而東陽文非秦漢，詩則盛唐也。

李夢陽五言古源本陳王、謝客，初不以杜爲師，所云杜體者，乃其摹擬之作，中多生吞語，偶附集

中，非得意詩也。而學陳王、謝客者，亦過雕刻，未極自然。惟七言古及近體專仿少陵，超然蹊逕之外。七言古雄渾悲壯，縱橫變化；《明星》、《去婦》、《杜鍊師》、《劉大司馬》等篇，跌宕奇矯；《士兵》、《豆莖》之作，學杜而智過其師，俚質生硬處正不易到。而七言近體，開闢動宕，不拘故方，準之杜陵，亦幾具體；故當雄視一代，邈焉寡儔。至五言律頗傷質直，而長律整栗，亦有支弱之習。《靈濟宮》一篇，高出《松陵》；餘則《華嶽》、《簡何舍人》、《鄱陽湖》諸作，亦可誦。七言絕，則學供奉，而五絕如《獄中》、《詠將》諸篇，奇特可喜，是亦逸品。錄二首：

去婦詞

孔雀南飛雁北翔，含顰攬涕下君堂，繡幕空留並菡萏，羅袪尚帶雙鴛鴦。菡萏鴛鴦誰不羨？人生一別何由見；只解黃金頃刻成，那知碧海須臾變。賤妾甘爲覆地水，郎君忍作離弦箭。憶昔嫁來花滿天，賤妾郎君俱少年，瑤臺築就猶嫌惡，金屋裝成不論錢。重樓複道天中起，結綺臨春照春水。宛轉流蘇夜月前，萋迷寶瑟烟花裏。夜月烟花不相待，安得朱顏常不改？若使相逢無別離，肯放逝波到東海？薄命難教婦似知，衰年恨少姑嫜在。長安大道接燕川，鄰里攜壺舊路邊。妾悲妾怨憑誰省，君舞君歌空自憐。郎君豈是會稽守，賤妾寧同會稽婦。郎乎幸愛千金軀，但願新人故不如。

秋望

黃河水遠漢邊牆，河上秋風雁幾行？客子過壕追野馬，將軍破箭射天狼。黃塵古渡迷飛輓，白月橫空冷戰場。聞道朔方多勇略，只今誰是郭汾陽？

華州王維楨以爲：「七言律自杜甫以後，善用頓挫倒插之法，惟夢陽一人。」而何景明則譏之曰：「子高處是古人影子耳。其下者，已落近代之口。未見子自築一堂奧，突開一戶牖，而以何急於不朽也？」夢陽論詩稱陸謝。而景明則箴之曰：「陸詩，語俳，體不俳也。謝則體語俱俳矣。」又曰：「空同刻意古範，鑄形宿模，而獨守尺寸。僕則欲富於材積，領會神情，臨影構結，不仿形迹。詩曰：『惟其有之，是以似之。』以有求似，僕之愚也。近詩以盛唐爲尚。宋人似蒼老而實疏鹵。元人似秀俊而實淺俗。今僕詩不免元習，而空同近作，間入於宋。譬之樂，衆響赴會，條理乃貫，一音獨奏，成章則難。故絲竹之音要眇，木革之音殺直，若獨取殺直，而并棄要眇之聲，何以窮極至妙，感精飾聽也？空同丙寅間作，叩其音尚中金石，而江西以後之作，辭艱者意反近，意苦者辭反常，色澹黯而中理披慢，讀之若搖鞞擊鐸耳。夫聲以竅生，色以質麗。虛其竅，不假聲矣。實其質，不假色矣。苟實其竅，虛其質，而求之聲色之末，則終於無用矣。」夢陽主摹倣，景明則主創造。然景明不如夢陽之才大，夢陽亦遜景明之氣清。夢陽詩以雄麗勝，景明詩以秀朗勝，同是憲章少陵，而所造各異。名成之後，互相詆譏。何謂李搖鞞振鐸，李謂何搏沙弄泥。何病李之殺直，李病何之緩散。兩君皆負才傲物，而何稍和易，以是人多附之。亳州薛蕙詩云：「俊逸終憐何大復，羸豪不解李空同。」自此詩出，而抑李申何者日漸多矣。

何景明題畫諸詩，源出少陵，非徒貌似，神亦似之。而五言古，有三謝體，有少陵體。七言古則深崇唐四傑轉韻之格。錄《明月篇并序》：

僕始讀杜子七言詩，愛其陳事切實，布詞沈著。鄙心竊效之，以爲長篇聖於子美矣。既而讀漢魏以來歌詩及唐初四子者之所爲，而反覆之，則知漢魏固承三百篇之後，流風猶可徵焉。而四

子者，雖工富麗，去古遠甚，至其音節，往往可歌。乃知子美詞固沉著，而調失流轉，雖成一家語，實則歌詩之變體也。夫詩本性情而發者也，其切而易見者，莫如夫婦之間。是以三百篇首乎《關雎》，六義始乎風。而漢魏作者，義關君臣朋友，辭必託諸夫婦，以宣鬱而達情焉，其旨遠矣。由是言之：子美之詩，博涉世故，而出於夫婦者常少；致兼雅頌，而風人之義或缺。此其調，或反在四子下歟？暇日爲此篇，意調若彷彿四子，而才質俱弱，思致庸陋，故摘詞蕪素，無復統飭。姑錄之以俟審音者裁割焉。

長安月，離離出海嶠。遙見層城隱半輪，漸見阿閣銜初照。激灑黃金波，團圓白玉盤，青天流影披紅蕊，白露含輝沉紫蘭。紫蘭紅蕊西風起，九衢夾道秋如水。錦幌高褰香霧濃，瑣闌斜映輕霞舉。霧沉霞落天宇開，萬戶千門月明裏。月明皎皎陌東西，柏寢嵒嶢望不迷；侯家臺榭光先滿，戚里笙歌影乍低。濯濯芙蓉生玉沼，娟娟楊柳覆金隄。鳳凰樓上吹簫女，蟋蟀堂前織錦妻。別有深宮閉深院，年年歲歲愁相見；金屋螢流長信階，綺櫳燕入昭陽殿。趙女通宵侍御牀，班姬此夕悲團扇。

秋來明月照金微，榆黃沙白路逶迤。征夫塞上行憐影，少婦窗前想畫眉。上林鴻雁書中恨，北地關山笛裏悲。書中笛裏空相憶，幾見盈虧淚沾臆；紅閨貌減落春華，玉門腸斷逐秋色。春華秋色遞如流，東家怨女上妝樓；流蘇帳卷初安鏡，翡翠簾開自上鉤。河邊織女期七夕，天上嫦娥奈九秋。七夕風濤還可渡，九秋霜露迴生愁。九秋七夕須臾易，盛年一去真堪惜。可憐揚彩入羅幃，可憐流素凝瑤席。未作當壚賣酒人，難邀入座援琴客。客心對此歎蹉跎，烏鵲南飛可奈何。江

頭商婦移船待，湖上佳人挾瑟歌。此時凭闌垂玉箸，此時滅燭斂青蛾。玉箸青蛾苦絨怨，絨怨含情不能吐。麗色春妍桃李蹊，遲輝晚媚菖蒲浦。與君相思在二八，與君相期在三五，空持夜被貼鴛鴦，空持暖玉擎鸚鵡。青衫泣掩琵琶絃，銀屏忍對篋篋語。篋篋再彈月已微，穿廊入闥靄斜暉。歸心日遠大刀折，極目天涯破鏡飛。

此篇詞彩穠麗，音律婉諧，而未極秀朗，於景明爲變格，乃極意摹唐四傑者。其它歌行如《聽琴》、《獵圖》、《送徐少參》、《津市打魚》諸篇，深得少陵之髓，特以秀色掩之耳。

景明與夢陽書曰：「僕嘗謂詩文有不可易之法者，辭斷而意屬，聯類而比物也。上考古聖立言，中徵秦漢緒論，下采魏晉聲詩，莫之有易也。夫文靡於隋，韓力振之，然古文之法亡於韓。詩溺於陶，謝力振之，然古詩之法亦亡於謝。」而夢陽則應之曰：「假令僕即今爲文一通，能辭不屬，意不斷，物聯而類比矣，然於中情思澀促，語險而硬，音節生拗，質直而麓，淺譏露骨，爰癡爰枯，則子取之乎？故辭斷而意屬者，其體也，文之勢也，聯而比之者事也，柔澹者思也，含蓄者意也，典厚者義也，高古者格也，宛亮者調也，沈著雄麗、清峻閒雅者，才之類也，而發於辭，辭之暢者其氣也，中和者氣之最也，夫然又華之以色，永之以味，溢之以音。是以古之文者，一揮而衆善具也。然其翕闢頓挫，尺尺而寸寸之，未始無法也，所謂圓規而方矩者也。然僕猶謂不證諸事，則空言不切，不切不信。夫子近作乖於法者，何也？蓋其詩讀之，若搏沙弄泥，散而不瑩；又麓者弗雅也，如《月蝕詩》、《妖遮赤道行》是也。然闊大者鮮把持，又無鍼綫。古人之作，其法雖多端，大抵前疏者後必密，半闊者半必細，一實者必一虛，疊景者意必二，此予之所謂法，圓規而方矩者也。沈約亦云：『若前有浮聲，則後須切響。一簡之內，音韻盡殊。兩句

之中，輕重悉異。」卽如人身以魄載魂，生有此體，卽有此法也。詩云：『有物有則。』故曹、劉、阮、陸、李、杜，能用之而不能異，能異之而不能不同。今人止見其異，而不見其同，宜其謂守法者爲影子，而支離失真者以含筏登岸自寬也。且仲默《神女賦》、《帝妃篇》、《南游日》、《北上年》，四句接用，古有此法乎？水亭菡萏，風殿薜蘿，意不一乎？蓋君詩徒知神情會處，下筆成章爲高，而不知高而不法，其勢如搏巨蛇，駕風螭，步驟卽奇，不足訓也。君詩結語太咄易。七言律與絕句等更不成篇，亦寡音節。『百年』、『萬里』，何其層見而迭出也？七言若剪得上二字，言何必七也？』卽此可徵何李之異趣焉。

宏正問，詩流特衆，然皆近逐李何。豐城熊卓字士選，壽張殷雲霄字近夫，寶應朱應登字升之，夢陽派也。吳縣顧璘字華玉，亳州薛蕙字君采，信陽戴冠字仲鸞，孟洋字望之，景明派也。

徐禎卿雖服膺夢陽，然絕自名家。其與夢陽書曰：『古詩三百，可以博其源，遺篇十九，可以約其趨，（徐）府雄高，可以勵其氣，『離騷』深永，可以裨其思，然後法經而植旨，繩古以崇辭。』揆其塗逕，與夢陽不異。特夢陽才雄而氣盛，故恢張其辭；禎卿慮濬而思深，故密運以意。當時不能與夢陽爭先，日久論定，亦不與夢陽俱廢也。

禎卿少時，已工詩歌，多學六朝，旁參白居易劉禹錫。及見夢陽，初猶偶強，賦詩曰：『我雖甘爲李左車，身未交鋒心未服。』顧余多見不知量，此項未肯下頗牧。』既而夢陽詒以書曰：『僕竊謂足下過矣！夫詩，宣志而道和者也，故貴宛不貴險，貴質不貴靡，貴情不貴繫，貴融洽不貴工巧，故曰：『聞其樂而知其德。』故音也者，愚智之大防，莊誠簡侈浮浮之界分也。至元、白、韓、孟、皮、陸之徒出，始連聯鬪押，纍纍數千百言不相下，此何異於入市攫金，登場角戲也？三代而下，漢魏最近古。鄉使繁巧險虛之習，

誠貴於情質宛洽；而莊誼簡修浮乎，意義無大高下，漢魏諸子，不先爲之耶？」禎卿折服，遂變面目。是時李何並陳，未決雌雄。禎卿雄不及李，秀不及何，而風骨超然，遂成鼎足。咀六朝之精音，采初唐之妙則，其詩不專學太白，而髣髴近之。七言勝於五言，絕句尤勝諸體，《古宮詞》、《送蕭若愚》等作，雖龍標太白復生，何多讓焉。錄二首：

春思

渺渺春江空落暉，行人相顧欲沾衣。楚王宮外千條柳，不遣飛花送客歸。

送蕭若愚

送君南下巴渝深，予亦迢迢湘水心。前路不知何地別，千山萬壑暮猿吟。

禎卿未遇夢陽之時，先與祝允明、唐寅、文徵明善，號吳中四才子。允明與寅並以任誕爲世指目。寅詩類唐淺率，老益潦倒。而允明詩則取材頗富，造語亦妍，下擬晚唐，上薄六代，與禎卿別棄《鸚鵡編》、《花間集》風格差似，有《竹枝》、《楊柳》之韻。徵明詩則雅飭之中，時饒逸韻，自云：「吾少年學詩，從陸放翁入，故格調卑弱，不若諸君皆唐音也。」此所謂如人飲水，冷暖自知，皎然不誣其本志者矣。邊貢與李夢陽、何景明、徐禎卿並稱四傑，其詩才力雄健不及夢陽景明，善於用長，意境清遠，不及禎卿；而平淡和粹，能於沈穩處見其流麗，善於用短，而夷猶於諸人之間，以不戰爲勝者也。

楊慎以宰相子，文采照映，獨不在七子聲氣之中，而其詩含吐六朝，以高明伉爽之才，鴻博絕麗之學，隨題賦形，一空依傍；而於李何諸子之外，異軍特起。《南中稿》穠麗婉至，一集之勝。錄《柳》：

垂楊垂柳管芳年，飛絮飛花媚遠天。金距鬪雞寒食後，玉蛾翻雪暖風前。別離江上還河上，

拋擲橋邊與路邊。遊子魂銷青塞月，美人腸斷翠樓烟。

慎詩多用新事，工於設色，搜羅刻削，無出其右。而駢繪既繁，性情或盡，傳謂美能沒體，詩亦有之。此其蔽也。

楊慎以意度穠麗，冠絕當代。而祥符高叔嗣字子業、無錫華察字子潛、長洲皇甫冲字子浚，又以造詣古澹，駢駕一時。

高叔嗣初以詩受知於李夢陽，然擺脫窠臼，自抒性情，乃迥與夢陽異調，傳有《蘇門集》八卷（南京龍蟠里圖書館藏有明嘉靖刊本）。五言尤工，冲淡得韋蘇州體。錄《病起偶題》：

空齋晨起坐，倦游罷不適。微雨東方來，陰靄倏終夕。久卧不知春，茫然怨行役。故園芳草色，惆悵今如積。

叔嗣詩如空山鼓琴，沈思忽往，木葉盡脫，石氣自青。

華察亦以五言古詩風韻冲淡，欲追陶韋，傳有《巖居藁》，然垢氛已離，未穿溟滓。錄《惠山寺與施子羽話別》：

看山不覺暝，月出禪林幽。夜靜見空色，身閒忘去留。疏鐘隔雲度，殘葉映泉流。此地欲爲別，諸天暮生愁。

境事超詣，正復何減叔嗣。而叔嗣獨憔悴婉篤。

皇甫冲與弟濬、沆、濂並有盛名，稱四皇甫。而冲傳有《華陽集》，其詩源出韋柳，兼取材於潘、左、江、鮑，清音亮節，無一點纖濃之習，高叔嗣、華察而外，無有及之者。錄《維摩寺雨坐》：

回嶺無仄徑，陟岡有夷壤。展眺入空濛，游心益昭朗。長風吹輕衣，飄搖翠微上。古寺迷夕煙，明燈淡綃幌。冥雨從東來，驚雷自西往。林樹忽不見，但聞山澗響。景寂非避喧，心瑩乃成賞。爲禮沉疴蹤，因之知幻象。

絕去雕藻，益臻道亮。此則超絕風氣，而自樹幟於李何之外者焉。

第四節 李攀龍 王世貞 宗臣 謝榛

王李七子紹述何李，而李攀龍爲之倡，極爲王世貞所推，至謂「文許先秦上，詩卑正始還」，譽過其實。攀龍乃居之不疑。今觀其詩，古樂府及五言古體，臨摹太過，痕迹宛然。七言律及七言絕句，高華矜貴，脫棄凡庸，而七言律人所共推，心摹手追者，王維李頎也。錄二首：

秋杪登太華山絕頂

縹渺真探白帝宮，三峯此日爲誰雄？蒼龍半掛秦川雨，石馬長嘶漢苑風。地敞中原秋色盡，天開萬里夕陽空。平生突兀看人意，容爾深知造化功。

寄王元美

薊門城上月婆娑，玉笛誰爲出塞歌？君自客中聽不得，秋風吹落小黃河。

七言律已臻高格，未極變態。七言絕句有神無迹，語近情深，故應跨越餘子，爲集中之冠。

嘉靖七子，王世貞才氣十倍李攀龍，惟病在愛博，自珊瑚木難以及牛溲馬勃，無所不有。樂府變化，奇奇正正，推陳出新，遠非攀龍生吞活剥者可比。律體高華，絕亦典麗，雖鍛煉未純，不免華瞻之

餘，則露淺率，亦未遽出攀龍下也。當日名雖七子，實則一雄，其自述曰：「野夫興就不復刪，大海迴風吹紫瀾。」言雖大而非夸。錄二首：

戰城南

戰城南，城南壁，黑雲壓我城北。伏兵搗我東，遊騎抄我西，使我不得休息。黃塵合匝，日爲青，天模糊。鉦鼓發，亂譁呼。胡騎斂，颶迅驅。樹若薺，草爲枯。啼者何？父收子，妻問夫。戈甲委積，血淹頭顱。家家招魂入，隊隊自哀呼。告主將，主將若不知，生爲邊陲士，野葬復何悲。金中食，午未炊。惜其倉皇遂長訣，焉得一飽爲。野風騷屑魂依之，曷不親主將高牙大纛坐城中，生當封徹侯，死當廟食無窮。

陵祀

松楸何不極，複道見行宮。劍珮千官月，橋陵萬馬風。地迴山盡拱，雲合樹俱雄。白首先朝事，傷心涕淚中。

世貞詩唱盛唐，然其詩亦有清透似宋人者。余愛其《短歌》數句云：「不必名山藏，不必千金懸。歸去來，一壺美酒抽一編，讀罷一枕牀頭眠。天公未喚債未滿，自吟自寫終殘年。」又《棄官》云：「人生求官不可得，我今得官何棄之？六月繡襦黃金垂，行人拍手好威儀。與君說苦君不信，請君自衣當自知。」《明史》本傳稱世貞論詩，呵叱宋人，晚年臨終猶手握《蘇子瞻集》。此二詩果似子瞻。

嘉靖七子之有宗臣，猶徐禎卿之於何李。詩才秀爽，與王李同聲氣而不同格調。錄《登雲門諸山》：

山頭月白雲英英，千峯倒插千江明。手把芙蓉步石壁，蒼翠亂射猿鳥驚。誰其雲外吹紫笙，欲來不來空復情？天風吹我佩蕭颯，恍疑身在崑崙行。

其詩跌宕俊逸，頗能取法太白，而自入七子之社，漸染習氣，日以窘弱。然天才婉秀，吐屬風流，究無剽剽填砌之習，本質猶未盡漓也。

七子結社之初，尚論有唐諸家，茫無適從。謝榛以布衣執牛耳，主選十四家詩，讀熟之以奪神氣，申詠之以求聲調，玩味之以哀精華，得此三要，造乎渾淪，不必塑謫仙而畫少陵。李攀龍極推之，贈詩曰：「謝榛吾黨彥，咄嗟名士籍。遂令清廟音。乃在褐衣客。」既而布衣高論，不爲同社所安。攀龍乃遺書絕交，而其稱詩之旨要，皆自榛發，諸人實心師其言也。榛近體工力深厚，句響而字穩。七子之流，莫之與京也。錄二首。

榆河曉發

朝暉開衆山，遙見居庸關。雲出三邊外，風生萬馬間。征塵何日靜，古戍幾人閑？忽憶棄襦者，空慚旅鬢斑。

有感

薄伐原中策，論兵自古難。漢唐頻拓地，將帥幾登壇。絕漠兼天盡，交河蕩日寒。不知大宛馬，曾復到長安。

榛五言近體，句烹字鍊，氣逸調高，當與李攀龍七言，駢稱七子之冠云。七子中，徐中行、吳國倫咸工律絕。大抵七子可厭者，擬古樂府之生吞活剥耳。五古亦鮮真詣。七古高亮華美之作，自爲可愛。至於

七律七絕，則虛實開合，非僅浮聲爲貴。如謂其用字多同，格調若一，則又不盡然；觀其隨物賦形，古渾可掬，何嘗不典且麗？至詩中常用好字，本自不多。陶、謝、韋、杜、王、孟諸公，無論何家，一集之中，比而觀之，多有雷同，較其直際，亦不數見。則亦無事苛繩於七子矣。

第五節 袁宏道 高攀龍

王李七子之派，極王而厭。徐渭欲以李長古體變之，不能也。臨川湯顯祖欲以南宋四家尤、楊、范、陸體變之，不能也。長洲王穉登、吳江王叔承、鄞縣屠隆雖迭有違言，然壁壘不張，均未足以相代。於是三袁兄弟起而乘之，其論詩以爲：「唐自有古詩，不必選體。中晚皆有詩，不必初盛。歐、蘇、陳、黃各有詩，不必唐人。唐詩色澤鮮妍，如旦晚脫筆硯者；今詩纔脫筆硯，已是陳言，豈非流自性靈，與出自剽擬所從來異乎？」一時聞者渙然神悟，若良藥之解散，而沉疴之去體也。宗道首出，既以白蘇名齋而導其源。宏道、中道繼之，流波大暢，遂有公安體之目。而宏道最爲白眉，中郎之名獨著。白蘇詩以容易出清真，自有神采，厥旨淵放，使人忘其鄙近。而宗道則頽波自放，舍其高潔，專尚鄙俚，作法於涼，後將何觀，此則宗道之失也。惟宏道清新輕雋，時有合作。錄二首：

橫塘渡

橫塘渡，郎西來，妾東去，感郎千金顧。妾家住紅橋，朱門十字路，認取辛夷花，莫過楊柳樹。

妾薄命

落花去故條，尚有根可依。婦人失夫心，含情欲告誰。燈光不到明，龍極心還變。只此雙蛾

眉，供得幾迴盼。看多自成故，未必真衰老；譬彼盛開花，不若初生草。

其集中詩亦時涉俳諧調笑，如《西湖》云：「二日湖上行，一日湖中坐。一日湖上住，一日湖上卧。」《偶見白髮》云：「無端見白髮，欲哭反成笑。自喜笑中意，一笑又一跳。」《嚴陵釣臺》云：「人言漢梅福，君之妻父也。」其弟中道爲之說曰：「吾兄《錦帆》、《解脫》等集，意在破人執縛，間有率意游戲之語。或快爽之極，浮而不沈；情景太真，近而不遠；要出自性靈，足以蕩滌塵坌。」學者不察，效顰學語，其究爲俚俗，爲纖巧，爲莽蕩；烏焉三寫，弊有必至，非中郎之本旨也。中道才遜中郎，而雅飭過伯氏，傳有《珂雪齋集》二十四卷。

無錫高攀龍字雲從，理學大儒，與三袁同時，其爲詩亦尚清真，而沖澹入古，不事俳佻，足拔戟自成一隊。傳有《高子遺書》十二卷，其第六卷，則詩也。錄二首：

夏日閒居

長夏此靜坐，終日無一言，問君何所爲，無事心自閒。細雨漁舟歸，兒童喧樹間。北風忽南來，落日在遠山。顧此有好懷，酌酒遂陶然。池中鷗飛去，兩兩復來還。

夜步

幽人夜未眠，月出每孤往。繁林亂螢照，村屋人語響。宿鳥時一鳴，草徑露微上。欣然意有會，誰與共心賞。

無心學陶，天趣自會，以視公安之俳俚雜出者，何啻雅俗之別。然後知滌王李之富麗，而返正始之元音者，當在此而不在彼也。

第六節 鍾惺 譚元春 陳子龍

鍾惺與譚元春評選唐人之詩爲《唐詩歸》，又評選隋以前詩爲《古詩歸》，風行一時，幾於家絃戶誦，而竟陵派之名以起。蓋承前後七子藻麗齷齪皇之後，所選《唐詩》，專取清瘦淡遠一路。其人人所讀，若李太白之《古風》，杜少陵之《秋興》、《諸將》，皆不入選。公安以輕俊矯王李之縛重，而竟陵以幽冷洗王李之絢爛，所謂厭芻豢，思螺蛤也。盛名之致，會當其時，纖鉅高卑，視所成就。要亦秉其夙悟，運以苦思，執專門之巨規，樹並時之壁壘。而小道易泥，欹器懼盈，於詩學雖不甚淺，而他學問實未有得，故說詩既不能觸處洞然，自不能拋磚落地，往往有「說不得」「不可解」等評語，內實模糊影響，外似超超玄箸，雖驚流俗之觀，益來識者之詬。根本不實，窪水卽乾，吹毛索癢，遂無全體。然極可醫庸庸之病。而惺生當晚明，復爲黨論所擠，當時以大行擬科，忽出而爲南儀曹，志節不舒，而不肯起熱，「冷」之一言，其詩文、其學行皆主之。平日究心經史，《莊》《騷》，以官爲隱，以讀書爲官，其人其品實不可及。而其詩有《隱秀軒集》分三十三集，其手近隘，其心獨狠，要是著意讀書人，可謂之偏枯，不得目爲膚淺。其於師友骨肉存亡之間，深情苦語，令人酸鼻，則又未可以一「冷」字抹煞。大抵惺之詩，如橘皮橄欖湯，在醉飽後，洗滌腸胃最善，飢時卻用不得。然當其時，天下文章，酒池肉林矣，那得不推爲俊物也。錄二首。

上巳雨登雨花臺

去年當上巳，小集寇家亭。今昔分陰霽，悲歡異醉醒。可憐三月草，未了六朝青。花作殘春雨，春歸不肯停。

巴東道中示弟姪

山中未必雨，雲起已生愁。峽窄天多暮，江高地易秋。連朝皆陟嶺，茲路獨臨流。欲畫瞿塘勝，歸途定覓舟。

幽深孤峭，手眼別出。而情性所縛，時有名理，山水所發，彌見清思。惟才小氣窄，體輕腹陋，意鄰淺直，格固卑寒，故爲不了之語，每涉鬼趣之言，故或片語可稱，全篇尠取，此其蔽也。然惺爲人嚴冷，不喜接俗客，湖海之聲氣未廣。籍譚元春應和之，派乃盛行。而元春才不如惺，詩爲幽峭則一，傳有《嶽歸堂集》十卷。錄二首。

夜次陽邏同夏平尋山

靜人真可偕，高趣脫無逆。人家殘漲後，初乾沙紋迹。軟步過秋草，寂寂林下宅。宅邊如有徑，諒爲茲山闕。微茫犬吠巔，向下人聲積。高處天地靈，長江動空碧。一燈磬杳然，嶺爲溪所隔。不必詣其所，惆悵亦有獲。

遊九峯山

衆山作寺圍，羣松作山護。纏綿青翠光，山欲化爲樹。根斜卽倚磴，枝隙已通路。陰雲貫其下，常令白日暮。藤刺裹山巔，飛鳥慎勿度。

模山範水，特工五言，朗秀處似王右丞，險健處似孟東野。其病在時涉俳俚，鍾字複意，不免間出，作枯窘寒儉相，又往往上下語不相應。如能芟去蕪枝，迴然孤秀，亦復何減古人。然竟陵之體靡天下，而後進之學者，大江以南更甚，得其形貌，遺其神情。有賈島之苦僻，無孟郊之堅蒼，以寂寥言精練，以寡約

言清遠，以俚淺言沖澹，以生澀言新裁。篇章字句之間，每多重複，稍下一二助語，輒以號於人曰：「吾詩空靈已極。」空則有之，靈則何曾，見斥藝林，蓋有由已。然而非鍾譚之罪也。

歙縣程嘉燧，字孟陽，亦不爲何、李、王、李者，詩亦娟秀少塵，而不免纖窳，著有《松圓浪淘集》。錢謙益深懲何、李、王、李流派，乃於明三百年中，特尊之爲詩老。然格調極卑，時涉穢俚，近體多於古風，七律多於五律，才庸而氣弱，固卑之無甚高論矣。華亭陳繼儒字仲醇，以處士虛聲，傾動朝野，傳有《眉公集》，而纖詞浮語，更下《松圓》一等。

王李道盡，公安之派寢廣，竟陵之餓頓興，一時好異者講張爲幻。而有振七子之墜緒，返俚淺於茂典者，陳子龍也。實以沈博絕麗之才，領袖幾社。而同郡夏完淳字存古，髫齡崛起，如響斯應。譽之者謂其廓清榛蕪，力追先正；而詆之者則曰七子窠臼，徒爲虛囂。然以此結明三百年之詩局，而與開一代風氣之高啓，後先輝映，亦足以覘復古爲明文學之主潮，詩亦不在例外，所謂君以此始，亦以此終也。子龍有《白雲草廬居》、《湘真閣》諸稿，尤工七言古。錄二首。

小車行

小車斑斑黃塵晚，夫爲推，婦爲挽。出門何所之？青青者榆療吾飢，願得樂土共哺糜。風吹黃蒿，望見牆宇，中有主人當飼汝。叩門無人室無釜，蹣跚空巷淚如雨。

邊詞

大同女兒顏如花，十五學得箏琵琶。莫向中宵彈一曲，清霜明月盡思家。八城亦是古遼西，大纛高牙萬馬齊。壯士錦衣行樂地，十年無夢到春閨。

子龍七古跌宕自喜，取藻於六朝四傑，而出入太白昌谷。所惜鋪敘華縟，動出一軌，不免與七子同譏，又時雜以豪邁耳。然子龍之詩，不脫王李之窠臼，而子龍之詞，則直造唐人之奧宇。詞至南宋之季，幾成絕響，知比興者，元張翥之《蛻巖詞》而已。明初作者，猶承張翥之規，不乖於風雅。永樂以後，南宋諸名家詞，皆不顯於世，盛行者爲《花間集》、《草堂詩餘》二選。楊慎王世貞輩之小令中調，猶有可取，長調皆失之俚。惟陳子龍之《湘真閣》、《江籬檻》諸詞，風流婉麗，足繼南唐後主，則得於天者獨優也。觀其所作，神韻天然，風味不盡，如瑤臺仙子。獨立卻扇時，而《湘真》一刻，晚年所作，寄意更綿邈悽惻，言內意外，已無遺議。故附論之。

第三章 明曲

曲，有雜劇，有傳奇。明代詩文與宋元異，而明曲亦與元曲異，大抵由俗而文，用夏變夷。雜劇極盛於元。南戲繼起有明。而原南戲之興，當在宋光宗朝，永嘉人作《趙貞女》、《王魁》二傳，實爲首唱。或云：宣和間已有萌芽，至南渡時，則盛行，號曰永嘉雜劇。其文字卽本宋人詞，而益以里巷歌謠，不協宮徵。至元時雜劇蔚興，南戲衰熄。迨高則誠《琵琶記》出，盡洗胡元古魯兀刺之風，而易之以纏綿頓宕之聲，明太祖亟稱焉，於是海內嚮風，別名爲南曲，以元套雜劇爲北曲，而相驂斬。此一時也。澈川楊康惠公梓在元時，得貫雲石之傳，嘗作《豫讓》、《霍光》、《尉遲敬德》諸劇，流傳宇內，與中原絃索抗行。而公子國材，復與鮮于去矜交遊，以樂府世其家，總得南聲之祕奧，別創新音，號爲海鹽調；西江兩京間翕然和之。此一時也。徐渭著《四聲猿》雜劇，中《女狀元》一劇，獨以南詞作之，破雜劇定格。而太倉魏良輔，崑山梁辰魚以善謳名吳中。良輔探討聲韻，坐卧一小樓者十餘年，考訂《琵琶記》板式，造水磨調。辰魚作《浣紗記》付之，流麗穩協，天下始有清音，號曰昆曲，歷世三百，莫不頰首傾耳，奉爲雅樂。然梁辰魚以南詞負盛名，北劇亦雅擅場，而所爲《紅線》一劇，賓白科段，純爲南態，所異者，止用北詞耳。此又一時也。明之中葉，雜劇亦用南詞，傳奇間取北曲者，此又事之變也。不可繩之以法也。大抵元詞以拙樸勝，明則妍麗矣。元劇排場至劣，明則有次第矣。故曰明曲與元曲不同也。吾友吳瞿安先生梅有專書備論之，茲不具述。而要刪其指以備一格。大抵明文之異於宋元者，排唐宋以力追秦漢也。

明詩之異於宋元者，排宋元以還之漢、魏、盛唐也。明曲之異於元曲者，排胡音以還我夏風也。要之反本修古，不忘其初而已矣。

第四章 明八股文

第一節 總論

八股文，亦名《四書》文。《四書》文者，以命題言之也。八股文者，以體制言之也。或稱帖括，即唐帖經。亦名經義，即唐墨義。顧唐人帖經，猶今默寫經書，無文詞之發，非八股文比。而明之八股文，排比聲調，裁對整齊，即唐人所試之律詩、律賦，貌雖殊而其體則一也。亦稱時文，則對古文而言。其初宋仁宗篤意經學，王安石請興建學校，因言：「學者專意經術，庶幾可以復古。」於是改取士之法，罷詩賦、帖經、墨義，士各占治《易》、《書》、《詩》、《周禮》、《禮記》一經，兼《論語》、《孟子》，每試四場，初大經，次兼經，大義凡十道，後改《論語》、《孟子》義各三道，命中書撰大義式頒行。王安石奮筆爲之，存文十篇，或謹嚴峭勁，附題詮釋，或震盪排募，獨抒己見，一則時文之祖也，一則古文之遺也。眉山蘇氏父子，亦出其古文之餘，以與安石抗手，然皆獨據偉論，不沾沾於代古人語氣。其代古人語氣者，自南宋楊萬里始。此則《四書》文所由昉也。第北宋只《論語》、《孟子》命題，不及《大學》、《中庸》，有之，當在南渡以後。朱子嘗爲私議，欲罷詩賦，而分諸經、子史、時務之年。諸經以子午卯酉四科試之，皆兼《大學》、《論語》、《中庸》、《孟子》義一道。元仁宗皇慶二年，中書省臣奏科舉事，專立德行明經之科，乃下詔及條目頒行，出題用《四子書》。明初卽制國學，每月試經書義各一道。洪武三年八月，京師及各行省開鄉試，初場《四書》疑問，本經義，及《四書》義各一道。諸生應試之文，通稱舉業，《四書》義一道，二百字以

上，經義一道，三百字以上，取書旨明哲，不尚華采，其命題專取《四子書》及《易》、《書》、《詩》、《春秋》、《禮記》五經，遂爲定制。然英宗天順以前，舉業之文亦不過敷衍傳註，或對或散，初無定式。而憲宗成化以後，始爲八股。其法：截本題爲兩截，每截作四股，每四股之中，一反一正，一虛一實，一淺一深。其兩扇立格，則每扇之中，各有四股，其次第之法亦如之，故謂之八股。而未入口氣以前，先以破題，次以承題，篇末敷衍聖人言畢，自據所見，或數十字，或百餘字，謂之大結，可以發揮時事。以後功令益密，恐有藉以自衛者，但許言前代，不及本朝，大結無可發揮，止三四句而已。明初舉業文多散佚。開國會元，首推黃子澄。而成祖時，登第者，則于謙、薛瑄，差有傳作。謙英風飄發，瑄醇白無疵，各肖其人。英宗嗣位，商輅、陳獻章、岳正、王恕蟬聯鵲起。及邱濬教習國子，人材蔚起，乙未主試，冠會榜者王鏊、魁大廷者謝遷，則濬之有以樂育之也。其時李東陽屢掌文衡，振起之功，亦復不少。羅倫、章懋、林瀚、吳寬諸人，雲蒸霞蔚，濟濟盈門，而林瀚之文，談理真實，而行之以繁重紆曲，吳寬則春容大雅，不動聲色，尤文之以養勝者。然稱爲斯文宗主，則首推王鏊，雖謝遷之清剛古樸，不讓於鏊，究不若其神完氣足，理法純備也。至孝宗弘治庚戌，錢福會榜第一，因而王鏊並稱。其後冠會榜者，惟董祀可與二家鼎足而立。大抵王翺長於論議，錢福善於刻畫，而祀則遊行理窟，自成大家，非他人所可及，亦非識者莫能辨。故王錢文易讀，而祀文難讀，王錢體正大，祀格孤高。王錢之後，衍於唐順之，終明之世，號曰元燈。而祀之文，其傳遂絕，三百年間無問津者。今讀其文，神骨高騫，絕似古文之韓愈，知其用功者深也。唐順之傳王鏊之法，而運以唐宋古文雄肆之氣，以世宗嘉靖己丑得雋會榜，遂冠絕諸家，蓋其於經史子集，靡不貫通，而融裁之以八股文字。渾灝流轉，品獨高絕。而瞿景淳又以精確沖夷，別樹一幟。

合之王、錢、唐三人，因有四家之目。薛應旂貫通六經，發而爲文，如金出冶，如玉離璞，光芒煥發，遂有退錢而進薛以合王唐瞿爲四家者。而究其以古文爲時文，使天下復見宋人經義之舊者，則惟歸有光之功獨稱茂焉。王鑒善用偶。有光善用奇。有光宗法在錢，而名理過之。觀其高古，則秦漢也，其疏暢排宕，則唐宋八家也，而其法律精嚴，於題位不溢不漏，則又爲時文之大宗，而跌宕磅礴，看似散行，細玩乃見其股法之變，實有明一代八股文大宗也。其後胡友信相繼而起，則又家數純似王鑒，而出以浩氣，不爲鑒之熟圓。或以友信與有光追配王唐，所謂王、唐、歸、胡者也。茅坤與唐順之講貫，善挾古人之奧，以太史公爲師，以韓、柳、歐、蘇爲友，而施之舉業，亦爲別調獨彈。艾南英論舉業首推歸有光，繼又以坤爲上，二說相持未定。要之有光文固涵蓋一世，而古雅溫醇，坤亦何遽不相及也。乃至神宗萬曆一變而爲陵駕，再變而爲斷削。降逮熹宗天啓，文章削薄已極。一時轉移風氣，豫章四家之力爲多。陳際泰文最奇橫，如蘇海韓潮。章世純幽深勁鸞，如龍蟠蛟起。羅萬藻清微澹遠，如疏雨微雲。而艾南英則所謂公輪運斤，指揮如意，師曠辨音，纖微必審者也。世人翕然歸之，稱爲章、羅、陳、艾。大抵天啓之文，深入而失於太苦。崇禎之文，暢發而又嫌太盡。獨金聲崛起爲雄，幽深矯拔，力退古初。而陳子龍清奇冷雋，取材於韓非、《八姦》、《五蠹》、《說難》、《孤憤》諸篇，而運以魏晉風藻，故足別開生面者也。自科舉廢而八股成絕響，然亦文章得失之林也。明賢挾發理奧，洞明世故，往往以古人爲時文，借題發揮，三百年之人文繫焉。吾友吳瞿安先生嘗言：「明代文章，止有八比之時文，與四十齣之傳奇，爲別創之格。」（語見《顧曲塵談》）吾友既備論曲學矣，獨八股文闕焉放廢。遂爲明其流變，著其名家，以俟成學治國聞者有考焉。

第二節 黃子澄 姚廣孝

分宜黃子澄名湜，以字行，洪武十八年會試第一。首題爲《論語》：「天下有道，則禮樂征伐自天子出」，其文章莊重典雅，自來著錄八股文者，以此爲臺閣文字，開國之冠。其辭曰：

治道隆於一世，政柄統於一人。夫政之所在，治之所在也。禮樂征伐，皆統於天子，非天下有道之世而何哉！昔聖人通論天下之勢，首舉其盛爲言，若曰：「天下大政，固非一端，天子至尊，實無二上。」是故民安物阜，羣黎樂四海之無虞，天開日明，萬國仰一人之有慶。主聖而明，臣賢而良，朝廷有穆皇之美也，治隆於上，俗美於下，海宇皆熙皞之休也。非天下有道之時乎！當斯時也，語離明，則一人所獨居也；語乾綱，則一人所獨斷也。若禮若樂，國之大事，則以天子制之，而掌於宗伯，若征若伐，國之大柄，則以天子操之，而掌於司馬。一制度，一聲容，議之者天子，不聞以諸侯而變之也；一生殺，一予奪，制之者天子，不聞以大夫而擅之也。皇靈丕振，而堯封之內，咸懷聖主之威嚴，王綱獨握，而禹甸之中，皆仰一王之制度。信乎非天下有道之盛世，孰能若此哉！

時未立試牘科條，雍容掄揚，頗涉頌體。而收縱之機，浩蕩之氣，呵成一片，元氣渾圖。亟應首錄以存舉業之河源。其直射本題下文「諸侯」「大夫」字樣而不爲侵下，亦可知當日格式尚寬也。

長洲姚廣孝，爲僧，名道衍。洪武中，詔通儒書僧試禮部，不受官。以僧服與謀人家國，佐成祖起兵。而爲《大學》「所謂誠其意者，毋自欺也，與惡惡臭，與好好色，此之謂自慊，故君子必慎其獨也。小人閒居爲不善，無所不至，見君子而後厭然，揜其不善而著其善，人之視己，如見其肺肝然，則何益矣。

此謂誠於中，形於外，故君子必慎其獨也」題文。至云：「雖以聖人帝王，而不能無雜霸之心。即不能無盜蹠之心」，語奇闢未經人道，亦可見心術形於文章，有不自掩者。其辭曰：

誠意之功在獨，非慎不可也。夫不慎獨，則意得欺之，此君子而小人也。蓋聞明德以天下爲體，然每爲天下之念所昏。聖經以致知言誠意而求端於格物，此有深意焉。夫所格者何物也？若曰：一人明德耳，何爲天下國家之皆貫其間，則必有爲人一念欺吾初心，是與小人之不格物者一也，如何修身然後齊治平皆在其間，又有求人一念並欺我知，是與小人之不能致知者一也。凡好惡發於赤子之真，皆可通之天下，此聖賢之意，亦帝王之意自慊也；凡好惡爲天下而飾，即非赤子之真，此雜霸之意，即盜蹠之意自欺也。雖以聖人帝王，而不能無雜霸之心，即不能無盜蹠之心，故君子必慎其獨也。慎之何如？時時格物，則時時致知矣。小人惟致知格物之間，略有不慎，而求之天下。聖人王者方持大鑑以照心中之盜蹠，而天下之盜蹠，皆入其鑑，此小人之所以不免也。嗟乎！小人亦誤求之天下之間，而失之於先後焉者也。其害如此，可不慎哉！惟慎，故格物致知，格物致知，正慎也，此明明德也；誠意者可不知哉！

雋桀廉悍，其氣卓犖，自與黃子澄之雍容掄揚不同。然一渾雅，一奇警，雖規模粗具，而氣象岸異，大樸不凋，可以概見。世論多以八股文代古人語氣，未易見抱負，然非所論於豪傑。而明賢借題發揮，往往獨抒偉抱，無依阿洶忍之態，如姚廣孝之放言不顧，其一例也。又如錢唐于謙字廷益，遭逢國變，主虜寇深，而扶危定傾，措置若定，然亦蘊之有素。觀其爲孟子「不待三。然則子之失伍也亦多矣」題八股文，起講云：「且國家之倚重者有二：遇戰鬪，則用介冑之士。遇緩靖，則用旬宣之臣。故兵法嚴，則士

奮勇。吏治肅，則官効職。人君以馭兵之法馭臣，則吏治精矣。人臣以死綏之義死職，則官職當矣。」而後幅則曰：「一失伍，則執而論之有司，何至於再。再失伍，則縛而僇之於社，何至於三。蓋有死無犯，軍之善政也。信賞必罰，國之大經也。此大夫之所素明也。今子蒞官以來，所謂奉職循理者安在？其於急事，不啻再矣，豈士以賤刑，官以貴貸耶？由子曠官以來，所謂省愆訟過者安在？擬之以失伍，亦已多矣，豈士不致於再，官不憚其多耶？」辣手鐫文章，天下逃將曠官，一齊膽破。心存開濟，吐言天拔，其素所蓄積也。亦何嫌於舉業之消磨志氣哉？無亦志氣之自不振耳。

第三節 唐順之 歸有光

吳縣王鏊，字濟之，少善八股文，及貴顯，數典鄉試，程文魁一代。八股文之有鏊，如詩之有杜甫，古文之有韓愈。前此風會未開，鏊無所不有，後此時流屢變，鏊無所不包。前人語句，多對而不對，參差灑落，雖頗近古，終不如鏊裁對整齊，機調熟圓，爲舉業正法眼藏。若乃手眼別出，我行我法，而以古文爲時文，於熟圓出蒼堅者，則自唐順之倡之也。如《孟子》「子莫執中，執中爲近之。執中無權，猶執一也」題文曰：

時人欲矯異端之偏，而不知其自陷於偏也。蓋不偏之謂中，而用中者權也。子莫欲矯楊墨之偏而不知權焉，則亦一偏而已，此孟子斥其弊以立吾道之準也。且夫吾道理一而分殊，而爲我之與兼愛，固皆去道甚遠者也。吾道以一而貫萬，而執其爲我與執其兼愛者，固皆執一而不通者也。於是有子莫者，知夫楊墨之弊，而參之於楊墨之間，以求執乎其中焉。蓋曰：其子子然以絕物如楊

子者，吾不忍爲也，但不至於兼愛而已矣；其煦煦然以徇物如墨子者，吾不暇爲也，但不至於爲我而已矣。自其不爲爲我也，疑於逃楊而歸仁；自其不爲兼愛也，疑於逃墨而歸義。子莫之於道，似爲近也；然不知隨時從道之謂權，以權應物之謂中；而楊墨之間，非所以求中也。徒知夫絕物之不可，而不知稱物以平施，則爲我固不爲也，而吾道之獨善其身者，彼亦以爲近於爲我而莫之敢爲矣。徒知夫徇物之不可，而不能因物以付物，則兼愛固不爲也，而吾道之兼善天下者，彼亦以爲近於兼愛而莫之肯爲矣。雖曰將以逃楊也，然楊子有見於我，無見於人，而子莫有見於固，無見於通，要之均爲一曲之學而已，知周萬變者果如是乎？雖曰將以逃墨也，然墨子有見於人，無見於我，而子莫有見於迹，無見於化，要之均爲一隅之蔽而已，泛應不窮者果如是乎？夫爲我，一也，兼愛，一也，故楊墨之爲執一易知也。中，非一也，中而無權，則中亦一也，故子莫之爲執一難知也。非孟子辭而闕之，則人鮮不以子莫爲能通乎道者矣。

其文內堅凝而外渾厚，如一筆書成，而曲折相生，反正相顧，平舒疊幻，如山川之出雲，而其實熟極生巧，故能神明於王鑒之矩矱以自出變化。大抵舉業之文，體氣至王鑒而正，規模至順之乃大。順之有自爲詩云：「文人妙來無過熟，書從疑處更須參」，此順之自道其所得也。其舉業文，縱放出東坡，拗峭毀荆公，放而能收，散而能斂，一開一合，規矩出神明，凡八股文兩扇中作一組遙對，始自順之。

歸有光亦以古文爲時文，古文出歐陽修，而舉業則取選於蘇氏父子，肆之爲恢闔，澤之以經史，融裁古人語，渾如己出，實大聲闐，駕順之而出其上。如《孟子》：「天子一位，公一位，侯一位，伯一位，子男同一位，凡五等也。君一位，卿一位，大夫一位，上士一位，中士一位，下士一位，凡六等」題文曰：

大賢詳周室班爵之制，內外各有其等也。夫爵者，先王所以列貴賤也，內外異等，而天下之勢成矣。且夫有天下者不以其私，而選賢與能以與天下共焉，茲明王所以奉若天道者也，而制盡於成周矣。自其通於天下者言之，蓋無所不統謂之天子，天子無爵也，而爵之所尊也，六合之內，無以加矣。於是乎天子端冕於內，六服承辟於外，錫之命而重藩翰之寄，胙之土而同帶礪之盟。公也，侯也，伯也，各一位也，名異而等不同也；子也，男也，同一位也，名異而等不異也；合之凡五等矣。要之先王非私天下而相與爲賜也，顧寰宇之廣，億兆之衆，苟非聞見之所及，則智慮有所不周，而天下之情，必有壅而不通者矣。故爲之衆建諸侯，而使之錯壤以居，以大彌成之義，而內外相統，遠近相維，則運臂使指之勢以成，而五服之長，外薄四海矣。然則有天子必有諸侯，有諸侯必有公侯伯子男者，勢也，此先王所以聯屬天下而盡其大者也。自其施於國中者言之，蓋自天子至於子男，皆謂之君，君詔爵者也，而爵之所先也，域中之大，無以加矣。於是乎各君其國，則各統其臣，論官材而俾之咸熙庶績，亮天工而俾之弼予一人。卿也，大夫也，各一位也，官異而秩亦異也，上士也，中士也，下士也，各一位也，士同而品不同也，合之凡六等矣。要之先王非侈名號而相與爲榮也，顧委寄之重，幾務之叢，苟非耳目之所寄，則聰明有所不及，而天下之事，必有偏而不舉者矣。故爲之廣置官屬，而使之分職以治，以盡協恭之義，而上下相承，體統相係，則絲聯繩牽之勢以成，而九牧之長，卓成兆民矣。然則有君必有臣，有臣必有卿大夫士者，亦勢也，此先王所以經理一國而盡其細者也。是知合六等以治五等之國，合五等以一天下之勢，周室班爵之制，有如此者。

其爲文高視闊步，置身題外以寫題中，絕去時文束縛之苦，凡直起直落，承題不複破題，起講不複承題，是古文佳境，惟有光能之。後德清胡友信與齊名，世並稱歸胡。友信亦博通經史，沛然出之，無事長篇大論，局斂而氣自開拓。

第四節 陳際泰 艾南英

嘉靖以前，如王、唐、歸、胡，文以實勝。而隆慶、萬曆以後，文以虛勝。嘉靖文轉處皆折，隆、萬始圓，圓機，鄧以讚開之也。嘉靖文妙處皆生，隆、萬始熟，熟調，許癡開之也。圓之極而趨於薄，熟之極而入於腐，艾南英深嫉之，起於江西，與同郡章世純、羅萬藻、陳際泰以興起斯文爲己任，乃刻四人所行之世，以開天、崇兩朝清剛警卓之風，而結有明三百年八股之局，世翕然稱豫章四家。而臨川陳際泰，字大士，積健爲雄，返虛入渾，萬流景仰，尤爲絕出。際泰產於貧家，常借鄰人書讀之，不受師傅，卒成大家。其學無所承藉，一覽數行，手口耳目並用，質甚奇，日搆數十藝，作文盈萬，才甚捷，變通先輩，自爲面目，法甚高。爲諸生時，所作文徧天下，士大夫皆願與交。有以《四書》疑義質者，輒口占以示，即未成章，或二股，或四股，出沒縱橫，每多精義，後遂集爲《四書讀》。其稿中一題數義者甚多，如《孟子》「充類至義之盡也」題文凡五篇，一氣銜接，意境如轆轤之相引，舉業家以此爲直接賈誼《過秦》三論、柳宗元《西山八記》，分之則一篇自爲首尾，合之則數篇自爲首尾。時文之快且多，無有如陳際泰者。錄《大學》「欲齊其家者先修其身」題文曰：

家取則於身，故君子謀所以齊之者焉。夫以不德之身，強行於物，即家且先格矣，豈能齊乎？

且夫家之難齊，甚於國之難治也。所謂甚於國者有二：國者，威權之所可馭也，用恩之地，而威權之分失矣；國者，耳目之所不接也，匿就之人，而耳目之際真矣。威權不得而施，則反其道乃可以相易，耳目不得而匿，則益其事乃足以相當。其必先修身乎！一家之中，其爲賢不肖者，不一而足，齊之者將使人人有士君子之行，夫狹邪淫比，禁之而不止者，無術以主之也；吾修吾身，言必稱先王，動必稽古昔，則作事可法，而無自恣其偷越之思，故其子弟之教，不肅而成。一家之中，其愛惡相攻者，亦不一而足，齊之者將使人人有柔禮度義之意，夫詬誶羣陵，調之而愈禁者，無道以御之也；吾修吾身，情欲之感無介乎儀容，晏安之私不形於動靜，則用情正大，而無自開其偏溺之端，故其起伏之情，不劑而平。夫治家以和者，固不以乖戾致恩義之睽，而其弊或致於無節；治家以嚴者，固不以褻狎致婦子之嬉，而其弊或致於不樂。故齊家莫修身若也。身修，固去其和與嚴之名，而兼乎和與嚴之利者乎？蓋《關雎》、《麟趾》之休，本於文德，而風火利貞之義，究歸言行。然則欲齊其家者，其所先蓋可知矣！

際泰文於四家中最奇橫，如風發泉湧，免起鵲落，而此獨體質純茂，又變其平日縱橫跌宕，而一歸於經術。理題文，前此多直用朱熹《集注》以詰之，至際泰出，乃挹取羣言，自出精義，與相發明；故能高步一時，終莫之踰也。自言：「余文數變，然其意皆以一己之精神，透聖賢之義旨爲旨；而所獨得者乃在分股。前人定爲八股者，言之不已，而再言之，明爲必如是而後盡也。若每股合掌，則四股可矣。何必八股哉？而吾則對股與出股一字不同，對股既嚴而後出股不苟，然不合掌，又非於題外求不合掌也。文小至於一字不移，是八寸三分頭巾，隨人可戴也；病又不在世俗合掌下。必明於此，而後文始刻始尚，行

文之手始快。至於微遠以取致，博奧以取理，所謂加務善之，而所要不存焉。」

艾南英少負異才，倡其同志爲《四大家稿》，名動海內。而泛舟吳越間，以文贊者如雲，總束而庀於几。每當風日清美，縱棹明湖，酒酣興至，開評圈乙，出其甲者特置之艇尾。偵者得，走報各家曰：「某某文中選矣。」趨賀者傾間，筵宴累日，於時與選者，幾如登第之榮。而南英一老諸生，力肩斯文，裁成振作，一時風氣，遂爲所移。顧持論刻覈，亦以樹敵。復社爲太倉張溥、楊樞等所結，而宜興周鍾爲之長，嘗自鐫《經翼》諸選，比之咸陽國門之書。南英力譏貶之，語見所選《明文定》中。然以文論，南英文無一語不原本經傳，卻不用一經傳語，補題之妙，皆王鑿錢福舊法，而出以樸質堅辣，非王錢所及，鍾則氣體闊大，骨力平庸，誠不足以當南英之一喙。幾社則創自陳子龍，附者尤衆。其學好讀《文選》，務怪奇，務藻思。獨包爾庚有峭拔之筆，文情摇曳，則爲子龍所不喜，而同社不貴也。南英尤斥子龍，與際泰及卓世純、羅萬藻相砥礪。幾社中人忌之，爲駁四家文以解，故爲抑揚；際泰、世純不悅，故四家之交合而不終；而世純亦折而入幾社。南英勢孤，意有鬱結不得遽，乃發憤拈《孟子》曰「無傷也」題爲文以見意曰：

知人言之不足恤，而人當自信矣！夫禮義之或愆，則所患也；彼不理於口，是何傷哉！聞之曰：傷人以言，甚於戈矛，此特世俗之常情，而非所論於君子也。子告我曰：大不理於口，憂讒畏譏之心，何皇皇耶？夫君子提躬，何至以心爲垢府，然有人於此，終其身無詿誤可摘者，其中亦可疑也；君子涉世，何至以身爲詬端，然有人乎此，終其身無毀言能加者，其品亦可知也。子之不理於口，吾直以爲無傷耳。聞世俗之繁言，而夷夷然驚，規規然自失，此怯膽也；夫丈夫固當有相曠之懷，寧使有瑜有瑕，不甘無舉無刺，謠詠之口何足介其念也！患物議之相侵，而平情以合污，輟行

以弭怨，此俗腸也。夫丈夫固當有超勝之韻，尊之聖賢不喜，呼之牛馬不怒，講張之舌何足動其衷也！嗟乎！何物庸衆，而能譽豪傑也？謗固其所耳。一忌而欲殺，一惡而欲死，吾以閒心觀焉，天下有可解頤如此者哉！嗟乎！何物庸衆，而敢譽豪傑也？毀固其分耳。造讒者手足俱亂，吠聲者耳目若狂，吾以冷眼視焉，天下有可鼓掌如此者哉！故褊衷者聞謗若刺於肌膚，而冥之以至理，則羣聲洶洶猶嬰兒之啼呼也，何相忤也，盛氣者聞毀不安於夢寐，而對之以達觀，則羣口嗷嗷猶鳥獸之鳴號也，何相怒也。夫爲士者，識欲其超，骨欲其勁。以天下譽之，夷然不屑，以天下非之，倘然不顧。若夫憂讒畏譏，則妾婦之事也。

有笑有罵，亦憤極而爲曠達之言。世論以八股代言，此之優孟衣冠，啼笑皆非其真，如此之感慨激發，亦何嘗不出於性情之真也。性不倂仰隨俗，而清剛之氣，貫注行墨。遭時喪亂，跋履間關，同時名士，狼藉載路，而南英獨視死如歸，游說萬端，終莫之屈，不媿爲篤信好學，守死善道者矣。又明之亡也，滿洲入關以主諸夏。而寧化邱義字明大者，崇禎末，補諸生，易代後，義不就試。其父詰之。對曰：「世代既變，人心亦變，卽文字亦變。以前文應今試，徒取黜辱，無益。」父曰：「不必言遇合，但功令不許不應試耳。」義乃就試，題爲《大學》之「其所哀矜而辟焉。」義乃振筆直書以抒《黍離》之恫曰：

（破題承題佚）當可哀可矜之世，必無不哀不矜之人。世有辟於哀矜之人，必世有不勝哀矜之事也。今夫無怙無恃，哀之至也，乃至宗廟邱墟，鼎社遷改，哀又過之，《詩》所謂「哀恫中國，具贅卒荒」是也。更取父母之遺體而毀傷之，取聖王之冠裳而滅裂之，哀哉，維今之人，不尚有舊哉！鰥寡孤獨，矜之至也，乃至天潢溝壑，官闔泥塗，矜百倍之，《詩》所謂「爰及矜人，哀此鰥寡」，抑末矣。

更取匹耦而戮亂之，夫經而妻不寡，取老倪而僕隸之，父獨而子不孤，哀哉，俾彼昊天，寧不我矜哉！乃哀未畢也而和悅繼之，髡鉗之不爲辱，呼蹙之不爲憤，卽屠門覆祀，不敢仇也。矜未畢也而安樂繼之，謂他人父而忘其孤，謂他人夫而忘其寡，他人不子不妻而奴婢之，不悔其賤也！此之謂失其本心！故曰：「哀莫大於心死，而形死次之。」吾哀夫當哀而不知哀者，又哀夫已不能自哀而反哀他人之哀者，又哀夫已不哀而反慕人之哀者；又哀夫空胸行臆，擠人於可哀可矜，而自爲愉快者，又哀夫助虐相淫，陷萬家於可哀可矜，而僅奉一人歡笑者。蓋至此而荼毒攢心，無可告訴，徒飲痛銜恤而已。豈非之其所哀矜而辟乎！

怨恫憤盈，溢於紙墨。提學道閔度閱而判曰：「文心如此，何必應試！」除名免責。榜揭而諸生譁然，取原卷爭相傳寫，一時紙貴，亦可見人心不死，情到真處，無不感孚也。雖然，哀莫大於心死，常哀而不知哀，尤豈獨明清易代之際也哉？

明代八股文選本，如蘇苞九《甲癸集》，攬摭之多，至一百二十四種。黎淳《國朝試錄》六百四十卷，輯成化以前之文，邱濬爲序。而《四書程文》二十九卷，亦明初舉業程式，見《明史·藝文志》，不載選者姓氏。然而恢闊其義，足爲準繩者，要不得不推艾南英爲宗匠，其所選《明文定》、《明文待》諸書，大綱既舉，衆目具張，黜富強而歸於王，辨裨墨而宗於儒，究周秦議論之失，斥漢唐訓詁之浮，一代風氣，皆其論定。然猶不如後來俞長城所選《百二十名家稿》之備。自宋王安石、蘇轍以迄清初諸家，其所持擇，不名一格，每人各序出處於簡端，皆忠義文章之士，其人品僉王者不與焉。用功甚鉅，用心甚深，見者謂其以史法論文，五百年之文卽可以當五百年之史，亦洋洋乎大觀也哉！

附 錄

清代文學綱要

自明之季，學者知由韓、柳、歐、蘇沿洄以溯秦、漢者，歸有光之力也。雖然，有光之文，亦自有其別成一家而不與前人同者。蓋有光以前，上而名公巨卿，下而美人名士之奇聞雋語，劇心怵目，斯以廁文人學士之筆。至有光出而專致力於家常瑣屑之描寫。桐城方苞，謂「震川之文，發於親舊及人微而語無忌者，蓋多近古之文。至事關天屬，其尤善者，不事修飾，而情辭并得，使覽者惻然有隱，其氣韻蓋得之子長！」而姚鼐亦以爲「歸震川之文，於不要緊之題，說不要緊之語，卻自風神疏淡，是於太史公深有會處。」其尤惻惻動人者，如《先妣事略》、《歸府君墓誌銘》、《寒花葬志》、《項脊軒記》諸文，悼亡念存，摯之情而寫以極淡之筆，覩物懷人，戶庭細碎，此意境人人所有，此筆妙人人所無！而所以成其爲震川之文，開韓、柳、歐、蘇未闢之境者也！

清代中葉，桐城姚鼐稱私淑於其鄉先輩方苞之門人劉大櫟，又以方氏續明之歸氏而爲《古文辭類纂》一書，直以歸方續唐宋八家，劉氏嗣之，推究闡奧，開設戶牖，天下翕然號爲正宗。此所謂桐城派者也。方是之時，吾家魯思先生實親受業於桐城劉氏之門，時時誦師說於陽湖惲敬、武進張惠言。二人者，遂盡棄其考據駢儷之學而學焉。於是陽湖古文之學特盛，謂之陽湖派。而陽湖之所以不同於桐城者，蓋桐城之文，從唐宋八家人，陽湖之文，從漢魏六朝人。迨李兆洛起，放言高論，盛倡秦漢之偶儷，

實唐宋散行之祖，乃輯《駢體文鈔》，以當桐城姚氏之《古文辭類纂》，而陽湖之文，乃別出於桐城以自張一軍。顧其流所衍，比之桐城爲狹。然桐城之說既盛，而學者漸流爲庸膚，但習爲控抑縱送之貌而亡其實，又或弱而不能振。於是儀徵阮元倡爲文言說，欲以儷體嬗斯文之統。江都汪中質有其文，鎔裁六朝，導源班蔡，祛其縛藻，出以安雅，而儀徵一派，又復異軍突起以樹一幟。道窮斯變，物極則反，理固然也。厥後湘鄉曾國藩以雄直之氣，宏通之識，發爲文章，而又據高位，自稱私淑於桐城，而欲少矯其懦弱之失，故其持論以光氣爲主，以音響爲輔，探源揚馬，博宗退之，奇偶錯綜，而偶多於奇，複字單詞，雜廁相間，厚集其氣，使聲彩炳煥而戛焉有聲。此又異軍突起而自爲一派，可名爲湘鄉派。一時流風所被，桐城而後，罕有抗顏行者。門弟子著籍甚衆，獨武昌張裕釗、桐城吳汝綸號稱能傳其學。吳之才雄，而張則以意度勝，故所爲文章，宏中肆外，無有桐城家言寒澀、枯窘之病。夫桐城諸老，氣清體潔，海內所宗。徒以一宗歐、歸，而雄奇瑰瑋之境尚少，蓋韓愈得揚、馬之長，字字造出奇崛。至歐陽修變爲平易，而奇崛乃在平易之中。桐城諸老汲其流，乃能平易而不能奇崛，則才氣薄弱，勢不能復自振起，此其失也。曾國藩出而矯之，以漢賦之氣運之，故能卓然爲一大家，由桐城而恢廣之，以自爲開宗之一祖。殆桐城劉氏所謂「有所變而後大」者耶？

自明以來，言文學者，漢、魏、唐、宋，門戶各張，一闢一闢，極縱橫軼宕之觀，而要其歸，未能別出於漢、魏、唐、宋而成明之文學、清之文學也，徒爲沿襲而已。清初詩家有聲者，如錢謙益、吳偉業、礪淵寧爲江左三大家，皆承明季之舊，而曹溶詩名，亦與鼎孳相摩靳。大抵皆步武王、李也。明末公安袁宏道矯王、李之弊，倡以清真。竟陵鍾惺復矯其弊，變爲幽深孤峭，與譚元春評選唐人詩爲《唐詩歸》，又

評隋以前爲《古詩歸》。鍾、譚之名滿天下，謂之竟陵體，亦一時之盛也。新城王士禎肇開有清一代之詩學，枕藉唐音，獨嗜神韻，含蓄不盡，意有餘於詩，海內推爲正宗。與秀水朱彝尊、宣城施閏章、海寧查慎行、萊陽宋琬所彙刻者，曰《六家詩》。彝尊學富才高，始則揣摩初唐，繼則濫泛北宋，與士禎齊名，時人稱爲「朱貧多，王愛好」。又有南施北宋之目，蓋閏章以溫柔敦厚勝，琬以雄健磊落勝也。當是時，商丘宋犖亦稱詩宗，與士禎頡頏，而詩主條暢，又刻意生新，其源出於蘇軾，遊其門者，如邵山人長蘅等靡然從風，亦於士禎之外自樹一宗。獨王士禎名最高，然清詩之有王士禎，如文之有方苞也。清初詩人皆厭王李之膚廓，鍾譚之纖仄，談詩者頗尚宋、元，而宋詩之質直，流而爲有韻之語錄，元詩之綽豔，化而爲對句之小詞。王士禎崛起其間，獨標神韻，所選古詩及《唐賢三昧集》，具見其詩眼所在，如《三昧集》不取李、杜一首，而錄王維獨多，可以知其微旨，蔚然爲一代風氣所歸。但士禎之詩，富神韻而餒氣勢，好修飾而略性情。汪琬戒人勿效其喜用僻事新字，而益都趙執信本娶士禎女甥，習聞士禎論詩，謂「當如雲中之龍，時露一鱗一爪」，而執信作《談龍錄》糾之，謂「詩當指事切情，不宜作虛無縹渺語，使處處可移，人人可用」。論者以爲足救新城末派之弊。大抵士禎以神韻縹渺爲宗，而風華富有。執信以思路蟾深爲主，而刻畫入微。王之規模關於趙，而流弊仍傷膚廓；趙之才力銳於王，而未派再病纖仄。兩家並存，其得失適足相救也。執信既著《談龍錄》，發難士禎，而山左之詩一變。錢唐厲鶚《樊榭山房詩集》，精深峭潔，參會唐宋，於王士禎、朱彝尊外，又別樹一幟。而兩浙之詩一變。錢唐袁枚、鉛山蔣士銓、陽湖趙翼並起，號江左三大家，而大江南北之詩無不一變矣。然乾、嘉之際，海內詩人相望，其標宗旨，樹壇坫，爭雄於一時者，要推沈德潛、袁枚、翁方綱。王士禎之詩，既爲人所不饜，於是袁枚倡性情以矯

士禎之好修飾而涉於泛。翁方綱拈肌理以救士禎之言神韻而落於空。沈德潛論格調以藥士禎之工詠歎而枵於響。袁枚論詩，以爲「詩者，人之性情也。性情之外無詩。王士禎主修飾而略性情，觀其到一處必有詩，詩中必用典，此可想見其喜怒哀樂之不真！」此袁枚論詩之旨也。翁方綱以學爲詩者也。其論詩，謂：「士禎拈神韻二字，固爲超妙！但其弊恐流爲空調。」故特拈肌理二字，蓋欲以實救虛也。所爲詩，自諸經注疏以及史傳之考證，金石文字之爬梳，皆貫徹洋溢於其中。王士禎之後，詩有翁方綱，猶桐城之後，文有曾湘鄉乎？然言言徵實，亦非詩家正軌。故其時大宗，不得不推沈德潛。德潛少從吳縣葉燮受詩法，其論詩最崇格律。嘗曰：「詩以聲爲用者，其微在抑揚抗墜之間。」此說本發之趙執信，謂「漢魏六朝至唐初諸大家，各成韻調，談藝者多忽不講，與古法戾。」乃爲《聲韻譜》以發其祕，亦猶曾湘鄉論文從聲音證人，以救桐城儒緩之失也。德潛又曰：「詩貴性情，亦須論法。所謂法者，行所不得不行，止所不得不止，而起伏照應，承接轉換，自神明變化，貴能以意運法，而不能以意從法。」及自爲詩，古體宗漢、魏，近體宗盛唐，尤所服膺者爲杜，選《古詩源》及《三朝詩別裁》以標示宗旨。天下之譚詩者宗焉。踵其後而以詩名者：大興有舒位，秀水有王曇，昭文有孫原湘，世稱三君。四川有張問陶，常州有黃景仁、洪亮吉，江西曾有煥、樂鈞，浙中有王又曾、吳錫祺、許宗彥、郭麐，嶺南則有馮敏昌、胡亦常、張錦芳三子，而錦芳又與黃丹書、黎簡、呂堅爲嶺南四家。大率皆唐人之是學，未嘗及德潛門，而實受其影響者。其中以舒位、孫原湘、黎簡三家，尤爲特出。位與原湘皆自昌黎、山谷入杜，而簡則學杜而得其神髓者也。於是宋詩之徑塗漸闢。道光而後，何紹基、祁寯藻、魏源、曾國藩之徒出，益盛倡宋詩，而國藩地望最顯，其詩自昌黎山谷入杜，實衍桐城姚鼐一脈。鼐每詔人，謂「學詩，須先讀昌黎，然

後上訴杜公，下采東坡，於此三家，得門徑尋入，於中貫通變化，又係各人天分。」及其自爲詩，則以清剛，出古澹，以遒宕爲雄，由韓學杜，已開輓清同光體之先河，與文之蕭然高寄者異趣，而特爲文所掩抑不甚著。至國藩乃昌言「姚氏詩勁氣盤折，能以古文家之義法通之於詩」，而用其法，旁參山谷，益恣爲生蘄奧衍。洞庭以南，言聲韻之學者，稍改故步，而湘潭王闓運則爲騷選盛唐如故，比之古調獨彈矣。王闓運始與武岡鄧輔綸、鄧繹、長沙李壽蓉、攸縣龍汝霖四人者相善也，喜吟詠，日夕賡和，而輔綸尤工五言，每有作，皆五言，不取宋唐歌行近體，故號爲學古，標曰湘中五子。而五子之中，闓運獨推服鄧輔綸云。

清詩有唐宋之殊，而詞則宗宋。詞學至南宋之季，幾成絕響，知比興者，金之白樸、元之張翥而已。樸詞曰《天籟集》，清雋婉逸，意愜韻諧，可與張炎《玉田詞》相匹，而翥《蛺蝶詞》、婉麗風流，亦有南宋舊格。惟樸所宗者，多東坡、稼軒之變調，而翥所宗者，猶白石、夢窗之餘音，門逕微有不同。明初作者，猶沾溉張翥之舊，不乖於風雅。永樂以後，南宋諸名家詞，皆不顯於世，盛行者，爲《花間集》、《草堂詩餘》二選。楊慎、王世貞輩之小令中調猶有可取，長調皆失之。惟陳子龍之《湘真閣》、江籬檻詞，直接唐人，可謂特出。明社既屋，京兆士大夫，雖依新朝，猶慨滄桑，特假長短句，藉抒抑鬱之氣，始而微有寄託，久則務爲諧暢，而吳越操觚家聞風興起，作者選者，妍媸雜陳，遂不免有怪詞鄙詞遊詞之三大蔽。王士禎之數載廣陵，實爲斯道總持。蓋皆祖述南宋，唯《草堂詩餘》是規，罕及北宋以上。殆若文之櫛唐宋八家而挑東西京，詩之學蘇、黃而不知有蘇、李十九首，未可謂善學也。泊士禎在朝，位高望重，絕口不談倚聲。獨朱彝尊、陳維崧兩人並世齊名，妙擅倚聲，合刻《朱陳村詞》，而清朝詞派始成。

惟朱才多，不免於碎。陳氣盛，不免於率。朱之情深，所作詞高秀超詣，綿密精美，其蔽爲鉅釘。陳之筆重，所作詞天才豔發，辭鋒橫溢，其蔽爲粗率。繼之而起，名重一時者，實惟納蘭成德，門地才華，直越北宋之晏小山而上之。其詞纏綿婉約，能極其致，南唐墜緒，絕而復續。故論清初詞家，當推成德爲一把手，朱、陳猶不得爲上。所惜享年不永，門戶未張耳。然乾隆以前，言詞者莫不以朱、陳爲範圍。錢塘厲鶚，吳縣過春山，近朱者也。興化鄭燮，鉛山蔣士銓，近陳者也。其後作詞者遂分浙西、常州兩派。浙西派始於厲鶚，鶚詞宗彝尊，而數用新事，世多未見，故重其富，後生效之，每以摭摭爲工，後遂浸淫而及於大江南北。然抄撮堆砌，音節頓挫之妙，未免蕩然。特是綺藻韻致，詞家之有厲鶚，如詩之有王士禎。有《樊榭山房詞》一卷，續集一卷，生香異色，超然神解，如入空山，如聞流泉，節奏精微，輒多弦外之音。然標格僅在南宋，以姜夔、張炎爲登峯造極之境。流極所至，爲鮑鈺，爲寒乞。亦與詩之漁洋末派同。武進張惠言乃起而振之，與其弟琦選唐宋词四十四家百六十首，爲《詞選》一書，闡意內言外之旨，推文徵事著之原，比傳景物，張皇幽渺，雖叮咛未闕，而奧窔已開，蓋以深美閎約爲主，其意在尊清真而薄姜、張，視蘇、辛尤爲小家，貴能以氣承接，通首如歌行然，又須有轉無竭。嘉慶以來名家，大抵自張惠言而出。其學於惠言而有得者，歙縣金應城金式玉也。其以惠言之甥，而傳其學者，則武進之董士錫也。此常州派之所由起也。荆溪周濟稍後出，嘗謂：「詞非寄託不入，專寄託不出。」其所立論，實足推明惠言之說而廣大之，蓋自濟而後，常州派之壁壘益固矣。詞之有常州，以救浙派俳巧之弊，猶之文之有湘鄉，以矯桐城懦緩之失也。桐城之文，富神韻而餒氣勢，略如詩之有漁洋，詞之有浙派，然而有不同者，蓋崇雅澹而排塗飾，不如漁洋詩、浙派詞之好修飾而略性情。此以流

派論。若就詞論詞，南宋而還，極盛於清，然惟納蘭成德、項鴻祚、蔣春霖三人爲當家耳。成德《飲水詞》，哀感頑豔，得南唐後主之遺，雖長調多不協律，而小令則格高韻遠，極纏綿婉約之致。鴻祚《憶雲詞》、《甲乙丙丁稿》，古豔哀怨，如不勝情，盪氣回腸，一波三折，有白石之幽澀而去其俗，有玉田之秀折而無其率，有夢窗之深細而化其滯，殆欲前無古人。其《乙稿自序》云：「近日江南諸子競尚填詞，辨韻辨律，翕然同聲，幾使姜、張頰首，及觀其著述，往往不逮所言。」云云，婉而可思。又《丁稿自序》云：「不爲無益之事，何以遣有涯之生！」亦可以哀其志矣。以成德之貴，項氏之富，而填詞皆幽豔哀斷，異曲同工，所謂別有懷抱者也。浙中填詞爲姜、張所縛，百年來屈指惟項鴻祚有真氣耳。蔣春霖爲詩，恢雄飭髀，若《東淘雜詩》二十首，不減少陵、秦州之作，乃易其工力爲長短句，鏤情劇恨，轉毫於銖黍之間，直而緻，沈而姚，曼而不靡。文字無大小，必有正變，有家數。春霖《水雲詞》，固清商變徵之聲，而流別甚正，家數甚大，與納蘭成德、項鴻祚二百年中，分鼎三足。咸豐兵事，天挺此才，爲倚聲家杜老，而晚唐、兩宋一唱三歎之意則已微矣。或曰：「何以與成、項並論？」應之曰：「清初王士禎、錢芳標，錢芳標字蓀齡，華亭人，所著《湘瑟詞》有驚才絕豔之譽。一流，爲才人之詞；張惠言、張琦、周濟一派，爲學人之詞。惟三家是詞人之詞，固不以流派限矣！」

讀清人集別錄

近人修言文學史，而於名家集，作深刻之探討者卒鮮！余讀古今人詩文集最夥，何啻數千家，而寫有提要者，且不下五百家。唐以前略盡。嚴可均《全上古三代秦漢三國六朝文》、邑人丁福保《全漢三國晉南北朝詩》及清修《全唐詩》《全唐文》，通讀一過，人有論評，而於其人之刻有專集者，必取以校勘篇章，著錄異同。兒子鍾書能承余學，尤喜蒐羅明清兩朝人集。以章氏文史之義，抉前賢著述之隱。發凡起例，得未曾有。每歎世有知言，異日得余父子日記，取其中之有繫集部者，董理為篇。乃知余父子集部之學，當繼嘉定錢氏之史學以後先照映，非夸語也！近代姚鼐曾藩國張裕釗吳汝綸咸能文章，而罕知流別，又乏深沉之思，即如桐城為一代文宗，而桐城三家於古人文得失離合之故，及三家之何以自為不同，即四人集中，亦未能辨白言之。又如吾常州人好張陽湖，而陽湖揮張之何以不同於桐城三家，究亦莫明所以也！同學有以為問，遂刺取所記，寫付校刊，以昭流別而備攷論云。中華民國二十四年二月二十一日，錢基博自記於光華大學。

望溪先生文集十八卷集外文十卷集外文補遺二卷

桐城方苞，字靈皋撰。其鄉人後學戴鈞衡蒐輯，以苞晚年自號望溪，學者稱望溪先生，遂以題其集。初苞門人王兆符程金輯所為文以相質正。兆符早卒，其後增輯付刊者惟金，而亦隨時有刪削，傳世者

數本，不分卷，而篇數多寡不一。鈞衡乃就所見篇數最多之本，凡三百八十四首，排次爲十八卷。其它苞曾孫傳貴刻《集外文》五十二篇，仁和邵懿辰錄奏議十九篇，太倉王寶仁錄逸文六十四篇，又苞來孫恩露所藏遺文十九首，詩十五章，鈞衡乃刪其重複，而合所蒐得尺牘二十三首，併次之，得百八十二首，爲集外文十卷。既又蒐得寶應湯聘三藏逸文一篇，高密單氏藏逸文十九篇，讀書筆記數十則，邵懿辰錄《史記》評語，與舊所檢時文稿自記二則，及與沈晚叔尺牘三通，彙爲《集外文補遺》二卷，先後刻於咸豐元年二年，而殿以其鄉人蘇惇元撰《方望溪先生年譜》，以備知人論世之資。苞少時論行身祈禱曰：「學行繼程朱之後，文章在韓歐之間。」觀其論學，於明之王守仁，平時之顏元李璣，皆思有以矯其枉而折衷於程朱。治經深於《禮》《春秋》。治史深於《史記》。治子深《管子》《荀子》二子。辨正《詩》《書》《周官》《戴記》子史爲劉歆所僞託者十餘篇，以爲文奸言以佐新莽，而證以《漢書》·王莽傳，條舉件繫，卓然有以自信其說，疑爲後來南海康有爲《新學僞經考》之藍本焉？其爲文章，恪有義法，而短於氣韻，不敢爲韓愈之雄麗恣奇，亦不如歐陽修之紆徐委備，而特謹嚴樸質，高渾凝固，足以戢學者之客氣而滿其浮言。其鄉人姚鼐輯《古文辭類纂》，特以繼明人歸有光之後，然有光神溢篇外。苞則韻盡語內。桂林呂璜《初月樓古文緒論》，錄其所聞於宜興吳德旋者，曰：「方望溪直接震川矣，然謹嚴而少妙遠之趣，如人家房屋門廳院落廂廚無一不備，但不見書齋別業，若園亭池沼，尤不可得也。」余則謂有光尚氣韻而不免曼衍，何如苞之謹義法以截斷枝蔓。有光之韻逸，而苞之辭潔。巴陵吳敏樹《梓湖文集》有《與歐陽篠岑論文派書》曰：「歸氏之文，高者在神境，而稍病虛，聲幾欲下。望溪之文，厚於理，深於法，而或未工於言。」斯足以盡歸方之利鈍矣！特是有光當太倉王世貞之盛，刮去塗飾，苞則承虞山錢謙益之後，力

矯浮靡，歸真返樸而選言有序，不刻畫而足以昭物情，則兩家無不同。然苞之爲文，言盡則意止，而抑揚吞吐以事所謂情韻不匱者，則苞之所未有，而爲桐城文者之所亟喜。吳敏樹《記鈔本震川文後跋尾》曰：「近時爲古文，以倣歸氏，故喜爲閒情眇眇狀，搖曳其聲，以取恣媚，以爲歸氏學《史》之遺。」此自歸之血脈，而非方之矩矱也！世人混言歸方，又以苞爲桐城派開山。而不知苞之文，本不同於歸。而文貴有事外遠致，則歸之所以亟稱於桐城。若苞之文，有餘於質實，不足於妙遠。然則桐城之文，宗歸而不必櫛方，特以鄉人推重之爾！摭錄可誦，篇目如左：

論辯類 周官辯僞兩篇 辯明堂位 文王十三生伯邑考辯 成王立在襁褓之中辯 漢高帝論 漢文

帝論 蜀漢後主論 宋武帝論 原人下

序跋類 讀古文尚書 讀尚書記 讀尚書又記 書考定儀禮喪服後 書考定文王世子後 讀管子

書史記十表後 書刺客傳後 書蕭相國世家後 書淮陰侯列傳後 又書貨殖傳後 書漢書禮樂

志後 書漢書霍光傳後 書王莽傳後 書五代史安重誨傳後 周官析疑序 畿輔名宦志序 教

忠祠規序 吳宥函文稿序 儲禮執文稿序 熊偕呂遺文序 左華露遺文序 楊黃在時文序 青

要集序 書韓退之學生代齋郎議後 書韓退之平淮西碑後 書朱註楚辭後 書烈婦東鄂氏事略

後 古文約選序例 張彝歎稿序 劉巽五文稿序 朱字綠文稿序 余西麓文稿序 溧陽會業初

編序 跋先君子遺詩

奏議類 請定經制劄子 請矯除積習興起人材劄子 擬請纂修三禮條例劄子 貴州苗疆議 臺灣建

城議

書牘類

與翁止園書 與吳見山書 與某公書 與鄂張兩相國論制馭西邊書 與謝雲點書 與某書

與熊藝成書 與白玫玉書 與王崑繩書 與劉言潔書 與韓慕廬學士書 與徐貽孫書 與劉

大山書

贈序類 送徐亮直冊封琉球序 送劉函三序 贈潘幼石序 送左未生南歸序 贈李立侯序 送李兩

蒼序 送鍾勵暇寧親宿遷序 送張又渠守揚州序 贈宋西珏序 送雷惕廬歸閩序 送官庶常觀

省序 贈石仲子序 贈介菴上人序 送馮文子序 送韓祖昭南歸序 通蔽

傳狀類 孫徵君傳 白雲先生傳 四君子傳 三山林湛傳 二山人傳 二貞婦傳 高節婦傳

碑誌類 李剛主墓誌銘 杜蒼略先生墓誌銘 劉古塘墓誌銘 左未生墓誌銘 禮部侍郎蔡公墓誌銘

禮部尚書贈太子太傅楊公墓誌銘 廣東副都統陳公墓誌銘 李抑亭墓誌銘 中議大夫知廣州

府事張君墓誌銘 白玫玉墓誌銘 翰林院編修查君墓誌銘 安徽布政使李公墓誌銘 教授胡君

墓誌銘 張樸村墓誌銘 劉紫函墓誌銘 陳馭虛墓誌銘 尹元孚墓誌銘 龔君墓誌銘 余君墓

誌銘 大司寇韓城張公繼室王夫人墓誌銘 工部尚書熊公繼室李淑人墓誌銘 謝母王孺人墓誌

銘 王孺人墓誌銘 許昌楨妻吳氏墓誌銘 高善登妻方氏墓誌銘 贈孺人鄭氏墓誌銘 手瑞臣

墓表 萬季野墓表 梅徵君墓表 田間先生墓表 吏部侍郎姜公墓表 刑部右侍郎王公墓表

朱字綠墓表 汪武曹墓表 黃際飛墓表 宋山言墓表 兵部尚書法公墓表 趙處士墓表 內閣

中書劉君墓表 謝孺人葉氏墓表 贈淑人尤氏墓表 曾孺人楊氏墓表 中憲大夫鄂公夫人撒克

達氏墓表 陳太夫人王氏墓表 林母鄭孺人墓表 禮部尚書鄭公神道碑 理藩院員外郎贈資政

席公神道碑 杜茶村先生墓碣 鮑氏女球壙銘 禮部尚書韓公墓表 都察院副都御史巡撫貴州
劉公墓表 武強縣令官君墓表 明故兵部郎中劉公墓誌銘 翰林院掌院學士兼禮部侍郎湯公墓
誌銘 彭訥菴墓誌銘 顧飲和墓誌銘 長甯縣令劉君墓誌銘 楊千木墓誌銘 刑部郎中張君墓
誌銘 大理卿熊君墓誌銘 少京兆余公墓誌銘 兄百川墓誌銘 弟叔塗墓誌銘 張文端公墓表
雜記類 左忠毅公逸事 高陽孫文正公逸事 石齋黃公逸事 明禹州兵備道李公城守死事狀 將園
記 遊豐臺記 遊潭柘記 再至浮山記 記尋大龍湫瀑布 題天姥寺壁 遊雁蕩記 封氏園觀
古松記 湯司空逸事 湯潛菴先生逸事 安溪李相國逸事 記長洲韓宗伯逸事 記徐司空逸事
記所聞司寇韓城張公事 記太守滄州陳公罷官事 記姜西溟遺事 獄中雜記 結感錄
頌類 聖主親征漠北頌
哀祭類 駙馬孫公哀辭 宣左人哀辭 武季子哀辭 阮以南哀辭 張彝歎哀辭 僕王興哀辭 婢音
哀辭 祭顧書宣先生文 亡妻蔡氏哀辭 舒子展哀辭
右文一百八十三篇。嘗以古文義法繩班史柳文，尚多瑕疵。而論義法以《史記》爲準。論學則以
宋儒爲歸。

其砭當世之顯學曰：「僕少所交多楚越遺民，重文藻，喜事功，視宋儒爲腐爛；用此年二十，目未嘗
涉宋儒書。及之京師，始寓目焉，其淺者皆吾心所欲言，而深者則吾知力所不逮也！然尚謂漢唐以來，
以明道著書爲己任者衆矣，豈遂無出宋五子之右者乎？二十年來，於先儒解經之書，自元以前，所見者
十七八。然後知生乎五子之前者，其窮理之學，未有如五子者！生乎五子之後者，推其緒而廣之，乃稍

有得焉！其背而馳者，皆妄鑿牆垣而殖蓬蒿，乃學之蠹也！學之廢久矣，而明之衰，則尤其焉！浙以東，黃君蔡洲宗義壞之。燕趙間，顏君習齋元壞之。蓋緣治俗學者，懵然不見古人之樊。稍能治經史者，學爲古文，則皆有翹然自喜之心，而二君以高名者舊爲之倡，立程朱爲鵠的，同心於破之，浮夸之士皆醉心焉！夫儒者之學，所以深擷異端者，非貴其說之同也；學不明，則性命之理不順。漢代儒者，所得於經甚淺，而行身皆有法度，遭變抵節，百折而其志必伸。魏晉以後，工文章垂聲於世者衆矣，然叩其私行，不若臧獲之庸謹者，少遇變故，背君父而棄名節，若唾溺然。由是觀之，不出於聖人之經，非學也。乃昔之蠹學者，顯出於六經之外，而今之蠹學者，陰託於六經之中，其可憂彌甚矣！」（見再與劉拙修書）「習齋之學，其本在忍嗜欲，苦筋力，以勤家而養親，而以其餘習六藝、講世務。以備天下國家之用，以是爲孔子之學，而自別於程朱，其徒皆篤信之。余謂程朱之學，未嘗不有事於此，但此乃道之法迹耳！使不由敬靜以探其根源，則於性命之理，知之不真，而發於身心，施於天下國家者，不能曲得其次序。」（見李剛主墓誌銘）「閩百詩若曉病程朱刪易經字，則不敢不多爲反覆。蓋專易經字者，漢儒之病也！程朱刪易甚少而皆依於理。僕每見周秦以前古書，字形與聲近，則衆書所傳多異，卽一書諸本中，亦有增損改易。竊歎古書不可通者，多以字訛而人莫辨也。如《商書》「自周有終」，《酒誥》「爾尚克羞若惟君」，解者支離牽合，終不可通，若「君與周」互易，則其義不待詰而自明矣，蓋篆體二字本形似也。韓退之《羅池廟詩》：「乃此方之人，惟侯是非。」按其前後，辭意明白，而「此」以形訛「北」，「唯」以聲譌「爲」，子瞻不能辨，又自爲之說而大書深刻焉，則其讀書觀理之不詳可見矣！《莊子·外篇》：「舜將死，真冷禹曰：『不易爲遺冷』得乎？」《史記·封禪書》：「至梁父矣而德不治。」謂「梁父」非衍可乎？僕嘗自恨寡

陋，見古書字訛，無所證據而不敢擅易，願得博極羣書者以正之。」見《與閻百詩書》。

其論《史記》義法曰：「《五帝紀》後具列三代世系。《陳杞世家》後，具列十一臣之後及三代間封小不足齒列者，乃通部之關鍵。陳杞以後，不復總束，以衛晉鄭出於周，宋出於商，楚出於顓頊，越出於夏，趙韓魏瓜分於晉，田氏襲奪於齊，孔子出於宋，無庸更著也。」《五帝本紀》「敬王以後，赧王以前，二百年無一事，以《史記》獨藏周室，遭秦火，所據獨《左傳》《國語》《國策》耳！此遷所以深惜之也。晚周事少，故詳錄《國策》，而義鄙辭佻，不似本紀中語，且與篇首嚴重深廣之體不稱，不若略取事實，刪其蔓辭，爲得體要。」《周本紀》《秦紀》多夸語，其世系事蹟，獨詳於列國，而於他書無徵，蓋秦史之舊也。不載《國策》一語，體制遂覺峻潔，蓋由國史具存，有事蹟可紀故也。」《秦本紀》「楚與秦合兵由趙，而怨結於齊，羽之東歸，又二國首難，而其國事亦多端，故因與齊將田榮救東阿，入諸田角立之釁，於救趙，入張耳陳餘共持趙柄，以爲後事張本，然後脈絡分明。韓魏及燕，於秦楚劉項興亡，無關輕重，則於羽分王諸將見之。先後詳略，各有義法，所以能盡而不蕪也。」《高祖紀》獨舉趙歇而不及張陳，則《羽紀》之詳，以標前後脈絡明矣！」《項羽本紀》「《高祖本紀》遣魏人甯昌使秦，使者未來，因甯昌使秦未還而側入章邯之降，因邯之降，而追敘羽之救趙破秦，然後以趙高來約，遙承秦使未來，以襲攻武關，遙承攻胡陽，降析酈，參差斷續，橫縱如意，章法頗似《左傳》邯鄲陵之戰。又《項羽本紀》高祖留侯項伯相語，凡數百言，而此以三語括之，蓋其事與言不可殫，而於帝紀則不可詳也。高祖與項伯語，必載《羽紀》以見事情，則與留侯語，宜以類相從，故於《留侯世家》亦略焉。且《留侯世家》實傳體也，即載立六國後問答，復載此，則辭氣近複，而體制亦病於重疊。《羽紀》則間架闊遠，不重疊爲病矣！」《晉語》齊姜語重耳凡數百言，而

《左傳》以八字括之，蓋紀事之文，去取詳略，措置各有宜也。」（高祖本紀）《呂后本紀》，「是時高祖八子」一句提挈，以劉呂之禍，成於分王諸呂，故其列舊封，則後此地勢事情，瞭然在目，與《秦紀》將敘孝公修政郭上，先列六國疆界，及擯秦而不與盟同。長沙獨標非劉氏，以功而王，正與呂氏無功相對。」（呂后本紀）《孝文本紀》諸詔，皆帝戰戰恐懼，克已循道以懷安天下之大政，他事則各入本傳，觀此可識本紀列傳記事與言之義法。而「從代來即位二十三年」句以下所敘列，視前諸大政爲小，故總束於後，韓歐墓誌多用此法。」（孝文本紀。以上見《史記評語》）

「遷序十表，惟十二諸侯、六國、秦楚之際、惠景間侯者，稱『太史公讀』，謂其父所欲論著也；故於高祖功臣稱『余讀』以別之。周之衰，禮樂征伐自諸侯出，事由五伯；而其微兆，則在共和之行政。秦并六國，以周東徙，乘其險固形勢，故僭端見於始封。自虞夏殷周及秦代興，皆甚難，而漢獨易，以秦之重而無基也。先王之制封建，本以安上而全下，故惟小弱，乃能奉職效忠。此數義者，實能究天人之分，通古今之變，或遷所聞於父者信如斯，或其父所未及，而以所學推本焉。其自序曰：『請悉論先人所次舊聞，不敢闕。』而本紀、八書、世家、列傳，無稱其父者，故揭其義於斯，則踵春秋以及秦滅，漢與文景以前，凡所論述，皆其父所次舊聞具見矣。十篇之序，義並嚴密而辭微約，覽者或不能遽得其條貫，而義法之精變，必於是乎求之，始的然其有準焉。歐陽氏《五代史志》考序論，皆遵用其義法；而韓柳書經子後語，氣韻亦近之，皆其淵源之所漸也。」（見《史記十表後》）「六國并於秦，史記爲秦所焚，所表六國事迹，獨據《秦記》；故《六國表序》，通篇以秦爲經緯，而自漢以後，所用皆秦法，史公蓋心傷之而不敢正言，故微詞以見之，非果以秦可法也！」（《六國表序》。見《史記評語》）《禮》《樂》《律》《曆》四書，或曰褚少孫所補，或

日子長爲之而未具，皆非也。其序《禮》《樂》，用意尤深。蓋太初所定改正朔，易服色，已具《曆書》及《封禪書》；至宗廟百官之儀，則襲秦故，不合聖制者。漢之樂，文景以前，襲常肆舊而已！武帝作《十九章》，文雖爾雅，然自《青陽》《朱明》《西皞》《元冥》而外，多諛誕，且非雅聲，其甚者，如《太乙馬歌》，則汲黯所謂先帝百姓不知其音者，故止序其大略，而不復排纂爲書，蓋傷漢之興，無所謂禮樂也。故於四時之歌，明著其指曰：「世多有，故不論。」則非爲之而未具，明矣！漢之樂既無可次，而律則往古成法，故獨著其通於兵事以爲法戒。武帝改曆，雖由公孫卿札書，而洛下閎運算日順夏正，於曆術則無可議者，故直述其事。凡此皆著書之義法。其後四書，論繫於書後，亦各有義焉。蓋《河渠》《平準》，非若《禮》《樂》《律》《曆》，可前序其事，而以名物度數次列於後者。《封禪書》所載諸時諸祠，雖有方色幣幣之數，而皆秦漢間妖妄不經之制，且與封禪無與也。故其事並詳於書，而略見己意於後。惟《天官》宜與《律》《曆》一例，特家世所掌，有獨傳其精義者，災異之變，有親得之見聞者，諸家之占，有考之而不合者，故列次衆法於前而以己意詳論於後，所由與《律》《曆》二書異也。七書皆通古今，而《平準》則漢一代之制，故獨以古事附論於後而志慨焉。」見《讀史記八書》。

「《晉世家》，通篇以世數紀年爲章法。桓叔受封紀年，武公得國紀年，卒又紀年。武公卽位，追敘其父大父，悼公卽位，亦追敘其父大父，故文公之立，覆舉獻公之子，因以爲章法。文公少而得士紀年，其出也紀年，入而得位紀年，因以爲章法。」《晉世家》。《句踐世家》，先世無所考，子孫事亦甚略，亦傳體也。范蠡謀吳霸越，具見句踐語中，其浮海以後事，不足別立傳，而史公惜其奇，故用合傳體附載於後，非常法也。」《句踐世家》。《蕭相國世家》，首舉收秦律令圖書，進韓信，鎮撫關中，而功在萬世可知矣！末記與

曹參素不相能，而舉以自代，則公忠體國具見矣！中間但著其虛已受言，以免猜忌，雖定律受遺，概不著於篇。觀此可識立言之體要。」〔蕭相國世家〕「曹相國世家」，條次戰功，不及方略，所以能簡。治齊相漢，止虛言其清靜，不填實一事。」〔曹相國世家〕。以上見〔史記〕評語「古之晰於文律者，所載之事，必與其人之規模相稱。太史公傳陸賈，其分奴婢裝資，瑣瑣者皆載焉。若〔蕭曹世家〕，而條舉其治績，則文字雖增十倍，不可得而備矣！故嘗見義於〔留侯世家〕曰：『留侯所從容與上言天下事甚衆，非天下所以存亡，故不著』，此明示後世綴文之士以虛實詳略之權度也。宋元諸史，若市肆簿籍，使覽者不能終篇，坐此義不講耳。」見〔與孫以甫書〕「〔陳丞相世家〕，六出奇計，陰謀也，其後避讒僞，聽呂后，亦陰謀也，故用此總結通篇。」〔陳丞相世家〕「絳侯安呂氏之功，具〔呂后〕『孝文本紀』，故世家首敘戰功，承以可屬大事，其後獨載懼禍遭誣二事。條侯亦首敘將略，後獨載爭栗太子之廢，抑王信徐盧等之侯。其父子久任將相，豈他無可言者乎？蓋所記之事，必與其人之規模相稱，乃得體要。子厚以潔稱太史，非獨辭無蕪累也，明於義法，而所載之事不雜，故其氣體爲最潔也。此意惟退之得之，歐王以下，不能與於斯矣！絳侯則高祖預識其可任大事。條侯則文帝決其可將兵。絳侯氣質之偏，則東鄉責諸生。條侯則顧命尚席取楮。微小處亦問出相映，其法取諸左氏。」〔絳侯周勃世家〕

「本紀、世家、列傳後皆有論，惟伯夷、孟荀，合傳與論而爲一，故無後論。」〔伯夷列傳〕「管仲之功，焜耀史籍，於本傳敘列則贅矣。其微時事，則以稱鮑叔者見之。此虛實詳略之準也。其書不可多載，故揭其指要。其事人所共知，故著其權略。晏子之事，亦人所共見，故本傳不復敘列，與管仲同，而總論其爲人，即於敘次其顯名於諸侯見之，與管仲異。此章法之變化也。於管仲傳，舉鮑叔能知其賢，於晏子

傳，舉其能知越石父及御者。三歸反坫，正與食不重肉，妾不衣帛反對。觀此可知文之義法，無微而不具也。管晏事迹見於其書及他載籍者不可勝紀，故獨論其軼事。」（管晏列傳。以上見《史記》評語「太史公傳老子，著其國焉，著其邑焉，著其鄉焉，著其里焉，外此無有也。著其氏焉，著其名焉，著其字焉，著其謚焉，著其官守焉，外此無有也。著其子焉，著其孫焉，著其孫之元來焉，於其子孫元來，仍著其爵焉，著其封焉，著其仕之時與國焉，著其家之地焉，外此無有也。蓋世傳老子，多幻奇荒怪之迹，故特詳之，以見其生也有國邑鄉里名字，其仕也有官守，其終有謚，其身雖隱，而子孫世有封爵里居，則衆說之誕，不辨而自熄矣！」見《書老子傳後》）孫武吳起論兵具有書。圖閭破楚入郢，北威齊晉，武與有力，楚悼王南平百越，北并陳蔡，卻三晉，西伐秦，以相起，則武與起之戰功，不必言矣。故以虛語總括，而所載皆別事。孫臏在齊，田忌之客耳，其再破魏，主兵者田忌，故詳著其兵謀。此虛實之義法也。武與起之書，世多有，於論見之。臏之書則無傳焉，故於傳曰「世傳其兵法」。楚之戰功，吳起實專之。吳則申胥華登之謀居多，故曰「武與有力焉」。蓋古人之不苟於言如此！（孫子吳起列傳）管子治齊，蕭何定律，皆略而不具。而詳記商君之法，著王道所由滅息也。」（商君列傳。以上見《史記》評語「騶衍以下十一人，錯出《孟子荀卿傳》，若無倫次，及推其意義，然後知其不苟然也！蓋戰國之時，守孔子之道而不志乎利者，惟孟子耳！其次荀卿而少駁矣！故首論商鞅吳起田忌以及縱橫之徒，著仁義所由充塞也。自騶衍至騶奭，說猶近正，而著書以干世主爲志，則已驚於功利矣。其序荀卿於衍奭諸人後者，非獨以時相次也，荀卿之學，雖不能無駁，而著書則非以干世，所以別之於衍奭之倫也。自公孫龍至吁子，則舛雜鄰近，視衍奭而又下矣！至篇之終，忽著墨子之地與時，而不一言其道術。蓋世以儒墨並稱久矣，其傳已見於荀卿

所序列而不必更詳也。自漢及唐，莊列皆列學官，而孟子未興。以韓愈之明，猶曰「孔墨必相爲用」，而較孟子於荀楊之間。子長獨以並孔子，一篇之中，其文四見。至荀卿受業於孔氏之門人，則弗之著也。老莊申韓衍爽諸人，皆有傳，而墨子無，蓋孟子距而放之之義。然則子長於道，豈槩乎未有聞者哉！

見《書孟子荀卿列傳後》。「平原君所喜策士也，而終以著書談道之士，因與虞卿著書相映。」《平原君列傳》。「樂氏多賢，故樂毅列傳，詳其前後世系，因以爲章法。而結趙破齊，具毅報惠王書，故敘次不得過詳。」《樂毅列傳》。「趙奢李牧將略，及趙括之敗，具詳始末。假而牧再破秦，頗破齊燕，復一一敘列，則語燕而氣漫矣，而出以簡括。變化無方，各有義法，此史之所以能潔也！」《廉頗藺相如列傳》。「夏太后華陽太后薨葬，不應載《不韋傳》。以夏太后有後百年旁當有萬家邑語，史公好奇，欲傳之，而以人《秦本紀》，則無關體要，故因莊襄王之葬，牽連書之。而莊襄王之葬，所以見《不韋傳》，又以後與莊襄王合葬芷陽者，乃不韋姬也。但此等止爲文章波瀾而設，據史法則不宜書。」《呂不韋列傳》。以上見《史記評語》。「太史公裁割更易《尚書》《左傳》，或辭意不完，而於《國策》有遠過本文者。其序聶政事曰：『其姊嫪聞之，乃於邑曰：是吾弟歟？嗟乎！嚴仲子知吾弟！』蓋韓衛懸隔，政又自刑以絕蹤，其姊非聞而駭且疑，無緣遂如韓市也。既見政屍，而列其名，並爲嚴仲子死，則他無可言者矣，故曰：『乃大呼天者三，於邑悲哀而死政之旁。』其本文一切不具，乃曰：『美哉氣矜之隆，可以過賁育，高成荊矣！』世有乍見所親皮面抉眼屠腸，而從容贊美如途人者乎！觀太史公所增損，乃知本文之疏且拙也！蓋《國策》本紀言之書，中間序事者多不過數語，而亦未有殊絕者！余少讀《燕策》荆軻刺秦王篇，怪其序事類太史公。先秦人敘事皆廉峭，紆餘曲暢，自史公作乃有此。及見《刺客傳贊》，乃知果太史公文也！彼自稱得之公孫季功董生所口道，則非

《國策》之舊文，決矣！蓋荊軻之事雖奇，而於策則疏。意《國策》本無是文，或以《史記》之文入焉，而削高漸離後事，以事在六國既亡後耳！《楚世家》說頃襄王，真戰國之文也，而《國策》無之。蓋古書遭秦火，雜出於漢世，其本文散佚，與非其所有而誤入焉者多矣，不獨刺客爲然也！」（見《書刺客傳後》）

「趙高謀亂，入《李斯傳》，以高之惡，斯成之，秦之亡，斯主之也。其始述入《蒙恬傳》，以蒙毅曾治高，當其罪死，而高因此有賊心也。」（《李斯列傳》。見《史記》評語）太史公於漢興諸將，皆列數其成功，而不及其方略，以區區者不足言也；惟於信詳哉其言之。蓋信之戰，劉項之興亡繫焉。且其兵謀足爲後世法也。然自井陘而外，陽夏濉水之蹟蓋略矣，其擊楚破代，亦約舉其成功，至定三秦，則以一言蔽之，而其事反散見於他傳，蓋漢楚之爭，惟定三秦爲易，雖信之部署，亦不足言也。左氏紀韓之戰，方及卜徒父之占，而承以三敗及韓，乍觀之，辭意似不相承，然使戰韓之前，具列兩國之將佐，三敗之時地，則重脛滯壅，其體尚能自舉乎！此紀事之文，所以《左》《史》稱最也！其詳載武涉蒯通之言，則微文以志痛也。方信據全齊，軍鋒振楚漢，不忍鄉利背義，乃謀畔於天下既集之後乎！其始被誣，以行縣陳兵出入耳，終則見給被縛，斬於宮禁，未聞讞獄而明徵其辭，所據乃告變之誣耳，其與陳豨辟人挈手之語，孰聞之乎？列侯就第，無符璽節篆，而欲與家臣夜詐詔發諸官徒奴，孰聽之乎？信之過，獨在請假王，與約分地而後會兵垓下。然秦失其鹿，欲逐而得之者多矣，蒯通教信以反，罪尚可釋，況定齊而求自王，滅楚而利得地，乃不可末減乎！故以通之語終焉。」（見《書淮陰侯列傳後》）漢初文臣，御史大夫與丞相並重。張蒼申屠嘉兼兩職，故合傳。其餘爲御史大夫者五人，具有聲績，故列敘之。爲丞相者六人，皆無所發明，故總記其名以爲妮妮備員者戒焉。漢興，爲御史大夫者五人，皆在張蒼之前。張蒼既相，而申屠嘉代之，故於蒼相

淮南，預書十四年遷爲御史大夫，然後五人之爲御史大夫，脈絡相貫，而主客之分判然。蒼以前爲丞相者，名跡顯著，故不復言。嘉以後爲丞相者六人，別無所表見，故最其名氏而以媿媿備員蔽之，別有見者不列，皆義法之不得不然者。」（張丞相列傳）「禮書」痛漢用秦儀，三代聖制由是沈湮，而成之者實通。然時上之所用也，不敢斥言其非，故於後論隱約其辭，若褒若諷，而希世之污，則假魯兩生以發之。篇首載秦二世之善其對，以爲面諛之徵也。末載原廟之立，果獻之興，著其憑臆無稽，以示所言漢儀法，皆此類也。」（劉敬叔孫通列傳）「盡忌刻，錯刻深，而鄧公持議平，故得善終，因以爲章法。其子修黃老，亦與錯學申商相映。」（袁盎列傳）「吳王濞列傳」側入逆敍處，酷似「左傳」。蓋以吳及六國之敗亡，必牽連以書。設篇終更舉周邱之師及漢制詔，則爲附贅懸疣。故因敍吳兵之起，而及周邱之別出，因周邱之勝，而側入吳王之敗走，因吳王之敗走，而及天子之制詔，然後追敍吳楚之攻梁及亞夫之守戰，吳王之走死，六國之滅亡，而弓高侯出詔書以示膠西王，亦自然而合節矣！凡此皆義法所當然，非有意側入逆敍以爲奇也。」（吳王濞列傳）「魏其武安列傳」，以魏其灌夫生平事跡，並正敍於前，故武安事跡，皆與魏其夾敍。其初起也，著魏其方盛而卑事之。其益貴用事而下賓客，進名士也，以欲傾魏其諸將相。其讓魏其爲丞相也，以天下士素歸之，而用以釣讓賢之名。其好儒術，興禮度也，與魏其俱。其益橫益驕也，以言事多效，天下吏士皆去魏其而歸之。吏士去魏其，歸武安，則魏其與灌夫相歡相倚之由也。武安益橫益驕，則怨魏其，激灌夫之由也。中間魏其夫婦治具，旦及日中，與武安往來侍酒跪起如子姪相對。灌夫尤敬諸士貧賤者，與武安折詘諸侯王，坐其兄南鄉相對。好陵貴戚有勢在己之右者，爲後爭酒罵坐張本。而魏其初致名譽，及後銳身救灌夫，則以沾沾自喜，多易蔽之。章法蔽遏，覽者心怡目眩而莫知

所以然，所謂工倕旋而蓋規矩也。」〔魏其武安侯列傳〕「安國爲人多大略」三話，括盡安國平生。管子韓非文，有置樞紐於中間以要綰前後者，後來惟太史公韓退之能爲此。〔韓長孺列傳〕「平津侯主父列傳」，以恢奇多詐蔽宏之爲人。惟恢奇，故多詐而天子以爲敦厚也。惟天子以爲敦厚，故不惟汲黯之詰不能動，卽左右佞幸之毀，亦不能入也。其稱人主病不廣大，及陽屈於買臣之議，陰禍主父，徙董相，詐也。而使匈奴還報，不合上意，數諫通西南夷，築朔方，置滄海郡，汲黯廷詰，反稱其忠，使天子察其行而以爲敦厚，所謂恢奇也。黯詰以背約不忠，則曰：「知臣者以臣爲忠，不知臣者以臣爲不忠」，黯詰其儉以飾詐，則曰：「管仲侈擬於君而桓公以霸，晏嬰下比於民而齊國亦治」，所謂辨論有餘也。淮南衡山之反，泛引傳記，莫識其意嚮，而究其隱私，則自引咎以釋人主之慙，所謂習文法而又緣飾以儒術也。凡此類，皆以恢奇行其詐也。天子報書，一則曰君宜知之，再則曰君宜知之，而其曲學逢君，飾詐不忠之實，不可掩矣！〔平津侯主父列傳〕「史記」所載賦頌書疏甚略，恐氣體爲所滯壅也。長卿事跡無可稱，故獨編其文以爲傳，而各標著文之由，兼發明其指意以爲脈絡，匪是則散漫而無統紀矣！〔司馬相如列傳〕

「淮南衡山列傳」，備著淮南二王逆節，見漢法非過也。厲王反迹，皆於獄辭具之。故安之事既畢敘，乃曰「伍彼自詣吏告與淮南王謀反」，蹤迹如此，而獄辭則甚略。觀此傳，益信淮陰之枉，始則詐而禽之，而告反者無聞也，既則詐而斬之宮中，而上變者無徵也，使果有蹤迹，何難具獄而明徵其辭哉！著以傳著，疑以傳疑，俾百世以下，可尋迹推理而得其情，此之謂實錄也。〔淮南衡山列傳〕「循吏獨舉五人，傷漢事也。孫叔順民所欲，不教而從化，以視猾賊任威，使吏民重足一迹而益輕犯法者何如？子產既死而有遺愛，以視張湯死而民不思，王溫舒同時五族而衆以爲宜者何如？公儀子使食祿者不得與民爭利，

以視置平準，籠鹽鐵，縱告緡以巧奪於民者何如？石奢李離以死守法，以視用愛憎撓法，視上意爲輕重者何如？史公蓋欲傳酷吏，而先列古循吏以爲標準，故序曰『奉職循吏，亦足以爲治，何必威嚴哉！』然酷吏恣睢，實由武帝侈心不能自克，而倚以集事。故曰『身修者，官未曾亂也。』子產事具《左傳》，故略舉其成功。『循吏列傳』汲黯治東海，爲九卿，徙內史，居淮陽，而傳不填實一事，止虛言其性情氣象，略舉其語言及君臣上下之嚴憚，遂使千載下可聞風而興起，必如此乃與黯之爲人相稱。黯學黃老之言，好清靜，正與武帝與諸臣好興事病民相反。『治務在無爲而已』，語近復，然前郡守之治，後九卿之治也，其體各異，故分言之，且與張湯文深小苛，武帝分別文法反對，『面折犯顏』云云，亦與公孫宏懷詐飾智，阿諛取容反對。此傳蓋傷武帝有社稷臣，克知灼見而終不能用也。篇首稱黯以數直諫不得久留內，則進言多矣！爲右內史，守東海淮陽，列九卿，事蹟衆矣！而見於傳者止此，蓋非關社稷之計，則不著也。其直攻武帝之多欲，社稷臣所以格君也。矯節發粟以振貧民，奉使東越，不至而返，諫征匈奴，迎渾邪，罪民匿馬及賈人與市者，社稷臣所以安民也。面詰宏湯，責李息，社稷臣所以體國也。始仕爲太子洗馬，卽以莊見憚，及列九卿，與丞相大將軍抗禮，致天子敬禮，不冠不敢見，社稷臣所以持身也。史公於蕭相國，非萬世之功不著，於黯，非關社稷之計不著，所謂辭尚體要也。黯之爲社稷臣，不獨莊助知之，淮南謀逆者憚之，武帝實自發之，而終不能用，則內多欲之故也。黯之爲人，不獨衛人憚之，大將軍賢之，卽武安侯亦不聞含怒，而宏湯獨深心嫉之，欲擠之死，則宏湯爲人，又出武安侯下矣！入後敘上曰『人果不可以無學』，與篇首稱黯好學語反，以黯爲無學，故以儒術任宏也。『汲黯列傳』、『酷吏列傳』：甯成周陽由之前，不過吏之治酷而已！趙禹張湯而後，則朝廷之用法益刻，由上以爲能，而丞相宏數稱其

美也。因湯與禹共定律令而及其交驩，因交驩而及其爲人，以其後湯敗，天子使禹責之，因以爲章法也，故不與禹事連書而入《湯傳》。『湯爲御史大夫七歲敗』，湯所以敗，事緒多端，非用此爲關鍵，則散漫無紀。『三長史皆害湯欲陷之』句法，與先揭『湯爲御史大夫七歲敗』同。禹與湯同起，而死在湯後，故牽連以書。義縱守南陽，甯成奔亡而其跡終焉，故敘列於《縱傳》。『棄縱市，後一歲，張湯亦死』。湯誅在縱後，以天下事皆決於湯，故連書其敗露誅死之由，不暇書其年，至是始補記年歲也。尹齊與王溫舒相代爲中尉，而死又相次，故牽連以書。減宣出前早，而繫於篇終，以死後也。宣死而杜周任用。禹湯尚能貧，而周則家訾累巨萬矣！郅都尚能死節官下，不顧妻子，而周且爲子孫營窟，故以是終篇。」（《酷吏列傳》）

《大宛列傳》：『大宛之跡，見自張騫』；漢伐大宛，在張騫死後，而此篇前幅，乃通西北諸國事，非此二語，首尾不能相應。諸國地勢道里，皆以大宛四面言之，列序諸國，皆牽連大宛，以爲征宛立傳也。『騫因分遣副使』云云，大宛之跡，見自騫使月氏，其兵端起於使西北國者稱宛多善馬，故用此爲關鍵。

此篇前半記通使西北國，後半記以通使起兵端，而終於伐宛，故因烏孫獻馬，預入後得宛馬，以爲中間之關鍵。而通烏孫，乃騫本謀，故特書『自博望死後』，與篇首相應，然後首尾脈絡，併相貫注。『烏孫多馬，其富人至有四五千匹馬』，二語非多駢，見烏孫富人有馬至數千匹，則其王以馬千匹聘漢女，未爲重幣，而漢羣臣廷議，要以先納聘，始遣女，大辱國也。使端無窮，每遣齎金幣直數千萬，而所得僅此，與後天下騷動傳相奉伐宛而僅得善馬數十匹、中馬以下三千餘匹相應。」（《大宛列傳》）以上見《史記》評語。

《春秋》之制義法，自太史公發之，而後之深於文者亦具焉。義卽《易》之所謂言有物也，法卽《易》之所謂言有序，義以爲經，而法緯之，然後爲成體之文。《貨殖傳》兩舉天下地域之凡，而詳略異焉，其

前獨舉地物是衣食之源，古帝王所因而利道之者也，後乃備舉山川境壤之支湊，以及人民謠俗性質作業，則以漢興海內爲一，而商賈無所不通，非此不足以徵萬貨之情，審則宜類而施政教也。兩舉庶民經樂之凡，而中別之，前所稱農田樹畜，乃本富也；後所稱販鬻儉貨，則末富也。上能富國者，太公之教誨，管仲之整齊，是也。下能富家者，朱公子貢白圭，是也。計然則雜用富家之術以施於國，故別言之，而不得儕於太公管仲也。然自白圭以下，皆各有方略，故以能試所長許之。猗頓以下，則商賈之事耳，故別言之，而不得儕於朱公子貢白圭也。是篇大義，與《平準》相表裏，而前後措注，又各有所當如此，是之謂言有序，所以至蹟而不可惡也！夫紀事之文，成體者莫如左氏，又其後則昌黎韓氏，然其義法皆顯然可尋。惟太史公《禮》《樂》《封禪》三書及《貨殖》《儒林傳》，則於其言之亂雜而無章者寓焉，豈所謂定哀之際多微辭者耶！」見《又書貨殖傳後》其論《漢書》疏於義法，不如太史公曰：「太史公序禮樂，而不條次爲書，蓋以漢興，禮義皆仍秦故，不合聖制，無可陳者。郊廟樂章，並非雅聲，故獨舉《馬歌》，藉黯言以及明己意，其稱引古昔，皆與漢事相發，無泛設者。《漢書·禮樂志》，乃漫原制作之義，則古禮樂及先聖賢之微言，可勝既乎？是以不貫不該，偶然而無所歸宿也！其於漢之禮儀則闕焉，而獨載房中郊祀之歌及樂人員數。夫郊廟詩歌，乃固所稱體異雅頌，又不協於鍾律者也，既可備著於篇，則叔孫所撰，藏於理官者，胡爲不可條次以姑存一家之典法乎？用此知韓柳歐蘇曾王諸文家，敘列古作者，皆不及於固，卓矣哉，非庸學所能識也！」見《書漢書禮志後》「《春秋》之義，常事不書，而後之良史取法焉！昌黎韓氏目《春秋》爲謹嚴，故撰《順宗實錄》，削去常事，獨著其有闢治亂者。班史義法，視子長少浸矣！然尚能識其體要。其傳霍光也，事武帝二十餘年，蔽以『出入禁闥，小心謹慎』；相昭帝十三年，蔽以『百姓充實，四

夷賓服」，而其事無傳焉，蓋不可勝書，故一裁以常事不書之義，而非略也，其詳焉者，則光之本末，霍氏禍敗之所由也。古之良史，於千百事不書，而所書一二事，則必具其首尾，并所爲旁見側出者而悉著之，故千百世後，其事之表裏，可按而如見其人。後人反是，是以蒙雜暗昧，使治亂賢奸之迹，並昏微而不著也。是傳於光事武帝，獨著其出入殿門下，止進不失尺寸，而性資風采，可想見矣！其相昭帝，獨著增符璽郎秩，抑丁外人二事，而光所以秉國之鈞，負天下之重者具此矣！其不學專法，則於任宣發之，而證以參乘，則表裏具見矣！蓋其詳略虛實，措注各有義法如此！然尚有未盡合者！昌邑失道之奏，不詳，不足以白光之志事。至光之葬具，顯及禹山之奢縱，宣帝之易置其族姻，則可約言以蔽之者也，具詳焉，義無所當也，假子長退之爲之，必有以異此！〔見《書漢書霍光傳後》〕《王莽傳》，尤班史所用心，其鉤抉幽隱，雕繪衆形，信可肩隨子長，而借載莽之事與言，則義焉取哉！莽之亂名改作，不必有徵於後也，其奸言雖依於典故，猶唾溺耳；雖用文者無所取也，徒以著其譁張爲幻，則舉其尤者以見義可矣，而喋喋不休以爲後人詼嘲之資，何異小說家駁雅之戲乎！漢之朝儀禮器，一切闕焉，而具詳莽所易職官地域之號名，不亦舛乎！馮道事四姓十君，竊位固寵於篡弑武人之朝，其醜行穢言必多矣，歐公無一及焉，而轉載其直言美行，及所自述，與當時士無賢愚，皆喜爲稱譽，至擬之於孔子，是之謂妙遠而不測也！〔見《書王莽傳後》〕其論《五代史》得《史記》法，而猶未詳其義曰：「記事之文，惟《左傳》《史記》各有義法，一篇之中，脈相灌輸，而不可增損，然其前後相應，或隱或顯，或偏或全，變化隨宜，不主一道。《五代史》《安重海傳》，總揭數義於前，而次第分疏於後，中間又凡舉四事，後乃詳書之，此書疏論策體，記事之文，古無是也！」《史記》《伯夷》《孟荀》《屈原傳》。議論與敘事相間，蓋四君子之傳以道德節義，而事迹則無可列者，

若據事直書，則不能排纂成篇，其精神心術所運，足以興起乎百世者，轉隱而不著，故於《伯夷傳》，歎天道之難知，於《孟荀傳》，見仁義之充塞，於《屈原傳》，感忠賢之蔽壅，而隱以寓己之悲憤。其他本紀世家列傳，有事迹可編者，未嘗有是也！《重誨傳》乃雜以論斷語。夫法之變，蓋其義有不得不然者。歐公最爲得《史記》法，然猶未詳其義而漫效焉，後之人，可不察而仍其誤耶！」見《書五代史安重誨傳後》。

其論古文之淵源曰：「古文所從來遠矣！六經《語》《孟》，其根源也。得其支流而義法最精者，莫如《左傳》《史記》。《易》《詩》《書》《春秋》及《四書》，一字不可增減，文之極則也！降而《左傳》《史記》韓文，雖長篇，句字可薙芟者甚少。其餘諸家，雖舉世傳誦之文，義枝辭冗者，或不免矣！古文氣體，所貴清澄無滓，澄清之極，自然而發其光精，則《左傳》《史記》之瑰麗濃郁，是也。始學而求古求典，必流爲明七子之僞體。《三傳》《國語》《國策》《史記》爲古文正宗，然皆自成一體，學者必熟復全書，而後能辨其門徑，入其窠突。周末諸子，精深閎博，漢唐宋文家，皆取精焉，但其著書主於指事類情，汪洋自恣，不可繩以篇法。子長世表年表月表序，義法精深變化，退之子厚讀經子，永叔史志論，其源並出於此。孟堅《藝文志》·七略序《淳實淵懿》，子固序羣書目錄，介甫序《詩》《書》《周禮》義，其源並出於此。退之永叔介甫俱以誌銘擅長，但序事之文，義法備於《左》《史》，退之變《左》《史》之格調，而陰用其義法，永叔摹《史記》之調，而曲得其風神，介甫變退之之壁壘，而陰用其步伐。學者果能探《左》《史》之精蘊，則於三家誌銘，無事規撫，而自與之平矣！在昔議論者，皆謂古文之衰，自東漢始，非也。西漢惟武帝以前之文，生氣奮動，倜儻排宕，而法度自具，昭宣以後，則漸覺繁重滯澀，惟劉子政傑出不羣，然亦繩趨尺步，盛漢之風，邈無存矣！」見《古文約選序例》。

其論唐宋八家曰：「古文自周以來，各自名家，僅數十人，其艱可知。苟無其材，雖務學，不可強而能也。苟無其學，雖有材，不能驟而達也。有其材，有其學，而非其人，猶不能以有立焉。蓋古文之傳，與詩賦異道。魏晉以來，奸僉汙邪之人，而詩賦爲衆所稱者有矣，以彼瞶瞶於聲色之中，而曲得其情狀，亦所謂誠而形者也，故言之工而流俗所不棄。若古文，則本經術而依於事物之理，非中有所得，不可以爲僞，故自劉歆承父之學，議禮稽經而外，未聞奸僉汙邪之人，而古文爲世所傳述者！韓子有言：『行之乎仁義之途。游之乎詩書之源。』茲所以能約六經之旨以成文，而非前後文士所可比並也！姑以世所稱唐宋八家言之。韓及曾王，並篤於經學，而淺深廣狹，醇駁等差，各異矣。」見《答申謙居書》。

「子厚自述爲文，皆取原於六經，甚矣其自知之不能審也！彼言涉於道，多膚末支離而無所歸宿；且承用諸經字義，尚有未當者。蓋其根源雜出周秦漢魏六朝諸文家，而於諸經特用爲采色聲音之助爾，故凡所作效古自汨其體者，引喻凡猥者，辭繁而蕪，句佻且穉者，記序書說雜文皆有之，不獨碑誌仍六朝初唐餘習。其雄厲淒清濃郁之文，世多好者，然辭雖工，尚多町畦，非其至也！惟《讀魯論》、《辨諸子》、《記柳州近治山水》諸篇，縱心獨往，一無所依藉，乃信可肩隨退之，而曉然於北宋諸家之上！惜乎其不多見耳！」見《書柳文後》。

「歐陽永叔粗見諸經之大意，而未通其奧蹟。蘇氏父子，則慨乎未有聞焉。此核其文，而平生所學不能自掩者也。韓、歐、蘇、曾之文，氣象各肖其爲人。子厚則大節有虧而餘行可述。介甫則學術雖誤而內行無頗。」見《書柳文後》。

其他雜家，小能以文自耀者，必其行能少異於衆人者也！非然，則一事一言偶中於道而不可廢，如劉歆是也，然若歆者，亦僅矣！以是觀之，苟志平古文，必先定其祈嚮，然後所學有以爲基，非是則勤而無所！若夫《左》《史》以來相承之義法，各出之

徑途，則期月之間，可講而明也！」（《答申謙居書》）其論明歸有光曰：「震川之文，鄉曲應酬者十六七，而又徇請者之意，襲常綴瑣，雖欲大遠於俗言，而道無由。其發於親舊，及人微而語無忌者，蓋多近古之文。至事關天屬，其尤善者，不俟修飾，而情辭并得，使覽者惻然有隱，其氣韻蓋得之子長，故能取法於歐曾而少更其形貌耳！」孔子於艮五爻辭，釋之曰「言有序」。家人之象，系之曰「言有物」。凡文之愈久而傳，未有越此者也！震川之文，於所謂有序者，蓋庶幾矣；而有物者則寡焉！又其辭號雅潔，仍有俚而傷於煩者。」（見《書震川文集後》）其論錢謙益曰：「余初至京師，見時人言古文，多稱虞山錢受之。嘗私語其文，穢惡藏於骨髓，一如其人，有或效之，終不可灑濯！」（見汪武曹表）其辨文體曰：「喬侍講來一生大節，在爭開海口，而其子索為墓誌及家傳。以鄙意第可記開海口始末，而以侍講奏對車邏河事及四不可之議附焉，傳誌非所宜也！諸體之文，各有義法。表誌尺幅甚狹，而詳載本議，則擁腫而不中繩墨，若約略翦截，俾情事不詳，則後之人無所取鑒，而當日忘身家以排廷議之義，亦不可得見矣！」（《國語》載齊姜語）晉公子重耳，凡數百言，而《春秋傳》以兩言代之，蓋一國之語可詳也，傳《春秋》者總重耳出亡之迹，而獨詳於此，則義無取，今試以姜語備入傳中，其前後尚能自運掉乎？世傳《國語》，亦邱明所述，觀此可得其營度為文之意也。家傳非古也，必阨窮隱約，國史所不列，文章之士，乃私錄而傳之。獨宋范文正公范蜀公有家傳，而為之者，張唐英、司馬溫公耳，此兩人故非文家，於文律或固不審。若八家則無為達官私立傳者。韓退之傳陸贄、陽城以載《順宗實錄》。順宗在位未踰年，而以贄與城之傳附焉，非所安也，而退之以附焉者，以附實錄之不安，尚不若入私集之必不可也！」（見《答喬介夫書》）文士不得私為達官立傳。李習之與退之游，此義宜夙講，而集有《東川節度盧坦傳》，事迹平敘，無杼軸經緯，後無論贄，豈習

之嘗欲筆削國史，故於所聞見偶錄以備取材，其後史卒未成，而編者誤以入集耶？吾觀周秦間諸子，其傳顯著者，尚多爲後人僞亂。太史公作《史記》，藏之名山，副在京師，然中間多駢旁枝，如《秦紀》後復出襄公至二世六百一十年事，《田單傳》別載君王后王蠋語，蓋當日捭拾羣言，以備采擇而未用者，不知者乃取而附錄焉。故退之自言所學，首在辨古書之正僞。然則文之義法，不獨作者宜知之也！」（書李習之遺札傳後）「退之、永叔、介甫俱以誌銘擅長。退之諸誌，奇崛高古，而馬少監柳柳州二誌，皆變體。蓋誌銘宜實徵事迹，或事迹無可徵，乃敘述久故交親而出之以感慨，馬誌是也。或別生議論，可與可感，柳輔誌是也。永叔善敘述親故，介甫則別生議論，其體制皆師退之。」（見古文約選序例）「介甫誌錢公輔母，以公登甲科爲不足道，況瑣瑣者乎！余文乃用歐公法，若參以退之介甫，尚可損三之一，假而周秦人爲之，則存者十二三耳。誦歐公文，試思所熟者，王武恭杜祁公諸誌乎？抑黃夢升張子野諸誌乎？然則在文言文，雖功德之崇，不若情辭之動人心目也，而況職事族姻之纖悉乎！夫文未有繁而能工者，如煎金錫，鑄礦去，然後黑濁之氣竭而光潤生。《史記》《漢書》，乃事之體本大，非按節而分寸之不遺也！」（見與程若韓書）「誌銘每事必詳，乃近人之陋！古作者每就一端引伸以極其義類。」（見與陳滄洲書）「古者婦人祔葬無特銘。」（見劉中翰孺人周氏墓表）「余生平非親懿故舊，未嘗一與之銘。蓋銘者，謚誄之遺也。古者非貴而有功德，不爲誄；而謚則雖君父不敢有私焉。今於素所不識之人而與之銘，設實背於所稱，是謬言也！」（見爲君墓誌銘）「碑記墓誌之有銘，猶史有贊論，義法創自太史公，其指事辭事，必取之本文之外。班史以下，有括終始事迹以爲贊論者，則於本文爲複矣！此意惟韓子識之，故其銘辭，未有義具於碑誌者，或體制所宜，事有覆舉，則必以補本文之間缺，如《平淮西碑》兵謀戰功詳於序，而既平後情事，則以

銘出之。其大指然也。前幅蓋隱括序文，然序述比數世亂，而銘原亂之所生，序言官怠，而銘兼民困，序載戰降之數，銘具出兵之數，序表洄曲文城收功之由，而銘備時曲、陵雲、邵陵、郾城、新城比勝之迹。至於師道之刺，元衡之傷，兵頓於久屯，相度之後至，皆前序所未及也。歐陽公號爲人韓子之奧窔，而以此類裁之，頗有不盡合者。介甫盡之矣，而氣象則過隘。夫秦周以前，學者未嘗言文，而文之義法，則無一之不備焉！」見《書韓退之平淮西碑後》「墓之有誌，以納於墳，義主於識其人之實，其道宜一而已，唐柳宗元以哀其姊而貳之，非古也！」外碑之表，依表之者以重，緣孝子之心，所以光揚其親者不一而足，則受其請者，各以意爲之可也！」見《黃際飛墓表》「散體文惟記難撰結。論辨書疏，有所言之事。誌傳表狀，則行誼顯然。惟記無質幹可立，徒具工築興作之程期，殿觀樓臺之位置，雷同鋪敘，使覽者厭倦，甚無謂也。故昌黎作記，多緣情事爲波瀾。永叔介甫則別求義理以寓襟抱。柳子厚惟記山水，彫刻衆形，能移人之情。至監察使四門助教武功縣丞廳壁諸記，則皆世俗人語言意思，援古證今，措事指語，皆有現成文字一篇，不假思索，是以北宋文家，於唐多稱韓李，而不及柳氏。凡爲學佛者，傳記用佛氏語，則不雅，子厚子瞻皆以此自取，至明錢謙益，則如涕唾之令人嘔矣。豈惟佛說，卽宋五子講學口語，亦不宜入散體文；司馬氏所謂言不雅馴也。」見《答程變州書》苞以文章爲天下宗，而世之治桐城文者，持其言論以爲準式，遂要刪之以備一家之學云。

集虛齋學古文十二卷

《集虛齋學古文》，簽題《方璞山古文》，還淳方葵如字文轉所撰。葵如與其宗人苞同時有名，而文

章各出一途。方苞質厚以爲渾，清約以見潔，而不敢出奇，蓋由李翱以得韓愈之體段，而稍短氣韻，不如翱之優游緩衍。葵如陌厲以爲雄，弔詭以出奇，而不欲爲平，蓋從皇甫湜孫樵以學韓愈之章句，而特爲警切，力矯湜之堆砌膚縟。苞之文樸，而葵如之辭華。苞之勢平，而葵如之筆峭。葵如氣肆不平，而苞不敢不平。葵如辭華不澹，而苞不能不澹。昌黎《上宰相書》所謂「時有感激怨懟奇怪之辭」，惟葵如爲有之能之，而苞不能！集爲光緒十年甲申仲秋，淳安縣署重刊，前有乾隆二十年歲在癸亥大淵獻端陽日，虞山王應奎一序，文格略仿皇甫湜《韓文公墓銘》，蓋亦以韓公待之也，頗足以盡葵如之意趣。其辭曰：「本朝文教訖乎四海，而江浙之間，漸被尤深；於是得強筆之儒二人焉，制義之外，兼以古文詞伏一世，而其人皆出方氏，一爲望溪先生，一爲賦溪先生云！天不憖遺，又弱一個。而賦溪先生乃以昔年宿德，巍然魯靈光特間！先生秀氣孤稟，而篤嗜惟書，怠以爲枕，澹以爲飢口，寢饋既久，常若生蓄，發而爲文，割其膏腴，入我爐鞴，羅絡蟹蛤，拘致鯢鰓，衆美輻輳，與古大適；周情孔思，流溢簡外；班香宋豔，浮動毫端；與世之貌爲歐曾以文其空疏者，判若筵櫺矣！在昔義山之稱《韓碑》也，謂爲『點竄《堯典》』，《舜典》字，塗改《清廟》《生民》詩。』然後知爲古文者，非點竄塗改，伏材於古，而理以貫之，氣以使之，則不能句奇語重，入人肝脾，使人欽其寶而莫名也！而或者謂點竄塗改，乃王李故智，非大雅所尚。而不知王李之所以爲僞體者，以其文不從，字不順，鉅釘而不貫串，駁雜而不雅馴也；而豈點竄塗改之爲病哉！今觀先生之文，融經液史，範秦鑄漢，而所謂點竄塗改者，絕無痕跡；如千狐之腋，會粹成裘，而滅盡針線也！如百花之萼，醞釀成蜜，而化盡渣滓也！又如五侯之鯖，熊蹯豹胎，猩唇象約，合并一器，而不辨爲此餉自某甲，彼餉自某乙也！當此人不悅學之世，而先生之文出焉，用以鉗持啾發，吹回蟲蛇，

庶空拳枵腹之士，擺指而退，而讀書汲古之士，俠轂以起乎！應奎溝督無識，妄有述造，而辱先生妄歎，賜以良書，方滋愧悚！茲又檢寄文集，屬題卷端。顧余何人，而敢爲先生皇甫氏哉！重違嘉命，勉效一言，終不能研其才外之致，而區區願附於李漢裴延翰之流，藉以致其欽挹之私於退之牧之者，固於是乎在！「觀王氏序蔡如之文，謂「爲古文者，非點竄塗改，伐材於古，而理以貫之，氣以使之，則不能句奇語重，人人肝脾。」若方苞則謂「古文氣體，所貴清澄無滓，澄清之極，自然而發其光精，則《左傳》《史記》之瑰麗濃郁，是也。始學而求古求典，必流爲明七子之僞體。」見《望溪文集·古文約選序例》。而蔡如則不憚求古求典，而貫以理，使以氣，順理成章，以不同於王李僞體之鉅釘駁雜焉！大抵方苞之文，所貴澄清無滓。而蔡如之文，難在茂典有致。摭錄可誦，篇目如左。

論說類 道與文俱

序跋類 讀史記游俠列傳 刻讀書記題詞 書蔣東委孟子讀後 書外舅徐寶名先生詩後 書桐野先

生詩集後 聽雨樓樂府題詞 題鄒古岳雲根樓草 小山堂唱酬詩題詞 書春浮書屋印譜 鄭注

拾濟自序 重修嵯縣志序代 嚴州救災圖序 雲洞葉氏宗譜序 蔣肇方氏譜序 應氏續修譜序

金氏續譜序 述本堂三世詩集序 夢月巖詩集序 石川詩序 施竹田詩序 鮑西岡閩江集序

石瓢詩鈔序 鮎埼集序 亡弟藥房緣情詩序 王榛逸遺集序 某人詩序 金先生文錄序 陳

先生文錄序 百川先生遺文序 吳竹城先生文序 姜自耘文序 墨汀初刻序 劉萬資文序 程

爽林遺文序 葉麗南遺文序 吳協南遺文序 序錢載錫文 儲于賓文序 徐笠山文後序 龔碩

果文序 杭大宗文序 蔡桐川文序

書牘類

奉辭檄試鴻博揭子 奉辭王少司馬薦舉劄子 與周白民書 與儲大雅書 王寅 與王虛舟書

與王漢階 與王立甫書 奉王少司馬 奉家學士靈臯二兄書 與儲于賓先生 與呂待孫先生

書 與全紹宸 答謝生書 答何漢勛

贈序類

送何漢勛入都序 送胡方二子試禮部序 越州太守周公考績序 贈句賓序 贈汪聿昭序

賀兩浙總督使御史中丞謝公序代 吳尺鳧五十壽序 徐笠山先生夫婦雙壽序 同學王君七十初度

序 史拙圃夫婦七十雙壽序 張母李太君八秩序 邵翁泉若八十壽序 宗人維章兄八十壽序

家從名卿五十壽序 族諸母王少君六十壽序 范鶴亭六十壽序

傳狀類

百五歲老嫗 述呂節婦 吳徵君傳 李培園傳 學博應孔昭家傳 方石卿志

碑志類

嶧縣崇祀貝子惠獻公神祠碑銘 嚴州太守周公德政碑銘 温州府創建育嬰堂碑代 捐修將

盈庫署碑 清故誥封恭人張母李太夫人墓誌銘 翰林院編修贈侍讀學士義門何先生墓誌銘 清

故奉政大夫陶君暨元配宜人胡太君墓誌銘 清故勅封文林郎知惠安縣錢君暨孺人墓誌銘 貞孝

沈先生暨節孝陳太君墓誌銘 明經處士周六雲先生墓誌銘 文學應次魯墓誌銘 清故攝知合州

事定遠縣知縣吳君墓誌銘 誥封中憲大夫學博周濟菴先生墓誌銘 先兄若遠暨嫂吳氏墓誌銘

先兄若召墓誌銘 亡弟藥房墓誌銘 繼室徐氏墓誌銘 藥房弟婦沈氏墓誌銘 從子栗夫墓表

雜記類

靈臯文稿後書 書華豫原事 記長老言 應東白築室記

右文一百零三首。集中與方苞何焯以學問文章相商榷者數見，而各行其是。論學，則右漢而抑宋，

又極稱王安石之學。論讀書則不尚宋本。

其論讀書不尚宋本曰：「今本《大戴禮》第七十九篇曰爲《公符》，大抵所言皆冠禮，而發云『公符自爲主』，初不知公符何解也？既讀《儀禮·士冠禮》賈疏引《大戴禮·公冠篇》者三，求之今本日次，顧無之，其詞，即今《公符篇》所云；然後知『符』字卽『冠』字之三家，以草筆涉誤耳！嘗試改『符』爲『冠』，則篇首『公冠自爲主』，與後文『太子與庶子，其冠皆自爲主』之句，一一珠穿矣！然高安朱文端公撫浙時，嘗閱此書，自謂得宋刻善本於滿制府案頭，其篇目亦爲《公符》，而潛邱閻氏義門何氏各有校正《困學紀聞》一書，今方流布，所引者仍作《公符》，則州鐵鑄錯，所從來久。世嘗寶宋版本書，謂可是正文字，卽如此，豈不疑誤後生也！」見《書大戴禮後》。

其論王氏新學曰：「吾嘗怪陸農師方性夫輩，皆從介夫新學，然說經鏗鏘，類能敷通危疑，桀然自建。而號爲得不傳之學，其門徒昏昏索索，乃反十三四不逮之！端居多暇，點勘經解，有蔡元度《毛詩名物解》二十卷，閱之，歎其穿穴因鎖，遠有致思，自《雜解》以下諸條尤奇，因念其人爲鬼爲蜮，狗彘不食汝餘，而緣飾經術乃如此！然則妙解文章之味者，不獨章子厚也！又念子厚且不免以世故廢學，元度貪顧凶叫，豈辦仰屋梁著書！意渠婦翁偶遺下兔園冊子，從道旁拾得耳！既閣李迂仲黃夫兩家《詩解》，其中往往摭王氏之說而反之，而意語強半與此編相出入，又多同陸農師《埤雅》，然後決其爲安石碎金，無疑也！竊計經義字說中，如此類者非一！何等腐生，因其衰也而攻之，吠虛唾實，猜猜相索，而妙析奇致，竟以此無種矣！惜哉！」見《書毛詩名物解後》。

其論道與文俱以砭宋儒之著書曰：「歐陽子曰：『吾所爲文，必與道俱。』某則一言以變之曰：『吾所爲道，必與文俱。』今稱載道之文者《五經》，然文必如《五經》，始能以載道。自《五經》後，言道者世多有其

書。至宋而益浩浩若烟海，其間號爲得不傳之學者，仰視天，俯畫地，中更人事，旁涉物怪，上追本始之茫，下極諸元會運世之窮無所入，以復歸於溟滓，皆言其理而筆之於書，精無倫而大不可圍，往往出於《五經》之文之所不到，意且超而越焉。然而《五經》之文，回薄萬古，光景若日月。凡此儒書，則使人讀未竟一紙，欠申思睡者過半，是何也？道有餘而文不足起之也！文不足起之，而至使人欠申而思睡，則道翳翳而愈伏，不惟不並驅《五經》，而并不能與揚子之《法言》，王氏之《中說》，韓子之《原道》《原性》諸篇，爭黃池之長！夫此皆諸儒所不滿，以爲道不足而彊言者也，而因文見道，文極於工，遂聳其書於得不傳之學者之上！且夫左氏之誣也，《公羊》之短也，《穀梁》之俗也，史遷之是非謬於聖人也，班氏之排正直，否死節也，皆非知道者也！老、莊、列則道其所道。苟之於道，亦同門而異戶。外此法家、名家、雜家如韓公子、呂覽、淮南之屬，戰國短長家言，傾危權變，其於道疑無一毫可論。而學士家玩其華，食其實，直與《五經》流通相銷饌，任諸儒老先生排擯毀斥之，口燥唇乾，卒不能使之回而易向，舉所業而投之水火，蓋文之入人肝脾有如此，雖無道者猶將申焉！然則道之必與文俱也決矣！抑非獨此而已！經故以道法勝，然唯《易》與《春秋》無間然！《詩》《書》雖經聖人手，而如《呂刑》《文侯之命》，儒先既有違言矣！又謂《鄭風》即鄭聲之淫，夫淫復何道！《禮記》成於漢人，由諸儒言之，其背理傷道者難偏以疏舉。將以《周禮》當之，而或詆爲瀆亂不經之書，或又以爲六國陰謀之書。《儀禮》則形而下者耳，雖號爲經，未多乎道。而其光景之回薄萬古者，諸經若一，不以損其毫毛，顧反苦繩諸文人，若有一言之不幾乎道，即貶刺之，令一錢不直，以己之不好，而并禁人之好之，嗚呼！此何理也！相馬者期於驥，驥之德力，不可必得，而必待驥而乘之，不得驥，雖馬之奔蹏，力可致千里，皆斥棄異阜，不以服箱，爲其

將折輒而摧轅也；而反任驚下以唏驥之乘，駕蹇驢而無策，駟跛鼈而上山，將沒世不行尋常，而又何路之能極！是故有道而文者上也。道不足而文者次之。文不足而道者又次之。雖說於道，而其文深妙，使人不覺入其玄中者又次之。言之無文，而託諸道以逃其樸鈍枯朽，則無次！某之爲此言也，重文也，乃所以重道也！昔者莊周言道，蓋無所不在，稊稗瓦礫，每下愈況。其序《天下篇》：「凡一曲百家，皆標爲古之道術有在者。是故荀卿之非十二子也，必曰『其持之有故，言之成理』，夫其有故而成理也，卽道也。朱子譏蘇氏，亦曰『出入有無，曲成義理』。夫其出入而曲成也，卽道也。詭乎道以爲文，要之文仍不離所謂道。而或者謂辨道不可耀文，欲以樸鈍枯朽之學，嚙嚙道真。夫人之棄其文也，若棄泥塗矣！又安所得道而辨之！然則無文者，道之賊也。重文乃所以重道，雖謂某之說，卽歐陽子之說，可也！」

（見《文獻通考》）

其論文以韓愈爲宗，而志不在唐以下曰：「僕幼狂蠢，起辰終酉，讀書不能度十行，居三家邨中，亦無與道古者。先君子不知其驚下，經書外，頗授以《三傳》《史》《漢》韓柳文，而旁及牧之可之輩；曰：『成學治古文當取是！』退而尋今世古文，乃無一毫相似！僕嘗以古文盛於唐，而論文之旨，亦莫如唐備昌黎語劉正夫曰：『文無難易，惟其是。』習之語王載言曰：『文無難易，極於工。』此二言者，如左右手，斷其一則兩俱廢，不是，非工也，不上，非是也。故皇甫持正之誌昌黎也，曰：『至是歸工，則既盡之矣。雖然，爲此者，有族有祖。昌黎蓋祖左、史、揚子雲，而以劉向班固輩爲之族，故其文奇而法。河東蓋祖《國語》《漢書》，而以杜欽谷永輩爲之族，故其文密而至。樊川則已固矣，然所祖者，尚在賈太傅晁家令，而以韓柳爲之族，故其文散朗勁俠，得韓一體，習之持正及可之輩，不能紀遠，祖於韓而還相爲族，故論者

以爲學韓而不至，夫其學韓也，茲所以不至也！賴其才力雄獨，故尚能持門戶。苟才減諸人，則不勝困蹙矣；如義山襲美等，是也。銳意鑽仰，蓋不在唐以下；苟叩其祖與族之所處，而倍道趨之，於韓、柳、樊川，尚可得意髣髴；次不失持正可之諸公；下亦徑到義山、皮、陸輩。故曰：『國王不成，其弊猶可以霸。』見與王立甫書。綜所云云，生平宗尚可知矣！

劉海峯集十九卷附詩文三冊

《劉海峯集》，古文八卷，詩古體五卷，今體六卷，附詩文即四書文三冊；桐城劉大槐字畊南撰。大槐於桐城年輩視方苞爲後，而以古文繼起有名，駢稱方劉。苞亟賞歎，至謂：「苞何足算！劉生乃國士爾！」苞不能詩，而大槐兼能詩；五言尤勝七言。近體運古於律，秀麗而出以疏朗，韻高氣清，髣髴王維。古體風骨峻拔，興象淵微，蓋得元亮之古澹，而協左思之風力者。七言古錯綜震蕩，逸氣干雲，其原出李太白，而微欠卓錫。此集爲前清光緒二年，其族孫少塗遊宦河南所重刊，冠以《國史·文苑傳》，謂：「大槐雖遊方苞之門，所爲文造詣各殊。苞蓋擇取義理於經，所得於文者義法。大槐並古人神氣音節得之，兼集《莊》《騷》《左》《史》《韓》《柳》《歐》《蘇》之長。嘗著《觀化篇》，奇詭似《莊子》。詩雄豪奧祕，揮斥出之。」尚非過譽之論！特謂「大槐並古人神氣音節得之，兼集《莊》《騷》《左》《史》《韓》《柳》《歐》《蘇》之長」，則不免故相矜詡耳！大抵方苞取義理於程朱，取體段於史公。而大槐取詼詭於《莊子》，取音節於韓愈。大槐之氣矜肆，而方苞之文醇茂。然大槐雖好爲詼詭，而學莊學韓，模擬之迹太似；轉不如方苞之放筆灑落，脫盡畦徑！桂林呂璜錄宜興吳德旋《初月樓古文緒論》曰：「劉海峯文，最講音節，有絕好之篇。其萃

諸子而有痕迹，非上乘也！」然吾以爲大樾之文，有音節而無風力，描頭畫角，未能如韓愈之肆意有所作！墓誌神道碑，尤傷庸絮，殆不足法；而銘俶詭有光響，往往道變，庶幾韓愈之具體乎！論桐城文者必及大樾。然大樾特桐城人爾！而讀其文，則陽湖張惠言之所自出，而不合世之所謂桐城宗派。桐城以震川數歐公，而蘄於潔適；大樾以莊子化韓愈，而故爲矜誕，故不同也。采錄可誦，篇目如左。

詩類 雜詩十四首 觀魚 登金谷巖 江鄉 宿合明寺 過周山人莊居 不寐 山中 夜行 送周

大汝調之官福建 感懷七首 羈旅行二首 雜詩八首 飲酒五首 雨後 田居詩 借酒 曉望

北齊校書圖 宿山中古寺 舟行見月有懷倪九司城 題巴船出峽圖 雜感十一首 贈徐崑山

結交篇以上古體 山居雨後 五印寺聽吳少峰彈琴 山行 與諸君泛舟荷花盛開 夏日暝興

獨坐有懷 獨宿 雨晴 訪鶴鳴寺僧不遇 春日有懷方二頌椒 對酒 江村獨宿 晚行 竹園

獨遊古寺 真州作 歸雁 送何淵若將軍 送人賦西域 過大慧寺 獨酌思歸 山中暮歸 家

在 江鄉 江口晚泊 宿勝福寺 跣跌 感懷 懷姚姬傳 鄖陽客舍 懷方頌椒 懷跋三二首

宿山寺 聞雁以上今體

論說類 觀化 心知 天道上中下 息爭 焚書辯 雷說 續難言

序跋類 書荆軻傳後 海舶三集序 見吾軒詩集序 馬湘靈詩集序 倪司城詩集序 王天孚詩集序

海日樓詩集序 海門初集序 江若度文集序 鄭山子詩集序 張訥堂詩集序 張秋溍詩集序

張荔亭詩集序 顧備九時文序 綦白堂時文序 潘在澗時文序 徐笠山時文序 朱子頌詩

集序

書牘類 與吳閣學書 再與吳閣學書 與李侍郎書 答吳殿麟書

贈序類 贈張綱儒序 送張福清序 送姚姬傳南歸序 送沈菽園序

傳狀類 胡孝子傳 江先生傳 鄭之文傳 樵髯傳 錢節婦傳 胡節婦傳 芋園張君傳 少宰尹公

行狀 章大家行略

碑誌類 方府君墓誌 江西吉南贛道副使方君墓誌銘 海門鮑君墓誌銘 許游擊墓誌銘 吳夢千墓

誌銘 吳錦懷墓誌銘 謝師其墓誌銘 方橙林墓表 舅氏楊君權厝誌 下殯子張十二郎壙銘

雜記類 浮山記 遊黃山記 遊晉祠記 遊大慧寺記 遊三遊洞記 遊百門泉記 寶祠記 遊萬柳

堂記 漱潤樓記 半塾園圖記 賁趾堂記 一掌圖記 金陀圖記 無齋記 如意寺記 縹碧

軒記

祭文類 祭尹少宰文 祭望溪先生文 祭張閑中文 祭左和中文 祭余少京兆文 祭邵開府文 祭

左蘭中文 祭史秉中文

右詩一百零一首，文七十八首。古文前有《論文偶記》，四書文前有《時文論》，可以覘蘄嚮所在。

其論文以神氣爲主，而不以理爲主曰：「行文之道，神爲主，氣輔之，曹子桓蘇子由論文以氣爲主，是矣。然氣隨神轉，神渾則氣灝，神遠則氣逸，神偉則氣高，神變則氣奇，神深則氣靜，故神爲氣之主。

至專以理爲主，則未盡其妙！蓋人不窮理讀書，則出詞鄙倍空疏。人無經濟，則言累牘不適於用。故義理書卷經濟者，行文之實，若行文自別是一事。譬如大匠操斤，無土木材料，縱有成風盡望手段，何處設施！然有土木材料而不善設施者甚多，終不可爲大匠。故文人者，大匠也。神氣音節者，匠人之能事也。

義理書卷經濟者，匠人之材料也。作文本以明義理，適世用；而明義理，適世用，必有待於文人之能事。程子謂：『無子厚筆力發不出。』文章最要氣盛，然無神以主之，則氣無所附，蕩乎不知其所歸也！古人文章，可告人者惟法耳；然不得其神而徒守其法，則死法而已！要在自家於讀時微會之。李翰云：『文章如千軍萬馬，風恬雨霽，寂無人聲。』此語最形容得氣好。然論氣不論勢不備。昔人云：『文以氣為主。氣不可以不貫。鼓氣以勢壯爲美，而氣不可不息。』此語甚好。今粗示學者：古人行文至不可阻處，便是他氣盛，非獨一篇爲然，卽一句有之。古人下作一語，如山崩峽流，覺攔當他不住，其妙只是簡直的。氣最要重。予向謂文須筆輕氣重，善矣而未至也。要得氣重，須便是字句下得重。此最上乘，非初學笨拙之謂也。文法至鈍拙處，乃爲極高妙之能事，非真鈍拙也，乃古之至耳！古來能此者，史遷尤爲獨步！

其論神氣見於音節，音節託於字句曰：『文章最要節奏，譬之管絃繁奏中，必有希聲竊渺處。神氣者，文之最精處也。音節者，文之稍粗處也。字句者，文之最粗處也。然余謂論文而至於字句，則文之能事盡矣！蓋音節者，神氣之跡也。字句者，音節之矩也。神氣不可見，於音節見之。音節無可準，以字句準之。音節高，則神氣必高。音節下，則神氣必下。故音節爲神氣之跡。一句之中，或多一字，或少一字，一字之中，或用平聲，或用仄聲；同一平字仄字，或用陰平陽平上聲去聲入聲，則音節迥異，故字句爲音節之矩。積字成句，積句成章，積章成篇，合而讀之，音節見矣！歌而詠之，神氣出矣！近人論文不知有所謂音節者，至語以字句，則必笑爲未事；此論似高實謬！作文如字句安頓不妙，豈復有文字乎！但所謂字句音節，須從古人文字中實實講貫通始得；非如世俗所云也。凡行文多寡短長，抑揚高下，無一定之律，而有一定之妙，可以意會而不可以言傳，學者求神氣而得之於音節，求音節而得之

於字句，則思過半矣！其要只在讀古人文字時，便設以此身代古人說話，一吞一吐，皆由彼而不由我，爛熟後，我之神氣，即古人之神氣，古人之音節，都在我喉吻間，合我喉吻者，便是與古人神氣音節相似，久之，自然鏗鏘發金石聲。記得多，便可生悟，譬如弈棋記得著多，便須有過人之著。文章到極妙處，便一字不可移易，所謂無一定之律，而有一定之妙。」

其論文之所貴曰：「行文最貴者品藻，無品藻，便不成文字，如曰渾，曰灝，曰雄，曰奇，曰頓挫，曰跌宕之類，不可勝數；然有神上事，有氣上事，有體上事，有色上事，有聲上事，有味上事，有識上事，有情上事，有才上事，有格上事，有境上事，須辨之甚明。文章品藻最貴者，曰雄，曰逸。歐陽子逸而未雄。昌黎雄處多，逸處少。太史公雄過昌黎，而逸處更多於雄處，所以爲至！文貴奇。所謂珍愛者，必非常物；然有奇在字句者，有奇在意思者，有奇在筆者，有奇在邱壑者，有奇在氣者，有奇在神者。字句之奇，不足爲奇；氣奇，則真奇矣！神奇者，古來亦不多見。次第雖如此，然字句亦不可奇，自是文家能事。揚子《太玄》《法言》，昌黎甚好之，故昌黎文奇。奇氣最難識，大約忽起忽落，其來無端，其去無迹，讀古人文，於起滅轉接之間，覺有不可察識處，便是奇氣。奇正與平相反。氣雖盛大，一片行去，不可謂奇。奇者，於一氣行走之中，時時提起。文貴高。窮理則識高。立志則骨高。好古則調高。文到高處，只是平淡意多，譬如不事紛華，儵然世味之外，謂之高。昔人謂子長文字峻，震川謂此言難曉，要當於極真極樸極淡處求之。文貴大。道理博大。氣脈宏大。邱壑遠大。邱壑中必峯巒高大，波瀾闊大，乃可謂之遠大。而文之大者，莫如史遷。震川論《史記》謂爲大手筆，曰「起頭處來得勇猛」，又曰「連山斷嶺，峯巒參差」，又曰「如畫長江萬里圖」，又曰「如大塘上打緯，千萬船不相妨礙」，此氣脈洪

大，邱壑遠大之謂也。文貴遠。遠必含蓄，或句上有句，或句下有句，或句中有句，或句外有句，說出者少，不說出者多，乃可謂遠。昔人論畫曰：「遠山無皴。遠水無波。遠樹無枝。遠人無目。」此之謂也。遠則味永。文至味永，則無以加。昔人謂：「子長文字微情妙旨，寄之筆墨蹊徑之外。」又謂：「如郭忠恕畫，天外數峯，略有筆墨，而無筆墨之迹。」昔人謂：「意盡而言止者，天下之至言也，然言止而意不盡者尤佳。」意到處，言不到，言盡處，意不盡，自太史公後，惟韓歐得其一二。文貴簡。筆老則簡。意真則簡。辭切則簡。理當則簡。味淡則簡。氣蘊則簡。品貴則簡。神遠而含藏不盡則簡。程子云：「立言貴含蓄意思，勿使無德者眩，知德者厭！」此語最有味。文貴疏。宋畫密，元畫疏。顏柳字密，鍾王字疏。孟堅文密，子長文疏。凡文力大則疏，氣疏則縱，密則拘，神疏則逸，密則勞，疏則生，密則死。子長筆握大意，行文不妨脫略。文貴變。易曰：「物相雜，故曰文。」一集之中篇篇變，一篇之中段段變，一段之中句句變。而文法有平有奇，須是兼備，乃盡文人之能事。上古文字初開，實字多，虛字少。典謨訓誥，何等簡奧，然文法自是未備！至孔子之時，虛字詳備，作者神態畢出。《左氏》情韻並美，文彩照耀，至先秦戰國，更加疏縱，漢人斂之，稍歸勁質，惟子長集其大成！唐人宗漢多峭硬。宋人宗秦，得其疏縱而失其厚懋，氣味亦稍薄矣！文必虛字備而後神態出，何可節損，然枝蔓軟弱，古人厚重之氣少，自是後人文漸薄處！司馬遷句法似贅拙，而實古厚可愛。文貴瘦，須從瘦出而不宜以瘦名。蓋文至瘦，則筆能屈曲盡意而言無不達，然以瘦名，則文必狹隘。公、穀、韓非、王半山之文極高峻難識，學之有得，便當捨去。文貴華，華正與樸相表裏，以其華美，故可貴重。所惡於華者，恐其近俗耳。所取於樸者，謂其不著脂粉耳。昔人謂「不著脂粉而清真刻削者，梅聖俞之詩也。不著脂粉而精彩濃麗，自《左傳》

《莊子》《史記》而外，其妙不傳」。此知文之言。天下之勢，日趨於文而不能自己。上古文字簡直。周尚文，而周公孔子之文最盛。其後傳爲《左氏》，爲屈原宋玉，爲司馬相如，盛極矣。盛極則轉衰，流弊遂爲六朝。六朝之靡弱，屈宋之盛肇之也。昌黎氏矯之以質，以六經爲文。後人因之爲清疏爽直，而古人華美之風亦略盡矣！平奇華樸，流激使然，未流皆不可處。唐人之體，較之漢人微露圭角，少渾噩之象，然陸離璀璨，猶似夏商鼎彝。宋人文雖佳，而萬怪惶惑少矣！文貴參差。天之生物，無一無偶而無一齊者。故雖排比之文，亦以隨勢曲注爲佳。文貴去陳言。昌黎論文，惟陳言之務去，又極言去之之難。蓋經史諸子百家之文，雖讀之甚熟，卻不許用他一句，另作一番語言，豈不甚難！《樊宗師墓誌》云：「必出於己，不蹈襲前人一言一語，又何其難也！」正與「憂憂乎難哉」互相發明。李習之親炙昌黎之門，故其論文必以創意造言爲宗。所謂創意者，如《春秋》之意，不同於《詩》；《詩》之意，不同於《易》；《易》之意，不同於《書》，是也。所謂造言者，如述笑哂之狀，《論語》曰「莞爾」，《易》曰「啞啞」，《穀梁》曰「粲然」，班固曰「攸爾」，左思曰「輟然」，後人作文，凡言笑者，皆不宜復用其語。習之此言，雖覺太過，然彼親聆師長之訓，故發明之如此，亦可窺見昌黎學文之大旨矣！《樊誌銘》云：「惟古於詞必己出，降而不能乃剽賊，後皆指前公相襲，自漢迄今用一律。」今人行文，反以用古人陳語，自謂有出處，自矜典雅，不知其爲襲也，剽賊也。吾人謂杜詩韓文，無一字無來歷，來歷者，凡用一字二字，必有所本也，非直用其語也。況詩與古文不同，詩可用成語，古文則必不可用，故杜詩多用古人句，而韓於經史諸子之文，只用一字或至兩字而止。若直用四字，知爲後人之文矣。大約文字是日新之物，若陳陳相因，安得不日爲朽腐！原本古人意義，到行文時，卻須重加鑄造一樣言語，不可直用古人，此謂去陳言，未嘗不換字，卻不是換字法。

其論《莊子》《史記》之文曰：「理不可以直指也，故卽物以明理。情不可以顯言也，故卽事以寓情。卽物以明理，《莊子》之文也。卽事以寓情，《史記》之文也。」以上見《論文偶記》。

其論時文與古文之不同曰：「八比時文，是代聖賢說話，追古人神理於千載之上，須是逼真；聖賢意所本有，我不得減之使無，聖賢意所本無，我不得增之使有。然又非訓詁之謂，取左馬韓歐的神氣音節，曲折與題相赴，乃爲其至者。作時文要不是自我作論，又不是傳註訓詁，始得。要文字做得好，纔不是傳註訓詁。要合聖賢當日神理，纔不是自我作論。故曲折如題而起滅由我，八字是要言。作時文，使不得才情，使不得議論，使不得學問，並使不得意思，只看當日神理如何，看得定時，卻用韓歐之文，如題赴之，須先洗滌心地，加以好學深思，令自家肺腸，與古聖賢肺腸相合，然後吐出語言，自然相似。如今人作文字，便不見聖賢神理，待摹神理時，又不見今人作文字的人，須是取自家行文神理，去合古聖賢神理，有古人有我，卽我卽古人，大非易事。古文只要自己精神勝。時文要己之精神，與聖賢精神相湊合。時文摹繪聖賢神理，而神尤重於理，作者以兼至爲上。神重於理，則寫神爲主，而理自無不至。理重於神，則說理爲主，而神自無不合。寫神者宜少說理，恐礙神也。說理者忌恐寫神，貴明理也。明代以八比時文取士，作者甚衆。日久論定，莫盛於正嘉！其時精於經，熟於理，馳驟於古今文字之變；震川先生一人而已。荆川之神機天發，鹿門之古調鏗鏘，卓然自立，差可肩隨。唐、歸、茅三家，皆有得於《史記》之妙。荆川所得，多在敍置曲盡處。鹿門所得，多在歇腳處，逸響鏗然。震川所得，多在起頭處，所謂來得勇猛也。談古文者，多蔑視時文；不知此亦可爲古文中之一體，要在用功深，不與世俗轉移。」以上見《時文論》造論入微，語無泛設。董理其說，以俟考論。

惜抱軒文集十六卷文後集十卷詩集十卷詩後集一卷詩外集一卷尺牘八卷

桐城姚鼐字姬傳撰。《詩集》與《文集》，皆鼐及身刊定。而《詩後集》、《文後集》，則其門人婁縣姚椿字春木出貲，上元梅曾亮字伯言、管同字異之校刊，而尺牘，則其門人新城陳用光字碩士蒐刻者也。桐城文學，姚鼐繼方苞劉大櫟而自用我法，遺言措意，切近的當，不如方之質厚，而勝以澹遠，不爲劉之雄奧，而力求潔適，奇辭奧句，漸洗淨盡，已不敢爲韓昌黎之怪怪奇奇，而迂迴蕩漾，餘味曲包，深得歐陽永叔紆徐委備，容與閒易之致。《劉海峯先生八十壽序》、《登泰山記》，皆發憤爲雄，於集中爲別調，然光焰不長，終是道而未雄！余獨喜誦《范蠡》《翰林》《李斯》《賈生明申商》諸論，事核而理當，儘明爽而避剽滑，不爲蘇老泉之筆情蹕厲，而爲王介甫之筆力拗峭。又《莊子章義序》、《左傳補註序》、《讀司馬法六韜》、《讀孫子》、《書貨殖傳後》，長於道古，辯證而出以裁制，辭氣芳潔，觀其意緒風規，蓋由柳子厚以上窺劉氏向歆，而不爲曾子固之持論，可謂善自得師！詩則以清剛出古澹，以遒宕爲雄深，由韓學杜，已開晚清同光體之先河，特不爲生蘄與衍，與文之蕭然高寄者，別一蹊徑！大抵姚氏之文，由歸學歐，而詩則由韓學杜。姚氏之文，紆徐爲妍，而詩則卓犖爲桀。姚氏之文，長於掉虛，短於用實，氣有餘韻，文無道力，而詩則體骨堅蒼，銜華佩實，力破餘地，此其較也。要其歸皆出宋賢江西，特文爲廬陵之不盡，而詩則不憚爲西江之盡耳！采錄可誦，篇目如左。

詩類 山寺 感春雜詠 東王禹卿病中 臨清雨夜 酬胡君 望廬山 漫詠三首 田家 送子穎之

湖南 邳州黃山 贈沈方毅 與王禹卿泛舟至平山堂即送其之臨安府 東張樞亭庶子 次樞亭

韻寄張安履 景州開福寺塔 九月八日登千佛山頂 大明湖夜 安肅道中 獲嘉渡河 許州
 寄仲孚應宿 嶽麓寺 定州遇雪 王少林讀書圖 送沈觀察赴四川同知任 萬壽寺松樹歌呈張
 祭酒 嚴侍讀散木菴集時嚴將南旋 花朝雪集覃溪學士家歸作此詩 錢詹事座上觀沈石田畫檜
 歌 王舍人友亮坐看雲起圖 篆秋草堂歌贈錢獻之 歲除日與子穎登日觀觀日出作歌 雜詩
 舟中望板子磯以南山勢甚奇因題長句 同王禹卿馮拙齋游八公洞循招隱寺歸 惠照寺分韻得自
 字 潘惟勤弟兄有小園在城北當龍眠山口林麓豁嶂蟠擁最爲可愛惟勤於松下作亭余爲名之曰谷
 口亭 夏晝齋居 王叔明山水卷 偕方坳堂登牛頭迴至獻花巖宿幽棲寺 雨晴出廬江寄諸同學
 舟中漫興 金麓村招遊莫愁湖偕浦柳愚毛俟園陳碩士醉中作歌 秋齋有述 三月九日鄭三雲
 通守邀於隱仙菴看牡丹竟日翌日雨毛俟園復邀同往賦呈兩君 題葉君雲海移情圖 送胡豫生之
 山西趙城將訪乃翁舊知 闕口阻風 次日又阻風 酬釋妙德 米友仁楚江風雨圖卷 王麓臺山
 水 贈孫雨窗 弔朱二亭 登天平山觀白雲泉 觀飛來峯入靈隱寺由寺西北上輞光菴乃北高峯
 上也 戊午九月十四日出雲棲寺作 次韻答秦小峴觀察贈別併以別謝蘊山方伯以上古體 貴池道
 中 出池州 送人往鄴 宿德化縣 送客之南昌 太白樓 由儀真至滁州口號三首 過江浦縣
 法源寺 官塘 萬年庵次劉石荈韻以呈補山 論墨絕句 喬鷗村江邨圖 飲鄭前邨寓舍觀其
 兩郎君新作文藝前邨本出先伯之門追感往昔作此二首 次韻子穎送別三首 江行絕句 夏夜
 泥汙阻風 竹林寺懷王禹卿 招隱寺 寄王禹卿 涼階 敬敷書院值雪 雷漢樓 春日漫興
 又絕句 銷暑 夏日絕句 夏夜 穀樹 入龍眠 野戍 江路又一首 寄靈谷僧 天門 四合

山阻風 天門阻風 翠微亭 懷祝芷塘 洲上見桃花 葆光寺 歸舟 過黃陂湖 王太常雨景

秋至 入山 曉過蘇隄作 洪造深深柳讀書堂圖 題甘夢六桐陰小築照

論說類 范蠡論 翰林論 李斯論 賈生明申商論 議兵

序跋類 莊子章義序 左傳補註序 代州道後馮氏世譜序 食舊堂集序 左仲郭浮渡詩序 吳荀叔

杉亭集序 張仲絮時文序 高常德詩集序 讀司馬法六韜 讀孫子 書貨殖傳後 方勘堂會試

硃卷跋尾 孫文介公殿試卷跋尾 朱二亭詩集序 方恪敏公詩後集序 南園詩存序 跋鹽鐵論

左蘭成詩題辭

書牘類 答翁學士書 復張君書 復魯絮非書 復蔣松如書 復休寧程南書 答魯賓之書

贈序類 送右庶子畢公爲鞏秦階道序 送龔友南歸序 贈錢獻之序 贈程魚門序 劉海峯先生八十

壽序 陳東浦方伯七十壽序 家鐵松中丞七十壽序 旌表貞節大姊六十壽序 陶慕庭八十壽序

陳約堂七十壽序

傳狀類 朱竹君先生傳 張逸園家傳 何季甄家傳 方染露傳 禮恭親王家傳 劉海峯先生傳 吳

殿麟傳 方恪敏公家傳 周梅圃君家傳

碑志類 鄭大純墓表 疏生墓碣 蔣君墓碣 內閣學士張公墓誌銘 贈太傅錢文端公墓誌銘 贈武

義大夫貴州提標右營游擊何君墓誌銘 副都統朱公墓誌銘 原任少詹事張君權厝銘 翰林院庶

吉士侍君權厝銘 嚴冬友墓誌銘 孔信夫墓誌銘 陝西道監察御史興化任君墓誌銘 夏縣知縣

新城魯君墓誌銘 建昌新城陳母楊太夫人墓誌銘 章母黃太恭人墓誌銘 袁隨園君墓誌銘 江

蘇布政使德化陳公墓誌銘 方侍廬先生墓誌銘 奉政大夫江南候補府同知軍功加二級仁和嚴君墓誌銘 歙胡孝廉墓誌銘 繼室張宜人權厝銘 東閣大學士王文端公神道碑文 吏部左侍郎譚公神道碑文 石屏羅君墓表 臧和貴墓表 博山知縣武君墓表 方母吳太夫人墓表 安徽巡撫荆公墓誌銘 廣西巡撫謝公墓誌銘 通奉大夫廣東布政使許公墓誌銘 中議大夫通政使副使婺源王君墓誌銘 中憲大夫雲南臨安府知府丹徒王君墓誌銘 中憲大夫松太兵備道章君墓誌銘 蘇憲之墓誌銘 浮梁縣知縣黃君墓誌銘 贈光祿寺少卿寧化伊君墓誌銘 封文林郎巫山縣知縣金壇段君墓誌銘 中議大夫太僕寺卿戴公墓誌銘 新城陳君墓誌銘 資政大夫光祿寺卿加二級寧化伊公墓誌銘 舉人議敘知縣長洲彭君墓誌銘 中憲大夫順德府知府王君墓誌銘 知縣銜管石牌場鹽課大使事師君墓誌銘 周青原墓誌銘

雜記類 儀鄭堂記 寶扇樓後記 快雨堂記 游媚筆泉記 登泰山記 游靈巖記 晴雪樓記 遊雙谿記 觀披雪瀑記 袁香亭畫冊記 少邑尹張君畫羅漢記 甯國府重修北樓記 遊故崇正書院記 朱海愚運使家人圖記

哀祭類 祭林編修澍蕃文 祭張少詹曾敞文 祭侍潞川文 祭宋竹君學士文

右詩一百又六首，文一百一十一篇。大抵論學主義理而不廢考據，作文偏陰柔而亦稱陽剛。

其論學問之事有三曰：「義理，考據，詞章，三者苟善用之，則皆足以相濟；苟不善用之，則或至於相害。今夫博學彊識而善言德行者，固文之貴也。然而世有言義理之過者，其辭蕪雜俚近如語錄而不文。爲考證之過者，至繁碎繳繞而語不可了當。以爲文之至美，而反以爲病者，何哉？其故由於自喜

之太過，而智昧於所當擇也。夫天之生材，雖美不能無偏，故以能兼長者爲貴。」見述藝文鈔序。「夫以考證斷者，利以應敵，使護之者不能出一辭。然使學者意會神得，犁然當乎人心者，反更在義理文章之事也！」見尚書辨僞序。「今世天下相率爲漢學者，搜求瑣屑，微引猥雜，無研尋義理之味，多矜高自滿之氣，愚鄙竊不以爲安！」見復汪孟慈書。其論義理考證之迭爲興廢曰：「孔子沒而大道廢。漢儒承秦滅學之後，始立專門，各抱一經，師弟傳受，儕偶怨怒嫉妬，不相通曉，其於聖人之道，猶築牆垣而塞門巷也！久之，通儒漸出，貫穿羣經，左右證明，擇其長說，及其蔽也，雜之以讖緯，亂之以乖僻猥碎，世又譏之！蓋魏晉之間，空虛之談興，以清言爲高，以章句爲塵垢，放誕壞亂，迄亡天下。然世猶或愛其說辭，不忍廢也！自是南北乖分，學術異尚，五百餘年，唐一天下，兼采南北之長，定爲義疏，明示統貫，而所取或是或非，未有折衷。宋之時真儒乃得聖人之旨，羣經略有定說。元明守之，著爲功令。當明佚君亂政屢作，士大夫維持綱紀，明守節義，使明久而後亡，其宋儒論學之效哉！且夫天地之運，久則必變，是故夏尚忠，商尚質，周尚文。學者之變也，有大儒操其本而齊其弊，則所尚也賢於其故，否則不及其故，自漢以來皆然已！明末至今日，學者頗厭功令所載爲習聞，又惡陋儒不考古而蔽於近，於是專求古人名物制度訓詁書數，以博爲量，以闕隙攻難爲功，其甚者，欲盡舍程朱而宗漢之士，枝之獵而去其根，細之蒐而遺其鉅，夫寧非蔽歟！」見贈錢獻之序。「自秦漢以來，諸儒說經者多矣，其合與離固非一途。逮宋程朱出，定於古人精深之旨，所得爲多，而其審求文辭往復之情，亦更爲曲當，非如古儒者之拙滯而不協於情也！而其生平修己立德，又實足以踐行其所言，而爲後世之所嚮慕。故元明以來，皆以其學取士，利祿之途一開，爲其學以進趨富貴而已！其言有失，猶奉而不敢稍違之，其得亦不知其所以爲得，斯固數

百年以來學者之陋也！然今世學者，乃思一切矯之，以專宗漢學爲主，以攻駁程朱爲能，倡於一二專己好名之人，而相率而效者，因大爲學術之害！夫漢人之爲言，非無有善於宋而當從者也；然苟大小之分，精粗之弗別，是則今之爲學者之陋，且有勝於往者爲時文之士，守一先生之說而失於隘者矣，博聞彊識以助宋君子之所遺，則可也。以此跨越宋君子，則不可也！」見復蔣松如書。

其論清代學者之蔽曰：「近世論學，喜抑宋而揚漢，吾大不以爲然！正由自奈何不下腹中數卷書耶！」見尺牘與胡雄書。「初以人所匙聞而吾知之，以賅博自喜，及久入其中，自喜之甚，而堅據之，以至迂謬紛紜不能自解。卽如孔搗約廣義，豈可謂非通人，而所說《公羊》，有甚無理者！祭仲衛輒皆以謬說爲正論，至滕侯褒稱一條，乃絕可笑！無論魯侯未甚足言，卽使文王復生，一子爵者朝之，亦未必驟與進爵二等，且追贈及其父也！此豈若杜元凱以滕本侯爵，桓公時，王降之之說爲明通哉！夫漢儒所言易學推衍取象之故，非精心窮之，不能得其解也。班固所云少窮一經，白首始能言也，及能言而卻於聖人之旨未當，不若讀程朱之書，用功之勞同，而所得者大且多也！凡爲經學者，貴此心宏通明澈，不受障礙。近時爲漢學者，不深則不能入，深則障礙生矣！」見尺牘與陳碩士。「夫爲學不可執漢宋疆域之說，但須擇善而從，此心澈空，自得恬適。」同上惠氏棟左傳補注，亦自見讀書精密處，特嫌其所舉太碎小，近世爲漢人學者，率有斯病！愚意不喜之，覺殊不能逮顧亭林也！閱其書，見爲用力勞而受功寡！」全上「如王伯申引之之小學，寔可貴，其餘藝或是努末，亦可勿論矣！李安溪光地雖未是真道學，而所論義理自可取，而侈言文章，乃殊可笑！戴東原戴震言考證豈不佳，而欲言義理以奪洛閩之席，亦可笑之甚矣！」同上「夫漢儒之學，非不佳也，而今之爲漢學乃不佳，徧徇而不論理之是非，瑣碎而不識事之小大，嘵嘵

聒聒，道聽塗說，正使人厭惡耳！且讀書者，欲有益於身心也。程子以記史書爲玩物喪志。若今之爲漢學者，以搜殘舉碎，人所少見者爲功，其爲玩物，不彌甚耶！」全上「博聞彊識，而用心寬平，斯爲善學。守一家之言則狹！專執己見則陋！」見《尺牘與吳子方》。且漢人各守師法，不肯相通，固已拘滯矣，然彼受業於先師，不敢背，猶有說也。吾生於後世，兼讀各家之書，本非受一先生之言，而不欲兼以從是，而執一家之言爲斷，是辟之甚也！」見《尺牘與陳碩士》。

其自敘治學之功夫曰：「凡人學問，千歧萬派，但貴有成，不須一轍，實有自得，非從人取，斯爲豪傑矣！」全上「凡書少時未讀，中年閱之，便恐難記。必須隨手鈔纂。退之記事提要，纂言鉤玄，固古今爲學之定法也！但此等只爲求記之方，一人所爲，於他人無用；後人往往刊行，等於著述，乃是謬也！地理乃史學中之一端，須足行多所歷，方能了了，或覓得當今之全圖有百里方格者，時懸於前，其間雖有小誤，大體不失，若止於史志上，終不能分明也！」見《尺牘與劉明東》。近時史學無過錢辛楣。大昕然吾有所辯論，殆足僂之，恨吾書彼不得見耳！凡說一事，欲使聞吾說者觸處更無窒礙，乃佳！」見《尺牘與陳碩士》。經學用功，誠爲要務。竊謂學者以潛心玩索，令胸中有浸潤深厚之味，不須急急於著述，斯爲最善學也！」全上「竊謂說經古今自有真是非，勿循一時人之好尚。如近年海內諸賢所持漢學，與明以來講章諸君，何以大相過哉！爾所愧者，功不沈密，不能專治一經，然每於一經內有一二條的論，自當爲後之專治一經者所采用。」全上「爾昔在館中，見宋元人所注經，卷帙甚大，而其間足存之解，或僅一二條而已！意以爲何須爲是繁耶！故愚見有所論，但專記之，如是歷年所記，每經多者數十條，少則數條而已，謂之私說，不敢謂之注。」見《尺牘與翁覃溪》。夫說經有數條之善，足補昔賢所未逮則易，專講一經，首尾無可憾則其

難。竊謂生朱子後，朱子已注之經，但當爲之疏，而朱子誤處，不妨正之，用范寧註《穀梁》之法，如此則體謹小而意宏大，賢於自注一書也！」（見《尺牘與陳碩士》）又注書之體，欲簡嚴，勿與人爭，爭辯，是疏非注矣！」（全上）「凡人不能靜坐，須以讀書寫字自遣者，亦是心不寧帖，無胸中真樂故也。竊近深覺平生愛作文章，於自己本分事，全乏工夫，今雖欲自勉，薄收桑榆之效，其可得乎！」（全上）「竊於學儒學佛，皆無所得，正坐工夫怠惰耳，卻非謂所讀之書有難解也。《安般守意經》，吾所未見，然佛經大抵相仿，能用功者皆可入也。惟教意則需略問人。《世說》所謂殷深源未解事數，遇一道人，問以所籤，便豁然者也。此與禪悟事不同，而理亦通。」（全上）「閱佛書與佳僧談論，勝於服藥，此急救心火妙方也。蓋世緣空，則心病必愈矣！」（見《尺牘與鮑雙五》）

其論文章之原，本乎天地，而有陰陽剛柔之分曰：「天地之道，陰陽剛柔而已！文者，天地之精英，而陰陽剛柔之發也。惟聖人之言，統二氣之會而弗偏，然而《易》《書》《詩》《論語》所載，亦間有可以剛柔分，值其時其人告語之體，各有宜也。自諸子而降，其爲文無弗有偏者。其得於陽與剛之美者，則其文如霆，如電，如長風之出谷，如崇山峻崖，如決大川，如奔騏驥，其光也如杲日，如火，如金鑠鐵，其於人也，如憑高視遠，如君而朝萬衆，如鼓萬勇士而戰之。其得於陰與柔之美者，則其文如升初日，如清風，如雲，如霞，如烟，如幽林曲澗，如淪如漾，如珠玉之輝，如鴻鵠之鳴而入廖廓，其於人也，謬乎其如歎，邈乎其如有思，暝乎其如喜，愀乎其如悲。觀其文，諷其音，則爲文者之性情形狀，舉以殊焉！且夫陰陽剛柔，其本二端，造物者糅，而氣有多寡進絀，則品次億萬以至於不可窮，萬物生焉，故曰「一陰一陽之爲道」。夫文之多變，亦若是已，糅而偏勝，可也。偏勝之極，一有一絕無，與夫剛不足爲剛，柔不足

爲柔者，皆不可以言文。」見復魯齋非書。「然古君子稱爲文章之至，雖兼具二者之用，亦不能無所偏優於其間，其故何哉？天地之道，協合以爲體，而時發奇出以爲用，理固然也。其在天地之用也，尚陽而下陰，伸剛而絀柔，故人得之亦然。文之雄偉而勁直者，必貴於溫柔而徐婉，溫深徐婉之才，不易得也，然其尤難者，必在乎天下之雄才也。」見海愚詩鈔序。其論文章尚意氣，貴自然，而欲以變化運用義法曰：「今天下之善射者，其法曰：『平肩臂，正脰，腰以上直，腰以下反句磬折，支左詘右，其釋矢也身如槁木，苟非是，不可以射！』師弟子相授受，若此而已！及至索倫蒙古人之射，傾首歛肩僂背，發則口眼皆動，見者莫不笑之！然而索倫蒙古之射遠貫深而命中，世之射者常不逮也！然則射非有定法明矣！夫道有是非，而技有美惡。詩文皆技也。技之精者必近道，故詩文美者命意必善。文字者，猶人之言語也，有氣以充之，則觀其文也，雖百世而後，如立其人而與言於此，無氣，則積字焉而已！意與氣相御而爲辭，然後有聲音節奏高下抗墜之度，反復進退之態，采色之華，故聲色之美，因乎意與氣而時變者也，是安得有定法哉！」見答翁學士書。「夫古人文章之體非一類，其瑰瑋奇麗之振發，亦不可謂盡出於無意也。然要是才力氣勢驅使之所必至，非勉力而爲之也！後人勉學，覺有累積紙上，有如贅疣。故文章之境，莫佳於平淡，措語遺意，有若自然生成者，此熙甫所以爲文家之正傳！」見與王鐵夫書。「而熙甫能於不要緊之題，說不要緊之話，卻自風韻疏淡，此乃是於太史公深有會處。文家有意佳處，可以著力，無意佳處，不可著力，功深聽其自至可也！」見尺牘與陳傾士。「震川論文深處，望溪尚未見。望溪所得，在本朝諸賢爲最深，而較之古人則淺。其閱太史公書，似精神不能包括其大處，遠處，疏淡處及華麗非常處，止以義法論文，則得其一端而已！然文章義法，亦不可不講。如梅崖便不能細受繩墨，不及望溪

矣！「全上」文章之事，能運其法者才也，而極其才者法也。古人文，有一定之法，有無定之法。有定者，所以爲嚴整也。無定者，所以爲縱橫變化也。二者相濟而不相妨。故善用法者，非以窘吾才，乃所以達吾才也，非思之深，功之至者，必不能見古人縱橫變化中所以爲嚴整之理。思深功至而見之矣，而操筆而使吾手與吾所見之相副，尚非一日事也！」（見《尺牘與弢阮林》）

其論文體曰：「西漢人文傳者，大抵官文書耳，而何其雄駿高古之甚！昌黎官中文字，止用當時文體，而卽得漢人雄古之意。歐、曾、荆公官文字，雄古者鮮矣！然詞雅而氣暢，語簡而事盡，固不失爲文家好處矣！熙甫於此體，乃時有傷雅不能簡當之病。」（見《尺牘與陳碩士》）「墓表自與神道碑同類，與埋銘異類。神道碑有銘，似墓表用銘亦可通，然非體之正也。吾謂文章體制，當準理決之，不得以前賢有此，便執爲是。如贈序中用不具某頓首，與書同，此顏魯公《蔡明遠序》體也，直當斷以爲不是耳，安可法之耶！」（全上）「大抵作金石文字，本有正體，以其無可說，乃爲變體，始於昌黎作《殿中少監馬君誌》，因變而生奇趣，文家之境，以是廣矣！」（全上）「墓誌文不宜繁，必欲簡峻，莫若更讀荆公，則筆間自有裁制矣！敘事之文，爲繁冗所累，則氣不能流行自在，此不可不知也。」（全上）「大抵頌辭每以嘖嘖爲病，能如孟堅《典引》，已大難，況西京乎！」「東漢六朝之誌銘，唐人作贈序，乃時文也，昌黎爲之，則古文矣！明時經藝壽序，明時文也，熙甫爲之，則古文矣！作古文者生熙甫後，若不解經藝，便是缺陷。本朝如李安溪，所見不出時文，其評論熙甫，可謂滿口亂道！望溪則勝之矣，然於古文時文界限猶有未清。大抵從時文家逆追經藝古文之理甚難，若本解古文，直取以爲經義之體，則爲功甚易，不過數月，功可成也！」（見《尺牘與管異之》）

其論古人文曰：「大塘打緯，移入議論，此豈易言！必如此言，則如《報任少卿書》，足以當之耳！」見《尺牘與陳碩士》。大抵《漢書》惟宣帝以前之傳，可以肩隨子長。元成以後，則彌劣矣！「全上漢人之文，如《論衡》乃不足道，謂蔡伯喈祕其書，乃越中僞造之辭，伯喈何至貴是書！其言平者則陋，奇者乃悖。」全上「凡言理不能改舊，而出語必要翻新。佛氏之教，六朝人所說，皆陳陳耳！達摩一出，翻盡窠臼，然理豈有二！但更搬陳語，便了無意味。移此意以作文，便亦是妙文矣！」全上「大抵簡峻之氣，昌黎爲最！」全上「宋朝歐陽曾公之文，其才皆偏於柔之美者也。歐公能取異己者之長而時濟之。曾公能避所短而不犯。」見《復魯絮非書》。虞伯生文去震川甚遠，其才識皆不逮歸，但詩字雜藝勝之，又是元。前於明人，故翰墨家重之耳！」見《尺牘與陳碩士》。如直求可當古文家數者，則南宋雖朱子不爲是，況元及明初諸賢乎！如宋金華直是外道，而朱竹君以爲妙絕，遂終身爲所誤。此等非所見親切，安得無妄說也！」全上「凌仲子至以《文選》爲文家之正派，可笑如此！」見《尺牘與石甫姪孫》。

其自論定曰：「竊於文章之事，何敢當作者之目！但平生所聞於長者，差異於俗學。」見《尺牘與周希甫》。夫學問之事，天下後世之事，非自亢者所能高，亦非自抑者所能下。竊於文事粗識門徑，而才力不足盡赴其識。竊以是更望諸年少者，假令更有韓歐之才出，而世第置吾於獨孤及穆修之倫，則吾心所大快矣！」見《尺牘與王惕甫》。夫文章之事，望見塗轍，可以力求，而才力高下，必由天授。竊所自歎者，正在才薄耳！頃見王鐵夫文規模頗正，其才恐不免與吾輩上下，無復古人意致佳處也！」見《尺牘與陳士石》。鐵夫集中，有《跋惜抱集》一篇。此君乃未識面之人，而承其推許，使人有知己之感！其論鄙作，所最許者敘事之文，甚愛《朱竹君傳》，而不甚喜考證之作。愚意以考證累其文，則是弊耳，以考證助文之境，正有

佳處，夫何病哉！鐵夫必欲去之，亦偏見耳！其文章不魏雅馴，亦今之奇士矣！」全上「韓理堂誠爲好手，其論宋太宗事，與常州惲敬旨同而文勝。惲亦今一作手也！」全上「理堂果勝於理境，文筆則苦有區牖，無縱橫超妙處，此亦是天限之，第勝於他人之猥陋耳！」全上「鼎近作《禮親王傳》，似可勝《道園學古錄》中文，以較韓歐便覺遠在，況子長乎！然只可如此做去，若勉強作漢人，則反成明人之僞體矣！」全上「吾近鈔取所作古文未入集者，寄松江姚春木。春木欲爲吾刻續集，成否不可知。大抵人人集之文，亦欲其少，不欲其多也！」全上「近人刻集務多，此最可笑！其間不足錄而錄入者幾半。然久之世自有定論，一時之好尚何足憑！且文集多亦自難於傳播。王元美《四部稿》，人家得觀者希矣！此亦其多之爲害矣！」見《尺牘與張阮林》。

其詔門弟子學文，熟讀動作，從摹擬入手曰：「文章一事，而所以致美之道非一端。命意立格，行氣遣辭，理充於中，聲振於外，數者一有不足，則文病矣！作者每意專於所求，而遺於所忽，故雖有志於學，而卒無以大過乎凡衆！故必用功勤而用心精密，兼收古人之具美，融合於胸中，無所凝滯，則下筆時自無得此遺彼之病也！」見《尺牘與陳碩士》「深讀久爲，自有悟入。夫道德之精微，而觀聖人者，不出動容周旋中禮之事。文章之精妙，不出章句聲色之間，舍此無可窺尋矣！」見《尺牘與石甫孫》大抵學古文者，必要放聲疾讀，又緩讀，祇久之自悟，若但能默看，即終身作外行也。」見《尺牘與陳碩士》「詩古文各要從聲音證入。不知聲音，終爲門外漢耳！」全上「文韻致好，但說到中間忽有滯鈍處，此乃是讀古人文不熟，急讀以求其體勢，緩讀以求其神味，得彼之長，悟吾之短，自有進也。」全上「學文之法無它，多讀多爲以待其一日之成就，非可以人力速之也。士苟非有天啓，必不能盡其神妙，然苟人輟其力，則天亦何自啓

之哉！」全上「夫文章之事，有可言喻者，有不可言喻者，要必自可言喻者而人之。韓、柳、歐、蘇所論言文之旨，彼固無欺人語。後之論文者，豈能更有以踰之乎，若夫其不可言喻者，則在乎久爲之自得而已！」見尺牘答徐李雅「夫學文者利病短長，下筆時自知之，更取以與所讀古人文較量得失，便無不明了，充其得而救其失，可入古人之室矣。」見尺牘與魯賓之「凡作古文，須知古人用意冲澹處，忌濃重，譬如舉萬鈞之鼎如一鴻毛，乃文之佳境，有竭力之狀，則入俗矣！」見尺牘與石甫姪孫「風味疏淡，自是好處，從此做深，或更入古人奇妙之境，然不可彊爲，反成虛矯。」見尺牘與陳碩士「大抵文字須熟乃妙，熟則利病自明，手之所至，隨意生趣，常語滯意，不遺而自去矣！」全上「文之出奇怪，惟功深以待自至，卻又須常將太史公韓公境界懸置胸中，則筆端自與尋常境界漸遠也！」全上「大抵文章之妙，在馳驟中有頓挫，頓挫處有馳驟。若但有馳驟，卽成剽滑，非真馳驟也！更精心於古人求之，當有悟處耳！」見尺牘與石甫姪孫「世人習聞錢受之偏論，輕譏明人摹倣。文不經摹倣，安能脫化！觀古人之學前古，摹倣而渾妙者自可法，摹倣鈍滯者自可棄！」見尺牘與管異之「然文家之事，大似禪悟，觀人評論圈點，皆是借徑，一旦豁然有得，呵佛罵祖，無不可者！此中自有真實境地，必無疑於狂肆忘言，未證爲證者也！」見尺牘與陳碩士「欲悟亦無他法，熟讀精思而已！大抵古文深入難於詩，故古今作者少於詩人，然又有能文而不能詩者，此亦自由天分耳！」見尺牘與石甫姪孫

其詔弟子學詩，熟讀精思，亦以摹倣爲說曰：「吾以爲學詩，不從明李、何、王、李路人，終不深入，而近人爲紅豆老人所誤，隨聲詆明賢，乃是愚且妄耳！」見尺牘與陳碩士「近人每云作詩不可摹倣，此似高而寔欺人之言也！學詩文不摹倣，從何得人！須專摹倣一家，已得似後，再易一家，如是數番之後，自

能鎔鑄古人，自成一體。若初學未能逼似，先求脫化，必全無成就。譬如學字而不臨帖，可乎！」見《尺牘與舒姪》「今日詩家大爲榛塞，雖通人不能具正見。吾斷謂樊榭簡齋，皆詩家惡派，此論出，必大爲世怨怒，然理不可易！」見《尺牘與鮑雙五》「五七言《今詩體鈔》，吾意以揀俗體詩之陋，鈔此爲學者正路耳！使學者誦之，縱不能盡上口，然必能及其半，乃可言學，故惟恐其多，不嫌其少。以爲此外絕無佳詩可增，此絕無之理，欲使人知吾意所嚮耳。」見《尺牘與陳頌士》「吾向教後學學詩，只用王阮亭五七言《古詩鈔》，然阮亭詩法，五古只以謝宣城爲宗，七古以東坡爲宗。今所宗正當以李杜，越過阮亭一層。然王所選，亦不可不看以廣其趣。《崆峒集》亦正爲李杜先導。」見《尺牘與管異之》「凡學詩文之事，觀覽不可以不汎博。若其熟讀精思，效法者，只欲其少，不欲其多，如漁洋《五言詩選》，吾猶覺其多耳！其選不及杜公，此是其自度才力不堪以爲大家，而天下士之堪學杜詩者亦罕見，故不以杜詩教人，此正其不敢自欺處耳！今若病其缺此大家，只當另選一杜詩，或益以昌黎，以待天下才力雄健者之自取法，可也！若此外別家，只有泛覽之詩，寔無當熟讀效法之詩。吾嘗謂袁簡齋嘗云：『人只可以名家自待，後世人或置吾於大家之中，切不可自待，俾後世人併不數吾於名家之內。』此言最妙！簡齋豈世易得之才！欲得筆勢痛快，一在力學古人，一在涵養胸趣。夫心靜，則氣自生矣！」全上「近體只用吾選本，其間各家門徑不同，隨其天資所近，先取一家之書，熟讀精思，必有所見，然後又及一家，知其所以異，又知其所以同。同者必歸於雅正，不著纖豪俗氣，起復轉摺，必有法度，不可苟且牽率，致不成章，至其神妙之境，又須於無意中忽然遇之，非可力探，然非功力之深，終身必不遇此境也！」見《尺牘與伯昂從姪孫》「但就《愚《今體詩鈔》，更追求古人佳處，時以己作與相比較，自日見增長。大抵作詩平易，則苦無味，求奇，則

患不穩，去此兩病，乃可言佳！至古體詩，須先讀昌黎，然後上泝杜公，下采東坡，於此三家，得門逕尋入，於中貫通變化，又係各人天分。」全上「五言詩每欲押強韻，輒不能妙。此處惟涪翁爲獨勝！此天賦，不可彊學也！」見尺牘與陳頌士。「杜公排律，布置局格，開闢起伏變化，大約橫空而來，意盡而止，而千形萬態，隨時隨地溢出，此他人詩中所無有，惟韓文時有之，與子美詩同耳！然作詩心之所向，必須在此，否則止是常境耳！李玉溪、白太傅、朱竹垞，皆刻意作排律之人，而不能得此妙！」見復劉明東書。「然觀人之才，須正變兼論之，得其真境，乃善！夫文章之事，欲能開新境。專於正者，其境易窮，而佳處易爲古人所掩。近人不知詩有正體，但讀後人集，體格卑卑，務求新而入纖俗，斯固可憎厭！而守正不知變者，則亦不免於隘也！」見尺牘與石甫姪孫。「大抵其才馳驟而炫耀者宜七言，深婉而澹遠者宜五言，雖不可盡以此論拘，而大概似之矣！」見尺牘與陳頌士。

涇縣包世臣著《藝舟雙楫》，以姚鼐行草書入妙品，以故論書亦極有真見。其論二王獨推大令書曰：「論二王書，譬之論李杜之詩。太白作五言詩，固爲妙矣。然必至其歌行，瑰詭縱蕩，窮態極變，乃所以爲大家而與杜並也！大令草書，能變右軍之法，極其筆力，雄奇怪偉，絕超古今，此所以並稱二王也！近王虛舟輩評大令書，但取其清迥和雅，似右軍之書。至其狂草，變化無方，率加詆毀，此不可謂善論書矣！譬如讀《太白集》者，但取《牛渚西江》等製，而棄《蜀道難》、《遠別離》諸篇，是尚爲能讀李詩者乎！世傳《桓江州》及《委曲前書》等帖，及以子敬書誤入張芝、《知汝殊愁帖》，皆古今絕出之奇筆，如祖師禪，人佛入魔，無不可者！書品以大令草書列右軍上，雖未必至當，要非無理！」見《法帖題跋三》。「至《辭令帖》，未見古摹，而明嘉靖中，吳章傑摹本，多姿媚而少古韻，乃有唐李北海等筆法，竊疑非子敬蹟也。」

見《跋王子敬辭令帖》其論褚河南書曰：「褚書《聖教序》，於用筆極細瘦中，有起伏轉變之妙。」見《跋褚書聖教序》其論顏魯公書曰：「魯公書多取篆籀法人真行。」見《跋顏魯公劉太沖序》論八分書曰：「吾見未能楷書，學八分，終不佳！惟本善楷書，故進爲八分，極有筆力也！」見《尺牘與伯昂孫姪》併附錄之。

中復堂全集九十八卷

《中復堂全集》，內《東溟文集》六卷，《外集》四卷，《東溟文後集》十四卷，《外集》二卷，《東溟奏稿》四卷，《後湘詩集》九卷，《二集》五卷，《續集》七卷，《識小錄》八卷，《寸陰叢錄》四卷，《東槎紀略》五卷，《康輶紀行》十六卷，《姚氏先德傳》六卷，桐城姚瑩字石甫所撰。其子潛昌以同治丁卯八月，刻於安福縣署，蓋潛昌方爲安福縣知縣也，而以南豐吳嘉賓所撰《姚公傳》，合肥徐子苓撰《墓誌銘》，桐城徐宗亮撰《墓表》，及潛昌撰其父《年譜》與其母《方淑人行略》爲附錄一卷，殿焉。瑩爲姚鼐從孫，從受義理考據詞章之學。湘鄉曾國藩爲《歐陽生文集序》，謂：「姚先生晚而主鍾山書院，門下著籍者，上元有管同異之，梅曾亮伯言，桐城有方東樹植之及瑩，四人者稱高第弟子。」觀瑩之集。詩勝於文，渾脫瀏亮，其詩由明何景明李夢陽入，而以盛唐李杜爲宗。古體勝於近體，七古尤勝五古，震蕩錯綜，闔闢頓挫，其原出李白，而近體亦頗脫去纖穠，獨抒高渾，嗣響杜陵，不爲格律所拘，庶幾姚鼐之血脈！文章善持論，忼慨深切，亦得姚鼐之一體。然上者爲東坡之快利，其下者急言極論，不免再衰三竭，無姚鼐《李斯》《翰林》等論瘦峭拗勁，往復百折之致。敘事好爲盡而涉觀縷，又少變化，未若鼐之控馭歸於含蓄，餘味醇然！採錄可誦，篇目如左。

詩類

處女篇 遊子篇 采葛篇 擬古八首 雜詩 飛龍引四首 夜飲方竹吾北園偕左匡叔徐六襄
方履周光律原張阮林諸君 白溝河大風 月下有懷 辭家曲 詠古七首 十九夜待月不見 詠
懷十三首 夢歸 從大奎閣歸途中憶在欖山日開元寺一僧窮老且病客至亦不爲禮然枯寂有禪意
余梅花時輒訪之今此間有僧頗能詩乃不及也 寄希光姪 七月五日用東坡韻 愁來 中秋日出
遊 溪山夜興 番禺段幼秋佩蘭招同薛南洲敬茂黃香石培芳遊白雲山自蒲澗至安期巖夜雨止宿
九月二十一日至羊城謀歸忽聞故人張阮林歿於京師驚哀有作成七十四韻 述憂四首 三月朔日
自臺灣放舟至澎湖遇北風舟南駛不可收越兩日夜達粵東之惠來乃捨舟登陸問道至潮州偕方子步
探登江樓小飲憑檻有作寄穎齋觀察 自梅銓換舟至赤石 新城道中二首 湖口夜下三首 山中
人日 荆州晤光律原第一首 再呈律原 丁酉六月十二日偕潘四農毛生甫遊金山放舟焦山宿松
寧閣賦東二君并示從遊諸子四首 高旻寺夜舟 金帶圍 活魚 觀物八首 出遊兩首 贈梅伯
言 梅山園微雪以上五言古 贈彬卿 采石磯遇汪夢塘 廬山謠 峽江歌 憶昨行寄吳子方 觀
梅舞劍行寄梅壯士 海船行 台灣行 晚泊延平城下喜張慶齋見過且餽茶筍 舟中午夢到一園
亭有軒池竹石之勝主人煮茗邀客甚殷作詩以贈覺乃僅憶八句遂率成之 山水大漲舟不得進泊葭
葦中遙望斷山一缺登岸攀緣久之得一漱口更百餘步豁然開朗稻田數百頃嘉禾青秀可愛山泉亂響
溝渠滿溉四面山圍綠合竹樹甚茂平疇中起一小山高里許巖谷天然時雨初晴四山草香撲鼻野鳥雜
色格磔飛鳴不可名狀裴回經時心甚羨之歸詢舟人不知地名亦未嘗至也 苦雨 守水 蜻蜒 舟行
觸魚躍起丈餘惜不能得之 獨酌偶憶昔在粵中有術者言余前身爲王無功戲賦此篇 舟起早發

寒知閣在龍眠山內左忠毅少時讀書於此張文端嘗作詩和者頗多奉麓侍御屬作長句 鄧湘皋先生
松堂讀書圖 湘皋有田在新化之南邨其兄雲渠隱焉以湘皋常遊外恐其仕作書招之湘皋乃作南邨
耦耕圖以見志 酬別同年金鶴皋大令周伯恬陸綸山及里中諸子時衆人滿集北園爲餞凡三十二人
諸君皆有詩 微雨登小孤山用東坡焦山詩韻 饒河舟中 寄光律原 古廟 下灘歌 己丑四月
方竹吾來漳州邀同汪味根二丈胡曉峯同年陳澧西膝藍邨二明府文謙之二尹遊開原寺觀唐咸通石
塔遂登芝山謁道原堂還至僧寮聽蔡香谷秀才彈琴紫石坪明府後至 漳浦黃忠端公先塋在雲霄道
光八年有欲侵葬山麓者一夜山上石苔無數盡作黃山字凹凸大小不一或篆或隸天成奇絕柳孝廉廷
爵作黃山苔字歌作和 至福州喜晤楊笙友水部林梅友謝碩甫劉芑川三孝廉及亨甫弟子余柏溪茂
才小集寓舍諸君各有詩文見贈既登舟諸君復置酒洪山橋餞送作長句酬別是時亨甫方遊河洛 李
生歌 峽中作示同行諸子 折多山雪 高日寺 將至巴塘見松林口花樹二株一紅一白葉似枇杷
花皆一幹數朶每朶十數小花含苞狀如蠟梅馨口檀心特紅白異耳詢其名曰遠麻花焉長句賞之 還
度飛越嶺大雪 食橘 苑中芙蓉一樹高出檐花開白數十朶大者如盤色紅而瓣多自中秋後終九月
未已 出遊兩首以上七言古 謠變六首 樹有枝客宴客至同謠和歌老女歎脂難 逼仄行 相逢行送董定園
攝白髮歌 雙姑謠 白芍藥歌以上雜言古 蘆溝橋晚眺 南旅舟中雜詠五首 烏程道中 寄二
內首 湖口渡江南首 出滇陽峽 秋日登粵秀山和曾賓谷方伯原韻同王樞樵 曉望 魏默深贈
佛書數種 鳳臺夜坐 頭塘曉起冒雪登山以上五言律 孫秀林齋中夜話 春日登粵王臺 書懷
寄方竹吾 三十 酬張南山孝廉見贈 書齋春日 許昌懷古 鹿春如召同張亨甫張竹虛陳梁叔

陸次山家兄伯符集白公祠下時方七夕 三月十五日赴蜀前二日邀同馬元伯光律原家兄伯符弟緒

周攜潘昌遊谷林微雨遲方植之不至 自折多山至提茹道中 夜坐二首以上七言律 鴛鴦曲四首

洞房曲四首 柳枝詞四首 明珠曲三首以上五言絕 東流夜思 皖江雜詩 望小孤山 清明日登

大奎閣見桃花一枝半落矣悵然有作二首 雜詩四首 論詩絕句六十首 感懷雜詩二十首 寓舍

海棠 旅店山丹屬客 坊口曉發二首 廿八都二首 寓裏塘僧樓卽景以上七言絕

賦類 怪鷗賦

論說類 通論上下 賈誼論 說鷹

序跋類 吳子方遺文序 吳子山遺詩序 劉薇卿詩序 孔蘅浦詩序 論語集註書後 張南山詩序

松坡詩說序 黃香石詩序 香蘇山館詩集序 北園讌集詩序 侯冠芳遺集序 惜抱先生與管異

之書跋

書牘類 與張阮林論家學書 上座師趙分巡書 復趙尚書言臺灣兵事兩書 上韓中丞書 與吳岳卿

書 與吳春麓員外書 復方彥聞書 復管異之書 奉逮人都別劉中丞書 復廬青一兄書

贈序類 王石卿壽序

傳狀類 仲童子傳 張阮林傳 朝議大夫刑部郎中加四品銜從祖惜抱先生行狀 萬孝子傳 張亨甫

傳 湯海秋傳

碑誌類 孫宜人墓誌銘 廣東鹽運使知事王府君墓表 光祿大夫兵部尚書戴公墓誌代

雜記類 遊欖山記 粵東學使後園記 桐城麻溪姚氏登科記 噶瑪蘭廳異記 一樂居記 遊白鶴峯

記 李鳳岡生墳記 桐鄉書院記

右詩二百七十三首，文四十五篇。論學論文，壹本家學。其論學必宗程朱曰：「僕承家業，治經史，爲詩古文之學三世矣！先曾祖薑塢先生爲文根柢經史，指淵思深，必得古人精意，不爲放論踳駁之論，取快一時。至其天資沈篤，彊記博聞，自束髮以終其身無間，故能淹通宏洽，不爲拘墟孤陋之見，空疏無據之譚。論者以爲可差肩閭惠諸君。然閭君斷斷博辨，以摘發前人所喜。惠君鑿鑿訓詁，以蒐求古義專門；二君精博，均不可及！然其於聖人之道，曾未望藩籬，乃與宋儒爲難，欲以寸筵破巨鐘！若先曾祖則以考博佐其義理，於程朱之學，見之真而守之篤，固與二君大異，以爲『非考證，不足以多聞；而舍身心，亦何以爲學。漢儒謹守師法，訓詁略備於前。宋儒講論修明，義理大著於後。其道在守先待後，其功在風俗人心。學者當識其大以體其微；去其矜心，與其昏氣，乃可以爲學。俗儒務毀人以成己名，邪說好立異以亂是，非卮言日出，貽害人心，亦何異亂法舞文之吏耶！』塢之生，距先曾祖歿已十餘年；家中落，藏書爲人竊取盡！又十餘歲，稍解讀書，二十四歲，編錄遺集，又六七年，然後有以見先曾祖爲學之實。從祖惜抱先生以詩古文鳴海內，學者宗之！然惜抱先生孤立於世，與世所稱漢學異趣；而海內學者徒以詩古文相推，於其說經治學，罕有從者！風氣使然，不能以一人挽也！」見與張阮林論家學書。「顧學術是非，非文章不能以自顯！塢於經術之文，嘗慕董膠西劉中壘論事之文，嘗慕賈長沙蘇眉山父子；非徒悅其文章，以爲數子之學，皆精通明達，所謂其言有物者。至於天人之際，性命之微，則非殫究於濂、洛、關、閩，不足以定極中至正之歸；而又必考索於漢、唐、元、明諸儒經說以明其章句，辨覈於正通別霸歷代史書以觀其事蹟；泛濫於九流百家以博其趣；出入於釋老二氏以窮其說。若夫陶冶

性情，抒寫景物，則詩歌之作，即古樂之遺，所以宣道幽滯，寄哀樂於聲音者也。」見《再復趙分巡書》。

其論學不廢老釋曰：「釋氏與老莊，有同有異，其同處，在收心返觀，淨靜爲體以制羣動；其異處則不免索隱行怪。然其觀心之法，實能體勘種種偏私傲辟、嫉妬忿狠、諂媚貢高、矜己慢人、損物自利一切貪嗔妄見，切中隱微。士大夫終日儒行者，多護己非，其自訟之誠，或未能逮也！雖其深妙之義，不出吾教，而所行堅忍，則有不止於富貴不淫、貧賤不移、威武不屈者，恐亦未可厚非，非特《中庸》所云知者過之耳！果能如其推勘私心，毫無己見，亦何害於人耶！世俗崇奉彼教，多悚於禍福死生之說，固鄙陋可嗤。若上智不以福禍死生爲念者，往往亦喜觀之，故程朱大儒皆嘗從事。惟能透過此關，所以爲程朱也！」見《復光律原書》。

其論道不可道曰：「方植之書皆衛道，見真語確，多前儒所未發，然所論辨，皆在學者用功著力處，苦心苦口，開悟來茲。若道之本原，則有不可言、不容言者；斯理渾然，無有畔岸，人皆闕尋，就見爲說，皆非道體。生平最喜《阿含經》衆盲言象一段，與吾儒仁者見之謂之仁，知者見之謂之知同意。儒先諸說，往往小言破道，但取能教學者之失，有功世道人心，可矣。忠敝而救之以質，質敝而救之以文，文勝則返之於質，如五行之相尅而相生，其用無窮；而於天之所以爲天，道之所以爲道，則皆非也！害道之事多矣！聖人隨事立法，以救世耳！邪固害道。正而非當，害與邪同。吾觀前賢之書，雖有淺深純雜不同；但就我所蔽而救其失，則皆神農之《本草》也。蓂莢朮草，各適其用，是爲得之。必使天下人蓄蓂莢朮草；其他一切屏棄，必有待桂附烏頭，不得而死者矣！特蓂莢朮草之性質功用爲良，使天下人知其良而近之，桂附烏頭之性質功用爲劣，使天下人知其劣而遠之，可也。過爲去取，則非道矣！」見《與方

植之書

其論《論語》莫精於朱註曰：「朱子生平用力《四子書》訓解，屢有更易。蓋見道愈精，析義愈密，而訓詁文字初不少略焉。《論語》成書凡四本：最先作《論語要義》，在隆興元年，蓋病王氏新學之穿鑿，而諸儒說經，又或支離，未能卓然不畔於道，慨然發憤，取平生所編古今諸儒之說，以及門人友朋之議，盡刪其穿鑿支離及不得聖人之微意者，定爲一書，而以二程子爲宗。此皆講明大義，不解章句，以爲文義名物之詳，當求之註疏，有不可略者，未嘗廢註疏也！既因訓詁略而義理詳，非初學宜習，復加刪錄，作《訓蒙口義》，本之《註疏》以通其訓詁，參之《釋文》以正其音讀，然後會之以諸儒之說以發其精微，一句之義，繫之本句之下，一章之旨，刊之本章之左，又以生平所自得者附見一二，然後訓詁音義備焉！既又取二程子講論之語，及橫渠張子、范氏、二呂氏、謝氏、游氏、楊氏、侯氏、尹氏九家之說，作《論孟精義》。《集註》之成，蓋在晚年，然猶隨時更改。先賢大儒好學之勤，體道之深乃如此，而於百家之說，未嘗盡廢也！故作《論孟精義序》曰：『漢魏諸儒，正音讀，通訓詁，考制度，辨名物，其功博矣？學者苟不先涉其流，則亦何以用力於此。而近世二三名家，與夫所謂學於先生謂二程子之門人者，其考證推說，亦或時有補於文義之間。學者有得於此而後觀焉，則亦何適而無得哉！特所以求夫聖賢之意者，則在此而不在彼耳！』嗚呼！朱子述而不作，皎如天日，所以爲天下萬世計者，無非欲下學上達，由粗入精，同底於大中至正，豈小儒俗學，專以一己之私說，欺世取名，假博聞多識以自文其不肖者所能望其萬一哉！」見《論語集註書後》。

其論《左傳》莫善於杜註曰：「《左氏傳》自賈太傅始爲訓詁，劉子駿創通大義。後漢鄭仲師、賈景伯、

服子慎、許惠卿、穎子嚴之徒，皆有註。馬季長謂：「賈君精而不博，鄭君博而不精，已無可復加。」但作《三傳異同說》，則賈鄭之書可知矣。魏世王子雍亦有《左傳》解，此皆通師碩儒之說也。至杜氏以爲諸家皆膚引《公羊》、《穀梁》以釋《左氏》，適足自亂，乃著《經傳集解》，專修丘明之傳以釋經，其所論三體五例，詳哉言也！又作《長曆》以推其歲時，撰《釋例》以通其條辨，殫畢生之勤，成專家之業，大義舉而訓詁明，天文昭而地理覈，自有左氏以來，傳註未有若元凱者也！故南北學者皆爲之疏義。劉光伯雖曾規其過失一百五十餘條，未害其美。且隋世諸傳，尚多存者，光伯獨爲杜氏作疏，豈非其長不可掩耶！疏其書而規其短，乃光伯通見，足破疏家袒護之陋，非好攻之以爲異同也！夫長短不容相掩，功過可以互明，賈、服、劉、馬之異同，要當並著其書，使後學有所鑽仰。自唐世奉勅修定《正義》，獨用征南，而諸家註說，如燭火辰星，熒然闇滅，此固當時學人之陋，亦孔沖遠顏師古之徒，不能請問於朝，兼存古訓，通人至今爲恨！然以諸家之廢，而大不平於杜氏，此何說哉？亦猶朱子表章六經《四書》，原令人先習註疏以通其訓詁，其後學者不能兼習，乃自放棄註疏，專治宋儒註義。今舉世駁辨，咸謂宋儒滅絕舊註，徒言義理而廢訓詁，此何異盲人道黑白乎！《左傳補註》之作，發端於元人趙汭，蓋以杜爲主，不足，以陳傳良之說通之，非糾杜也！國朝顧寧人作《杜解補正》三卷，朱鶴齡作《讀左日鈔》十二卷，補錄二卷，始有意正其闕誤，而曰補日鈔，不居攻辨之名。近世惠定宇以古義名家，特搜輯服賈之說，爲《左傳補注》。吾鄉馬器之慕惠氏之風，援光伯之說，亦有《補註》之作，意乃頗攻杜氏，嚮嘗疑之！若惜抱先生亦嘗撰《三傳補註》，在馬氏之先，則又不過隨所考證，其有未安，間爲之說，並無意於長短之見。說經經，貴淵通，不在攻擊也！」（見《與張阮林論家學書》）

其論史注之得失曰：「自古史書，惟《史記》、《前》、《後漢書》、《三國志》有註，通史惟《資治通鑑》而已。裴駰、司馬貞、裴松之、劉邵、李賢、顏師古、胡三省，皆博極羣書，學通今古，且經昔人註本，乃集其成，然皆殫畢生之精力，或數十年而成之，千百年來，猶時爲人所糾。信乎註書難，註史尤不易也。李氏之爲《南》、《北史》也，取宋、齊、梁、陳、魏、齊、周、隋八代之書，芟其繁蕪，而通著之，世皆稱善，猶有未盡，朱子譏之！然非取八代之書互觀，烏知其所以善，與朱子所以譏哉！特是古書存者日少，徵引無其廣博，所恃不過晉、宋、齊、梁、陳、魏、齊、周、隋諸書及《通鑑》而已，此外皆少全書。不得已於古類書，如《初學記》、《藝文類聚》、《白孔六帖》、《太平御覽》、《冊府元龜》、《北堂書鈔》各種中，有涉及南北朝事文者，偏加考索以爲之注，一字一句，或煩旬日，非可定擬爲之。夫正史久已昭垂，而猶註之者，非欲著其所未明，詳其所未備乎？天文，職官，地理，制度，典章，代有不同，本書有志，可無費詞。若其無之，則非註不能明了矣！其未備者，亦非卽爲病，皆人去取，不無意義，諸家異聞，必有汰削，或始末未賅，或存舍未審，故當博收旁證，卽本書去取之旨益明，此註所由作也，非是則無須矣，然注家得失，亦有可言。龔頴者，失在簡而多闕。繁博者，失在濫而鮮當。此其蔽也。大小顏註《前漢書》，劉昭李賢註《後漢書》，裴松之註《三國志》，胡三省註《通鑑》，可謂善矣！《前》、《後漢》自有志，地理職官制度可無詳，而前人猶多所援引。《三國》、《通鑑》本無志，故註者考證益詳，此後人所當取法也。然考《通鑑》上采千數百年之事，卷帙已富，則注不容更繁。《三國》卷軸無多，則注不妨廣博。此又相體爲通，不可不察也。元明以來，學人著書，但嚴取義，而事實輒從疏略，讀者病焉！乃矯之者又但尚廣博而昧於體裁，苟能兩祛其蔽，斯爲善耳！李清注《南北史稿本》已見，此是李清自修《南北史》耳！李乃明季人，相沿元明人習氣，妄以本

書書法失當，輒憑己見任意刪改原文，而自註其下，荒略武斷甚矣！本朝彭文勤因徐無黨舊註《五代史》，過於荒略，欲更蒐討古書，凡關五代事實者，悉爲援引以成補註。然文勤亦僅發凡起例，更以屬之劉金門先生。五代距今千餘年耳，當時書籍已多放佚。見與童石塘論註南北史書：「往在杭州金門先生學使署中，見彭補註，大約以薛書割裂，分繫歐史每條之下，而於他書少所徵引。竊謂歐《五代史》體嚴義精，考博家漫謂其紀事疏略，不如薛書之詳，爲可歎也！」蓋公未作此書，先爲《十國志》，原亦多取繁載；及與尹師魯論之，乃大芟削改并爲正史，初與師魯分撰，後獨成之。公在夷陵，與尹師魯書云：「開正以來，始以無事治舊史，前歲作《十國志》，務要卷多，今若變爲正史，盡宜芟削，存其大要。至於細小之事，雖有可紀，非干本體，自可存之小說，不足以累正史。數日檢舊本，因盡芟去矣！」此可見公執筆之精義。又云：「師魯所撰，在京師不曾細看，路中細讀，乃大好！師魯素以史筆自負，果然！河東一卷大妙，修本所取法。」是公此書，經與師魯商榷，從其芟削者也。至云「修本所取法」，時公以文章自命，上追龍門，而虛心如此！至和二年，與徐無黨書云：「《五代史》，昨見曾子固議，今重頭改換，未有了期。」則又經與南豐商榷而改定之者也。又皇祐五年，與梅聖俞書云：「閒中不曾作文，祇整頓《五代史》，成七十四卷，不敢多令人知。」蓋是書初成，人見其簡，必多議之者，故不欲輕以示人，及後始從南豐說而自改定。然則此書以著五代之得失爲本，其事實繁瑣，無關法戒者，固非正史之所宜載。若夫典章制度，則有志在，紀傳中不必滯入，而五代紛紛，爲國日淺，制度蓋無可言，故並不立志。世人淺見，喜廣異聞，以爲詳備，乃謂公學《史記》，故爲高簡，不顧事實闕略，豈非不辨正史載記之各有體裁而輕議昔賢乎！今註稱徐無黨撰，或疑其陋，然公與徐書，已言作註之難，則未必後人謁撰，安知非以公當日意在簡嚴，卽註

亦不取繁蕪耶！然鄙意作註與著書不同，而註史尤與註經不同。蓋著書病在蕪雜。註經病在支離。註史者，旁引廣證以存事實，正可多引本書所不載，使人得以觀其去取之意，抑何害乎！昔劉昭既有著《續漢志》，以劉昉註《後漢書》一百二十卷，僅及范書所見，乃更蒐廣異聞，作《後漢書補註》五十八卷，可云豐富！而劉知幾譏之，《史通·補註》篇云：「蔚宗之芟《後漢》也，簡而且周，疏而不漏，蓋云備矣！而劉昭采其所損以爲補註，言盡非要，事皆不急。」知幾此言，可謂精史體者，世俗紛紛，爭咎蔚宗歐公之缺略，當以此說示之，而其責註家不當廣引爲非體，無乃過乎！顧更深味歐公命筆之意以立其本，而於薛史外，更博考別史載記，如王禹偁《五代史闕文》、陶岳《五代史補》、馬令《南唐書》、龍衮《江南野史》、陳彭年《江南別錄》、張唐英《蜀檮杌》、錢儼《吳越備史》之類，參比之以存其事，蒐討於諸家，如司馬公《通鑑考異》、吳縝《五代史纂誤》、朱子《語類》、胡三省《通鑑注》、胡一桂《十七史舉要》及近代杭大宗《錢辛楣廿二史考異》之類，縷析之以證其文，務揭所長，勿諱所短。」見《與徐六襄論五代史書》。

其論古詩獨存於樂府曰：「《書》曰：『詩言志。』歌永言。」古人詩與樂合，未有不可歌者，故貴乎長言永歎。記曰：「情動於中，故形於聲，聲成文謂之音。」孔子曰：「詩可以興、觀、羣、怨。」聲音之道微矣！故詩之不可以歌，不得爲善詩。歌之不可以感人，不得爲善歌。夫《三百篇》，多愚夫婦之所謳吟，其人豈嘗習金石、諧宮商之奏哉？然而自合於樂者，天籟也。後人不求自性之真籟，而摩古人之音節，卽之愈真，去之愈遠矣！漢魏以後，詩與樂分，其道遂亡！流變至於唐宋，古意益遠，無復永言之旨，興、觀、羣、怨，鮮有合焉！獨樂府一體，可見古人遺意，爲其據事寫情，感深語摯，辭直而思曲，節短而音長，意有怨抑，語無褒譏，使人聞聲自不能已，是其至也！然其體亦自有二：如郊祀、房中、鐸舞、巾舞等詞，皆

文臣所作，故多潤色，極奇古與駁而不能起發人意，蓋其源出於雅頌。若鐃歌、瑟調、雜曲，則采民間歌謠爲之，此皆人情天籟，無假修飾，最有興觀羣怨之旨，卽古之變風也。歷代文士最喜爲之，鮑明遠、李太白爲最，元次山、韓退之、孟郊、張籍次之。惟杜子美、白樂天，則師其體而不用其題，自爲新聲以寫世事，論者以爲轉得古意。自是樂府又爲二派。明人詩稱復古，作者集中，無不以擬古樂府居首。其善用變者，惟王弇州而已！余幼讀詩，則喜言興觀羣怨大意，每至《谷風》《式微》諸詩，未嘗不流涕反覆！及閱漢以來樂府歌謠，輒低徊永歎，以爲古詩之存，獨有此耳！」見《詩集樂變序》。

其論詩以李、杜、韓、蘇爲極詣曰：「詩有可以學而至者，有不可以學而至者，有可以悟而得者，有不可以悟而得者。格律之精深，聲響之雄切，筆力之沈勁，藻飾之工麗，此可以學而至者也。意趣之沖淡，興象之高超，神境之奇變，情韻之繚邈，此不可以學而至者也，非悟不能。若夫忠孝之懷，溫厚之思，卓越之旨，奇邁之氣，忽而沈摯，忽而激烈，作之者歌哭無端，讀之者哀樂並至，是則天趣天籟，又豈可以悟得者乎！漢魏以前是已！盛唐作者，妙悟爲多。李杜二公，可悟不可悟之間者也，天與學兩至之矣！昌黎眉山，則其詩也，卽其文也，去風騷、漢魏之音遠矣！雖然，性情正，胸襟曠，才力峻，問學博，得之於心，應之於手，舉人世可驚可喜可哭可笑之事，一於詩發之，千載以下，讀其詩，如見其人，如見其世，此則天與人合，不學焉不至，不悟焉不得，而實不關乎悟與學者也；夫如是，則其文也，皆其詩也，所以並稱於李杜也！世之爲詩者，其以學至耶？以悟得耶？抑不由學與悟而得之天也？明何李之論詩，以學至也，學之失，則有形合神異者矣！王阮亭之言悟，抹其失也，而非廢學也；悟之失，則又有以不至焉至，以不得爲得者矣！沈歸愚是也。於是錢鐘石翁覃溪輩，思有以振之，取杜與蘇，日伐其毛而洗其髓，

於杜蘇則有功矣。要亦言其辭句體制耳，有不得而言者。二君未由及之也！故二君之詩，雖異俗學之浮聲，寔亦古人之游魄，天趣天籟，吾未之見也！真氣不存焉耳！近一二名賢，取材六朝，而借徑於少陵眉山，其家法，吾莫能非也，然而有剪綵爲花，範土爲人者矣！門下從而和之，出入攀援，自以爲工。吾讀其詩，泛泛然不能得其人與世也，不得已而強指之，則曰某者六朝，某者杜，某者蘇而已！」（見張南山詩序）

其論杜詩曰：「七律詩五六兩句最難工，以上四句雄駿直下，至此力竭，氣難轉運故也。昔人論此，推義山《馬嵬》一首，其五六云：『此日六軍同駐馬，當時七夕笑牽牛』，蓋用逆挽法也。然此法亦本少陵。《諸將》第一首云：『見愁汗馬西戎逼，曾閃朱旗北斗殷。』第二首云：『胡來不覺潼關隘，龍起猶聞晉水清。』義山寔本於此，蓋以鎖上斗轉，更開收結，章局既變化，而氣骨益見開拓，此等當從《國策》《史記》來。如《史記》敘荊軻刺秦王一篇，而秦法云云，忽然拓開，卽此法也。杜七律當以《諸將》第一，《秋興》次之，《詠懷古迹》又次之。若《白帝城最高樓》及《暮歸》二首，雖是拗體，而雄鍊自然，老橫無敵，筆力真可屈鐵，無一弱字，豈非空前絕後！後來得此種界兀之妙者，惟山谷一人而已！東坡亦間有之，而沈雄不及，惟得其橫放耳！太白登謝朓樓詩，末云：『人生在世不稱意，明朝散髮弄扁舟。』杜《暮歸》詩末云：『年過半百不稱意，明日看雲還杖藜。』語意極相似，而氣象迥然不同，李則豪放，杜則悲壯也。」（見識小錄）

其論清人詩曰：「國朝諸公，病明代復古之弊，乾隆嘉慶以來，多避熟就生以變其體，大約不出蘇黃二公境中，究未能自開生面也！古今作者，文質相宣，繁簡遞嬗，要當抒軸性情，雕繪景物，風骨堅壯，

才思高翔，格高體正，絕除卑俗，則其善也！若必以常見爲非，力求新異，卽明珠白璧，等諸瓦礫，特性太牢，不登肴俎。此乃賦七之奇，豈復言志之旨，雖復自矜沈奧，及乎羣輩爲之，久更生厭，猶然炫爛之極，歸平淡耳，前後易觀，何足深譏乎！」〔見《唐書詩集序》〕至於論詩，自以阮亭爲正，所謂妙悟天成也，乃其自選，又失之靡弱，雖力追唐賢，實則不異金元諸家，識者謂學似遠山，才力微不逮焉！歸愚以吳人言詩，頗能脫去纖穠，別裁僞體，而才質凡近，骨力不騰，每多死句滯意！近世虛僞之流，又以其有豪豔猥薄，傷風敗俗之辭，倡導後生，自比鐵崖。然鐵崖當日已有文妖之目，斯又下矣！又有工應試舉詩者數家，能以唐音入於體制，於是學者又相仿效，及取全集觀之，則所謂古近體者，猶然應試舉詩也！又或真情不足，假故實以文疏舛，由溫李之餘波，益加繁博，自矜選體，而不知與曹、劉、沈、謝有天壤之殊，其甚者，乃更孜孜考證，好古搜奇，破碎繁蕪，其於文章論說，猶失廉肉取舍之道，而況詩之風雅乎！」〔見《孔衡浦詩序》〕

其論文以八家爲塗軌，以沈鬱頓挫爲極詣曰：「文章一事，盛於周秦，衰於建安。自士衡《文賦》、子桓《典論》出，而斯道爲之極壞矣！周秦以上，惟六經之文，大純無疵。諸子亦各出其瓌瑋之言，大抵義豐詞約，氣固神完，以道爲標，以志爲的，探其一言，終身可行，究其全歸，六合不盡，是以繁簡微顯，蕩志愜心，凡所修辭，立誠爲本。自賈、董、揚、馬，恢張宏肆，已覺詞勝於義，氣王於神。建安以來，則專精詞贍，而高古堅樸之意盡矣！然風骨矯矯，神氣遒邁，創語造意，廉傑精奇，誓不相襲，蓋道衰而文盛，亦升降之大端也！唐宋諸賢，有見於斯，然望道未至，果於自矜，修辭之工，或反不逮，特其取義甚正，立體尤嚴，譬諸樂然，雖非清明廣大之奏，已絕煩數淫濫之音矣！先正論文，所以必主八家，非謂文

章極於八家，謂八家乃斯文之塗軌耳！斤斤一先生，不敢失其趨踰警欬；又豈八家之意哉！」（見復方閣書）「古人文章妙處，全是沈鬱頓挫四字。沈者，如物落水，必須到底，方著痛癢，此沈之妙也；否則仍是一浮字。鬱者，如物蟠結胸中，展轉縈遏，不能宣暢；又如憂深念切，而進退維艱，左右窒礙，塞阨不通，已是無可如何，又不能自己，於是一言數轉，一意數迴，此鬱之妙也；否則仍是一率字。頓者，如物流行無滯，極其爽快，忽然停住不行，使人心神馳騁，如望如疑，如有喪失，如有怨慕，此頓之妙也；否則仍是一直字。挫者，如鋸解木，雖是一來一往，而齒鑿巉巉數百森列，每一往來，其數百齒必一一歷過，是一來凡數百來，一往凡數百往也；又如歌者一字，故曼其聲，高下低徊，抑揚百轉，此挫之妙也；否則仍是一平字。文章能祛其浮率平直之病，而有沈鬱頓挫之妙，然後可以不朽。楚辭、史記、李杜詩、韓文，是也。嗟乎！此數公，非有其仁孝忠義之懷，浩然充塞兩間之氣，上下古今窮盡情態之識，博覽考究山川人物典章之學，而又身歷困窮險阻驚奇之境，其文章亦烏能若是也哉！今不惟數公之所以爲人，而惟求數公之所以爲文，此所以數公之後，罕有及數公者也！」（見康輅紀行）

其論清人文曰：「古人文章，所重於天下者，一以明道，一以言事。理義是非不精，則道蔽。利害得失不覈，則事乖。然理義可以空持，利害必以實驗，故言事之文爲尤難也。唐之陸宣公，宋之蘇文忠公，皆善言政事者，文與實俱茂焉；他人爲之，非詭則萎矣！本朝作者，如方望溪、朱梅崖能爲古人之文，海內無異辭也！望溪之後，有劉海峯及吾家惜翁。梅崖之後，則稱魯山、木。山、木又自以所得者就惜翁商榷之，其文章淵澹處，真可以追古人矣；而政事之文，特爲茂實，所陳得失利害較如也。」（見重刻山木居士集序）山、木之甥陳碩士詩文醇雅，得惜翁正傳。然碩士殊推上元管異之同，比之六祖，而自居秀上座。余謂吾

桐方植之東樹，劉孟塗開，上元梅伯言曾亮及異之，皆惜翁高足，可稱四傑。」見感懷雜詩自註。「然孟塗異之皆蚤卒。植之著述雖富，而窮老不遇，言不出鄉里。獨伯言爲戶部郎官二十餘年，植品甚高，詩古文無與抗行者！以其所得爲好古文者倡導，和者益衆，於是惜翁之說益大明。」見惜抱先生與管異之集跋。

其論姚鼐《惜抱軒詩文》曰：「《惜抱軒詩文》，皆得古人精意。文品精潔似柳子厚，筆勢奇縱似太史公，若其神骨幽秀，氣韻高絕，如入千巖萬壑中，泉石松風，令人冷然忘返，則又先生所自得也！或謂文學六一。余意不爾！集中文以記序墓誌爲最。銘辭不作險奧語，而蒼古奇肆，音節神妙，殆無一字湊泊。昔范蔚宗自稱其《後漢書》論贊，以爲奇作。吾於先生碑銘亦云。」「文章最忌好發議論，亦自宋人爲甚。漢唐人不然！平平說來，斷制處只一筆兩筆，是非得失之理自了，而感慨咏歎，旨味無窮，此蓋文章深老之境，非精於議論者不能，東坡所謂絢爛之極也！先生文不輕發議論，意思自然深遠，實有此意，讀者言外求之！」「詩以五古爲最！高處直是盛唐三昧，非膚襲貌取者可比！七古用唐調者時有王李之響，學宋人處時入妙境，尤不易得！七律功力甚深，兼盛唐蘇公之勝。七絕神俊高遠，直是天人說法，無一凡近語矣！」「五古中如《送演綸歸里》、《邳州黃山》二首，俊逸神到，居然太白！」《景州開福寺塔》一首，豈遜盛唐諸公《慈恩寺塔》耶！他如《山寺》、題沈學子步屨尋幽圖》、《趙北口》、《舟中作》、《吳戊橋》、《南旺湖》、《嶽麓寺遇劉樸夫》等作，神似崔王。《田家》一首，雖學淵明，卻近儲大祝。《由橋頭驛至長沙》一首，則步驟大謝，《九日渡湘水》一首，則小謝也！」「七古中，《柳湖漁舍圖》、《送朱子穎之淮南》、《送余扶重游武昌》等作，是東川龍標逸篇。《酬胡君唐伯虎匡廬瀑布圖》、《贈沈方穀唐伯虎赤壁圖》等作，橫逸之氣，直逼太白。《萬壽寺松樹歌》、《沈石川畫檜歌》、《贈錢魯思》等作，則沈壯蒼老，入少陵之室。若《心

人散牧晚歸。延祐元年江西鄉試卷。《魏三藏菩提流支譯金剛經拓本》。《新城道中書所見》。《唐人關山行旅圖》等作，則東坡得意之篇，真傑作也！七律中，全篇如《古意》，效西崑體。《出塞》。《南朝》。《金陵》。《曉發河上雜詩》。《彰德懷古》。《弔王彥章》。《懷劉海峯》。《懷王禹卿》。《臨江寺》等作，皆沈雄高渾，調響氣勁，唐音之尤者。若《清苑》。《望郎山》。《漫興》。《泥汭阻風》。《謝簡齋惠黃精》諸作，則尤蘇黃妙諦也！佳句尤多！七言如：『伊陽風雨從中出，洛下山川向北多。』行窮南汶山初見，吟到澄江葉盡飛。『斜陽萬里背人去，落葉千聲與客悲。』寒吹滿空雲出塞，暮天無色日平關。『寒潮不隔中原望，白日遙懸大海流。』滄海霧搖孤月上，青天影合二流來。『中原日落關城白，西楚河來天地黃。』春草不知韓信來，秋風曾到項王臺。『千秋遺蹟尋黃石，一片寒陽下白樓。』屠市故人從偶語，屏風侍史不知名。『紫陌鶯花故人牘，黃河風雨郡城樓。』歸人夜夜聽山雨，落雁聲聲下郡樓。『盡室相看浮汶去，數山如畫入船來。』賈舶霾雲吹暗浪，佛圖懸日照空磯。『藏史著書歸苦縣，祠官侍禮在甘泉。』安定有城名第一，隴西出將每無雙。『十月清霜大地肅，一江空水古今寒。』南國市朝非曩日，西風闌檻又經年。『五言如：』水澹松茲郭，月生天柱峯。『河水流中國，寒陽下寒門。』連峯渤海外，流畝穆陵西。『筒水澆青園，檐風隕白花。』單車度淇水，秋雨綠王莠。『閉門生逕草，空砌墮鄰花。』風絲垂縷女，雨蔓長牽牛。『連朝江路冷，數點岸花春。』帆勢遙投戍，濤聲故近人。凡數十聯，皆精深華妙。七言絕句如《送人往鄴》。《出湖口》。《淮上有懷》。《留別揚州諸君》。《湘陰》。《江上送吳殿麟》諸首，在唐人中猶爲高作。若《黃河曲》二首，則『黃河遠上』之亞。秦漢宮辭，卽似龍標。竹枝等篇，何殊夢得。若明賢中，使王李見之，能不擊節耶！『見《識小錄》』所以闡揚姚鼐之學者甚盡！要刪其語以俟考論。

柏枧山房文集十六卷續集一卷駢體文二卷詩集十卷續集二卷

上元梅曾亮字伯言撰。曾亮，道光壬午進士，官戶部郎中，以爲古文有名京朝。其詩文集，乃其同年友江南河道總督楊以增，以咸豐五年爲刻於清江節署而祝七十之壽者也。曾亮少好駢體文，年近三十，始事姚鼐以肆力爲古文，不事塗飾而選言有序。惟姚鼐潔而適。曾亮潔以峻。姚鼐紆迴蕩漾，餘味曲包。曾亮抑揚爽朗，餘地力破。獨其論議切覈，善剝古今，蓋以半山之瘦勁拗折，參永叔之紆徐委備，於姚氏爲得師法。傳誌之文，則辭喜簡練，而事貴刻畫，與姚氏之容與閒易以攝虛神者，蹊徑不同。若夫容與閒易，餘味曲包者，集中亦時時遇之，如《觀漁》、《讀莊子書後》、《費崑來西園感舊圖跋書後》、《韓氏藏明題名錄書後》、《江亭消夏記》、《通河泛舟記》、《侯子有先生墓誌銘》、《男八十墓碣》、《鄉孺人墓表》、《舒伯魯集序》等篇，率以出真，淡而有味，可謂步趨姚氏而得其神髓者也！駢文則意境尚沈鬱，而氣調欠岸異，辭句不新麗，然有意鮑照劉峻之遺警，而不爲徐陵庾信之華點者也。詩則汰膚存骨，由瘦得堅，以峻嶒出妥貼，以清削見識趣，蓋亦衍韓退之黃山谷一派，然無退之之大力控搏，亦無山谷之拗詞詰屈，此其較也。采錄可誦，篇目如左。

詩類 贈胡聖基 哭幼弟曾誥 秋懷五首 呈管異之 借異之遊東城 避暑過管異之齋是日小雨未

成同坐者宋幹臣吏部馬韋伯茂才侯振庭舅氏 贈左匡叔桐城 放歌行示植之異之韋伯彥勤弟

暑甚與鈕非石顧千里夜坐 歲暮感舊用東坡聚星堂雪韻 題陳仰韓讀書秋樹根圖 秋日偶書

春日雜詠 過滕縣作時縣令趙毓駒貴州人 暑甚喜雨 自都中赴樂城省視家弟仲卿 方子範故

園樽酒圖 出京自德州赴歷城泥水失路 同宣城謁墓夜泊江寧鎮作 銅井泊舟 薛家渡夜泊
苦雨作 急雨歌 六月十五日柏棧山飛橋納涼作 歸舟至江東門 過方村晤外兄崔芝田 自郡
城赴坐古村過嶧陽橋 村中雜詠 夏日雜詠 和明叔見懷用其韻不復次 和琯香地樓看雪韻
過當塗黃山寺 爲人題跨牛圖 題許心梅如意圖 題張淵甫圖 得家書口號寄仲卿彥勤弟及淑
儀妹 偶出 買書四友歌 贈黃景濂友蓮 贈李蓮舫冬夜偶成二首 送黃香鐵歸嶺南 贈鄒松
友 程春海侍郎人日雪後招飲龍樹寺中 贈陳小松 悼汪均之 七月十七日作 書示張生端甫
贈馮魯川 和余小坡覽翁詩 贈余小坡 追悼程春海侍郎 卽事呈伯韓小坡魯川 可歎 悼
柏雲伯父 也似 種竹 題戴雲帆寒齋味雪圖 與方慎之夜話寄示仲卿弟 苦雨作 喜晴 和
邵位西游書肆詩 和吳笏庵枕上偶成 苦雨歎四首 爲蔡友石先生題董羽六龍圖 鍾山寒燒
臘八粥 送窮 燕行九村居無書無墨無硯無紙無衣作六無歎 示家人 有客 雜詠 當書 雜
詠 贈楊至堂 七十自嘲 三月十日看花作 秋蟲 有客

駢文類 姚姬傳先生八十壽序 答惠川書 寄湯燮堂書 弔梁武帝文 書陳保田男文保壙銘後 普
洱茶賦

論說類 士說 韓非論 民論 觀漁 晁錯論 刑論 臣事論

序跋類 鈕非石非石子書後 秦遠亭詩書後 讀莊子書後 梅氏宗譜書後 費崑來西園感舊圖敘書
後 董文恪公詩集敘 桑弢甫先生集敘 繁昌縣志敘 撫吳草序 緣園詩序 管異之文集書後

陳拜鄰詩序 黔記序 郭羽可竹冊跋 韓氏藏明題名錄書後 朱蘊山詩序 劉簾舫先生行狀

書後 帝鑑圖詩序 陰晉異函序 葉耳山遺稿書後 孫秋士詩存序 恥躬堂文集序 阮小咸詩集序 舒伯魯集序

書牘類 上汪尚書書 覆上汪尚書書

贈序類 贈陳仰韓序 贈汪平甫序 送姚建木序 送張梧崗序 送張漁簋序 贈孫秋士序 送馬止齋序 送蔡友石先生序 秦稗堂五十壽序 鄧嶠筠先生七十壽序

傳狀類 書楊氏婢事 侯起叔先生家傳 書李林孫事 葉應傳 汪泊齋先生家傳 書鄧中丞決獄事 鮑母謝孺人家傳 艾方來家傳 總兵劉公家傳 王剛節公家傳 栗恭勤公家傳 秦省吾家傳

黃个園家傳

碑誌類 侯子有先生墓誌銘 王惠川先生墓誌銘 男八十墓碣 朝議大夫貴州遵義府知府胡君墓誌

銘 崔恭人墓誌銘 黃先生墓表 陳師吾墓誌銘 光祿大夫兵部尚書王公墓誌銘 朝議大夫臺

灣府知府蓋君墓誌銘 湯府君墓表 誥封中憲大夫安襄鄖荆道卽墨縣教諭楊府君墓誌銘 原任

予告大學士戴公墓碑 方彥聞墓表 朱仁山墓誌銘 湯海秋墓誌銘 朱孺人墓誌銘 館陶縣知

縣張君墓表 鄒孺人墓表 馳贈奉直大夫陳府君墓誌銘 翁母張太淑人墓誌銘 國子監學正劉

君墓表 朝議大夫南昌府知府吳君墓誌銘 胡母龔宜人墓誌銘

雜記類 游小盤谷記 鉢山餘霞閣記 周石生授經圖記 記棚民事 謁墓記 馮晉漁舍人夢游記

游瓜步山記 吳淞口驗功記 晝樵夜讀圖記 江亭消夏圖記 宜南夜話圖記 通河泛舟記 金

山寺藏鼎記

右詩八十首，駢文六篇，古文九十二篇。論學不喜漢學，而以義理爲無與文事，論文獨貴漢文，而以誦讀爲急所先務，或出師說而不必盡同。

其論宋明人語錄曰：「向於性理微妙，未嘗窺涉，稍知者，獨文字耳。昔孔子之門，有善言德行者，有善爲說詞者，此自古大賢不能兼矣。謂言語之無事乎德行，不可也，然必以善言德行者，乃得爲言語，亦未可也！莊周列禦寇及戰國策士，於德行何如？然豈可謂文字之不工哉！若宋明人所著語錄，固非可以文詞論，於德行亦未爲善言者也！竊以爲讀古人書，求其爲吾益者而已，求其疵而辨勝之，無當也！專求其疵，則可爲吾益者寡矣！方其得一說焉，皆自以爲維世道，防人心也，然人心久存而不毀者，自有在焉，雖朱陸之是非，良知格物之同異，猶未足爲其輕重也。況所辨有下於此者，或前人所已辨而不必置辨者，愈少味矣！」見《答吳子序書》。

其砭清學曰：「昔侍坐於姚姬傳先生，言及於顏習齋李剛主之非薄宋儒。先生曰：『習齋猶能豁刻自處者也。若近世之士，乃以所得之訓詁文字，訕笑宋儒。夫程朱之稱爲儒者，豈以其訓詁文字哉！今無其躬行之難，而執其末以譏之，視習齋又何如也！』昔李文貞、方侍郎苞以宋元諸儒議論，糅合漢儒，疏通經旨，惟取義合，不名專師，其間未嘗無望文生義揣合形似之說，而扶樹道教，於人心治術有所裨益，使程朱之學，遠而益明，雖不必盡合於經，而不失聖人六經治世之旨，則固可略小疵而尊大體，棄短取長，積義成章，治經之道固如是也。後之學者，辨漢宋，分南北，以實事求是爲本，以應經義不倍師法爲宗，其始亦出於積學好古之士，爲之倡，而未流瀆以加厲，言《易》者首虞翻而黜王弼，言《春秋》者，屏左氏而尊何休，至前賢義理之學，涉之惟恐其汙，矯之惟恐其不過，因便抵牾，周內其語言文字之疵，

以詭竇名義，駭誤後學，相尋逐於小言羣說而不要其統，黨同妬真而不平其情，安其所習，毀所不見，終以自蔽，此其患未可謂愈於空疏不學者也！」（見『九經說書後』）

其論文不尚駢體，而欲參會漢宋曰：「某少喜駢體之文，近始覺班、馬、韓、柳之文爲可貴。蓋駢體之文，如俳優登場，非絲竹金鼓佐之，則手足無措，其周旋揖讓，非無可觀，然以之酬接，非人情也！」（見復陳伯游書）「文章至極之境，非可驟喻，以言有用，則論事者爲要耳！宋人文明健酣適，然時失之冗。戰國策士文，可謂雄矣，然抑揚太甚，有矜氣，令人生不信心。簡而明，多而不令人厭生者，惟漢人耳！苟得其意，而爲宋人之文從字順，論事之道，莫善於是矣！」（見『與姚柏山書』）

其論學文必自誦讀入手曰：「古文與他體異者，以首尾氣不可斷耳！有二首尾焉，則斷矣！退之謂『六朝文雜亂無章』，人以爲過論！夫上衣下裳，相成而不複也，故成章。若衣上加衣，裳下有裳，此所謂無章矣！其能成章者，一氣者也。欲得其氣，必求之於古人，周、秦、漢及唐、宋人文，其佳者，皆成誦乃可。夫觀書者，用目之一官而已！誦之而入於耳，益一官矣！且出於口，成於聲，而暢於氣。夫氣者，吾身之至精，以吾身之至精御古人之至精，是故渾合而無有間也！國朝人文，其佳者，固有得於是矣！」（見『與孫芝房書』）「羅臺山氏與人論文，而自述其讀文之勤，與讀文之法，此世俗以爲迂且陋者也！然世俗之文，揚之而其氣不昌，誦之而其聲不文，循之而詞之豐殺厚薄緩急與情事不相稱，若是者，皆不能善讀文者也！文言之，則昌黎所謂養氣，質言之，則『端坐而誦之七八年』，明允之言，即昌黎之言也。文人矜夸，或自諱其所得，而示人以微妙難知之詞，明允可謂不自諱者矣！而知而信之者或鮮！臺山氏能信而從之，而所以告人者，亦如老泉之不自諱，吾雖不獲見其人，其文固可以端坐而得之矣！」（誦

之而成聲，言之而成文，而空疏寡情實者，蓋亦有焉！則聞見少而蓄理不富也。故詩之道，性近者皆能工之。古文而成體，非博學而心知其意者不能！」見《與孫芝房書》

其論陳言務去曰：「文章之事，莫大乎因時。立吾言於此，雖其事之至微，物之甚小，而一時朝野之風俗好尚，皆可因吾言而見之。使爲文於唐貞元元和時，讀者不知爲貞元元和人，不可也！使爲文於宋嘉祐元祐時，讀者不知爲嘉祐元祐人，不可也！韓子曰：『惟陳言之務去』，豈獨其詞之不可襲哉！夫古今之理勢，固有大同者矣，其爲運會所移，人事所推衍而變異日新者，不可窮極也，執古今之同而概其異，雖於詞無所假者，其言固已陳矣！」見《答朱丹木書》

其論結體貴屈曰：「凡詩閱一二字，可意得其全句者，非佳詩也！文氣貴直而其體貴屈，不直，則無以達其機；不屈，則無以達其情，爲文詞者，主乎達而已矣。」一見《舒伯魯集序》

其自敘曰：「曾亮年十三四，學執筆爲詩文，見時賢集多快語無忌憚，大以爲佳！二十餘，見王惠川，云：『君博覽而不循其本，未終卷，已易他書，不足以爲學也！』博書當先求其古者，專治一書，熟其神情詞氣，再易他書，數年後，視近人當何如耳！」其時聞言，面赤汗沾衣也！稍取《史記》，點定兩三次，繼以《漢書》及先秦子書，漸及諸史，數年前所歎賞者，漸化去無顧藉心！嘗除夕，閱舊作詩文不可者，裂然爐中；下布栗子數十，且燃且閱，遂盡無一紙存者，時栗子則大熟矣，作爆竹聲，躍起觸人面。是後人皆戒子弟以無交梅管兩生，兩生多誤人。管生者，異之也。」見《與容瀾止書》「曾亮少好爲駢體。異之曰：『人有哀樂者面也，今以玉冠之，雖美，失其面矣！此駢體之失也。』余曰：『誠有是！然《哀江南賦》、《報楊遵彥書》，其意固不快耶，而賤之也！』異之曰：『彼其意固有限。使有孟荀莊周司馬遷之意，來如雲

與，聚如車屯，則雖百徐庾之詞，不足以盡其一意。」余遂稍學爲古文詞。異之不盡謂善也，曰：「子之文病雜！一篇之中，數體互見。武其冠，儒其衣，非全人也！」余自信不如信異之深，得一言，爲數日憂喜！」
見《管異之文集書後》。「昔會課鍾山書院，每論文，訟議紛然，忘所事事。異之色獨莊，盛言古文。余曰：『文貴詞達耳！苟敘事明，迷意暢，則單行與排偶一也。』異之不復難曰：『君行自悟之！』」
見《馬章伯駢體文序》。

其論詩毋爲學所累曰：「國初以詩鳴者，王漁洋、施愚山，皆不以考證爲學。其以是爲學者，如閻百詩、惠定宇、何義門，於學各有所長，而詩非其所好。兼之者，惟顧亭林朱竹垞而已！亭林不以詩人居。竹垞於詩則求工而務爲富者矣，然其詩成處多而自得者少，未必非其學爲之累也！嘗謂詩人不可以無學，然方其爲詩也，必置其心於空遠浩蕩，凡名物象數之繁重叢瑣者，悉舉而空其糟粕，夫如是，則吾之學常助吾詩於言意之表而不爲所累，然後可以爲詩！」
見《劉楚楨詩序》。

其論詩貴肖乎吾，當乎物曰：「詩至今日，難言工矣！言唐者容，言宋者肆，漢魏者木，齊梁者綺，矜其所尚，毀所不見，舌未乾而名磨滅者，不可勝數也！然則孰探其所從生？曰：空而善積者，人之情也。習而善變者，物之態也。積者日故，變者日新，新故環生，不得須臾平，而激而成聲，動而成文，故無我不足以見詩，無物亦不足以見詩，物與我相遭，而詩出於其間也。今以吾一人之身，俄而廊廟，俄而山水，俄而齋居，俄而觴詠，將拘拘然類以居之，派以別之，取古人之所長而分擬之，是知有物而不知有我也！若昧昧焉不揣其色，不則其聲，而好爲大，曰不則其境隘，好爲莊，不則其體俳，好爲悲，不則其情蕩，是知有我而不知有物也！知有物而不知有我，則前乎吾，後乎吾者，皆可以爲吾之詩，而吾如未嘗有一詩！知有我而不知有物，則道不肖乎形，機不應乎心，日與萬物游而未嘗識其情狀焉，謂千萬詩如

一詩，可也！然則詩惡乎工？曰：肖乎吾之情性而已矣！當乎物之情狀而已矣！審其音，玩其辭，瞭然爲吾之詩，爲吾與是物之詩，而詩之真者得矣！」見《李芝齡先生詩集後跋》

其論詩不規規於一家，乃爲善學一家曰：「吾嘗謂東坡之詩，出於劉夢得，而讀者或不能知。蓋有過乎前人之材，而所旁涉者，又廣博而無涯涘，故使人移易耳目而忘其源流之所自出，古之善學人者，固皆如是，不獨東坡然也！法可菴於詩，蓋深學東坡而不規規於一人一境，且旁及大歷以下諸子，游其思而博其趣，故所作得東坡清曠之氣，而運以唐賢之調適澹沲，亦時有感激振厲，而離合微至，不大聲色。然則東坡之於夢得，其所學有高出於夢得者，而可菴之於東坡，其所學有不專於東坡者也。惟其不專於一人也，乃合乎東坡之所以學夢得，而爲善學古人也！」見《法可菴詩序》要刪其語，以備考覽。

因寄軒文初集十卷二集六卷補遺一卷

上元管同字異之撰，附《小異文》四篇，爲其子嗣復所著。同好談經世之學，而文章則師姚鼐。鼐以古文名一世，少許可，顧獨稱同。而同自以意爲古文，故不之襲也！道光乙酉舉於鄉，公車輒報罷，無所用其學，則退論天下大計，洎流極所至，往往若逆覩；若所擬《風俗》《積貯》及《與鳳陽守令》諸書議，是也。是故同學於姚氏，自陳用光梅曾亮，類率相推下，非特以其文也！即言乎文，其勁氣峻骨，亦絕出流輩云。所著有《七經紀聞》《孟子年譜》《文中子考》《戰國地理考》《皖水詞》等書。其《文集》，則其鄉人安徽巡撫鄧廷楨以道光十三年，爲刻於皖中，而屬曾亮編校。同以前一年卒，年四十七。鄧廷楨亦姚鼐弟子，與同爲同門，而序其集曰：「楨爲諸生時，肄業鍾山書院，從姚姬傳先生游。先生古文爲

一時宗匠，慎所許可，惟亟稱吾友異之以爲得古人雄直氣。同年陳石士侍郎亦爲姚先生弟子，而異之即侍郎已酉所得士。侍郎每爲余言，不以持節校兩江士爲榮，而以得一異之自慰也！及楨巡撫安徽，延異之爲兒子師，益悉其底蘊。蓋宋以後，言文者約有數派：司馬子長之文，雄潤而澹遠。得其澹遠者，歐陽廬陵也，而歸熙甫繼之。董生劉子政之文，渾噩樸茂。曾子固朱文公取之。蘇長公取《國策》《莊子》而參以班孟堅。明允之文，峻厲嚴切，甚似賈生，其原出於韓非荀子。能學孟子者，惟昌黎而已！長公之學，盛於南宋，而師明允者甚少！學廬陵而兼子固者，方望溪，學廬陵而兼長公者，劉海峯也，然皆不及熙甫！姚先生文師廬陵而上溯子長，故與熙甫皆神似廬陵而不以貌也。異之學於姚先生，而文似明允，其平居亦未嘗誦法宋人，獨好賈生。不好明允而好賈生，所以能明允歟！師姚先生之文而不襲其派，此先生所以以文事深許歟！「集中《與友人論文書》，稱「與其偏於陰也，無寧偏於陽」；則與姚猶言「文章之境，莫佳於平淡，措語遣意，有若自然生成者，此熙甫所以爲文家之正傳」；與《王鐵夫書》而「文之雄偉而勁直者，必貴於溫深而徐婉」，《海愚詩鈔序》意趣迥殊。今觀其文章，工於持論，如集中論議書疏諸類之文，深切喜往復，而特瘦折曲達，無不盡之情與理，其言峭以肆，雖不如鼂之紆徐委備，而得其一體，足與梅曾亮伯仲者也！題跋如《讀晏子春秋》、《讀墨子》、《讀司馬法》、《讀六韜》、《讀漢書貨殖傳》及《重修甘敬侯墓碑記跋》諸篇，辯證而成章以達，辭筆簡峻而波瀾澹蕩，其原出於柳宗元經子諸跋，而與鼂《左傳補注序》、《讀司馬法六韜》、《讀係子》、《書貨殖傳後》諸篇，意境髣髴似之。傳誌亦喜以刻畫爲寫生，而辭筆不如梅曾亮之峻重，時失之繁！詞賦則以賈誼學屈原，其氣噴薄，其辭倣詭，其文也縱而後反。要之同好爲峭悍，能爲盡而不欲爲不盡，與曾亮爲同調，於師門爲轉手矣！采錄可誦，篇目

如左。

賦類 弔鄒陽賦 悼亢宗賦 暑賦

論著類 原僊 除奸 刪通論 韓信論 范增論上下 禁用洋貨議 說士上下

序跋類 讀晏子春秋 讀司馬法 讀六韜 讀漢書貨殖傳 重修甘敬侯墓碑記跋 舅氏鄒君詩稿序

嚴小秋詩詞集序 許叔翹文集序 書李伯時聖賢畫像後 書李伯時白描追遠圖後 姚庚甫集序 錢秋倡和詩序 陳竹如詩序 書梅伯言馬韋伯詩後 跋團勇助軍約記

書牘類 擬言風俗書 擬籌積貯書 擬與鳳陽守令書 與朱幹臣書 與吳仲倫書

贈序類 送李理問序 送朱幹臣爲浙江按察使序 贈汪孟慈序 送李海鵬爲永州知府序

傳狀類 先大父家傳 王礪可家傳 鄒梁圃先生傳 羅彬文傳 資政大夫刑部右侍郎致仕王公行狀

附小異張炳垣傳

碑誌類 舉孝廉方正李君墓誌銘 資政大夫兵部侍郎鄒察院右副都御史總督江南河道黎公墓誌銘

雜記類 登掃葉樓記 過關山記 寶山紀游 餓鄉記 靈芝記 包孝肅公像記 安徽巡撫部院題名

記代 觀潮圖記 抱甕園游宴記 繼園記 附小異書汪馬二秀才書

頌贊類 畫龍贊 歐陽文忠公畫像贊

祝祭類 祭方明府文 祭王秀才文 祭趙司馬文代 禱雨龍神文

右文六十二篇。綜其所學，解經兼綜漢宋，此與姚鼐同也。論文偏尚陽剛，此與姚鼐異也。

其論《尚書·洪範》曰：「《洪範》三德之章，自『一曰正直』至『高明柔克』，其義止矣，而其下忽綴以

「惟辟作福」至「民用僭忒」之辭，於三德何相關涉？初讀而甚疑之！及後觀韓非《有度篇》載先王之法曰：「臣無或作威，無或作利，從王之指。無或作惡，遵王之路。」始知此十語乃《皇極章》文，舊本在「無偏無頗」之上，而編書者亂其次耳！《皇極》一章，言人君有錫福之事，故承上言人臣毋作威福，而所當得爲者，絕偏頗以遵王之義也，苟作福焉，則作好而不遵王道，苟作威焉，則作惡而不遵王路，如此連屬，其文義致爲通貫，知古書本必如此爾！及漢後，簡編失錯，馬鄭輩乃不能曉，其解三德，乃以誅治人臣爲說。夫《左氏》甯羸引《尚書》剛克，明言治性，安得以爲治人！蓋不悟簡編有誤，遂併其本不誤者而亦牽牽解之矣！」（見《答孫淵如觀察書》）

其論解經曰：「朱子解經，於義理決無謬誤；至於文辭訓詁名物典章，則朱子不甚留神，其中不能無失！義理之得，賢者識其大也。文辭訓詁名物典章之得，不賢者識其小也。世之善學者，當識大於朱子，識小於漢唐諸儒及近代經生之說，而又必超然有獨得之見，然後於經爲能盡其全體而無遺。求勝焉，曲徇焉，非私則妄，均之無補於經也！」（見《答陳編修書》）

其論《司馬法》曰：「姚姬傳先生嘗謂今《司馬法》爲東晉後僞書，非漢人所言之本。同謂今《司馬法》後二篇文甚古，恐非東晉後人所能僞作，若前三篇，則其辭誠淺，不可謂之洪闊深遠矣！然考魏武序《孫子》，引是書云：『人故殺人，殺之可也。』故殺，謂有意殺人，今律文猶有是語。今本乃於『人』下增『是』字，而『殺人』下增『安人』二字，則其上語意不可復通。又今本云：『國容不入軍。軍容不入國。軍容入國，則民德廢。』國容入軍，則民德弱。』上二語見《漢書》，下四語，始亦疑其僞作。及觀劉淵林《吳都賦注》全引是文，而『民德廢』，作『民德匱』，『匱』與『弱』對，且語意絕精，作『廢』者乃以字形相近而

謁。乃知古書庸淺，大抵傳久舛誤，而淺者以意增損其間耳，非其書本固然也。夫作僞者不能無依據，故采擷他書，十常八九。今《司馬法》於《漢書·周禮注》所引之文，同者僅十一，而不見者且十八九焉，使其作僞，夫豈不知多取之而割棄若斯乎？《漢書·藝文志》《司馬法》百五十五篇，及《隋志》乃云三卷。而李善注《文選》所引是書，多同《孫子》之文，然則今之五篇，尚非《隋志》三卷之全，古書所引，多不在其中，蓋無足怪矣！又考《隋志》賈誼注《司馬法》三卷。今《文選》李注載《司馬法》曰：「古者以仁爲本，以義治之之謂正。」曹操曰：「古者，五帝三王以來也。仁者生而不名。義者成而不有。」是此書在唐時猶有孟德注，而《隋志》無之。然則古書或著錄而亡，或無錄而在者，誠亦衆矣，未可以篇章語句之不符，而遂疑其僞也！」見《讀司馬法》

其論《晏子春秋》曰：「陽湖孫督糧星衍甚好《晏子春秋》，爲之音義。吾謂漢人所言《晏子春秋》，不傳久矣！世所有者，後人僞爲者耳！何以言之？太史公爲《管晏傳贊》曰：『其書世多有，故不論，論其軼事。』仲之傳，載仲言交鮑叔事獨詳悉，此仲之軼事，管子所無也。以是推之，薦御者爲大夫，脫越石父於繯綫，此亦嬰之軼事，而《晏子春秋》所無也。假令當時書有是文，如今《晏子》，太史公安得稱曰軼事哉！吾固知非其本也。柳宗元知疑其書而以爲出於墨氏。墨氏之徒，去晏子固不甚遠，苟所爲，猶近古，其淺薄當不至是！是書自管、孟、荀、韓下逮韓嬰、劉向書，皆見剽竊，其詆訾孔子事，本出《墨子》。非儒篇，爲書者見《墨子》有是，意嬰之道必有與翟同者，故既采《非儒》篇入《晏子》，又往往言墨子聞其道而稱之，是此書之附於墨氏，而非墨氏之徒爲是書也！且劉向歆、班彪固父子，其識皆與太史公相上下，苟所見如今書，多墨氏說，彼校書胡爲人之儒家哉！」見《讀晏子春秋》

其論《離騷》曰：「同幼好是書，廣覽諸注，尚愧不能盡曉，後乃憤發，舍注而專誦本文，誦之僅百餘過耳，第覺其書辭義顯，始終條理，無世所云難曉之處也！既又取注以解之，則不可曉者如故；然則是書豈有難曉哉！注累之也！古今注《騷》者，如王逸洪興祖，其用意固已勤矣！大要專心名物訓詁，置意不求。朱子欲求其意者也，牽於興賦，亦不能盡得。至近世若張鳳翼、林雲銘，蓋無足道矣！夫注《騷》者，節次不分，則言辭多雜，言辭多雜，則意旨不明，是皆讀之不精之故耳！而猥謂《離騷》與奇不一，非可言詮，壹以《史記》所云『三致意』者了之，是使屈子史公交受過矣！首貴分其節次，節次既分，則言辭不雜，言辭不雜，則意旨隨之而皆明，雖不敢謂古人之意，必當如此，而其間不得古人之意者，必已寡矣！」見《與梅孝廉論離騷書》。

其論《招魂》曰：「舊皆謂《招魂》爲宋玉作。太史公贊屈原曰：『予讀《離騷》《天問》《招魂》《哀郢》，悲其志。』《招魂》亦原之爲耳，豈玉作哉！其文之旨，首言魂魄離散，所謂故國難安，亦嘗有九州相君之志矣，卜居所云『心煩慮亂』時也，顧以義不可去，故招使歸來。然招之必託於帝告巫陽者何也？孝子之於親，天性也；忠臣之不忍離君，亦天命而已！其文之中，至亂辭之首，乃盛陳楚邦繁盛，則意譏頃襄，猶壯辛論幸臣之旨，父死於秦，不思報復，而乃逞聲色，縱獵游，侈陳之，正以見王之不道而難與有爲也。其文辯博閎麗，殊不易曉，故於篇終明見其意曰：『魂兮歸來哀江南。』君子之居季世也，欲他去，則於義難安，欲不去，則其憂不可解，在位而極言之，猶冀其君之一悟也，而爲君者必屏棄放逐，過其身而杜其口，雖不去，亦何能爲哉！則戚戚焉惟日憂故國之將亡而已矣！哀江南者，卽庾信哀江南意也。自王逸以來，率不達其旨，猥以玉招原魂釋之。是文首卽曰『朕幼清以廉潔』，玉招原魂，而謂原爲朕

耶！

「見讀招魂。」

其論文貴陽剛而戒剽襲曰：「文之大原出於天，得其備者，渾然如太和之元氣，偏焉而入於陽，與偏焉而入於陰，皆不可以爲文章之至境。然而自周以來，雖善文者，亦不能無偏！僕謂與其偏於陰也，則無寧偏於陽。何也？貴陽而賤陰，信剛而細柔者，天地之道，而人之所以爲德者也！孔子曰：『吾未見剛者！』曾子曰：『士不可以不宏毅，任重而道遠。』聖賢論人，重剛而不重柔，取宏毅而不取巽順。夫爲文之道，豈異於此乎！古來文人，陳義吐辭，徐婉不失態度，歷代多有，至若駿桀廉悍，稱雄才而足號爲剛者，千百年而後一遇焉耳！甚矣陽之足貴也！然僕以爲是有天焉，有人焉，得天之剛，世亦無幾，其餘必進之以學。進之以學，孟子所云『以直養而無害』是也。日蓄吾浩然之氣，絕其卑靡，遏其鄙吝，使夫爲體也常宏，而其爲用也常毅，則一旦隨其所發，而至大至剛之槩，可以塞乎天地之間矣！如此，則學問成，而其文亦隨之以至矣！取道之原，六經其至極也，而論其從人之塗，則《公羊》《國策》《賈誼》《太史公》，皆深得乎陽剛之美者，誠熟復之，當必更有所進耳！」「見與友人論文書。」後人爲文，不能不師古，上者神合之，次者貌肖之，最下者販其辭。故曰：「惟古於辭必己出，降而不能乃剽賊。」何也？以其中不見己作也。荀子曰：「古之學者聚道。」吾輩生來，才思有幾，故惟多見古書，博覽而熟誦，重積而遲發，深造自得時，左右逢源，自無陳言到筆下，此非旦夕可爲而勉強可致者也！」「見答侯念勤書。」

其論文貴體直而勢曲曰：「體不直，不可以爲傑；勢不曲，不可以爲妍，如長江大山，千里萬仞，而峯巒島嶼，層見疊起，望之茫然而卽之竦然，是故養氣必盛，而儲思必深。思深矣而氣不盛，弱焉而已爾！氣盛矣而思不深，平焉而已爾！今夫爲文一篇，其始終必貫以一意，此不待能者而後知也，然而按文之

首而可測其尾，讀文之上而便知其下，其陳義遺辭，縱使明當，而欲執以論文章之奇妙，遠矣！世之爲文者，亦皆知文章貴乎奇妙，而卒至於弱且平者，何哉？讀之不精，而臨文時不知迎而距之之說也。僕幼爲文章，私持謂文貴宏毅，具所答友人論文書，近乃知文人之心，控引天地，囊括萬物，神機闔闢，不知其故，乃爲能盡文章之極致，而宏毅乃其一端耳！」（見《又答念勤書》）

其論別裁僞體曰：「文辭者，人之所自爲也；自爲之，則宜有工拙之殊，而不當有真僞之辯。而古之人有言曰：『別裁僞體』，此何說也？無得於己而剽販古人，是謂無情之辭。無當於道而塗澤古語，是爲無理之作。之二者，是爲僞體而已矣！文辭之有僞體，豈獨明中葉爲然！精而言之，子雲之《法言》，猶剽販也！元和之雅頌，猶塗澤也！設使後世復有刪定之聖人，則二者亦必歸諸僞體，何者？爲其事詩文，而情理中有不足故也。」（見《蘊素閣全集序》）

其論臨文下筆，有情有理曰：「偶見陸祁孫《續集》，有與吳仲倫論吾師姚鼐序王惕甫文事一書，檢吾師《前後集》無此序文，惟《後集》中有《與惕甫》一書。則同有說焉！吾師之爲是書，方植之謂譽之過甚，同亦未以爲然！吾師終寫而與之者，誘掖獎勵，君子所以成人之美也。惕甫七十老翁，負海內文譽，以文集求張於吾師，實非如後生之求益也！豈得不稍假借之！天下之道，有情有理，徇情而不依理，固非；執理而不言情，必輒於好剛好直不好學者之所爲矣！前輩豈肯出此！昌黎於文，最多徇情之作。」

《唐書》稱韓宏玩寇，而《平淮西碑》云「都統宏責戰益急」。《順宗實錄》備書李實之惡，及自與書，又極口稱之。吾師所論者文耳，雖曲筆焉，未若昌黎徇情之害理！況乎其言亦尚有斟酌也！惕甫文誠不能得熙甫之傳，而在今日，要爲好手！但聞其人狂傲暴戾，不可嚮邇。祁孫惡其人，遂痛詆其文，謂吾師

譽之太過，愛人者愛及屋烏，憎人者憎及儲胥，其立論毋乃已甚乎！吾師於當代公卿，不爲過譽，作《江上攀轅圖記》，但美孫文靖厚於故交，作《王文端神道碑》，數十年宰相一事不書，惕甫，窮老學博耳！何所攀援，何所畏葸，而曲筆諂諛焉，其處此蓋必有道矣！仲倫以爲反言譏之，亦未然也！」見《與吳仲倫書》

其論著書不宜自稱字曰：「古人著書，必自稱名。《易大傳》《論語》諸書則每篇稱子，其始蓋門人所記錄，而沿及周末，則無不自子者矣！其在古未必然也！然以周人創之，則其例可用。唐宋人文，則柳子厚稱柳子，蘇子瞻稱蘇子，王介甫稱王子，依仿古書，其稱爲有據。若夫字以表德，出於朋友之相呼，《論語》記顏淵子貢云者，大抵他人所載述，古人著書，必無自表其字者也！頃見惲氏《大雲山房文集》，動於篇中署「惲子居曰」四字，意甚以爲不典！惲氏孤學無師，不足怪！桐城王悔生從海峯游，於此等宜素講，而集首《孟獻子論》，亦自署「王悔生曰」，是豈合古人之義法哉！悔生文專學海峯，序事頗有佳者，此則不當律令！」見《題王悔生文集》

其勗姚鼐之子以繼文章絕業曰：「庚甫，吾師惜抱先生之冢嗣也；二十舉於鄉，四十得縣令，江南屬縣儀徵、江都、泰興，皆世所云好缺也，君連得之，不餘一錢，既而失官寓江寧，窮益甚！始猶租屋以居，負屋值，主人厭而逐焉，乃移家人書院。所居糞牆土舍，上穴旁穿，不蔽風雨。客至，則君衣垢衣揖坐後，抗聲高語，其出如淵泉不竭，多驚絕可喜之論，然久坐或不能具茗飲，客苦之，多不至；庭下草深尺許，岑寂極矣！然君乃更力於學，自義理經濟考證，下逮陰陽星命，皆精究焉，而於詩文尤用意。自失官窮居，所作至數百篇，屬同爲序。嗟夫！同生也，晚不及知君少年事矣！顧猶見君爲縣令，服蟒服，冠朝冠，設樂於庭，爲吾師壽，賓友雜遝，僮僕輿馬麗都，今數年耳！吾師門生故舊，富貴者有人，何君

乃一窮至此哉！然當君之得意也，其氣甚盛，苟乎不知今之有失意也！及其窮也，氣不少衰，渾乎不知前之嘗得意也！然則如君者，非所謂「素位而行，無人而不自得」者歟！昔韓蘇諸公皆自斥謫後，道益進，文益工，同所望君繼吾師之絕業者在此！」見姚庚甫集序

其論詩貴道健曰：「《記》曰：『溫柔敦厚，《詩》教也。』夫柔也者，情之所以蹈和；健也者，辭之所以取勝，養溫柔以爲質，積雄健以爲文。景星慶雲，必無耿耿之光。鳳凰鸞鷟，必無啾啾之響。酌之乎雅以範才，養之乎奇以足氣，其始也縱其所之，其繼也歸其所舍，使夫識者觀吾之容，肅然無不齊之步，聽吾之聲，鏗然無不諧之律，以是爲詩，雖未能與天爲徒哉，抑其去於人也則遠矣！雖然，是特言詩之末節也！古之爲詩者，其情與古今，其作與經通，究萬物之情而定以中正，極夷險之變而出以和平，其爲道也，第固於詩者能之乎！彼世之人，沈酣聲色之中而曲得其情狀，可以爲詩，而終無與於古作詩者之事。由是言之，志在於爲詩而已，則其詩必未足言也！」見《答花學博書》「同少時求友於鄉中，其先得而交厚者，強圉而不移，深沈而不露，處事精明勁悍，是梅君伯言之行也。而伯言之於詩也，意欲其深，詞欲其堅，一思之偶淺，必鑿而幽之，一語之稍婉，必摯而精之，賦一詩，或累日踰時而後出。」見《書梅伯言馬車伯詩後》

其闢詩貴性靈曰：「詩之爲道，意欲其高，卑則下；辭欲其雅，俚則俗。夫高必視乎所懷，雅必視乎所學，然則詩之爲道，舍立志讀書，無他術矣！今之論者，援《國風》《樂府》之作，以爲詩貴性靈，不取學問。夫《國風》《樂府》，出於閭巷小夫幽閨婦女，彼其人皆偶然得之，而執筆不能再作者也！周召之雅頌，屈宋之《騷辭》，漢魏唐宋十數大家之作，閎闊而典厚，變化而離奇，取之不窮，探之不竭，是則出於

學問之詩，而後人之所當效法矣！今爲詩者，不以十數大家自命，而竊附於古小夫婦女之偶然，小夫婦女之偶然，卒不可得，遂乃率其胸臆，肆其手口，不根之談，無稽之說，鄙倍淺薄，叢積乎紙上，此今人所以日爲詩，而詩日不善也！論者又謂詩本性情，必學古人，則古人又何學？是大不然！古之聖人，觀鳥跡而造書，觀科斗而作字。今爲書者，舍《說文》《玉篇》，則不能知筆畫。祖述憲章，自孔子不能不師古，而爲詩文者，矜其智出於孔子之上，不亦僥乎！由前之說，可以植詩之本。由後之說，可以得詩之徑。同之所聞於師者如此！」（見《答甘肅人書》）要刪其語，以備考覽。

劉孟塗詩前集十卷後集二十一卷文集十卷駢體文二卷

桐城劉開字孟塗撰。開幼而神雋，十四歲，上書鄉先輩姚鼐。鼐奇賞之，語人曰：「此子他日，當以古文名家，望溪海峯之墜緒，賴以復振，吾鄉之幸也！」由是著名，遂受業稱弟子。而自以意爲詩古文，不用姚鼐法。早喜爲駢體文。晚乃肆力古文，謂：「韓退之取相如之奇麗，法子雲之閎肆，故能推陳出新，徵引波瀾，鏗鏘鏗鏘，石以窮極聲色，欲以漢人之氣體，運八家之成法，本之以六經，參之以周末諸子。」語詳集中。與阮芸臺宮保論文書。昔遵義黎庶昌自敘《續古文辭類纂》，謂「湘鄉曾文正公出，擴姚氏而大之。循姚氏之說，屏棄六朝駢儷之習，以求所謂神理氣味格律聲色者，法愈嚴而體愈尊。循曾氏之說，將盡取儒者之多識格物，博辯訓詁，一納諸雄奇萬變之中，以矯桐城末流虛車之飾。」桐城吳汝綸《與姚仲實》尺牘，謂：「桐城諸老，氣清體潔，海內所宗，獨雄奇瑰瑋之境尚少，則才氣薄弱，不能復振。曾文正公出而矯之，以漢賦之氣運之，而文體一變，故卓然爲一代大家。」而興化李詳《論桐城派》，則稱：「文正之

文，雖從姬傳入手，後益探源揚馬，姆宗退之，奇偶錯綜，而偶多於奇，複字單誼，雜廁相間，厚集其氣，使聲采炳煥而戛焉有聲，此又文正自爲一派，可名爲湘鄉派。」而莫知開之先曾氏而發其塗轍！姚鼐之文潔適，而開之辭博麗。姚鼐以永叔之紆徐，用蘇王之爽朗，意思安閒，如不欲戰。而開得昌黎之健舉，發揚馬之醴郁，辭氣鏗匉，欲自名家。集中書牘贈序二體，縱橫排宕，尤多傑作；氣往轢古，辭來切今，其格調風力，在桐城三家中，於海峯爲近，而與姚鼐則異。詩則覃精極思，頗喜巧琢，詞務妍鍊，格求生峭，五古由鮑明遠以學陳思，七古由李昌谷以宗太白，七律由李義山以追杜陵，新裁古藻，觸手繽紛，發唱驚挺，不避危仄，與姚鼐之不貴綺錯，由韓學杜，以堅蒼出古澹者，體氣迥異。至駢文情密古初，力疏凡近，不讀唐以後書，不作宋以下語，得明遠之俶詭，含開府之清新，連氣而走千言，百鍊而鑄一字，古秀之豔，隱於幽奇，鬱怒之思，出以溫順，有清一代，亦罕觀也！開懷才不遇，自刻詩十卷，卽《前集》也；卽歿之後，同門姚瑩訪遺稿，得《詩後集》二十二卷，缺第八卷，《文》十卷，《駢體文》二卷，付其兄元之束之刻之，併重刻其《詩前集》，實爲道光六年。《詩前集》有南城曾燠序，《後集》有姚元之及鄱陽陳方海所爲《劉孟塗傳》，而詩古文卷後各殿以諸家評語。《駢體文》有陳方海書後。采錄可誦，篇目如左：

詩類 雜詩四首 雜興六首 雜感八首 卽事 遣興四首 里巷吟六首 秋夜 晚眺 獨坐 贈張

二小阮 述懷二首 與石甫夜話有贈 黃鵠行 豔歌行 雜憶十三首 感遇十八首 讀史四首

看花曲三首以上五言古 登太白樓 江樓醉題 次彭澤作 題友人居 題師荔扉明府紀游圖八

首 春曉詞 道中見枯松感賦 送別陳大治 野鳥行 詠硯 食蕨歎 催科吏 力役謠 歲暮

別 少年游 月下吟 江南曲四首 春閨曲 相逢曲 秦淮曲 抵星渚贈鄭夢白明府 贈方茶
 山太守兼以留別 別鄭夢白明府 題海帆孝廉海上釣鼈圖 秦淮曲 贈王四 平山堂醉題 重
 過星渚奉贈鄭明府尊人柳門先生 寄周澗東 董竺雲以所畫海棠見贈 望西山歌 笠飄方伯招
 同解鐵樵高蒼崖查花農宋于庭諸君宴集飛霞閣 過婁妃墓 螺墩行 抵廣州呈曾賓閣方伯 白
 雲山歌贈胡春海司馬時春海約游不果兼以嘲之 夢游羅浮 酒樓贈石甫 擇交行 短歌行 憶
 浮山寄光栗園比部 抵濟南觀趵突泉 陳笠颺中承邀同觀珍珠泉喜周南卿回都卽送回里 絳桃
 歌爲杜虛齋賦 袁柳詞 寄懷鮑覺生侍郎 素雲曲 放歌行贈陶珠泉司馬 弄珠樓宴集卽席醉
 賦並贈竹嶼 游黃山登蓮花峯抵煉丹臺 題周南卿品茶圖 游金精洞作歌 十萬松園歌爲少伯
 山人作 亳州觀牡丹歌 牡丹後歌 偕陳丈晚香任硯香至城東觀芍藥復作長歌以上七言古 夜泊
 皖城卽事二首 閨情 離家 過家敏齋比部叢桂山房 夜宿 石上 晚歸 靜坐 秋夜懷人
 偶感 懷鄭明府 題小孤山三首 題姚聽泉憶故居圖二首 別李喬生先生二首 別潘柳堂
 平野 卽事七首 卽事續詠十一首 題小松長夏讀書圖 歸至江右 江岸獨立 麻山 逆旅夜
 飲 園居五首 星子署偶詠三首 過友人居 游白雲崖 游三公山三首 隱几 題黃明府竹裏
 彈琴圖 與栗原夜話 抵順德 卽事有懷姚幼樸 過龍門寺 白麻山夜歸留贈 客至 西湖寓
 樓與梅麓刺史小住 夜歸湖上以上五言律 秣陵口號 潁州感賦八首 金陵懷古八首 客館詠懷
 八首 病中 客路有懷 詠古六首 詠史八首 過左叔舊宅有懷二首 瑤臺八首 道中 山中
 夜坐 楚中懷古二首 偶成 漫興 卽事 過姑塘 登金山寺四首 歸自平山堂道中口占 將

去揚州 題焦山四律 曉發棲霞最高峯 滕王閣 楚中雜感八首 粵中雜詠八首 望遠簡石甫

小園 重經棲賢寺 宿寺 夜感 江行卽事 宿遷道中 燕臺有懷六首 重有懷六首 偕海

帆自靈隱登韜光寺 游雲棲寺 阜陽道中口占以上七言律 再上姬傳先生二十二韻 留別李蘇門

贊府兼示沈文浦二十二韻 寄懷張小阮二十二韻卽送其公車北上 再寄陳大冶以上五言長律 題

剪衣圖 閨情五首 靜坐二首 古意十一首 有懷四首 宴集二首 閨怨五首 擬古五首 偶

成 採蓮曲十三首 幽居 獨坐 春閨曲十一首 閨中消夏詞十一首 湖上曲 憶昨五首 閨

憶 春思 古意三首 閨意 山居 閨情 小別 新月二首以上五言絕 偶興二首 擬唐人邊庭

四時詞四首 宮怨三首 卽事二首 皖城口占 秋懷 夜集 偶句 閨情 閨詞三首 途中口占

抵揚州 渡漳河 將抵里門阻雨 題程赤霞白秋海棠詩後三首 渡木樨河至金山古寺以上七言絕

駢文 游石鐘山記 樅江游記 與吳理菴先生書 與光律原書 與許農生書 贈鄭夢白明府序 再

與光律原書 書司馬遷貨殖列傳後 小園記 贈陶子靜序 贈沈閨生序 與周伯恬書 與方彥

聞書 與王子卿太守論駢體書 書文心雕龍後 雋都行記 孔城北游記 嘉樹記 查口記 與

朱魯岑書 贈查梅史明府序 贈章完素明府序 藝園記

論說類 義理說 賈誼論 荀卿論 學論上中下 貴齒論 春秋責賢者備論

序跋類 書韓退之伯夷頌後 書退之與于襄陽書後

書牘類 復陳編修書 上蔣礪堂大司馬書 上曾賓谷方伯書 與阮芸臺宮保論文書 與張古餘太守

書 上汪瑟庵大宗伯書 與朱魯岑書 與倪穎符書 再與倪穎符書 再與魯岑書

贈序類 贈周海樵先生序 贈萬香海序 贈吳子方序 贈陸子倫序 贈龔若士檢討序 贈左筐叔序

送宋思安歸里序 送吳孝廉至京師序

傳狀類 張阮林傳 吳生甫先生傳

雜記類 游三疊泉記 過岐嶺記 游小龍興記 游塞山林記 游九龍山記 游乍浦記 渡海登小落

伽山記 雲心草堂圖記 江右行記

詞賦類 越游解

右詩四百四十六首，駢文二十三篇，古文四十篇。論學主程朱而不廢考據，一承姚氏之說。論文尚漢魏而頗主偶麗，則異姚氏所論。

其論文以漢人之氣體，運八家之成法曰：「文章之變，至八家而極盛。文章之道，至八家而始衰。謂之盛者，由其體之備於八家也，爲之者各有心得，而後乃成爲八家也。謂之衰者，由其美之盡於八家也，學之者不克遠溯，而亦即限於八家也。夫專爲八家者，必不能如八家，其道有三：韓退之約六經之旨，兼衆家之長，尚矣！柳子厚則深於《國語》，王介甫則原於經術，永叔則傳神於史遷，蘇氏則取裁於《國策》，子固則衍派於匡、劉，皆得力於漢以上者也！今不求其用力之所自，而但規倣其辭，遂可以爲八家乎！其失一也。漢人莫不能爲文，雖素不習者，亦皆工妙，彼非有意爲文也，忠愛之誼，悱惻之思，宏偉之識，奇肆之辯，詠諧之辭，出之於自然，任其所至而無不咸宜，故氣體高渾，難以迹窺，八家則未免有意矣！夫寸寸而度之，至丈必差，效之過甚，拘於繩尺而不得其天然，其失二也。自屈原宋玉工於言辭。莊辛之說楚王，李斯之諫逐客，皆祖其瑰麗。及相如子雲爲之，則玉色而金聲。枚乘鄒陽爲之，

則情深而文明。由漢以來，莫之或廢。韓退之取相如之奇麗，法子雲之閎肆，故能推陳出新，徵引波瀾，鏘鏘金石以窮極聲色。柳子厚亦知此意，善於造練，增益辭采，而不能割愛。宋賢則洗滌盡矣！夫退之起八代之衰，非盡掃八代而去之也，但取其精而汰其粗，化其腐而出其奇，其實八代之美，退之未嘗不備有也！宋諸家疊出，乃舉而空之。子瞻又掃之太過，於是文體薄弱，無復沈浸醲郁之美，瑰奇壯偉之觀，所以不能追古者，未始不由乎此！夫體不備，不可以爲成人。辭不足，不可以爲成文。宋賢於此不察，而祖述之者，並西漢瑰麗之文而皆不敢學。其失三也。然而志於爲文者，其功必自八家始。何以言之？文莫盛於西漢，而漢人所謂文者，但有奏對封事，皆告君之體耳。書序雖亦有之，不克多見。至昌黎始工爲贈送碑誌之文，柳州始創爲山水雜記之體，廬陵始專精於序事，眉山始窮力於策論，序經以臨川爲優，記學以南豐稱首，故文之義法，至史漢而已備，文之體制，至八家而乃全，彼固予人以有定之程式也。學者必先從事於此，而後有成法可循，否則雖銳意欲學秦漢，亦茫無津涯。然既得門徑，而猶囿於八家，所見不高，所挾不宏，斯爲明代之作者而已！故善學文者，其始必用力於八家，而後得所從入，其中必進之以《史》《漢》，而後克以有成。然猶未足以盡之也！退之以六經爲文，而徒出入於《詩》《書》，他經則未能也！

夫孔子作《繫辭》，孟子作七篇，曾子闡其傳以述《大學》，子思困於宋而述《中庸》，七十子之徒各推明先王之道以爲《禮記》，豈獨義理之明備云爾哉，其言固古今之至文也。世之真好學者，必實有得於此，而後能明道以修辭，於是乎從容於《孝經》以發其端，諷誦於典謨訓誥以莊其體，涵泳於《國風》以深其情，反覆於變雅、離騷以致其怨，如是而以爲未足也，則有《左氏》之宏富，《國語》之修整，益之以《公

羊《穀梁》之清深，如是而以爲未足也，則有《大戴記》之條暢，《考工記》之精巧，兼之以荀卿揚雄之切實，如是而猶以爲未足，則有《老子》之渾古，莊周之駘蕩，《列子》之奇肆，管夷吾之勁直，韓非之峭刻，孫武之簡明，可以使之開濬智識，感發意趣，如是術藝既廣而更欲以括其流也，則有《呂覽》之賅洽，《淮南》之瓌瑋，合萬物百家以汎濫厥辭，吾取其華而不取其實，如是衆美既具而更欲以盡其變也，則有《山經》之怪豔，《洪範傳》之陸離，《素問》《靈樞》之奧衍、精微，窮天地事物以錯綜厥旨，吾取其博而不取其修。凡此者，皆太史公所徧觀以資其業者也，皆漢人所節取以成其能者也，而變而出之，又有自道，食焉而不能化，猶未爲神明其技者也。有志於文章者，將殫精竭思於此乎？抑上及《史》《漢》而遂已乎？將專求之八家而安於所習乎？且八家之稱何自乎？自歸安茅氏始也。退之之才，上比揚子雲，自班固以下皆不及，而乃與蘇子由同列於八家，異矣！退之之文，冠於八家之前而猶屈。子由之文，卽次於八家之末而猶慚。使後人不足於八家者，蘇子由爲之也！使八家不遠於古人者，韓退之爲之也！

吾鄉望溪先生深知古人作文義法，其氣味高澹醇厚，非獨王遵巖、唐荆川有所不逮，卽較之子山亦似勝之。然望溪豐於理而膏於辭，謹嚴精實則有餘，雄奇變化則不足，亦能醇不能肆之故也！夫震川熟於《史》《漢》矣，學歐曾而有得，卓乎可傳，然不能進於古者，不能不囿於八家也。望溪之弊，與震川同，然其大體雅正，可以楷模後學，要不能不推爲一代之正宗也！學《史》《漢》者，由八家而入，學八家者，由震川望溪而入，由是明道修辭，以漢人之氣體，運八家之成法，本之以六經，參之以周末諸子，則所謂爭美古人者，庶幾其有在焉！」（見《與阮芸臺宮保論文書》）

其論《文心雕龍》與退之之論有合曰：「永嘉以降，文格漸弱，體密而近縟，言麗而闢新，藻繪沸騰，

朱紫夸耀，蟲小而多異響，木弱而有繁枝，理詘於辭，文滅其質，求其是非不謬，華實並隆，以駢儷之言而有馳驟之勢，含飛動之彩，極瓌瑋之觀，其惟劉彥和乎！以爲：鐘鼓琴瑟，所以理性也，而亦可以悟性。黼黻文章，所以飾情也，而亦可以掩情。故名川三百，非無本之泉，寶璧十雙，皆自然之質也；是宜尋源於經傳，毓材於性靈，問途於古先，假徑於賢材，求溢藻於神爵而後，想盛事於青龍以前，磅礴以發端，感嘆以導興，優柔以竟業，慷慨而命辭，故論及神思，則寸心捷於百靈，論及體性，則八途包乎萬變，論及風骨，則資力於天半之鸞鳳，論及情采，則借色於木末之芙蓉，論其夸飾，則因山而言高，論其隱秀，則聳條而獨拔，示人以璞，探驪得珠，華而不汨其真，鍊而不虧於氣，健而不傷於激，繁而不失之蕪，辨而不逞其偏，覈而不鄰於刻，文犀駭目，萬舞動心，誠曠世之宏材，軼羣之奇構也！前修言文，莫不引重。自韓退之崛起於唐，學者宗法其言，而是書幾爲所掩。然彥和之生，先於昌黎，而其論乃能相合，是其見已卓於古人，但其體未脫夫時習耳！夫墨子錦衣適荆，無損其儉。子路鼎食於楚，豈足爲奢。夫文亦取其是而已，奚得以其俳而棄不重哉！然則昌黎爲漢以後散體之傑出，彥和爲晉以下駢體之大宗，各樹其長，各窮其力，寶光精氣，終不能掩也！」（見《書文心雕龍後》）

夫文辭一術，體雖百變，道本同源，經緯錯以成文，元黃合而爲采。故駢之與散，并派而爭流，殊塗而合轍，千枝競秀，乃獨木之榮，九子異形，本一龍之產。故駢中無散，則氣壅而難疏，散中無駢，則辭孤而易瘠，兩者但可相成，不能偏廢。世儒執虛曲之見，騰培井之波，宗散者鄙儷詞爲俳優，宗駢者以單行爲薄弱，是猶恩甲而仇乙，是夏而非冬也。夫駢散之分，非理有參差，實言殊濃淡，或爲繪繡之飾，或爲布帛之溫，究其要歸，終無異致，推厥所自，俱出聖經。夫經語皆樸，惟《詩》《易》獨華。《詩》之比

物也雜，故辭婉而妍。《易》之造像也幽，故辭驚而創。駢語之采色，於是乎出。《尚書》嚴重而體勢本方。《周官》整齊而文法多比。《戴記》工累疊之語，《繫辭》開屬對之門。《爾雅·釋天》以下，句皆珠連，《左氏》敘事之中，言多綺合。駢語之體制，於是乎生。是則文有駢散，如樹之有枝幹，草之有花萼，初無彼此之別，所可言者，一以理爲宗，一以辭爲主耳。夫理未嘗不藉乎辭，辭亦未嘗能外乎理，而偏勝之弊，遂至兩歧，始則土石同生，終乃冰炭相格。由唐及宋，駢儷之文，變體已極，而古法寢微，國朝作者起而振之，因骨理而加膚澤，易紅紫而爲朱藍，窮波討源，以雅代鄭，意云善矣，法云正矣！然襲末流者既不歸準衡，追古制者亦多滯形貌，八珍列而味爽，五官具而神離，良由胎意尚薄，藻飾徒工，情旨未深，意興不飛之所致也。」（見《與王子卿太守論駢體書》）所以推勘駢散相用之理者甚盡，抑與師門殊趣焉。

儀衛軒詩集五卷文集十二卷文外集一卷

桐城方東樹字植之撰。東樹與同邑方苞同姓而別族。曾大父澤，優貢生，候選知縣。生平論學宗朱子，而爲科舉文宗明支子，詩似宋楊祕監，姚鼐嘗師事焉。父績，諸生，事鼐爲弟子，著有《經史札記》《屈子正音》《鶴鳴集》。生東樹，自少喜爲古文辭，二十二歲，之江寧。時鼐主鍾山書院，東樹遂受學焉，與同里劉開及上元梅曾亮、管同，並爲鼐所亟賞，稱姚門四傑。東樹自少力學，泛覽經史百家之書，而獨契朱子之言，每日雞初鳴即起，矻矻鉛槧，至漏下三十刻就寢，有得輒記之，或中夜攬衣起，書所記，名《待定錄》，百餘卷，凡格致修齊治平之理，無不備。乾嘉間，學者崇尚考證，專求訓詁名物之微，名曰漢學，穿鑿破碎，有害大道，名爲治經，實足以亂經，又復肆言攻訐朱子。道光初，其焰尤熾！東樹

憂之，乃著《漢學商兌》上中下三卷，其指在申宋學以紓漢學，箴廢起疾，議論鑿鑿，詞筆既明快，足以達其所見，考據尤詳該，足以證其不誣。漢學家每以考據傲宋學之不逮，而東樹即以考據發漢學之覆，晰而不枝，覈而能當，即以其人之道，還治其人之身，實開後來陳東塾朱無邪一派，博學明辨，未可以文章之士而少之也。儀徵阮元方以名士爲達官總督兩廣，而創建學海堂，輯刻《皇清經解》，以漢學唱導多士，東樹授經其幕，兼閱學海堂課文，遂以是書上之，元意大忤！東樹又以元落成學海堂之明年初春，首以學者願著何書策堂中學徒，東樹因慨後世著書太易而多，殆有孔子所謂不知而作者，因誦往哲遺言及臆見所及，爲十有六論以成《書林揚鱗》二卷。又著《昭昧詹言》十卷，論詩學旨要。大略謂古人詩，學者當求之於義理蘊蓄，本領根源，精神氣脈，不可襲其形貌，宜力守韓公「陳言務去」之戒，及山谷「隨人作計終後人」二語，而又以「文從字順各識職」爲歸。它所著書，有《大意尊聞》、《一得拳臆錄》、《進修譜》、《未能錄》、《最後微言》、《思適居鈴語》、《山天衣聞》等書，好構深湛之思，博辨醇茂，而言必有物，學問宏通，四傑之冠，而文章則於四人爲最下。好爲持論，由蘇軾以敦莊周，駿利而未免滑易，頓宕而嫌未沈著，自序稱：「吾爲文務盡其事之理而足乎人之心，竊希慕乎曾南豐朱子論事說理之作，顧不善學之，遂流爲滑易好盡，發言平直，措意儒緩，行氣柔慢而失其國能，於古人雄奇高渾，潔健深妙，波瀾意度全無。」寸心得失，匪不自知！然彌綸羣言，研精一理，無辭不達，有意必透，抑揚爽朗，殊豁人意！駢文則仗氣愛奇，不爲纖靡，然而疏宕有餘，藻采不足！至詩則橫空盤硬，好作生語，評某人詩云：「祇因詞熟，轉晦意新！」由黃庭堅數韓愈以闕杜甫，力避俗熟，自是姚門師法，惜其詞句排鼻而未臻妥帖，意境兀傲而未及華妙！而五七言絕，獨緣情綺靡，出以清麗，不爲拗體。其詩文集皆自定，而同邑後學鄭福照

輯《年譜》以殿文集之末焉。采錄可誦，寫目如左。

詩類 雲泉山館擬王右丞藍田石門精舍 西郊游眺擬柳 柳州南礪中題 讀孟郊詩 聞鶯 真州城

東觀荷 丙申六月初六日同人讌集西郊吳氏似園作此呈主人 華陽鎮阻風 馬當遇風變 上灘

始興江口望韶州石多奇念昔人吟詠皆傳著舜樂既辭客而意痴土人言其氣凶惡主盜亦昧其佳折

而作詩 湓陽峽 觀音巖 清遠峽 飛來寺 將至廣州舟中遣懷寄故鄉諸友 遣興六首 月

九日登粵秀山過曾勉士紅棉寺寓館以上五言古 庭前紅梅花三首 小孤山扶桑花 夢游羅浮擬李

翰林夢游天姥吟 游六榕寺擬韓退之山石 試西樵茶恩平綠石硯 擬黃山谷團茶洮州綠石硯詩

儒林鄉漁莊圖擬虞道園漁村圖 中秋玩月擬高青邱張校理宅得南字 唐荔園爲阮公子賦以上

七言古 春怨詞三首 秋柳以上五言絕 廬江道中 晚抵臨安 玉山道中效元人體二首 贈別梅花

以上七言絕

駢文 孔雀賦 學海堂銘 漢晉名譽考 謝鄧中丞啓

論說類 原學 辨道論 雜說一 化民正俗對

序跋類 漢學商兌序 漢學商兌重序 節孝總旌錄序 馬氏詩鈔序 劉悌堂詩集序 書法言後 書

望溪先生集後 書惜抱先生墓誌後 馬一齋先生遺書跋 族譜序 族譜後述上下篇

書牘類 答葉溥求論古文書 答人論文書

贈序類 送毛生甫序

傳狀類 先友記 曾大父逸事

碑誌類 管輅之墓誌銘 劉君應臺暨夫人吳氏合葬墓誌銘

右詩四十三首，駢文四篇，古文二十三篇。自謂：「僕之文粗，而獷氣未除，其於古人精醇境地，實未能臻！」「見復載存莊書。」在嶺南所爲者，尤粗豪放縱，時亂以淺俗常語，無復古人韻格，獨其論議稍有可采。「見復羅月川太守書。」性喜莊老及程、朱、陸、王諸賢書，讀之若其言皆如吾心之所發者，以觀近時人文字，輒見其踏駁謬盪爲不當意。「見答姚石甫書。」論學以明道爲要歸，宗朱子而斥考據，論文以精誦爲入手，師姚氏而戒剽襲。

其論清儒之言漢學曰：「三代以上，無經之名。經始於周公孔子。樂正崇四術，春秋教以禮樂，冬夏教以《詩》《書》。及至春秋，舊法已亡，舊俗已熄，詐謀用而仁義之路塞。孔子懼，乃修明文、武、周公之道以制義法而作《春秋》。《春秋》亦經也，孔子雖未嘗以是教人，然其平日所雅言於人者，莫非《春秋》之義也！衛君待子爲政。子曰：『必也正名乎！』陳恆弑其君，請討之。季氏伐顓臾，旅泰山，則便欲止之。此皆《春秋》之義也。故莊子曰：『《詩》以道志。《書》以道事。《禮》以道行。《樂》以道和。《易》以道陰陽。《春秋》以道名分。』六經之爲道不同，而其以致用則一也，此周公孔子之教也。及秦兼天下，席狙詐之俗，肆暴虐之威，遂乃蕩滅先王之典法，焚燒《詩》《書》，於時不特經之用不興，并其文字而殄滅之矣！漢興，購求遺經。於是羣經始稍稍復出，或得之屋壁，或得之淹中，或得之宿儒之口授，而固已殘缺失次，斷爛不全，賴其時一二老師大儒，辛勤補綴，修明而輯治之，於是《易》有四家，《書》與《詩》三家，《禮》《春秋》二家，號爲十四博士，則章句所由興，家法所由異，漢儒之功，爲不可沒矣！自是而至東京、魏、晉，以逮南北朝諸儒，遞相衍說，辨益以詳，義益以明，而其爲說亦益以多矣！及至唐人，乃爲

之定本定注，作爲《釋文》，舉八代數百年之紛紜，一朝而大定焉，然其於周公孔子之用，猶未有以明之也！及至宋代，程朱諸子出，始因其文字以求聖人之心，而有以得於其精微之際，語之無疵，行之無弊，然後周公孔子之真體大用，如撥雲霧而睹日月。由今而論：漢儒宋儒之功，並爲先聖所攸賴，有精粗而無軒輊，蓋時代使然也！道隱於小成，辯生於末學，惑中於狂疾，誕起於妄庸！南宋慶元以來，朱子既沒，微言未絕，而有鉅子數輩，遽起於世，奮其私智，尚其邊見，逞其駁雜，新慧小辯，各私意見，務反朱子，其所謂道非道，而所言之謬，不免於非，其於道槩乎未嘗有聞者也。逮於近世，爲漢學者，非蔽益甚，其識益陋，其所挾惟取漢儒破碎穿鑿謬說，揚其波而汨其流，抵掌攘袂，明目張膽，惟以詆宋儒攻朱子爲急務，要之不知學之有統，道之有歸，聊相與逞志快意以驚名而已。吾嘗譬之：經者，良苗也。漢儒者，農夫之勤畝耨者也，耕而耘之以殖其禾稼，宋儒者，穫而舂之，蒸而食之，以資其性命，養其軀體，益其精神也。非漢儒耕之，則宋儒不得食。宋儒不舂而食之，則禾稼蔽畝，棄於無用，而羣生無以資其性命。今之爲漢學者，則取其遺秉滯穗而復殖之，因以笑舂食者之非，日夜不息，曰：吾將以助農夫之耕耘也。卒其所殖，不能用以置五升之飯，先生不得飽，弟子長飢，以此教人，導之爲愚，以此自力，固不獲益，畢世治經，無一言幾於道，無一言及於用，以爲經之事盡於此耳矣！其生也勤，其死也虛，其求在外，使人狂，使人昏蕩！」（見《漢學商兌》重序）而「以言心性言理爲厲禁，著書以闢宋儒，攻朱子，海內名卿鉅公，高才碩學數十家，遞相祖述，膏唇拭舌。究其所以爲之罪者，不過三端：一則以其講學標榜，門戶分爭，爲害於家國。一則以其言心性言理，墮於空虛，心學禪宗，爲歧於聖道。一則以其高談性命，束書不觀，空疏不學，爲荒於經術。而其人所以爲言之指，亦有數等：若黃東發、萬季野、顧亭林輩，自是目擊時

弊，意有所激，創爲抹病之論，而析義未精，言之失當。楊用修、焦弱侯、毛大可輩，則出於淺肆矜名，深妒《宋史》創立《道學傳》，若加乎《儒林》之上，緣隙奮筆，忿設詖辭。若夫好學而愚，如東吳惠氏、武進臧氏，則爲闡於是非。自是以來，漢學大盛，新編林立，聲氣扇和，專與宋儒爲水火，而人類皆以鴻名博學，爲士林所重，馳騁筆舌，貫穿百家，遂使數十年間承學之士，耳目心思，爲之大障！歷觀諸家之書，所以標宗旨，峻門戶，上援通賢，下譬流俗，衆口一舌，不出於訓詁小學名物制度，棄本貴末，違戾詆經，於聖人躬行求仁修齊治平之教，一切抹殺，名爲治經，實足亂經，名爲衛道，實則畔道。昔孟子不得已而好辯，欲以息邪說，正人心。竊以孔子沒後千五百餘歲，經義學脈，至宋儒講辯，始得聖人之真。今諸人邊見偵倒，利本之類，必欲尋漢人紛歧異說，復汨亂而晦蝕之，致使人失其是非之心，其有害於世教學術，百倍於禪與心學！又若李塉等以講學不同，乃至說經必故與宋人相反，雖行誼可尚，而妒惑任情，亦所不解！」見《漢學商兌序》。至於考證之學，蓋自漢代以還，通儒宿學，讀書審慎，是正脫誤，辨審異同，詁解音聲，鉤鉅章句，其大者毛音鄭簡，與道相扶，其次者名物典章，於政爲輔，歷世既遠，著述轉紛，通才碩彥，接踵而出，使來學者變學究，破僉陋，以炳於經籍之府，其用亦可謂宏矣！國朝考據之學，超越前古，其著書專門名家者，自諸經外，歷算，天文，音韻，小學，輿地，考史，扶摘精微，折衷明當，如崐山、四明、太原、宣城、秀水、德清，根柢學問，醇正典雅，言論風采，深厚和平，夙矣尚矣！雖漢唐名儒，不過於斯矣！及乎惠氏戴氏之學出，以漢儒爲門戶，詆宋學爲空疏，一時在上位者，若朱笥河先生及文正公昆弟，紀尚書、邵學士、錢宮詹、王光祿及蘭泉侍郎、盧抱經學士十數輩，承之而起，於是風氣又一變矣！此諸公者，類皆天姿茂異，卓越等倫，強識博辯，萬卷在口，能使有學者驚厥耳，無聞者蕩厥

心，馳騁筆舌，論議濤湧。然而末流易雜，變本加厲，弊亦生焉！海內英俊，傾其風，豔其舌，懷其利，相與掇拾破碎，搜覓羣書，苟獲一字新義，即詆爲賈人得寶，違背理本，棄心任目，不顧文義之安，但出於漢者主之，出於宋者非之，詭爲輔經，實足亂經，始不過主張門戶，既肆焉無忌，則專以攻宋儒爲功，主名詆罵，視同仇敵，幾於惡聞其聲而比之於罪人，此其風實自惠氏戴氏開之，而揚州爲尤甚！及其又次者，行義不必檢，文理不必通，身心性命未之聞，經濟文章不必講，流宕風氣，人主出奴，但手一部《說文》，卽悠然自命絕業。朱子有言：「書愈多而理愈昧，讀書愈勤而心愈肆。浮名愈盛，而行義德業愈無以逮乎古人。」不知孔子所以教人爲學者，果若是已乎！昔孔子辭多能博學，而詔及門「文莫吾猶人」。孟子曰：「博學而詳說之，將以反說約也。」學不反約，而以有涯之知，遂於無涯之場，其間豈不有才，所患在於無本！」見復羅月川太守書。「有正言繁稱，而人不悟，且厭之者。有旁見側出，無意立言，自然流出，見者如獲異聞，深解意趣，而因以明道者，古之善言者，蓋嘗有若是！之人也，之言也，非斬取於人而以求售其言也。」孟子曰：「觀水有術，必觀其濶。日月有明，容光必照焉。」有本焉如是耳！見世之著書，剽竊苟且，速以歲月而邀名者皆是，淵潛靜深於大本，積而厚發者不數造，卒其速成邀名者終速朽，而無名而不數遺者，人轉以其希有而貴之，如法物焉！於是浩帙重編，有不若微文細意者矣！竟陵胡承諸著《經志》六十一篇，輯粹儒門精言，而僥倖紛沓，心尚羸惓，如庫藏籙，大官庖，以令寒人餓夫，又如以飴蜜糗糒餒嬰兒，未飽者不得飽，既飽者慮或損腸胃，嗟乎！《經志》其一耳！」見馬二齊先生遺書跋。近世言考證之宗，首推深寧王氏、亭林顧氏、太原閻氏。吾觀王顧二家之書，體用不同，而皆足資於學者而莫能廢，非獨其言覈實而無誣罔之失，亦其著書旨趣，猶有本領根源故也，閻氏則不逮矣！然亦頗博物條

暢，多所發明，讀其言如循近澗，觀清泉，白石游鱗，一一目可數，指可掬，其用功塗轍，居然可尋見，異於池竭而自中不出者也！特其體例不免僉陋，氣象矜忿迫隘，悻悻然類小丈夫之所發，故不逮王顧兩家淵懿淳蓄，託意深厚，類例有倫，此固存乎其人之識與養焉已！」（見潛邱劄記書後）

其論漢學之敝，必歸陸王曰：「以孔子爲歸，以六經爲宗，以德爲本，以理爲主，以道爲門，旁開聖則，蠢迪檢押，廣而不肆，周而不泰，學問之道，有在於是者，程朱以之！以孔子爲歸，以六經爲宗，以德爲本，以理爲主，以道爲門，以精爲心，以約爲紀，廣而肆，周而泰，學問之道，有在於是者！陸王以之！以六經爲宗，以章句爲本，以訓詁爲主，以博辨爲門，以同異爲攻，不概於道，不協於理，不顧其所安，鶩名干澤，若飄風之還而不儻，亦闕乎佛，亦攻乎陸王，而尤異端寇讎乎程朱，今時之敝，蓋有在於是者，名曰考證漢學，其爲說以文害辭，以辭害意，棄心而任目，剝敝精神而無益於世用，其言盈天下，其離經畔道，過於楊、墨、佛、老，而吾置不辨者，非爲其不足以陷溺乎人心也；以爲其說粗，其失易曉而不足辨也。使其人稍有所悟而反乎己，則必翻然厭之矣！翻然厭之，則必於陸王是歸矣！何則？人心之蕩而無止，好爲異以矜己，迪知於道者寡，則苟以自多而已！方其爲漢學考證也，固以天下之方術，爲無以加此矣！及其反己而知厭之也，必務銳入於內。陸王者，其說高而可悅，其言造之方，捷而易獲，人情好高而就易，又其道託於聖人，其爲理精妙而可喜，託於聖人，則以爲無詭於正，精妙可喜，則師心而入之也無窮，如此，則見以爲天下之方術，真無以易此矣！故曰：人心溺於勢利者可回，而溺於意見者不可回也！吾爲辨乎陸王之異以伺其歸，如弋者之張羅於路歧也，會鳥之倦而還者，必人之矣！陸、王、程、朱，同學乎聖，同明乎道，同欲有以立極於天下，然而不同者，則以所從人有頓與漸之分也。程朱者

取於漸，陸王者取於頓。傳曰：「自誠明謂之性，自明誠謂之教。」以其學而言，曰性曰教，以其候而言，曰頓曰漸。回其頓乎？參其漸乎？然而孔子立教，頓非所以也，必以漸焉。《論語》曰：「吾十有五而志於學。三十而立。四十而不惑。五十而知天命。六十而耳順。七十而從心所欲，不踰矩。」《中庸》曰：「君子之道，譬如行遠，必自邇，譬如登高，必自卑。」其列誠之目五曰：「博學之。審問之。慎思之。明辨之。篤行之。」顏子之照，鄰於生知矣，而夫子教之，必曰「博文」，曰「約禮」。及顏子既見卓爾，而追思得之功，歎以爲循循然善誘人。則夫子立教，不惟頓之以，而惟漸之以，亦明矣！並曾子而聞一貫者，惟子貢，而子貢之言夫子曰：「性與天道不可得聞。」故以實，則顏淵子貢賢於陸王，以迹，則陸王賢於顏淵子貢。且夫由顏淵子貢而至陸子，是千年而後生也，由陸氏而至王氏，是數百年而後見也！古今學者不絕於中，則漸之所磨以就者多也！漸者，上不至顏淵子貢，而不至欲從末由，下不至下愚，亦可攀援而幾及，是故程朱之道，爲接於孔門之統者，惟其漸之足循而萬世無弊也！夫頓之所得者，心悟也，悟心之妙，上智之所難明，今爲衆人法，而以上智之所難明，則中人不得與焉矣！爲其德之弗明也，而教之以明德，今以德之不明，而絕於明之望也，則其於教亦反矣！故聖人之教如天，陸王之教亦如天。聖人之教如天云者，蒼蒼然，東面西面，南面北面，立於地而無不見也。陸王之教如天云者，天不可階而升，則將永爲凡民以沒世焉耳矣！雖然，成陸王者之過者，孟子也！子貢之稱夫子曰：「夫子之不可及者，猶天之不可階而升也。」公孫丑之稱孟子曰：「道則高矣美矣，宜若登天然！何不使彼爲可幾及而日孳孳也！」公孫丑之言，則適得孔子之意，而孟子引而不發，故曰：「成陸王之過者，孟子也。」孟子曰：「人皆可以爲堯舜。」「人皆可以爲堯舜」云者，是瓦石亦有佛性之說也。以實言之，孔孟及佛及陸王，其

等不同，其皆得乎性之上者也。惟聖、人知人性之不能皆上，亦不皆下，故不敢爲高論，而恆舉其中焉者以爲教，此所以爲中庸也！孟子、陸王則不然！以己之資，謂人亦必爾，雖曰誘之以使其至，而不顧導之以成其狂。故觀於孟子之門，檢押斧械，蔑如也！攀龍附鳳，巽以揚之，益寡矣！陸氏方河決而天蹕，其御心猶役奴隸也，然扇訟發明，止於心之精神一語，可謂率矣！及至王氏，一傳而離，再傳而放，不亦宜乎！故自孟子、陸、王至今，遠或千年，近者數百年，而不聞復有孟子及陸王者，則孟子及陸王，固自由天授焉！夫以千年數百年而止有一孟子、陸、王，則是孟子及陸王，固不能人人皆爾，而孟子及陸王，必謂人皆可以爲己者，其意甚仁，而其實固莫得也！則皆過高而失中焉之過也！孟子學乎孔子而正其統。陸王學乎孟子而流於佛。夫孟子於孔子，不可謂有二道也，而其流已如此，則百家所從分之異路，往而不返，何怪其然也！「耳目之官，不思而蔽於物；物交物，則引之而已矣！心之官則思，思則得之，不思則不得也，此天之所與我者。先立乎其大者，則其小者不能奪也。」此孟子之言也，而陸氏之學執之以爲之術。「人之所不學而能者，其良能也。所不慮而知者，其良知也。孩提之童，無不知愛其親也，及其長也，無不知敬其兄也。親親，仁也；敬長，義也；無他，達之天下也。」亦孟子之言也，而王氏之學執之以爲之術。陸氏王氏，其取於孟子也同，其流而入於佛也亦同，而王氏之失彌甚！惟其人心道心之辨，執之者堅也！夫謂心惟一心，非有二心，佛氏之指，不可謂非妙契也。惟所謂一心者，與生俱生，人皆有之，然固失之六合之裏，四方之內，往古來今，放而不知求者，幾千年矣！孟子言本心云者，指道心而言之也，其言放而不知求，則以有人心之故也。人心乍出乍入，實止一心也。孔子曰：「操則存，舍則亡，出入無時，莫知其鄉，惟心之謂歟！」程子之意，則謂出入也者，以操舍而言之也，心固無出入也。

而佛氏直指道心，因誣謂無人心，遂誣謂無出入，甚而並心亦誣之謂無，而相與苦守一空，而尊謂之曰真如。嗚呼！此亦求聖人從容中道而不得，因歧而迷惑之如此，可憐哉！其莫有覺而已其迷者也！堯、舜、孔子以道心人心出入言之，其爲解至確，而其爲方甚密。惟不敢忽乎人心也，所以有克治，有克治而後有問學，有問學而後有德，勤而後獲，及其獲之也，乃其所固有也，貞固不搖，歷試而不可渝。若夫所謂一心者，轉乎迷悟而爲之名也，轉乎迷悟而爲之名，轉者一，其不轉者又一也。頓悟者，迪乎悟而爲之名也，迪乎悟而爲之名，悟者頓，其不悟者，頓不頓終莫可必也！然則所謂頓者未嘗頓，所謂一者未嘗一也！雖然，此其大介也。若夫彼學行業名實之所立，又非小儒粗學所能歷其藩，了其義者也！吾嘗學其道而略能語其故矣！蓋彼所謂頓悟云者，其辭若易，而其踐之甚難，其理若平無奇，其造之之端，崎嶇窈窕，危險萬方而卒莫易證，其象若近，其卽之甚遠，其於儒也，用異而體微同，事異而致功同，端末異而疇乎無妄同。世之學者弗能究也，驚其高而莫知其所爲高，悅其易而卒莫能證其易，徒相與造爲揣度近似之詞，而影響之談，或毗之，謂吾能知之，或呵之，謂吾能關之，以是欲附於聖人之徒，而以羽翼夫大道也，而其說愈歧矣！夫惟不能無人心，故曰危。惟不能常道心，故曰執。今日：「道心之外，不可增一人心」也。又曰：「天理在吾心，本完全而無待於存」也。嗚呼！譚何容易耶！未嘗反躬，故其言誣！未嘗用力，故其言僭而不可信！顏淵問仁，子曰「克己復禮」，及請其目，則告之以非禮勿視聽言動。今日「學者但明理，理純則自無欲。」嗚呼！爲此言者，是求勝於堯、舜、孔子也。」見辨道論。

其論文以知其所以爲爲難曰：「古人文章，皆由自道所見，平日讀書考道，胸中蓄理至多，及臨事臨文，舉而書之，若泉之達，火之然，江河之決，沛然無所不注，所以義愈明，思愈密，而其文層見疊出而不

可窮。使待題之至而後索之，烏有此妙哉！雖然，文章之道，得之非難，而爲之難，爲之非難，而知其所以爲爲難！」（見復羅月川太守書）「若夫所以爲之方，可一朝講而畢也。然而羣喙鳴動，蓄心各異，是其所非，非其所是，顛倒妒惑，昧沒不返。後學之士，欲求聞古人之真，舉一世空無人焉。夫古之人，以其本而發之爲文，軌迹不侔，家自爲則，其人已亡，不能復起自言。俗士淺學，各蔽其愚，人各云云，吾亦云云，則烏知吾言之獨是耶？人言之且非耶？就令吾言是矣，而古人已死，其孰從而定之！且人之言曰：『爲文宜何若，何去何取』，吾弗過而問焉。吾之言曰：『爲文宜何若，何去何取』，人亦弗過而問焉。退之有言：『究不知直似古人，又何得於今人也！』而要有不易之論，不可已之情者，吾取不詭古人，不迷來學，自是吾心而已。故凡吾所論文，每與時人相反，以爲：文章之道，必師古人，而不可襲乎古人，必識古人之所以難，然後可以成吾之是，善因善創，知正知奇，博學之以別其異，研說之以會其同。方其專思壹慮也，崇之無與爲對，信之無與爲惑，務之無與爲先，掃羣議，遣毀譽，強植不可回也。貪欲不可已也。及乎議論既工，比興既得，格律音響既肖，而猶若吾文未足追配古作者而無愧也，於是委蛇放舍，綿綿不勤，舒遲黯會，時忽冥遇，久之乃益得乎古人之精神而有以周知其變態。是故文章之難，非得之難，爲之實難！道德以爲體，聖賢以爲宗，經史以爲質，兵刑政理以爲用，人事之陰陽善惡，窮通常變，悲愉歌泣，凌雜深蹟以爲之施，天地風雲，日星河嶽，草木禽獸，魚蟲花石之高曠夷險，清明黜露，奇麗詭譎，一切可喜可駭之狀以爲之情，及其營之於口而書之於紙也，創意造言，導氣扶理，雄深駿遠，瑰奇宏桀，蟠空直達，無一字不自己出，而後吾之心胸面目，聲音笑貌，若與古人偕出沒隱見於前，而又懼其相似也而力避之，惡其露也而力覆之，嫌其費也而力損之，質而不俚，疏而不放，密而不俚，陰陽蔽虧，天機闔開，

端倪萬變，不可放物。蓋自孟、韓、左、馬、莊、騷、賈誼、揚雄、韓、歐以來，別有能事，而非艱深險怪，禿削淺俗，與夫鉅釘剿襲，所可襲而取之者也！夫文，亦第期各適一世之用而已，而必剗心剗肺，斷斷焉以師乎古人，若此者何也？以爲不如是，則不足以爲文也；此固無二道也！嘗觀於江河之水矣！謂今之水，非昔之水耶？則今之水所以異於昔者安在？謂今之水，猶昔之水耶？則昔之水已前逝，今之水方續流也；古之人，不探飲乎今之水，今之人，不挹酌乎古之水，古水今水，是二非一，人皆知之；占水今水，是一非二，則慧者難辨矣。蚩蚩者曰飲乎今之水，有人曰吾必飲乎古之水，而不飲今之水，則人必笑之矣。蚩蚩者曰飲乎今之水，有人曰若所飲今之水，實仍卽古之水，則人猝然未有不罔於心而中夫惑疾者也。夫有孟、韓、莊、騷而復有遷、固、向、雄，有遷、固、向、雄而復有韓、柳，有韓、柳而復有歐、蘇、曾、王，此古今之水相續流者也；順而同之也。而由歐、蘇、曾、王，逆推之以至孟、韓，道術不同，出處不同，論議本末不同，所紀職官名物時事情狀不同，乃至取用辭字句格文質不同，而卒其所以爲文之方，無弗同焉者，此今水仍古水之說也；逆而同之也。古今之水不同，同者溼性；古今之文不同，同者氣脈也。雖然，使爲文者，古人已云云矣，吾今復取古人所云而亦云之，則古人爲一文，已足萬世之用，而復何待於吾言乎！夫文猶己也，生民以來，四海之衆，而中以有己，立己於此，將使天下確信知有是人也，則必不俟假他人之衣冠笑貌以爲之，亦明矣！奈何世之爲文者，徒剽襲乎陳言，漁獵乎他人而以之爲己也，是故爲文之難，非合之難，而離之實難！雖然，合可言也，離不可言也，故凡論文者，苟可以言其致力之處，惟在先求其合。苟真知所以爲合，則以語於離，不難知矣！若於古人艱窮怪變之境，不知其艱，而以爲與己不甚相遠也，則其人又不足以語於合之說者也！真力不至，則精識不生！史言大秦國有駭雞

犀，置犀於地，雞見之卻走；而人之過之者，蹴踏踐履，童孺丈夫，千百而無稍異也；豈人之智不若雞歟？彼其性不相習，則其天弗能通也！世之俗士，名爲讀書，彼其於古作者之製，實未嘗相習，故其天弗能通，亦若是也已！粵無雪，士人見微霜，目之爲雪，此不可以口舌喻也！是故文章之難，非真信之難，真知之實難！」（見《客棗薄求論古文書》）退之論文，屢稱揚子，而不及董子；蓋文以奇爲貴，而董子病於儒，余聞之劉先生說如此。然竊以退之所好揚子文，亦謂其賦及他雜文耳，若《法言》《太玄》，理淺而詞艱，節短而氣促，非文之工者也！退之所好不在此！夫立言者，皆欲其不棄矣，而不能爲不可棄者，理不當而辭不文也！文其辭而無當於理者，有之矣，未有當於理而其辭不文者也。揚子徒知爲不可棄，而不務培其本，畢生用力造字句已耳！或曰：揚子成《太玄》，桓譚以爲後世復有子雲者，必能好之；及宋司馬溫公果篤嗜其書，意有其奧而世鮮知耶？余曰：不然！夫孟、荀、揚、韓雖並稱，然孟氏之道，班於聖人；今讀其書，充然沛然，高下曲折，涵天地而無極，指事而無不盡焉，曷嘗待於人黃泉、出青天，若揚子之所爲耶！夫以揚氏書與孟氏相比，差等殊絕，若河潦之不可同觀如彼，而司馬氏猶非孟子而尊揚子，是尚得爲知言乎哉！（見《書法言後》）

其論學古人之文，宜精讀而出之勿易曰：「自明臨海朱右伯賢定選唐宋韓、柳、歐、曾、蘇、王六家文，其後茅氏坤析蘇氏而三之，號曰八家。五百年來，海內學者，奉爲準繩，無敢異論，往往以奇才異資，窮畢生之力，極精敏勤苦，踴躍萬方，冀得繼於其後，而卒莫能與之並，蓋其難也！夫唐以前，無專爲古文之學者；宋以前，無專揭古文爲號者。蓋文無古今，隨事以適當時之用而已；然其至者，乃並載道與德以出之，三代、秦、漢之書可見也。顧其始也，判精粗於事與道，其末也，乃區美惡於體與辭，又其降也，

乃辨是非於義與法。噫！論文而及於體與辭，義與法，抑末矣！而後世至且執爲絕業專家，曠百年而不一遵其人焉！豈非以其義法之是非，辭體之美惡，卽爲事與道顯晦之所寄，而不可昧而雜，冒而託也！文章者，道之器，體與辭者，文章之質，范其質，使肥瘠修短合度，欲有妍而無媿也，則存乎義與法。近世論者謂八家後，於明推歸太僕震川，於國朝推方侍郎望溪、劉學博海峯以及姚惜抱先生而三焉！余讀侍郎文，歎其說理之精，持論之篤，沈然黯然，紙上如有不可奪之狀，而特怪其文重滯不起，觀之無飛動票姚跌宕之勢，誦之無鏗鏘鼓舞抗墜之聲，卽而求之，無玄黃采色，不能創造奇辭奧句，又好承用舊語，而於退之論文之說，未全當焉！而篤於論文者，謂自明歸太僕後，惟侍郎爲能得唐宋大家之傳。惟余亦心謂然也！蓋退之因文見道，其所謂道，由於自得，道不必粹精，而文之雄奇疏古，渾直恣肆，反得自見其精神。侍郎則襲於程朱道學已明之後，力求充其知，而務周防焉，不敢肆，故議論愈密，而措語矜慎，文氣轉拘束，不能宏放也。先後諸公，學既不能如侍郎之深，而又懵於所謂義法者，故文不能如侍郎之潔，而知所鎔裁以合化於古，而侍郎遂儼然於二百年文家之上，而莫敢與抗矣！侍郎之文，靜重博厚，極天下之物蹟而無不持載，泰山巖巖，魯邦所瞻，擬諸形容，象地之德焉，是深於學者也。學博之文，日麗春敷，風雲變態，言盡矣，而觀者猶若浩浩然不可窮，擬諸形容，象太空之無際焉，是優於才者也。姚氏之文，紆餘卓犖，樽節隱括，託於筆墨者淨潔而精微，譬如道人德士，接對之久，使人自深，是皆能各以其面目自見於天下後世，於以追配乎古作者而無忝也！學博論文主品藻，侍郎論文主義法。要之不知品藻，則其講於義法也慙。不解義法，則其貌夫品藻也滑耀而浮。姚氏後出，尤以識勝，知有以取其長，濟其偏，止其敝，此所以配爲三家，如鼎足之不可廢一！凡今東南學者，多好言古文，而盛推桐

城三家，於三家之中，又喜稱姚氏，有非姚氏之說，莫之從。嗚呼！可謂盛矣！而吾獨以爲人知姚氏之文之美，猶未有能得其微妙深苦之心也，不得其心，則其於知也終未盡！夫學者欲學古人之文，必先入精誦，沈潛反覆，諷玩之深且久，闇通其氣於運思置詞迎距措置之會，然後其自爲之以成其辭也，自然嚴而法，達而臧，否則心與古不相習，則往往高下短長，齟齬而不合，此雖致功淺末之務，非爲文之本，然古人所以名當世而垂爲後世法，其畢生得力，深苦微妙而不能以語人者，實在於此！」（見《書惜抱先生墓誌後》）「世之爲文者，不乏高才博學，率未能反覆精誦以求喻夫古人之甘苦曲折，甘苦曲折之未喻，無惑乎其以輕心掉之而出之恆易也！若夫有知文之失在易，而出力以矯之，又往往辭艱而意短。辭艱意短者，氣必弱，骨必輕，精神氣脈音響必不王，是則其辭雖不易，而其出言之本領未深，猶之失於易而已！古之能精讀者不若是！是故揚子雲教桓譚作賦，必先讀千賦。明歸太僕嘗於公車上取曾子固《書魏鄭公傳後》文，讀之五十餘遍，左右厭倦，而公猶津津餘味未已！嗟乎！此所以繼韓歐陽而獨立，三百年無人與埒，豈偶然哉！」（見《答人論文書》）「今爲文者多，而精誦者少，以輕心掉之，以外鑠速化期之，無惑乎其不逮古人也！」（見《書惜抱先生墓誌後》）要刪其指，以備考論。

梅崖居士文集三十卷外集八卷

建寧朱仕琇字斐瞻撰。仕琇，乾隆戊辰進士，散館出爲山東夏津縣知縣，以足疾改福寧府教授。其生平以古文詞自力，其始欲抗周、秦、兩漢，與荀卿、屈平、馬遷、揚雄諸子搏，必伏而盥其腦，然後導而匯之韓、柳、歐陽、王、曾、姚、虞以下，若首受而委逆也。及其晚而反復於遵巖震川諸家，心愈降而客氣

盡，於是奇辭奧旨，不合於道者鮮矣！所以自命者如此。而要其刻意學韓，力矯熟俗，雖造語未能如韓之雄奇瑰麗，而運筆實能得韓之盤折拗怒，曲而勁，峭以肆，筆情瘦硬，蓋得孫樵王安石學韓之一體。晚乃心折歸有光，蘄於辭簡體峻，而出以優游，取其自然，則與桐城姚氏之學，殊塗同歸；特其爲文簡峻有餘，優游不足，自是能品，故與姚鼐之逸品有間耳！蓋仕琇學韓而嬖於荆公之峻，鼐則由歸以上闢永叔之逸也。其文始刻於乾隆二十四年乙卯，雷鉉、林明倫、朱繼及其兄仕玠爲序之。仕玠與仕琇兄弟齊名，仕玠以詩，仕琇以古文。此本乃乾隆四十七年壬寅所刻。其弟子新城魯仕驥於仕琇卒之明年，彙其已刻未刻遺文，屬大興朱珪校而刻之，爲《文集》三十卷，《外集》八卷。而《外集》第八卷後附《梅崖山人詩偶存》，四言三首，五言三十六首；其詩骨力峻蒼，質而爲綺，不尚矜飾，篤意真古，乃學陶淵明者也。三十卷之前，冠以朱珪序，而《外集》則殿以朱筠墓誌銘及仕驥所爲行狀焉。采錄可誦，篇目如左：

詩類 辛巳孟冬過松谷擬留肄業簡樞園子用韋蘇州司空主簿琴席與韓庫部會王祠曹韻二首 水口精

舍訪族兄耘廬二首 松谷夏夜 暮春甯立孚招飲一枝山房同人卽席賦詩以鳴鳩乳燕青春深爲韻

分得鳩字 雜詩 衰周起游說，神仙傳不死，水牛獐行狀，叔孫在患難，霧豹無隱姿，採藥採參苓六首

論說類 原法 堯論上下

序跋類 迎鑾曲序代 樂閒圖序 崇本山房文集序 吳士林詩序 屏風集序 谿音序 魯遠懷詩集

序 留踪集序 朱南岡詩集序 澄碧齋詩集序 黃石山人詩集序 莆風清鎮集序代 蓮麓畫冊

詩序 半江書屋課藝序 徐鄭侯制義序 金荳汀制義序 李早川制義序 余羽臯制義序 溫陵

先正文藏序 石臼陳氏族譜序 建寧大南何氏族譜序

書牘類 復沈侍郎書 上沈尚書書 答雷憲副書 與林穆菴書前作一字起句 與林穆菴書前作二札起句

重與林穆菴書 與林穆菴書東閣同事起句 又與陳繩菴書 復陳繩菴書 答陳來章書 三與李郁

齋書 復李郁齋書 復家石君書 答魯絮非書足下書辭起句 復答李絮非書 復黃臨臯書 答金

生芑汀書 答李礪玉書 又答李礪玉書 與筠園書 復涂榮詔書 與潘立人書 復上楊副使書

答王光祿西莊書竊仕秀園西之鄙人起句 與余羽臯書去歲閑欲起句 與族兄可南書 示子文佑書

贈序類 送傅少尹序 送同年荆蔭南序 送葉蔚文南歸序 送筠園之京師序 贈族兄羽健序 贈黃

君序 巡撫余公七十壽序 邑侯余公壽序 李樞園六十壽序 魯致堂七十壽序 屏峯山人六十

壽序 伯兄七十壽序 姪孟豪五十序 林母鄭太夫人六十壽序 朱母鄧太夫人八十壽序

傳狀類 方天游傳 李世昇傳 陳太學傳 葉紹期傳 晚含山人傳 誥封寧化李太夫人傳 帖菴先生

行狀 帖菴先生六十述

碑誌類 通奉大夫都察院左副都御史雷公墓誌銘 封朝議大夫提督四川學政吏部考功司郎中兼翰林

院編修賡亭孟公墓誌銘 賜進士出身資政大夫吏部左侍郎念修何公墓誌銘 誥授奉直大夫雲南

鎮南州知州龔君墓誌銘 連城司訓楊君墓誌銘 太學生姜公墓誌銘 明經席先生宋亭墓誌銘

郡文學甯君墓誌銘 孝廉李君墓誌銘 李君墓誌銘 縣文學鄧君墓誌銘 從兄太學君理山墓誌

銘 鄉飲賓明經朱公墓誌銘 庠生朱公墓誌銘 太學生朱君墓誌銘 文儀墓誌銘 文仁墓誌銘

伯兄太學生默軒先生墓誌銘 仲兄縣文學恆菴墓誌銘 筠園先生墓誌銘 皇清誥封宜人晉封

夫人黃太夫人墓誌銘代 皇清勅贈太安人黃夫人墓誌銘 李母余夫人墓誌銘 皇清旌表節婦謝

夫人二子從葬墓誌銘 淑英墓誌銘 先母李氏墓誌銘 誥封奉直大夫例授州同知立軒陳公暨元

配誥封太宜人魯氏合葬墓表 庠生朱公墓表 擬提督學院新建周公去思碑 松溪令潘公去思碑

雜記類 蘭陔愛日圖記 遊鼓山記 重游靈隱峯記 山池荷花記 髻亭記 題泰寧寶蓋巖

頌贊類 皇帝南巡頌 杜可權像贊 朱太翁引泉築室圖贊

哀祭類 雷時若哀辭 祭雷憲副文 祭妹丈黃君及亡妹文

右詩十二首，古文一百十七篇。其爲文章自始學韓愈，其後更博采秦漢以來諸家之長，而獨成其體於韓子之後。其教學者爲文，卽舉韓子之所以教人者，而綜其要，以立誠爲本，以文從字順各識職爲旨歸，以中有自得而能自爲爲究竟。而論學則不嫌於時賢之爲漢學者。論文則不嫌於近世文人爲程朱之學者。

其論治經曰：「古人治經，非專門名家教授者，皆取大義通，不爲章句，若孟子、荀卿、李斯、賈生、司馬遷、劉向、揚雄、班固是也，故遷稱李斯知六藝之歸，固謂向父子揚雄爲湛深經術，謂優於其義也。至於物名器械之詳，則季漢通儒徐偉長之流，亦知鄙之矣！近時人不悅學，士多疏陋，故豪傑之士，率以博覽自喜，夫經言精奧，史籍紛繁，加人自爲之書，與世而增，雖有上智，豈能徧理，至傳聞回互，文義點竄，先後相積，疑竇半毛，但當存而不論，豈能窮其自出。古人於事訛誤未有折衷者，但云當考，或云慎取，如是而已，其言誠有味也！夫子曰：『我知之矣，如爾所不知何！』此聖人所以爲萬世法也。近世士多奮其私智以誣古籍，鑿空立說，日出新奇，微引繁富，足佐其謬，其弊始末之二二名人自喜之過，後遂益甚！揚子雲曰：『多聞則守之以約，多見則守之以卓。寡聞，則無約也。寡見，則無卓也。』孤陋固不

足以盡道。然荀況載孔子論士之言曰：「不務多知，務審其所知」，則所以主乎聞見者，必有道矣！」見

《答王光祿西莊書》

其論古人文利病曰：「凡爲文不宜太切，其陳義類迂誕而咀之有餘味，使人心寬厚愉悅，風清而神遠，穆然而近古，最爲文家高致，若《公》、《穀》、《戴記》、《詩小序》、《春秋繁露》、《說苑》、《新序》、《列女傳》是也。」見《梅崖雜錄》。仕琇治古文，自晚周下迄元明百餘家，雖不能盡識，亦嘗行其崖畔，知其升降所由。六經之作，聖人本諸身，垂教天地萬物，理畢備。孟軻七篇，明仁義。荀況輔之。斯、非背師以售術。聃、周假道德放言。管、商新法。不韋呂覽。下有脫文穰苴、孫、吳申軍制。丘明傳《春秋》，災異於董劉。《詩》變於原。史變於遷。《易》紹於雄。相如好靡，韓愈救其弊。此周、秦、漢至唐爲辭之大較也。」見《與胡稚威書》。「孟、荀、屈原之後，能爲六經之辭，惟揚雄、韓愈氏耳！李翱之文，溫靖隱厚，猶有《詩》、《書》遺風。他若百家雜術，出於周秦之間，漢氏作者益衆，所著皆偉麗可喜，而害人心者亦已多矣！左氏、司馬遷、董生、劉向、班固、歐陽、曾鞏、王安石，其特淳者。若柳宗元、蘇洵，亦其傑然者也。至子瞻、子由氏，挾其才智以傾一世，其徒晁、張、秦、黃從之，而法度一變矣！宋之南渡，作者率依附古籍而不能自爲辭。陳亮、葉適、陸游、文天祥，稍治氣格，有二蘇遺風，蓋晁張之亞也。元姚燧始法韓氏，而於仁義藹如之旨遠矣。虞集益求北宋大家之遺，而氣格少陋。顧終元之世，論文未有先二家者也。明時作者，推王顧爲最，歸尤俊偉，駸駸乎軼元代，而追歐陽諸人以爲徒者。蓋自周以降，二千餘年間，文章每降益衰，然其中輒有振起之者。故文衰於六朝，韓愈振之，降而五代，歐陽振之。及其又衰，姚燧振之。明文何、李、王、李之偶，王慎中、歸有光振之。若今之爲遵嚴震川者，蓋不知何人也。昔邵子湘、

方望溪嘗輕震川，至今日論定之下，二人視震川，果何如耶？人苦不自知，正坐此耳！」（見《與石君書》）

大約唐長慶後，其氣傷，宋熙寧後，其理澁，二者交譏。古文道缺不全以迄於今，雖其間數十豪傑，

力自振頹廢中，然以二者追隨終始，卒不能脫也！」（見《與胡稚威書》）近世文人爲程朱之學者，如前明宋景

濂、方希直之類，按其所著，大抵情辭而辭矜，辭陳而指淺，求其詩人優柔之風，書人灑灑之遺，邈不可

見，以此自詡治經，豈非荀卿所稱口耳之間，不足以美七尺之軀者耶！」（見《答雷憲副書》）又其淫則公倘規

矩，裂六經以逞強，欲不囿於世而納於作僞之類，若前代濟南新安之類，皆廝養僕隸僭主人，曾不得比

庶孽，沐猴而冠，妄自侈大，亦可哀也！」（見《與胡稚威書》）仕秀少孤，學無師傳，其古今文，輒以意取通於

古人，得其相屬條理之一二，然治經鹵莽，昧於史事，故措注處不能窮極原委以盡文之變化，使考古者

望而意滿，要其精神所著，則亦有不可誣者耳。古人之文，直書情事，而本末具見，後人繁徵博引，彌形

疏陋。盡古人根源盛大，所著皆自得之餘。後人弱材薄植而速華，淺流自盈而務竭，故其文之工拙，行

之遠近，各稱其精神爲限，非口耳漁獵所得與也！」（見《復徐榮昭書》）《莊子》書謂宜熟讀，其說理精處，吾

儒不能過也，又條暢通貫於俗情人事，以之處世最宜，但文太疏快，久服傷人元氣，又當以六經、荀、揚、

《左》、《國》重厚淳朴之意，鎮壓之耳！」（見《復李郁齋書》）學六朝，去其排偶最善。若又能從此上窮屈、宋、

揚、馬，卽與唐宋大家，豈殊源哉！至起伏照應，三國六朝，原不以此爲工，蓋其氣韻輕清，苦神短耳！

如流泉入花，雖有小濠洄激射映帶，以幽迴取勝，然浩浩掩濛，萬怪惶惑，終讓江河也！然人才視志所

趣，亦當量遠近以自定，果能魏晉，亦豈易得！」（見《與梅庭書》）文章氣大則力渾，凡以力見者，皆有畔岸，

則害廣博易良之體，而隘於氣，此峭緊之文所以未達一間也！欲知韓、柳、歐、王文高下，於此觀之。」（見

《鄉飲朱公墓誌銘後自題》「硬排比對，相角而下，中無轉捩虛機躲閃處，最窘筆力，此法昌黎獨擅。柳州《咸宜》等篇，亦復雅健可喜。」見《規友後自題》「退之《張徹》《王適》等銘，乃從《大雅》諸篇，兼採《瓠子》《天馬》等樂歌，奧崛深洞，奇氣橫溢，直與《九章》《天問》相爲彪炳，後之銘者皆法之，惟歐公《孫明復》《蘇舜欽》《尹源》諸銘得其神髓。王介甫極力追摹，終於膚殼未化！」見《李君墓誌銘後自題》「退之《墓》《騷》，視柳爲深，蓋河東悽情哀怨處，得《九歌》神韻，然體過峻厲，與騷人之渾然無涯，尚屬一間未達。退之遼於雅誥，故溫柔敦厚，與《騷》不謀而合，未嘗抒號哀怨而瀏焉忽至，此惟深於文者知之耳！」見《祭李母姜夫人文後自題》「四言祭文。《昌黎集》不用韻者甚多。」見《祭族叔喬瞻後文自題》「柳子厚文樹骨左馬，採神《騷》《穀》，涵掩韓非、賈誼、子雲，相如諸家，取源甚富，卽西京亦少其敵，不論異代也！特其崖岸太峻，稍乖平康正直之體，以之載道，頗似未宜，要其文自卓絕也！近世有人疑指方苞以宋末詰訓之遺，爲腐木濕鼓之音，不解柳文，妄肆詆欺，其言尤怪誕癡僂可笑！蓋墾榛泥填，而訾虎豹之炳蔚，不知者嗤其妄，知者乃深哀其愚也！悲夫！積一生之力，精治古文，不知好學深思以增益其所未足者，而長僞飾驕，將以愚人，其究自愚而已！」見《福州鄭魚門文後自題》「歐、蘇、曾、王，各自成家，馴至姚牧菴、虞伯生漸合源流，至震川而益備，嚮時志意高，頗輕視之，今閱歷久而心降，乃知前輩之未易及也！」見《答黃臨舉書》「震川《王邦憲墓誌》《戴錦衣家傳》，高卓鬱動，得史遷之神，然《王誌》氣尚微滯，不逮《戴傳》之豪雋，揮霍如意也！」見《孝廉李君墓誌銘後自題》「顧讀曾子固《王容季集序》，以《書》善序事，簡而無不足，繼《詩》《書》孔子而作者，孟軻揚雄爲最，而卜商、左丘明、司馬遷、韓愈其次也。震川之業，視諸君子爲稍繁，而世乃以太簡少之，可笑也！」見《答族弟和鳴書》「但當時尋繹歐陽、曾、王之文，使之日就簡古堅朴爲佳，震川文根

本盛大而約省出之，固已脫落修潔，然終不若三君子之淳實切至也！」〔見《答魯絮非書》〕仕琇自視所學，不敵震川十一，向時不自量，欲以簡自名，出吏後，寢頹散不能制，日所書者，皆俗言也！我朝學者寢少。侯、魏、汪、姜諸家皆傑出者，然視元明皆不及。邵青門、儲畫溪、方望溪益求真素，而頗病膚淺。仕琇之文，亦諸人輩耳！」〔見《答族弟和鳴書》〕仕琇少年虛憍負氣，更世事深，頗悔悟其妄，近稍斂就平實，檢閱明朝歸熙甫、王遵巖、方希直、高子業、徐昌穀諸人詩文，覺已有所未及。熙甫、子業尤高，其寄託真率，邁遠自然，視後來摹擬牽附者，文采非不斐然可觀，而終自言無與於中，令人寥絕不能明其志，若是著述雖多，祇益僞耳！」〔見《答李千人書》〕

其論學古文曰：「學古文，宜且先看曾子固、王介甫作者，得其澹朴淳潔之趣，儲氏選本，於二家太略，當求得《鹿門文鈔》讀之。卽歐陽文亦然，必合《五代史》讀之，佳處始見也。至近世《三上文鈔》、《青門麓稿》、《草堂文集》，亦宜博觀識其利病。不如此，文章之變不盡。故經潛其源，史核其情，諸子通其指，《文選》辭賦博其趣，左氏太史勁其體，孟、荀、揚、韓正其義，柳、歐以下諸子參其同異，泛濫元明近世以極其變。歸諸心得以保其真，要諸久遠以俟其化。」〔見《答黃臨舉書》〕固知積漸之功，不可誣也！杯勺不已，可生蛟龍。溝澮皆盈，頓生枯鮒。惟真故微，微故漸，漸可積而大也。惟僞故張，張故驟，驟者不終日而敗也。所願虛衷下氣，深中厚蓄，以大其造就。大由於積，積由於微而漸，微者人忽之，漸者人遲之，不存人之見於胸中，則自不見爲微與漸，見其爲真而已！」〔見《與余羽舉書》〕所著文力求峻潔而養氣未裕，則於立言之義不得其安，而聲之高下長短，時有拂戾，此蓋望速成之蔽也！韓子曰：「無望其速成」，又曰：「優游者有餘。」歐陽子曰：「孟韓文雖高，不必似之也，但取其自然耳。」此言甚精，久體之，

當自悟也。大抵知言養氣，二者爲立言之要。知言在積，讀書而慎取之，得其正且至者。所以載言者氣也，氣宜清明和平，不可過求緊健，既作之，又宜息之，順乎其理，不以己與其間，斯得之矣！左氏、司馬遷、二史、荀、揚、莊、屈四子宜熟復，大指歸於《詩》《書》，如此學韓乃爲得其要領，仍取李習之、歐陽永叔、老蘇、曾、王二公文觀之，察其取於韓之異者，又時觀柳柳州以見同時異趣，而本末之相去，有不可揜者，此尤爲學之要也。」（見復黃臨臯書）

其論作文曰：「至著文之道，第本其所得於古人者，調劑心氣，誠一以出之，齊莊以持之，優游以深之，曲折以暢之，援引古昔以矜重之，使其言粲然各識其職而不亂，澹然各止其所而不過，則雖尋常問訊起居之辭，而人寶之如金玉，襲之如蘭芷，聽之如笙瑟，味之如牢醴，有不忍去者矣！何也？則以其心氣之清和惻怛。感人於微，而人樂之，亦自得其志也，故曰貴者，人貴之，自愛者，人愛之。」《傳》曰：『芷蘭生於空林，不以無人而不芳。』斯爲自著者也！後之作者，誇嚴自喜，動曰言思可法，或曰言必有用，故所爲皆依倣緣飾以動於世，二者豈非教之所崇！第以古人出之，皆流於內足之餘，其言信也。後之人未必然也，而馳騫心氣以逐於外，色取聲附以事觀聽，中枵源醜，美先盡矣，又何以永學者之思慕乎！（見答王光祿西莊書）「文章之貴，在於天人相兼，思學融會，忌用成句，語有出處，固爲無病。然必其取喻親切，方爲有味，否則易涉苟便，反不如用己意點化之爲得也！」黃山谷云：『韓杜詩文，皆有來處，後人讀書少，便謂自作語耳。』李穆堂因此遂註《原道》用語來處，此拙於知言者也。退之謂「唯古於辭必己出」。六經之文，中貫精意，何有沿襲！偶閱周亮工評文云：「文莫妙於杜撰」，不覺驚歎，以周非文家，何其精於文事如此！孫樵謂世言俚言奇健，可爲史筆精魄，因牽韓吏部云如此，孫樵當時謂爲不然，易

以典要二字，要豈得謂世言之無因哉！往時與先兄筠園論詩，謂自宋後無能自造語者，正謂杜撰之難也。」見答蔡蒼嶼明府書。「銘辭奇偉，要於義正句鑿，不落模糊，否則墮人僞境矣！」見族祖朱公墓誌銘後自題。「有韻之文，出於《詩》《騷》，辭意哀麗，上也。渾浩流轉，次也。敷陳完飭，斯爲下矣！若填綴雜亂，或遂混入後世詩句中語，風雲月露，蟲鳥花草，則惡道魔趣，徒供嘔噦，不足與於此，而或猶尚之，可笑也！」見古堂王公文後自題。

其論學詩不如學古文曰：「古文之名起於唐，是時作者皆沿六代之遺，以偶儷爲工，韓退之出，始深探六藝，凌驟諸子，脫落時體，粹然一出於正，子厚習之輔之，而有唐之文，遂與三代西漢同風。詩自《十九首》迄劉宋陶謝，作者古音不絕。齊梁始敝。至唐陳子昂《感遇詩》氣格豪邁，又復於古。太白子美，每出益奇，然詩自鮑照至子美僅百年，自子昂太白而外，中間能者無數。古文自漢建武至唐貞元，惟得退之等數人而已！甚矣其難也！然古文之道，正大厚重，非學士大夫，立心端慤者莫能習，詩歌之靡，則儇人佻士，率往趨之，以故詩人之無行者不可勝數，而古文之傳，皆正人君子也。嚴羽曰：『詩有別才。』夫詩之道，雖易於古文，然非可一蹴至也，必沈酣《詩》《騷》，熟精《文選》，屬思於有無之際，著筆於近遠之間，發興蒼茫，開倪寥廓，無意而合，自然而成，觸緒而悟，或則怒生豪出，噓吸百川，噴字如珠，灑墨成雨，神歌鬼泣，混連元氣，歸於淡無，如此等境，皆詩家上乘，豈初學所能知哉！至若言取清虛，意求閒適，亦出天然，不可湊泊。古文雖難，然隨人材質習之，卽其所得淺深，皆可以正心術，導迎善氣。且先錄韓柳與人書及諸賦碑誌，見其清深淵古者，日夕復之，然後乃及序記。次閱歐陽公《五代史》及《唐書》諸論贊，又次閱其碑誌，乃及序記，因之乃及曾南豐、王介甫，因之又復於韓，又因韓以及

李習之，及於柳，以見諸家同異，因是以上及於揚雄、劉向、董生、司馬遷、相如、宋玉、屈原、荀況、左丘明、孫武、尉繚、管仲、穰苴、莊周、列禦寇、《國語》、《國策》，因以下及於蘇老泉，如此又數往復焉，乃至西京諸作者，及於班固、張衡，及於東京，及於唐諸雜家，及於東坡、穎濱并宋諸雜家，及元、明、本朝諸家，又如是以復於唐宋，又復於諸子六經，誠如是漸進而自得焉。古文既立，其於詩蓋順而推之耳，若韓、柳、歐、王、蘇之於詩，皆高出諸家，此其明驗也。」見《示子文佑書》。

其論詩曰：「詩力求緊密而乏疏奇之致，蓋鎔鍊未造輕淨，見滯悶而已，杜韓不如是也！」見《復李郁齋書》。昔人論詩，謂七言其靡者，然唐時每以長句相矜，如杜甫之贈薛華，是也。甫後，工長句者，韓文公外，推宋蘇文忠、黃文節，迄於南邊，金源氏之北渡，陸游、元好問，益講明二公之遺。明之中世，北地李夢陽者出，始絀其前名家者，而專修杜甫氏，然後之論互有同異。賦爲六詩之一，而後《離騷》、《九歌》、《九章》、《九辨》，音節已淪。至於《招魂》、《高唐》、《上林》、《子虛》、《大人》、《七發》、《甘泉》、《長楊》、《羽獵》，則務爲閎衍夸侈，競於使人不可加矣！《大雅》「維昔之富不如時」。『今也日蹙國百里』，蓋長句所昉，其後《牛角》、《垓下》、《大風》、《瓠子》、《柏梁》繼作，迄後漢、魏、晉、六代益衍，至杜甫氏而極盛。甫嘗自喜其詩能愈瘡，因誦生平佳篇，皆長句也。蓋長句與賦，皆詩之歧出者，迄宋而賦道幾絕。蘇黃二公長句法杜甫氏，而傳以己趣，自成阡術，票姚搜剔，暢悅精緊，卓立風氣轉側之餘，不襲取前人而自與合，故足貴也。北地一力摹擬，欲如優孟之肖孫叔，而忘始末簡鉅之不同揆，斯其蔽矣！國朝王尚書士正，始復尋陸氏元氏之遺緒，以韓、蘇、黃三家長句爲法，然王氏自著，亦兼採王維高適之遺，而雜出於元明諸家。」見《春懷懷詩集序》。王尚書懲空同、于鱗二李之弊，力矯荒儉，以清新俊逸爲宗。數十年

來，遂成風氣；前後二宋玉叔，綿津頗以健格撐拄其間而力不勝。於時李天生獨探源經術，其後鐵君翺循嶺南諸家之徑，別立風格。」見《復家石右書》。仕琇文章爲閩士所宗，其弟子新城魯仕驥誦其師說以奉手姚鼐，用詳次其說以備一家之學焉。

太乙舟文集八卷

新城陳用光字碩士撰。用光，嘉慶辛酉進士，累官禮部左侍郎。自其少小好爲文章，學詩於鉛山蔣士銓，學古文於舅氏同里魯仕驥。而仕驥爲建寧朱仕琇弟子，既受古文法，而其所自得，沖澹夷猶，別成其體於梅崖之外，與桐城姚鼐略同；遂通書問以相質正，又命用光從學於鼐，遂兼受兩家法。今觀其文，不爲刻深毛鷲之狀，而條達疏暢，浩浩乎隨流平進，辭明而理舉，意盡則言止，與世之爲桐城，抑揚吞吐以事所謂情韻不置者異趣；顧辭或蕪煩，韻味亦短，而扶植理道，樸實無華，乃近方苞，而特遜其高渾凝固！其集初刻於道光十七年，用光先以十五年卒，其友人梅曾亮爲編定，而冠以祁嶺藻梅曾亮序，吳德旋爲神道碑，梅曾亮爲墓誌銘，以備讀者知人論世焉；至光緒乙未，重刻於長沙。詩則用光自刻，久罕傳本；其裔孫陳贛一爲《青鶴雜誌》，選登第四、五卷。跌宕昭彰，髣髴蔣士銓，而無士銓之顧視清高，筆情雄騫，嘗以詩質正大興翁方綱。方綱評之曰：「作不入，所以作不出」，亦天資所限也！采錄可誦，篇目如左。

序跋類 翠微山紀游詩序 銀藤花館詞序 紅葉山房文集序 南石先生制義序 振綺堂書目序 觀

齋集序 王述菴與蓉裳尺牘書後 袁簡齋尺牘跋 山木先生書冊跋

奏議類 論攻滑縣賊摺子 應詔言事摺子

書牘類 與伯芝書頃檢取姬傳起句 再與國史館總裁書 上王侍御書

贈序類 送登之以通判分發江蘇序 送劉孟塗南歸序 送童觀察序 送胡墨莊給諫擢延建邵道序

送劉松嵐爲河東道序 送何蘭士爲寧夏守序 送服齋給諫外擢之官山左序 送鄧鹿耕擢鹿港同

知序 贈譚琴巖序 送黃初甫前輩乞養南歸序 送程梓庭提刑之任江西序 送鄧嶠筠同年廉訪

湖北序 送賀藕耕贊善出守南昌序 送梁芷鄰儀曹擢守荊州序 果堂五叔父六十壽序 仲兄朗

亭四十序 贈集正五十序 魯南晚七十壽序 繹堂制府六十壽序 十五弟彪字說 四子字說

傳狀類 先母事述 姚先生行狀 齊召南傳 武虛谷家傳 忻州知州魯公家傳 蔣省齋家傳 費給

諫家傳

碑誌類 從兄仁山侍郎墓誌銘 從兄子玉方墓誌銘 從兄子鍾溪侍郎墓誌銘 兄子蘭祥墓誌銘 貴

州巡撫鶴樵程公墓誌銘 光祿大夫經筵講官戶部左侍郎致仕歐齋顧公墓誌銘 工部左侍郎浙江

學政李公墓誌銘 劉芝崖墓誌銘 姚子方墓誌銘 王叔和墓誌銘 鹽源縣知縣襄城常君墓誌銘

吏部左侍郎譚公墓誌銘 寶慶府知府譚子受墓誌銘 魯賓之墓誌銘 壽暉厝誌 韓理堂先生

墓表 鄧實山墓表

雜記類 記先贈大夫畫像始末 菊隱圖記 蜀岡紀游圖記 游石門洞記

哀祭類 魯習之哀辭

右文六十五篇。論學，則宗義理而兼尚考據；論文則主疏澹而不廢聲色；壹推本其師姚鼐之說。

其論經學曰：「用光比爲《論語義疏》，汎濫於諸經傳說，益知朱子之學，誠爲己耳，非有爲乎人也，今之爲漢學者，誠爲人耳，非有爲己也。胡氏之傳《春秋》，前乎朱子者也。蔡氏之注《尚書》，後乎朱子者也。二子者，論議之迂，名物之略，誠有過焉；而攻朱子者叢擊之不遺餘力，曰吾漢學也。《春秋》每月書王，以爲孔子之筆，此服虔說也；而胡氏因之。其不書王以治桓，賈逵說也；而胡氏取之。曰服虔而黨之，曰胡蔡而伐之，黨乎其所異，而不知固伐乎其所同，曾是以爲愈乎！人心之相勝，至無已時也；不顧義理之安，而攻乎名之所難犯以爲己名，夫胡蔡其嚆矢也。生心作事之害，非獨儒生之論而已！」
見《與姚先生書》。閱近儒陳啓源《毛詩稽古編》，其說專與朱子爲難，獨其考訂名物，頗有是者，惟頗不喜惠定宇《明堂大道錄》。比見翁覃溪先生《與胡維君書》，亦以此爲畔道之作，所當辭而闕之。覃溪先生又言：「與其過信漢儒，無寧過信宋儒。」此非近日諸儒所能爲之言也！」
見《寄姚先生書》。覃溪先生窮經，以博綜漢學而歸於勿背程朱爲主，其識自非近人所及。然其論吾師姚鼐經說，謂「不當自立議論，說經文字，不可以作古文。」則用光不敢謂然！歐陽子曰：「經非一世之書也。」前人成說，有可以爲左證者，有不可以爲左證者。儒者學古，以其自得義理，兼所目驗事實，參互考訂，歸於一是，必欲於前人成說，一字不敢移易，是今人所嗤爲應聲蟲者也。雖依附鄭孔，安能免門戶之見哉！朱子之學，所以上接洙泗者，固其躬行心得，非諸儒所能幾及；而其窮經之餘，又精通文律，故其詁經文義，十得七八。用光嘗謂東漢人拙於文辭，雖邠卿康成亦然；凡其說之難通者，皆其拙於文辭所致也。文辭之在人，乃天地精華所發，周秦人無不能文者。諸經雖不可以文論，然固文也；不知文不能文者，則不可以通經。今人讀孔賈疏，未終卷，輒思臥，其爲說輻輳繚繞，不能啓發學者志意，非疏於文事之過耶！然則說經而以古文行

之，其有益於後人，豈獨文字之間而已哉！韓昌黎所注《論語》，惜後世無傳本，使其傳於世，朱子必亟稱之矣。」見《寄姚先生書》。

其論史傳曰：「善爲政者，無變今之法，而能行古之道，善爲文者，無變今之體，而能用古之法。繁簡張弛，與時消息，雖在爲文，何獨不然！史傳貴在傳其人，俾可見於後世而已。馬班諸史，無所謂附傳也。劉向欲宜專傳，而見於《楚元王傳》中，不云附，猶曰其子孫也。《孟荀卿列傳》列慎到、田駢、三鄒子之屬，而標題但曰『孟荀』，不注旁以附。其《嚴朱徐賈諸傳》，俱平標諸人，不云徐賈以附嚴朱也。惟范氏《蔡茂傳》附『郭賀』，則以賀釋夢，而茂辟以爲掾也，然賀居官有殊政，嘗爲顯宗所褒異。蓋以類附從，各有命意。今之爲傳，雖不能全用其體，而未嘗不當略存其意。又昔之爲《文苑傳》者，邊讓趙壹之流，其人皆偏宕之士。今既嚴絕偏宕之士，則入傳者必皆有守有爲，不獨其文學可稱，而政事亦當紀，雖不能盡然，而可紀者，必當詳紀之，以待後人之采擇。用光撰國史，於《汪堯峯傳》，舍芸臺先生錄《四庫提要》議論之虛語，而錄陳午亭相國紀載之實事。其《朱竹垞傳》，用光所附者尚有數人，以館中諸君謂附傳不宜多列人數，姑徇其意，而獨存譚古璉者，以其爲朱之中表，又同舉鴻博，而嘗有守城之功也。抑用光觀古人列傳之意，更有一說：林苑云者，羣材總集之區也，若其人有傑出之材，則以專傳爲貴，董江都鄭康成不入儒林，司馬長卿不入文苑是也。今之列儒林文苑者，異日苟有馬班之才出焉，豈無特取而爲專傳者乎？其餘儒林文苑中人，不啻皆異日之附傳者也。」見《再與國史館總裁書》。

其論古文曰：「古文辭傳之於世，必材與學兼備而後能有成，才不可能，而學則可勉致。然學有二：其存乎修辭者，異乎南北朝人之所學，爲古文而得其途者知之矣！其存乎學而銖積寸累以求其義理，

爲古文而得其途者，其所得又有淺深之分焉，得於此者深，雖修辭之功不至，而固可自立，得於此者淺，雖修辭之功至，而未必其能自立也！蘇氏曾氏之於歐陽，才與學兼備者也，繼歐陽而庶幾及之。李習之、皇甫持正、孫可之，學不足，而修辭之功至焉者也，繼韓而蹙乎其後焉！然習之、持正、可之尚足以自立，生宋人之後而學不足，微特不能挈習之、持正、可之諸君子，且不能如爲南北朝人之所學者之有成矣。」見《與管輅之書》。柳子厚云：「鏗鏘陶冶，時時見古人情狀。」此言格律聲色也，無格律聲色，不足以言古文辭。夫天下之道，有本有末，有淺有深。局於淺且末，固不足道矣，求其本與深焉者，而遺其末與淺焉者，此高語性命之學而不求諸事物之失也。爲古文辭，乃亦類乎是。格律聲色，古文辭之末且淺焉者也，然不得乎是，則古文辭終不成。自韓歐而外，惟歸震川得此意，故虞文靖、唐荆川皆莫逮焉。」見《答賓之書》。比讀王遵巖文，覺其辭繁而不能成音。震川則雖常語而亦可成誦，以此知震川之不可及也！」見《寄姚先生書》。「曩時閱《梅崖集》，以爲不可及，比乃覺其氣少懈而骨格未堅，譬之樂，鮮純繹之音，譬之木，鮮密栗之致，二者望溪似猶未至焉，梅崖於望溪，乃彌不能及已！近時王鐵甫爲文不可一世，用光得見其十二三，誠有過於梅崖者，然其於沖淡自然之詣，則似未之有得！」見《寄姚先生書》。「鐵甫嘗自言：『生平所較勝於人者，東京六朝之功頗深也。』爲用光言：『宜留意兼采左、史、班固之茂密。』夫以東京六朝入西漢，是綴狐白以羔裘也，其兼采左班之茂密，譬列雞彝龍勺而不廢敦卣，意其言固猶有可采者乎？」見《寄姚先生書》。「夫昌黎變排比之習，而以疏勝，昌黎不獨以疏勝也。歐陽、曾、王氏取其疏而得其所以爲疏者，故能各獨成其體。後之人無其學，而徒爲冗散汗漫，使不可合於尺度，固宜其見詬病於世。然司馬子長所以勝孟堅者，曷嘗必以縝密爲貴乎！吾師謂『歐公能取異己者之長而時濟之』，非獨濟之以密

也。吾師謂「曾公能避所短而不犯」，其所長在於疏，固非冗散汗漫而不合於尺度也。」見《寄姚先生書》「孫過庭言作字云：『先求平正，後追險絕。』作文正復如此。未能平正而遽求險絕，譬之孩提之童而遽欲舉鳥獲之鼎，效魏犖爲距躍曲踊也，其不至於絕臙折足者無幾！然某君所見似尚未及此，其所見未忘乎六朝之綺麗，而震習簡齋之炫耀耳。用光比年乃知簡齋之才雖橫絕，而用之於古文，則全無是處！」見《與梅伯言書》「用光之師先舅氏山木先生受古文法於朱梅崖，其在吾江西，卓然成一家言者也。姬傳先生之門人，有管異之同，梅葛君曾亮，皆深造有得，勝於用光。」見《再與呂禮北書》「吾今作詩文頗多，而總無愜心處，看來吾於虛處，總不能步趨吾師，惟當努力於實處，以冀步趨十分之一二耳。」見《與伯芝書》「夫文有虛有實。虛者，骨脈神氣也；實者，名物度數之見於文字間者，非考證之博，則每患其疏；故姬傳先生嘗以考證誨學者也。僕侍姬傳先生久，又嘗旁采莘楣覃溪諸君說，於考證知其途轍焉，而筆不足以副之，嘗以氣弱爲慙！」見《致魯賓之書》「今之爲漢學者，破碎穿鑿，令人不樂觀，雖僕亦以爲然。顧舍是而使人得以空疏詆我，徒以機軸氣體爲古文辭，雖明之茅鹿門，今之朱梅崖，皆深有所得於古文者，而不免病是也！」見《答賓之書》「吾師獨舉義理考據詞章三者並重之說，以誨示人，而所自著，復既博且精，掩有三者之長，獨闢一家之境，論文章於今日，先生功邁於震川矣！鐵甬見未及此，固宜其以考據爲病也！」見《寄姚先生書》「且如閻百詩以漢學警宋學，其詞氣之偏駁，非學者所當法也；其考證之精核者，則固古人實事求是之學，不可不法矣！朱竹垞爲人不足論，其學亦不逮百詩；然博聞強識，則今人固未易幾也！其文字雖無當於古文之業，然以其該洽，凡言學者往往不能廢之！往日吾鄉亦有聞山木之風而爲古文者矣，然卒之無成者，以其無學也，無學，則無以輔其氣，定其識。世人以古文學者多空疏，職是故也。」

且能以考證入文，其文乃益古。吾師嘗語用光曰：「太史公《周本紀贊》所謂周公葬我畢，畢在鎬東南杜中，此史公之考證也，其氣體何其高古，何嘗如今人繁稱博引，刺刺不休，令人望而生厭乎！」史公此等境詣，吾師文中時時有之，此固非百詩竹垞之所能知也。然則以考證佐義理，義理乃益可據，以考證入詞章，詞章乃益茂美矣！」見復齋之書

其論駢文曰：「余未嘗爲駢儷之學，顧於其源流派別，考核之嘗熟。往者喜楊蓉裳農部芳燦之文也。蓉裳之言曰：『吾之爲儷體文，色不欲其炫，音不欲其諧，以闕采而得古錦之觀，以闕響而得孤絃之韻，是則吾之所取於玉溪生也。』蓋本朝之爲儷體文者至衆，而討論之精，則後來者往往軼出前人之上。若蓉裳之文，取格近於邵叔^六、孔^卿軒，而易其樸而爲華，取材富於陳其年、吳蘭次，而易其熟而爲澀；其次此事可云三折肱焉。」見方彥聞儷體文序其他論保甲，則曰：「今之行保甲者，失《周官》比閭族黨佐行教化之意，而反鄰於商君相連坐之法，非徒其法之未究，抑亦其用意之相左矣！」見與劉仲矩書「昔惠先生士奇之說地官，吾有取焉，其言曰：『管子法周官，事類相近，凡孝弟忠信，賢良雋才，由其下以次復於上，有過惡，由其下以次及於上，猶是周官比閭族黨州鄉，勸善糾惡，慶賞相共，刑罰相及之意，非若商君什伍連坐之法，益之以暴也。』蓋市者政詳於下，故其上之政簡。夫相受相保，相調相救，民之所自致其恩誼也。」見屈氏義莊書田序信可爲世之言保甲法者當頭下棒喝焉！

大雲山房文稿初集四卷二集四卷言事二卷文稿補編一卷

陽湖惲敬字子居撰。敬，乾隆癸卯舉人，歷官浙江江山、山東平陰、江西新喻瑞金知縣，其《文稿初

集二集》，皆敬手定，各有《序目》。《初集序目》自道早年學古文之攻苦以屢有成，略脫胎韓愈《答李翊書》。《二集序目》則以諸子流別之法，論定文章，而謂文集之衰，當救之以百家，同於章學誠《文史通義》之所論。又為《文稿通例》二十五條刊卷末，以見文章之義法。《初集》以嘉慶二十年刻於南昌，而《二集》則以是年刻於廣州，至咸豐庚申，太平軍略地常州，而板以燬，其孫念孫以同治八年，重刻於四川，而附《言事》二卷，《補編》一卷。陽湖古文以惲敬張惠言為開山，而出於桐城。陽湖陸繼輅與惲張同時交好，而按其所著《崇白藥齋文集》，有《七家文鈔序》曰：「我朝自望溪方氏別裁諸偽體，一傳為劉海峯，再傳為姚惜抱，桐城一大縣耳，而有三君子接踵輝映其間，可謂盛矣！然世之沈溺於偽體者，固未嘗一日而息。乾隆間，錢伯坰魯思親受業於海峯之門，時時誦其師說於其友惲子居張臯文。二子者，始盡棄其考據駢儷之學，專志以治古文。蓋臯文研精經傳，其學從源而及流，子居泛濫百家之言，其學由博而反約。二子之致力不同，而其文之澹然而清，秩而有序，則由望溪而上求之震川，又上而求之廬陵，如一轍也。」然敬則不安於桐城之所為，自言：「古文法盡出子長，其孟堅以下，時參筆勢而已。」見《與黃石書》。又謂：「變化取子長，嚴整取孟堅。」見《上舉主陳笠帆先生書》。今觀其文，言厲氣雄，若肆意出之，而下筆特矜慎。姚鼐如斂而促，意餘於詞而不欲盡，敬則特悍以矜，氣溢於篇，而不敢盡。曾國藩用揚馬司馬相如揚雄以掄桐城之希淡，而瑰麗間出，其蔽也維！敬則學馬班司馬遷班固以藥桐城之蕪近，而適變時臻，其蔽也矜！其辭淨而無滓，斯敬之所以同於桐城，而與曾國藩為異。其氣厲而為雄，斯敬之所以異於桐城，而與曾國藩為同。采錄可誦，寫目如左。

論說類 三代因革論八首 西楚都彭城論

序跋類 子居決事序 秋潭外集序

書牘類 上曹儼笙侍郎書 答蔣松如書 上舉主笠帆先生書 答張翰風書

傳狀類 前翰林院編修洪君遺事述 前濟南府知府候補郎中徐君遺事述 楊中立戰功略

碑誌類 前太子少保雲貴總督劉公祠版文 前四川提督董公神道碑銘 太子少師體仁閣大學士戴公

神道碑銘 張阜文墓誌銘 舅氏清如先生墓誌銘 前臨川縣知縣彭君墓誌銘 兵部額外主事王

君墓誌銘 寧都州學正聞君墓誌銘 彭澤縣教諭宋君墓誌銘 寧都營參將博羅里公墓誌銘 刑

部主事曹君墓誌銘 甘宜人附葬墓誌銘 姜太孺人墓誌銘 亡妻陳孺人權厝誌 光孝寺碑銘

贈光祿大夫陳公神道碑銘 刑部尚書金公墓誌銘 國子監生錢君墓誌銘 孫九成墓誌銘 萬孺

人附葬墓誌銘 浙江提督李公墓闕銘 翰林院庶吉士金君華表銘

雜記類 新喻東門漕倉記 重修萬公祠記 東路記 遊翠微峯記兩首 紀言 書山東知縣事 書獲

劉之協事 遊廬山記 遊廬山後記 舟經丹霞山記 遊羅浮山記 分霞嶺記 茶山記 酥醪觀

記 遊通天巖記

右文五十七篇。大抵論學兼通儒釋，不以爲混；論文推本經子，必裁以義。其論古文之源流及其治法曰：「昔者班孟堅因劉子政父子《七略》爲《藝文志》，序《六藝》爲九種，聖人之經，永世尊尚焉；其諸子則別爲十家，論可觀者九家，以爲雖有蔽短，合其要歸，亦六經之支與流裔。敬嘗通會其說：儒家體備《禮》及《論語》《孝經》，墨家變而離其宗。道家、陰陽家支駢於《易》。法家、名家疏源於《春秋》。縱橫家、雜家、小說家適用於《詩》《書》；孟堅所謂『詩』以正言，《書》以廣聽」也。惟《詩》之流，復別爲詩賦

家，而樂爲焉。農家、兵家、術數家、方技家，聖人未嘗專語之；然其體亦六藝之所孕也。是故六藝要其中，百家明其際會，六藝舉其大。百家盡其條流，其失者，孟堅已次第言之，而其得者，窮高極深，析事剖理，各有所屬，故曰：『修《六藝》之文，觀九家之言，可以通萬方之略。』後世百家微而文集行，文集弊而經義起，經義散而文集益漓。學者少壯至老，貧賤至貴，漸漬於聖賢之精微，闡明於儒先之疏證，而文集反日替者，何哉？蓋附會《六藝》，屏絕百家，耳目之用不發，事物之蹟不統，故性情之德，不能用也。敬觀之前世，賈生自名家縱橫家人，故其言浩汗而斷制。鼂錯自法家兵家人，故其言峭實。董仲舒、劉子政自儒家道家陰陽家人，故其言和而多端。韓退之自儒家法家名家人，故其言峻而能達。曾子固、蘇子由自儒家雜家人，故其言溫而定。柳子厚、歐陽永叔自儒家雜家詞賦家人，故其言逍遙而震動。至若黃初甘露之間，子桓、子建，氣體高朗，叔夜、嗣宗，情識精微，始以輕雋爲適意，時俗爲自然，風格相仍，漸成軌範，於是文集與百家判爲二途。熙寧寶慶之會，時師破壞經說，其失也鑿，陋儒襲積經文，其失也膚。後進之士，竊聖人遺說，規而畫之，睥而斷之，於是文集與經義并爲一物。太白、樂天、夢得諸人，自曹魏發情。靜修、幼清、正學諸人，自趙宋得理。遞趨遞下，卑亢日積，是故百家之敝，當折之以《六藝》，文集之衰，當起之以百家。」見《二集序目》。是何也？孔子曰：『辭達而已矣。』孟子曰：『諛辭知其所蔽。淫辭知其所陷。邪辭知其所離。遁辭知其所窮。』古之辭具在也，其無所蔽、所陷、所離、所窮四者，皆達者也。有所蔽、所陷、所離、所窮四者，皆不達者也。然而四者有有之而於達無害者焉，列禦寇、莊周之言是也，非聖人之所謂達也！有時有之，時無之，而於達亦無害者焉，管仲、荀卿之書是也，亦非聖人之所謂

達也！聖人之所謂達者何哉？其心嚴而慎者，其辭端。其神暇而愉者，其辭和。其氣灑然而行者，其辭大。其知通於微者，其辭無不至。言理之辭，如火之明，上下無不灼然，而跡不可求也。言情之辭，如水之曲行旁至，灌渠入穴，遠來而不知所往也。言事之辭，如土之墳壤，鹹瀉而無不可用，此其本也。蓋猶有末焉。其機如弓弩之張在乎手，而志則的也。其行如挈壺之遞下而微至也。其體如宗廟圭琮之不可雜置也，如毛髮肌膚骨肉之皆備而運於脈也，如觀於崇岡深巖，進退俯仰，而橫側喬墮無定也，如是其可以爲能於文者乎！若其從人之途，則有要焉。曰：其氣澄而無滓也，積之，則無滓而能厚也。其質整而無裂也，馴之則無裂而能變也。「見與初之論文書」然必有性靈有氣魄之人，方能語小則直湊單微，語大則推倒豪傑。本源穢者，文不能淨；本源粗者，文不能細；本源小者，文不能大也。「見與來卿」治之之法，須平日窮理極精，臨文夷然而行，不責理而理附之；平日養氣極壯，臨文沛然而下，下襲氣而氣注之，則細入無倫；大含無際，波瀾氣格，無一處是古人而皆古人至處矣！看文可助窮理之功，讀文可發養氣之功。看文，看其意，看其辭，看其法，看其勢，一一推測備細，不可孤負古人。讀文則湛浸其中，日日讀之，久久則與爲一，然非無脫化也。歐公每作文，讀《日者傳》一遍；歐文與《日者傳》、何啻千里，此得讀文三昧矣！今舉看文之法：譬如《史記·李將軍列傳》：「匈奴驚上山陳。」一山字，便是極妙法門。何也？匈奴疑漢兵有伏，以岡谷隱蔽耳；若一望平原，則放騎追射矣；李將軍豈能百射直前，且下馬解鞍哉！使班孟堅爲之，必先提清漢與匈奴相遇山下，亦文中能手；史公則於匈奴驚下銷納之，劍俠空空見也。此小處看文法也。《史記·貨殖列傳》：「千頭萬緒，忽敘忽議，讀者幾於入武帝建章宮，煬帝迷樓，然綱領不過『昔者』及『漢興』四字耳，是史公曾次，真如龍伯國人，可塊視三山，杯看五湖矣！此大處看

文法也。其讀文之妙無可言，當自得之而已！」見答來卿「至於作文之事，曰典。典者，所以尊古也，若單文無故實，則比於小學諸書，當時語，據制詔及功令，是也。曰自己出。毋勦意，毋勦辭，是也。曰審勢。能審勢，故文無定形，古之作者，言無同聲，章無同格，是也。曰不過乎物。不過乎物者，必稱其物也，言事言理言情皆以之。」見初集序目「作文之法，不過理實氣充。理實先須致知之功，氣充先須寡欲之功。故知非枝枝節節爲之，不過其心淵然於萬物之差別，一一不放過，故古人之文，無一意一字苟且也。寡欲非掃淨斬絕爲之，不過其心超然於萬事之攻取，一一不黏著，故古人之文，無一句一字塵俗也。其尺度，則《文心雕龍》《史通》《文章宗旨》等書先涉獵數過，可以得典型焉。若其變化之妙，在乎一心而已！」
見答來卿

其論古今文家利鈍，如論太史公曰：「敬十五六時，讀《史記》，以孟子、荀卿與諸子同傳，不得其說，問之舅氏清如先生。先生曰：『此法史家亡之久矣。太史公傳孟子，曰受業子思之門人，曰道既通，蓋太史公於孔子之後，推孟子一人而已，而世主卒不用，所用者，孫子、田忌、戰攻之徒耳！次則三騶子、淳于髡諸人，其術皆足以動世主，傳中所謂牛鼎之意也；而孟子獨陳先王之道，豈有幸耶！荀卿者，非孟子匹也，然以談儒墨道德廢，況孟子耶！蓋罪世主之辭也。其行文如大海泛蕩，不出於匡，如龍登玄臺，遠視有悠然之迹而已；孟堅、蔚宗不能至也！然世主所以不用孟子者，何也？陷於利也，而不知卽所以亡，故以梁惠王言利發端，又引孔子罕言利，以明孟子之所祖。是以荀卿形孟子，以論子形孟子、荀卿，故題曰《孟子荀卿列傳》。若孟堅蔚宗，當題孟、二騶、淳于列傳矣。此《史記》所以可貴也。』後見敬讀《文選》，曰：『汝知縱橫之道乎？言相並必言左右，意相附必有陰陽，錯綜用之，卽縱橫也。』敬思之竟

日，仍於先生之言《史記》得之。於是讀天下之書皆釋然矣。」見《孟子荀卿列傳書後》又曰：「作史之法有二，太史公皆自發之。其一《留侯世家》曰『所與上從容言天下事甚衆，非天下所以存亡故不書』；此作本紀世家列傳法也，而表書亦用之。其一《報任少卿書》曰：『究天人之際，通古今之變。』此作表書法也，而本紀世家列傳亦用之。《史記》七十列傳，各發一義，皆有明於天人古今之數，而十類傳爲最著。蓋三代之後，仕者惟循吏、酷吏、佞倖三途，其餘心力異於人者，不歸儒林，則歸游俠，歸貨殖，天下盡於此矣！其旁出者爲刺客，爲滑稽，爲日者，爲龜策，皆畸零之人。見《讀貨殖列傳》

讀《論衡》曰：「吾友張臯文嘗薄《論衡》，詆爲鄙冗，其《問孔》諸篇，益無理致。然亦有不可沒者，其氣平，其思通，其義時歸於反身。蓋子任稟質卑薄，卑薄故迂退，迂退故言煩而意近，其爲文以荀卿爲途軌而無其才與學，所得遂止此，然視爲商韓之說者，有逕庭焉。卑薄則易近於道，高強則易入於術，斯亦兼人者之所宜知也！」

論漢人文曰：「近有言漢人文多如經注，唐宋文，乃漢之變體者，吾誰欺，欺天乎！漢人文如經注者，止經師自序之文。其他奏疏、上書、記事、言情之文具在，皆與唐宋之文出入者也。推而上之，聖人之六經，文之最初者矣，唐宋諸大家悉與之相肖。《儀禮》之細謹，《考工記》之峭岩，其相肖者，如《畫記》、《說車》是也。若漢之經師，肖六經何體耶！且文固不論相肖也。」見《與趙石農》

論韓愈曰：「《平淮西碑》，是摹《書》《詩》二經，已爲人讀爛，不可學；《南海廟碑》，是摹漢人文，亦不可學；如書字摹古之帖，若復摹之，乃奴婢中重儷也。《送李愿序》，淺而近俗。《與于襄陽書》，俳而近滯。《釋言》窠臼太甚。《上宰相書》亦有窠臼，其後兩篇，天矯如龍矣！學韓文，先須分別其不可學者，乃最

要也，此外可學者，大都識高則筆力自達，力厚則調采自腴，而其用意用法之巧，有不可勝求者，略舉數篇以爲體例，如《汴州水門記》，節度使是何官銜，隴西公是何人物，水門之事則甚小，若一鋪敘，不成話矣！故記止三行，詩中詳其事業，於水門止一兩語點過，此是小題不可大作也。有大題亦不可大作者，李習之《拜禹言》是也。禹之功德，從何處贊揚，故止以數言唱歎之，知此雖著述汗牛充棟，豈有浮筆浪墨耶！如《殿中少監墓誌》，竟用點染法，韓公何以有此種筆墨？蓋因少監無事可書，北平王事業涵蓋天地，若不敘北平王，於理不可，然輕敘則不稱北平王，重敘則少監一邊寥落，喧賓奪主矣，是以並敘三代，均用喻言，使文體均稱，翻出異樣采繪，照耀耳目，且恐平敘三代，有涉形迹，是以將納交作連絡，存沒作波瀾，真鬼神於文者也！如《滕王閣記》有王子安一篇在前，其文較之韓公，乃瑜伽僧之於法王，寇謙之、杜光庭等之於仙伯，何足芥蒂，然工部所謂當時體也，其力亦足及遠。即有此文，不可不避，故韓公記從未至滕王閣用意，筆墨皆烟雲矣！如《貞曜先生》《施先生墓誌》，不列一事，以貞曜詩人，施先生經師，止此二意，便可推衍成絕世之文，若列一事，體便雜也。又如《曹戍王碑》、《許國公碑》，盡列衆事，以二人均有大功於民生國計，其事皆不可削，須擇之，部署之，鋪排之，以成吾之文，若一虛舉，文與人與官皆不稱也。以上意法引而伸之，可千可萬，可極無量。歐公蓋能得之而盡易其面貌，故差肩於韓公。若各大家，各名家，均有所得，不如歐公所得之多也，倘不如此看，則歐公之文，與凡庸惡軟美之文何別哉！」見《答來卿》。又曰：「余少讀韓退之《南山詩》及子厚《萬石亭記》、《小邱記》，喜其比形類情，卓詭排蕩，及長，始知其法自周秦以來體物者皆用之，非退之、子厚詩文之至者也！退之以重望自山陽改官京曹，方有大行之志，故其詩恢悅。子厚負釁遠謫，故其文清澗而迫隘。」見《沿霸山圖詩序》。

其論明清人文曰：「文章之事，工部所謂大成，著力雕鐫，便觀面千里，儼體尚然，何況散行，然此事如禪宗，籊桶脫落，布袋打失之後，信口接機，頭頭是道，無一滴水外散，乃爲天成，若未到此境界，一鬆口，便屬亂統矣，是以敬觀古今之文，越大成，越有法度。如《史記》，千古以爲疏闊，而柳子厚獨以潔許之。今讀《伯夷》《屈原》等列傳，重疊拉雜，及刪其一字一句，則其意不全，可見古人所得矣。至所謂疏古，乃通身枝葉扶疏，氣象渾雅，非不檢之謂也。敬於此事，如禪宗，看話頭，參知識，蓋三十年，惜鈍根所得，不過如此，然於近世文人病病，多能言之。其最粗者，如袁中郎等，乃卑薄派，聽明交游客能之。徐文長，乃瑣異派，風狂才子能之。艾千子等，乃描摹派，佔畢小儒能之。侯朝宗、魏叔子，進乎此矣，然槍棊氣重。歸熙甫、汪荅文、方靈皋，進乎此矣，然袍袖氣重。能掉脫此數家，則掉臂游行，另有蹊徑，亦不妨仍落此數家，不染習氣者，人習氣所不染，卽禪宗入魔法也。」見《與舒白香》。又曰：「古文，文中之一體耳，而其體至正，不可餘，餘則支，不可盡，盡則敝，不可爲容，爲容則體下。方望溪曰：『古文雖小道，失其傳者七百年。』望溪之言若是，是明之遵巖王慎中、震川，歸有光，本朝之雪苑侯朝宗、勺庭魏樸、堯峯汪琬諸君子，皆不得與乎望溪之所許矣！蓋遵巖、震川，常有意爲古文者也；有意爲古文而平生之才與學，不能沛然於所爲之文之外，則將依附其體而爲之；依附其體而爲之，則爲支、爲敝、爲體下，不招而至矣！是故遵巖之文，瞻則用力必過，其失也少支而多敝；震川之文，謹則置辭必近，其失也少敝而多支；而爲容之失，二家緩急不同，同出於體下，集中之得者十有六七，失者十而三四焉，此望溪之所以不滿也。李安溪先生曰：『古文韓公之後，惟介甫得其法。』是說也，視望溪有加甚焉！敬當卽安溪之意推之，蓋雪苑、苟庭之失，毗於遵巖，而銳過之，其疾徵於二蘇氏。堯峯之失，毗於震川，而弱過之，其疾徵於歐陽文

忠公。歐與蘇二家，所蓄有餘，故其疾難形，雪苑、勺庭、堯峯，所蓄不足，故其疾易見。然望溪之於古文，則又有未至者，是故旨近端而有時而歧，辭近醇而有時而寡。近日朱梅崖等，於望溪有不足之辭，而梅崖所得，視望溪益庫隘。文人之見，日勝一日，其力則日遜焉！敬生於下里，同州諸前達，多習校錄，成考證專家，爲賦詠者，或率意自恣，而大江南北以文名天下者，幾於猖狂無理，排濁一世之人，其勢力至今未已！疑指袁枚敬幸少樂疏曠，未嘗捉筆，求若輩所謂文之工者而浸漬之，其道不親，其事不習，故心不爲所陷而漸有以知其非，後與同州張臯文、吳仲倫、桐城王悔生游，始知姚姬傳之學，出於劉海峯，海峯之學，出於方望溪，及求三人文觀之，又未足以厭其心所欲云者！由是由本朝推之於明，推之於宋唐，推之於漢與秦，斷斷焉析其正變，區其長短，然後知望溪所以不滿者，蓋自厚趨薄，自堅趨瑕，自大趨小；而其體之正，不特遵嚴、震川以下，未之有變，即海峯、姬傳，亦非破壞典型，沈酣淫說者，若是，則所謂爲支、爲敝、爲體下者，皆其薄、其瑕，其小爲之。如能盡其才與學以從事焉，則支者如山之立，敝者如水之去腐，體下者如負青天之高，於是積之而爲厚焉，斂之而爲堅焉，充之而爲大焉。然所謂才與學者何哉？曾子固曰：『明必足以周萬事之理，道必足以適天下之用，智必足以通難知之意，文必足以發難顯之情，』如是而已！臯文最淵雅，中道而逝。仲倫才弱，悔生氣敗。見上曹麗笙侍郎書又曰：『海峯樓文集，細檢量，論事論人未得其平，論理未得其正，大抵銳於本師方望溪，而疏濶不及，才則有餘於弟子姚姬傳矣。而或者以潔目之，鄙見太史公之潔，全在用意掉落，千端萬緒，至字句不妨有可議者，今海峯字句極潔，而意不免蕪近，非真潔也！姬傳以才短不敢放言高論，海峯則無所不敢矣，懼其蔽道也，又好語科名得失，酒食微逐，胸中得無滓穢太清耶！』見與章澧南又曰：『朱梅崖，始終學韓公者也。大抵

韓公天資近聖賢豪傑，而爲文從經諸子入，故用意深博，用筆奧衍精醇。梅崖止文人，而爲文又從韓公入，故詞甚古，意甚今，求鍊則傷格，求道則傷調。自皇甫持正、李南紀、孫可之以後，學韓者皆犯之；然其法度之正，聲氣之雅，較之破度敗律以爲新奇者，已如負青天而下視矣！」見《答伊揚州書二》又曰：「仲倫達心而慤。惕甫強有方而自是。仲倫之於道也儉，惕甫之於道也越。」見《上秦小峴按察書》

其自敘學古文之經歷以及臨文之甘苦曰：「敬生四年，先府君教之四聲，八年，學爲詩，十一，學爲文，十五，學六朝文，學漢魏賦頌及宋元小詞，十七，學漢、唐、宋、元、明諸大家文，先府君始告以讀書之序，窮理之要，攝心專氣之驗，非是不足以爲文，於是復反而治小學，治經史百家，凡先府君手錄天官地志物理人事諸書，亦得次第觀之，然未有所發也，時於一二日中得一解而油油然，數十日中得一解而油油然，至索之心，誦之口，書之手，仍茫茫乎搖搖乎而已！先府君曰：『此心與氣之故也，不可以急治，當謹而俟之，減嗜欲，暢情志，嗜欲減，則不淆雜，情志暢，然後能立，能立然後能久大！』自是之後，敬不敢言文者十年！旋走京師，遊中原，南極黔楚，與天下篤雅恭敬之士交，竊窺其言行著述，因復理先府君之言，欲有所論撰，而下筆迂回細謹，塊然不能自舉！嗚呼！天地萬物，皆日變者也，而不變者在焉，不變者，所以成其日變也。文者，生乎人之心。天地萬物之日變，氣爲之，心之日變，神爲之，神之變，速於氣之變，而迂回之敝，循循然而緩，謹細之敝，切切然而急，於神皆有所闕焉，敢不力充之以求所以日變者哉！然而有不可變者。《典論》曰：『學無所遺，辭無所假。』《史記》曰：『擇其言尤雅者著于篇。』可以觀矣！」見《初集序目》又曰：「近作《後二僕傳》見《初集》，僕人止可作小傳，若將陳明光緣起敘入，亦非法，且筆下糾擾矣！細審之，其法皆自《史記》《漢書》來，無他謬巧，不過安放妥當耳！觀此便可知前明

及國朝諸家僕人傳之非法也。張彥遠《名畫記》曰：「失於自然而後神。失於神而後妙。失於妙而後精。精之爲病也，而成謹細。自然者上品之上，神者上品之中，妙者上品之下。精者中品之中，謹細者中品之中。」不佞之文，其精與謹細之間乎！然《名畫記》不列中下品，以下者卽所謂「近今之畫，煥爛而求備，錯亂而無旨」者是也。畫如是，文可知矣。」又曰：「書日之法，始於《尚書》而詳於《春秋》。《春秋》書魯大夫之卒，《穀梁》言：『日者正也；不日者惡也。』《公羊》則以不日爲遠。今考公子牙以後二十三人，賢與不肖，卒皆日，則不日者以遠失之，《公羊》爲是，故古者金石文卒皆書日也。《左傳》：『衆父卒，公不與小歛，故不書日。』孔疏以季孫行父等證之，是君臨宜日也。《文端碑》：原題《太子少師體仁閣大學士戴公神道碑銘見初集》。書「甲寅，皇上親臨喪次」，其法本此。至賜謚，賜祀賢良，賜祭，《春秋》無明文可比；然不日，則疑於與臨喪同日矣，故謹書之。《春秋》於喪之歸皆書日，桓公、昭公是也，故文端之喪至南昌，亦謹書之。葬之日不日，《公羊》有渴葬漫葬之說，而以不日爲正，然《春秋》書魯公之葬，夫人之葬各十，皆日，則他國之不日者，亦以遠失之，非如《公羊》之說也，故文端之葬，亦謹書之。數條皆金石文通例也。若書三代封贈之法，其以一筆書者，必官封無異焉，今篋圖先生，文端之父有官階，不可沒，彭太夫人受夫封，亦不可沒，是以前後詳書，而中以如曾祖、如曾祖妣變文以隔之，此亦金石文通例也。其所以必三代排比書，不合書有官無官，有封無封，而一筆以封贈結之者，抑更有說。此文自嘉慶元年至如公式，以日排比書，舉人，中書，以文端之年排比書，賜及第以後，以國家年號排比書，而於賜及第書文端之年，爲上下轉接，蓋前後數百言皆排比法，以見謹也，若書三代獨不排比，則爲文體不純矣！《史記》《漢書》有排比數千言者，其後必大震蕩之。此文實在前，虛在後，所以如此者，因通篇不書文端一事，故用排

比法敘次家世科名官位，然後提筆作數十百曲，皆盤空擣虛，右回左轉，令其勢稽天匝地，以極震盪之力焉；此法近日諸家無人敢爲，亦無人能爲也！東坡《司馬公神道碑》，虛在前，實在後，所以如此者，由一切事業，不足以盡文正，故竭力推闡在前，後列數大事，止閒閒指示，如浮雲，如小石，此文正人之大，東坡手筆之大也！文端雖賢，必不敢自儕古人；敬才弱，必不敢犯東坡，因顛倒其局，用之，至變化則竊取子長，嚴整則竊取孟堅也。自南宋以來，束縛修飾，有死文，無生文，有卑文，無高文，有碎文，無整文，有小文，無大文。韓子詩曰：「想當施手時，巨刃摩天揚。」南宋以後，止於水航之尺寸粗細用心，而不想施手時，故陵夷至此也！婦人稱太，始於太姜、太任、太姒。戰國始見太后之稱。漢晉以來，有太夫人之稱。其夫在不稱太，乃定制於北宋，至今沿之。而夫婦皆亡，則仍不稱太，與歷代升祔不稱太同。文端爲修撰之時，篋園先生夫婦相繼而逝，故封一品時，應去太字。」見《上舉主陳笠帆先生書》。又曰：「春麓先生乃天下後學典型，不止仕宦上流而已，敬初至浙江，即蒙異賞。今先生身後，得操筆墨以論次功德，何樂如之！」原題《浙江分巡杭嘉湖道陝西候補道李公墓表》。見《初集》。惟是墓表之法，止表數大事，視神道碑廟碑體不同，視墓誌銘體亦不同，墓誌銘可言情言小事，表斷不可，神道碑廟碑，凡崇宏寬博之言皆可掄揚，墓表必發明實事，故墓表之善最難。今止表浙江二事，其二事自爲首尾，文卽以之爲首尾，而中間隱括諸事以隔之，此法《史記》《漢書》常用之而能使人不見，韓公偶用之卽見，乃才之大小淺深也。昔歐公誌尹河南，不知者頗有他說，歐公至爲文力辯。今敬表春麓先生，自謂舉一羽而知鳳，覩一毛而知麟。」見《與李愛堂》。又曰：「作《同遊海幢寺記》。」見《二集》。此文儒爲主中主，禪爲主中賓，琴與詩爲賓中主，畫與棋與酒爲賓中賓。其次序，前五節皆以禪消納之，爲後半重發無和尚張本；而儒止瞥然一見，如大海中日影，大山

中雷聲，此子長《河渠》《平準書》《伯夷》《屈原賈生列傳》法也。海幢形勢佳勝，先於獨遊時寫足，入同遊後，不必煩筆墨，此子長《項羽本紀》《李將軍傳》法也。敬古文盡出子長，其孟堅以下，時參筆勢而已！「見《與黃香石》」又曰：「光祿公人倫模楷，專立祠堂，頌述功德，敬得附名其間，可謂幸甚！惟命以作記。敬思記體謹嚴，唐宋諸名人，雖破體爲之，不過抑揚唱歎以遠神激蕩而已，氏族官位，既不能詳列，學問事功，又不能實載，是以改作祠堂碑銘，原題《前光祿寺卿伊公祠堂碑銘》見《二集》可以用大筆發揚，用重筆結束。太夫人祔廟，亦於體得書矣。古者講學之人，祠堂記多稱號稱先生，今用祠堂碑例，宜稱官稱公。道學異同，若入碑文中，少涉筆，則不透徹；多涉筆，則辯體論體矣；不涉筆，則通篇之文如玉卮無常，玉盤缺角，故起首推明朱子之學，後列高宗之諭及文恭之論，君友共證明之，遞入銘中，可以縱橫往來，使銘辭瀏然確然，與碑文相照耀，乃變法中正法也！」見《答伊揚州書三》又曰：「史筆不難於簡，難於有餘，最爲高識名論。敬更有進者，王右軍寫《樂毅》，則情多拂鬱，書《畫贊》，則意涉環奇，《黃庭經》則怡懌虛無，《太史箴》又縱橫爭折。此如太史公傳《儒林》《循吏》，皆筆筆內斂，與《游俠》《酷吏》不同。是以敬於《鄧公誌》文，不敢縱宕行之，遂致神太迫，氣太勁！原題《漢中府知府譚漢興道鄧公墓誌銘》見《二集》若《儒林》《循吏》，神與氣何嘗不有餘，此古人之不可及也！」見《答邱龍耕書》

其論佛經之文曰：「凡佛經之說，其辭旨無甚大異。《楞伽經》不立一義，而諸義皆立，悉與《金剛經》相比，惟艱晦過當。達摩至中國，掃除一切文字，以此經付慧可大師，蓋艱則難入，晦則難出，難入則意識無所用，難出則怡然渙然者，皆得之自然，乃即文字中斷文字障法也！至鴻忍大師易以《金剛經》，簡直平易，人皆樂從，故道法大行，而禪復流於文字，此五宗語錄之所以歧互也！經中開卷斥百八

句皆非，則全經語句無著爲最勝處。蓋《金剛經》先說法，後說非法；此經先說非法，後說法，一而已矣！其言不離妄想，卽見正智；與《楞嚴》無始生死，根本無始元清淨體義同；與《法華經》是法非思量分別之所能解，惟有諸佛乃能知之義亦同。佛法豈在多求耶！「見《楞嚴經》書後一」如此下語，人以憚子居爲宋學者固非，漢唐之學者亦非，要之男兒必有自立之處，不隨人作計，如蚊之同聲，蠅之同嗜，以取富貴名譽也！「見《得方九江》又曰：『《維摩詰經》，鳩摩羅什所譯大乘經，史稱與釋道安相合，白大傳曰：『證無生忍，造不二門，住不可思議解脫，莫極於《維摩經》』，蓋指其中精語言之，行文則舛陋平雜，不足觀也。其經之全指，在註明維摩詰示疾爲緣起，蓋佛教人出家，而維摩詰以居士見身，故此經佛道品言煩惱泥中有衆生起，佛法乃卽病與藥耳！然執藥治病，藥卽病矣，故下章入不二門品，盡掃除之，所以爲大乘經也！如此義諦，惟佛地位能決之，諸弟子並大菩薩，豈任問此疾耶！蓋全指皆出於佛，而筆授非過量人，雖釋道安、鳩摩羅什無如之何也。」「見《維摩詰經》書後」持之有故，強辯急論，要刪其指以備一家之言云。

茗柯文初編一卷二編二卷三編一卷四編一卷補編二卷外編二卷

武進張惠言字皋聞撰。惠言，嘉慶己未進士，官編修；其文初二三三編皆惠言自定；四編則其甥董士錫選錄；而《補編》《外編》，則其門人仁和陳善以所藏遺稿屬光澤高澍然寫定。《四編》以上，其師儀徵阮元於嘉慶十四年序而刊之。至同治八年，惠言之曾孫曰式曾者寫錄重刻；湘鄉曾國藩序焉。惠言由詞賦以爲古文，蓋吾宗伯坰及桐城王灼開其塗轍，而因以得法於劉大櫟者也。惠言與惲敬同里驪好，觀其議論文章，確切道德，以爲凡余之友，未有如子居之深相知者。而敬《大雲山房文稿》有《與湯編修

書，論惠言之所以爲學者甚詳。其辭曰：「臯聞爲人，其始爲詞章，志欲如六朝諸人之所爲而止，已遷而爲呂黎、廬陵，已遷而爲前後鄭，已遷而爲虞、許、賈、孔諸儒，最後遷而爲濂、洛、關、閩之說，其所學皆未竟，而世徒震之，非知臯聞者也！臯聞寡欲多思，寡欲，故言行多行於自然，而有爲者鮮，多思，故事藝皆出於必然，而無爲者亦鮮。自然必然二者合之，進道之器也，然有爲者鮮，則於道易近，無爲者亦鮮，則於道易遠，必也有爲者亦歸於無爲，則庶幾於斯道乎！」今按集中，有詞賦之文，有韓歐之文，亦有漢儒虞鄭之學，而無濂洛關閩之說，意爲之而未及發也。而曾國藩序，則盛推惠言之不以考據之瑣碎害詞章，不以詞賦之塗澤爲古文，並行不悖，各適其可，其辭曰：「文章之變多矣，高才者好異不已，往往造爲瑰偉奇麗之辭，倣效漢人賦頌，繁聲僻字，號爲復古，曾無才力氣勢以驅使之，有若附贅懸瘤，施膠漆於深衣之上，但覺其不類耳！敘述朋舊，狀其事蹟，動稱卓絕，若合古來名德至行，備於一身，譬之畫師寫真，衆美畢具，偉則偉矣，而於其所圖之人，固不肖也！吾嘗執此以衡近世之文，能免於二者之譏實鮮，蹈之者多矣！臯聞先生編次《七十家賦》，評量殿最，不失銖黍，自爲賦亦恢宏絕麗，至其他文，則空明澄澈，不復以博奧自高。平生師友，多超特不世之才，而下筆稱述，適如其量，若帝天神鬼之監臨，褒譏不敢少溢，何其慎歟！自考據家之道既昌，說經者專宗漢儒，厭薄宋世義理心性等語，甚者詆毀洛閩，披索疵瑕，枝之蒐而忘其本，流之遂而遺其源，臨文則繁徵博引，考一字，辨一物，累數千萬言不能休，名曰漢學，前者自矜創獲，後者附和偏誣而不知返，君子病之！先生求陰陽消息於《易》，虞氏，求前聖制作於《禮》，鄭氏，辨《說文》之諧聲，剖析毫芒，固亦循漢學之軌轍，而虛衷研究，絕無陵駕先賢之意，萌於至隱，文詞溫潤，亦無考證辨駁之風，盡取古人之長，而退然若無一長可恃，其蘊蓄深厚，

遇而蔽之，能焉而不伐，斂焉而愈光，殆天下之神勇，古之所謂大雅者歟！」大抵惠言與惲敬同開陽湖，出於桐城而自爲變化。姚鼐由歸有光以數歐陽修而斬於潔適，其蔽也，謹細有餘而不足於雄奇！惠言由劉大櫟以模韓愈而持以莊敬，其蔽也，矜持太過而或損其神明！惲敬取變化於史公，取嚴整於班書，而詞筆則出王介甫，其爲文也峭悍以肆。惠言取變化於莊子，取色澤於《騷》賦，而體段則學韓退之，其爲文也瑰麗而矜。惲敬數史公之道變，而恢詭不如，惠言有韓筆之緊健，而氣韻特遜。惲敬予智自雄，不免矜厲，而惠言澤古者深，又患模擬，如《黃山兩賦》之模《離騷》，《七十家賦鈔目錄序》之模《莊子·天下篇》，《周易鄭荀義序》之模太史公談《六家要指》，《畢訓咸詠史詩序》之模韓愈《原毀》，《莊達甫無名人詩序》之模《送王填序》，《先祖妣事略》之模歸有光《先祖事略》，《書左仲甫事》之模韓愈《柳州羅池神廟碑》及孫樵《書何易于》，蹊逕未化，其昭然者也，差幸智過其師，自出機杼，故不以模擬爲嫌。采錄可誦，寫目如左。

賦類 遊黃山賦 黃山賦 寒蟬賦 秋霖賦 望江南花賦 竹樓賦 蕉花賦 館試靈臺偃伯賦 館

試蜡賓說禮賦 館試大愷樂賦 愛石圖賦 擬庾子山七夕賦

序跋類 七十家賦鈔目錄序 莊先生遺文後序 周易虞氏義序 周易鄭荀義序 易義別錄序 詞選

序 畢訓咸詠史詩序 莊達甫無名人詩序 楊雲珊覽輝閣詩序 莊達甫攝山采藥圖序 說江安

甫所鈔易說 雁黃殘稿序代

書牘類 與左仲甫書 上阮中丞書

贈序類 送張文在分發甘肅序 贈毛洋溟序 送錢魯斯序 送計伯英歸吳江序

傳狀類 周維城傳 濟南知府莊君傳 先府君行實 先祖妣事略 先妣事略 贈文林郎袁君家傳

袁太孺人傳 陳長生傳

碑誌類 莊君墓表 封文林郎惲君墓誌銘 楊君茹征墓誌銘 恭城知縣陸君祠版文 江安甫葬銘

陸以寧墓誌銘 例贈文林郎許君墓誌銘 故儒林郎祝君墓誌銘

雜記類 書左仲甫事 書山東河工事 關東紀程

哀祭類 祭江安甫文 告安甫文三首 祭金先生文 祭曹大司農文 公祭湯太夫人文

右文五十六篇。大抵文章原本詞賦，經學尤邃《虞易》。其論《易緯》曰：「緯者，其原出於七十子之徒，相與傳夫子之微言，因以識陰陽五行之序，災異之本也。蓋夫子五十學《易》而知天命。子貢曰：『夫子之言性與天道，不可得而聞。』」是以其言者，六藝之文著之。其難言者，游夏之徒，或口受其傳指，益增附推闡以相傳授。秦漢之間，師儒第而錄之，其亦有技術之士，以其所能推說於篇，參錯間出，故其書難而不能醇。劉歆之於緯，精矣！當其時，河洛之文大備。而《七略》不著錄，將以符命之學，出於其中，在所禁祕耶？鄭康成氏，漢之大儒，博通古文，甄錄而爲之注，則緯之出於聖門，而說經者之不可廢也審矣！至隋，而六經之緯亡滅，惟《易》獨存！後漢書注載其目曰：《稽覽圖》、《乾鑿度》、《坤靈圖》、《通卦驗》、《是類謀》、《辨終備》；宋而更有《乾元序制記》、《乾坤鑿度》。宋儒排而擯之，訖於元明，亡佚既多，其近完存者，《稽覽圖》、《乾鑿度》、《通卦驗》。《稽覽圖》論六日七分之候，《通卦驗》言八卦晷氣之應，此孟京氏陰陽之學。《乾鑿度》論乾坤消息，始於一，變而七，進而九，一陰一陽相並而合於十五，統於一元，正於六位，通天意，理人倫，明王度，蓋《易》之大義，條理畢貫，自諸儒莫能外之，其爲夫子之緒

論，田楊以來先師所傳習，較然無疑！」見《易緯略義序》。《易》之傳，自商瞿子以至田生惟一家，焦氏後出，及費氏爲古文，而漢之《易》有三。自是之後，田氏之《易》、楊、施、孟、梁邱、高氏而五，惟孟氏久行。焦氏之《易》，爲京氏。費氏興而孟京微焉！夫以傳述之統，田生、丁將軍之授受，則孟氏爲《易》宗無疑，而其行不及費氏者，以傳授者少，而費氏之經，與古文同，馬融、鄭康成爲之傳注故也。王弼注行而古師說微！孔穎達正義行而古《易》書亡！」見《易義別錄序》。

其論漢《易》三家曰：「漢儒說《易》，大致可見者三家：鄭氏、荀氏、虞氏。鄭、荀，費氏《易》也。虞，孟氏《易》也。鄭氏言禮。荀氏言升降。虞氏言消息。昔者伏羲作十言之教，曰乾坤震巽坎離艮兌消息，鄭氏贊《易》實述之。至其說經，則以卦爻無變動，謂之彖辭。夫七八者象，九六者變，經稱用九用六，而辭皆七八，名與實不相應，非伏羲之旨也；爻象之區既隘，則乃求之於天，乾坤六爻，上繫二十八宿，依氣而應，謂之爻辰，若此，則三百八十四爻，其象十二而止，殆猶嫌焉；此又未得消息之用也。然其列貴賤之位，辨大小之序，正不易之倫，經綸創制，吉凶損益，與《詩》《書》《禮》《樂》相表裏，則諸儒未有及之者也。荀氏之說消息，以乾升坤降，萬物始乎泰，終乎否。夫陰陽之在天地，出入上下，故理有易有簡，位有進有退，道有經有權，歸於正而已，而荀氏言陽常升而不降，陰常降而不升，則姤遯否之義，大於既濟也。然其推乾坤之本，合於一元，雲行雨施，陰陽和均，而天地成位，則章章乎可謂得《易》之大義者也！虞氏考日月之行以正乾元，原七九之氣以定六位，運始終之紀以敘六十四卦，要變化之居以明吉凶悔吝，六爻發揮旁通，乾元用九，則天下治，以則四德，蓋與荀同原而闕大遠矣！王弼之說，多本鄭氏而棄其精微，後之學者習聞之，則以爲費氏之義如此而已！其盈虛消長之次，周流變動之用，不詳於

《繫辭》《彖》《象》，概以爲不經。若觀鄭荀所傳卦氣十二辰八方之風，六位世應，爻互卦變，莫不彰著。劉向有言：「《易象》皆祖田何，楊叔、丁將軍大誼略同」，豈不信哉！」見《周易鄭荀義序》。

其論《虞氏易》曰：「自漢成帝時劉向校書，考《易》說，以爲諸家皆祖田何，楊叔、丁將軍大義略同，惟京氏爲異。」而孟喜傳《易》家陰陽，其說《易》本於氣，而後以人事明之，八卦六十四象，四正七十二候，變通消息，諸儒皆祖述之，莫能具。當漢之季，扶風馬融作《易傳》，授鄭康成。康成作《易注》，而荊州牧劉表，會稽太守王朗，潁川荀爽，南陽宋忠，皆以《易》名家，各有所述。惟翻傳孟氏學，作《易注》，自稱高祖父故零陵太守光少治孟氏《易》。曾祖父故平輿令成續述其業。至祖父鳳，最有舊書，世傳其業，至翻五世。其言《易》以陰陽消息六爻，發揮旁通，升降上下，歸於乾元用九而天下治，依物取類，貫穿比附，始若瑣碎，及其沈深解剝，離根散葉，鬯茂條理，遂於大道，後儒罕能通之！自魏王弼以虛空之言解《易》，唐立於學官，而漢世諸儒之說微，獨資州李鼎祚作《周易集解》，頗采古《易》家言，而翻注爲多！其後古書盡亡，而宋道士陳搏以意造爲《龍圖》，其徒劉牧以爲《易》之《河圖》《洛書》也。河南邵雍又著《先天後天》之圖，宋之說《易》者翕然宗之，以至於今，牢不可破，而《易》陰陽之大義，蓋盡晦矣。清興百年，元和徵士惠棟始考孟、京、荀、鄭、虞氏古義，作《易漢學》；又自爲解釋，曰《周易述》；然掇拾於已廢之後，左右采獲，十無二三，其所述大抵宗禰虞氏，而未能盡通，則旁徵他說以合之。蓋從唐、五代、宋、元、明，朽壞散亂千有餘年，區區修補撝拾，欲一旦而其道復明，斯固難也！翻既承世學，又具見馬、鄭、荀書，考其是非，故其義爲精。又古書亡，而漢魏師說可見者十餘家，惟鄭、荀、虞三家，略有梗概可指說，而虞又較備，然則求七十子之微言，田何、楊叔、丁將軍之所傳者，舍虞氏之注，何所自焉！」見《周易

其論賦之原流曰：「賦烏乎統？曰統乎志。志烏乎歸？曰歸乎正。夫民有感於心，有概於事，有達於性，有鬱於情，故有不得已者而假於言。言，象也，象必有所寓，其在物之變化，天之濛濛，地之囂囂，日出月入，一幽一明，山川之崔蜀杳伏，畏佳林木，振礮谿谷，風雲霜霧，霏震寒暑，雨則爲雪，霜則爲露，生殺之代新而嬗故，鳥獸與魚，草木之華，蟲走蠅趨，陵變谷易，震動薄蝕，人事老少，生死傾植，禮樂戰鬥，號令之紀，悲愁勞苦，忠臣孝子，羈士寡婦，愉佚愕駭，有動於中，久而不去，然後形而爲言，於是錯綜其詞，回悟其理，鏗鏘其音以求理其志，其在六經則爲《詩》。《詩》之義六：曰風，曰賦，曰比，曰興，曰雅，曰頌。六者之體，主於一而用其五，故風有雅頌焉，《七月》是也，雅有頌焉，有風焉，《烝民》《崧高》是也。周澤衰，禮樂缺，《詩》終三百，文學之統息。古聖人之美言，規矩之奧趣，鬱而不發，則有趙人荀卿，楚人屈原，引詞表指，譬物連類，述三王之道以譏切當世，振塵滓之澤，發芳香之鬯，不謀同稱，並名爲賦，故知賦者，詩之體也。其後藻麗之士，祖述憲章，厥製益繁，然其能者之爲之，愉暢輪寫，盡其物，和其志，變而不失其宗，其淫宕佚放者爲之，則流遁忘返，壞亂而不可紀！譎而不觚，盡而不殺，肆而不衍，比物而不醜，其志潔，其物芳，其道杳冥而有常，此屈平之爲也，與風雅爲節，渙乎若翔風之運輕輶，灑乎若玄泉之出乎蓬萊而注渤澥！及其徒宋玉、景差爲之，其質也華然，其文也縱而後反，雖然，其與物椎拍宛轉，冷汰其義，穀輅於物，芴芴乎古之徒也！剛志決理，輒斷以爲紀，內而不汙，表而不著，則荀卿之爲也，其原出於禮經，樸而飾，不斷而節。及孔臧、司馬遷爲之，章約句制，弄不可理，其辭深而旨文，確乎其不頗者也！其趣不兩，其於物無強力，若枝葉之附其根本，則賈誼之爲也，其原出

於屈平，斷以正義，不由其曼。其氣則引費而不可執，循有樞，執有廬，頡滑而不可居，開決宦突而與萬物都，其終也芴莫而神明爲之藁，則司馬相如之爲也，其原出於宋玉。揚雄恢之，脅入竅出，緣督以及節，其超軼絕塵而莫之控也。其波駭石罅而沒乎其無垠也。張衡盱眙，塊若有餘，上與造物爲友，而下不遺埃墟，雖然，其神也充，其精也茶！及王延壽、張融爲之，傑格拮擻，鉤子菽梧而倏倏可觀，其於宗也無蛻也。平敞通洞，博厚而中，大而無瓠，孫而無弧，指事類情，必偶其徒，則班固之爲也，其原出於相如，而要之使夷，昌之使明。及左思爲之，博而不沈，贍而不華，連玆焉而不可止。言無端厓，倣倪以爲質，以天下爲郭廓，入其中，眩震而謬悠之，則阮籍之爲也，其原出於莊周，雖然，其詞也悲，其韻也迫，幽患之詞也！塗澤律切，苓蔽紛悅，則曹植之爲也，其端自宋玉，而枿其角，摧其牙，離其本而抑其末，浮華之學者，相與尸之，率以變古，曹植則可謂才士矣，摺摺乎改繩墨，易規矩，則佞之徒也！不摺於同，不獨於異，其來也首首，其往也曳曳，動靜與適，則陸機、潘岳之爲也，其原出於張衡、曹植，矯矯乎振時之儔也！以情爲裏，以物爲襮，鑿彫風雲，琢寫支鄂，其懷永而不可忘，岔乎其氣，煊乎其華，則謝莊、鮑照之爲也，江淹爲最賢，其原出於屈平《九歌》，其掩抑沈怨，冷冷輕輕，其縱脫浮宕而歸大常，鮑照、江淹，其體則非也，其意則是。逐物而不反，駘宕而駁舛，俗者之固而占是抗，其言滑滑而不背於塗輿，則庾信之爲也，其規步矐矐，則揚雄、班固之所引衡而控轡，惜乎，拘於時而不能騁，然而其志遠，其思哀，其體之變則窮矣！後之作者概乎其未之聞也。」（見《七十家賦鈔目錄序》）

其《自序》曰：「余少學爲時文，窮日殫力，屏他務爲之十餘年，乃往往知其利病。其後好《文選》辭賦，爲之又如爲時文者三四年。余友王悔生灼見余《黃山賦》而善之，勸余爲古文，語余以所受於其師

劉海峯者，爲之一二年，稍稍得規矩。已而思古之以文傳者，雖於聖人有合有否，要就其所得，莫不足以立身行義，施天下，致一切之治。荀卿、賈誼、董仲舒、揚雄以儒。老聃、莊周、管夷吾以術。司馬遷、班固以事。韓愈、歐陽修、曾鞏以學。柳宗元、蘇洵、軾、轍、王安石雖不逮，猶各有所執持，操其一以應於世而不窮。故其言必曰道，道成，而所得之淺深醇雜，見乎其文。無其道而有其文者，則未有也！故乃問而考之於經，求天地陰陽消息於《易》、虞氏，求古先聖王禮樂制度於《禮》、鄭氏，庶窺微言奧義以究本原。已而更先太孺人憂，學中廢。嘉慶之初，退鄉學於欽金先生，三年圖《儀禮》十卷，而《易義》二十九卷亦成，輒以述其迹象，闢其戶牖。若乃微顯闡幽，開物成務，昭古今之統，合天人之紀，若涉淵海其無涯涘。貧不能自克，復役役於時，自來京師，殆又廢棄。嗚呼！余生四十矣。計自知學在二十以後，中間奔走憂患，得肆力於學者纔六七年，以六七年之力而求所謂道者，敢望其有得耶！使余以爲時文辭賦之時畢爲之，可得二十五年，其與六七年者相去當幾何！惜乎其棄之而不知也。然余之知學於道，自爲古文始！」見《文稿自序》。錢魯斯伯桐長余二十四歲，以嘗從先君子受經，故余幼而兄事之。魯斯以工作書爲詩名天下，交友徧海內。余年十六七歲時，方治科舉業，問以其暇學魯斯爲書，書不工，又學魯斯爲詩，詩又不工，然魯斯嘗誨之。越十餘年，余學爲古辭賦，乾隆戊申自歙州歸，過魯斯而示之，魯斯大喜，顧而謂余：「吾嘗受古文法於桐城劉海峯先生，顧未暇以爲。子儻爲之乎？」余愧謝未能。已而余游京師，思魯斯言，乃盡屏置曩時所習詩賦，若書不爲而爲古文，三年乃稍稍得之，而余留京師六年，歸更太孺人之憂，復游浙中，轉入歙，而魯斯客湖南北久乃歸，參差不得見者十三年。今年夏，余自歙來杭州，留數月，一日，方與客遇，有覲然而來者，則魯斯也！其言曰：「吾見子古文，與劉先生言合。今

天下爲文，莫子若者！子方役役於世，未能還鄉里。吾幸多暇，念久不相見，故來與子論古文。」魯斯遂言曰：「吾曩於古人之書，見其法而已，今吾見拓於石者，則如見其未刻時；見其書也，則如見其未書時。夫意在筆先者，非作意而臨筆也。筆之所以入，墨之所以出，魏、晉、唐、宋諸家之所以得失，熟之於中而會之於心，當其執筆也，繇乎其若存，攸攸乎其若行，冥冥乎，成成乎，忽然遇之而不知所以然，故曰意者非法也，而未始離乎法，其養之也有源，其出之也有物，故法有盡而意無窮。吾於爲詩，亦見其若是焉，豈惟詩與書，夫古文亦若是則已耳！」嗚呼！魯斯之於古文，豈曰法而已哉！抑余之爲文，何足與此！」見《送錢魯斯序》。

其論篆書曰：「凡事得其所從入，然後可以決是非。夫篆徑生隸，隸密生分，分飭生楷，原流體降，不紊由來，則筆法可知。而分楷之法，所以傳者，由作者代工，而古刻多有。今篆文之存於金石者，數矣！譌贗者又甚焉！學者不見古文，各以意爲點畫。至如《琅邪》、《嶧山》，形具焉爾，《陳倉石鼓》，世疑非真，然揆厥典型，此爲最也！若乃漢人之書，碑碣額署，粲然猶存，大都奇恣縱宕，鳥獸龍擾，其筆墨之所出入，意象之所來往，隅鉤之所激厲，波瀾之所動澹。蓋亦足以尋其毛角，會其神怡者矣！唐李陽冰書自出新意，一爲工整，昔人謂其筆法如蟲蝕鳥步；今觀所傳《怡亭石刻》，奔放跳躍，其於古法，軌轍猶存；餘者率婀娜纖脆，蓋是俗工摹刻，非其始然！而世之學者，局於所見，苟遂固陋，謂傳刻之形爲真，訾漢人之書謂詭異，謂篆法不得與楷分同，豈不謬哉！今錢獻之^站以其妍俗鄙陋之書，自是所學，以爲斯冰之後，直至小生。京師名士盛爲篆學，大抵無慮奉爲憲章，橫街塞澗，牢不可破！余夙好此，未能力，偶以意作書，爲諸老先生所訶怪！獨見當世能篆書者，有懷寧鄧石如字頑伯，爲之甚工，曾一至京師，

京師之名能書者，爭擯斥之，默默以去。而惜其人拓落，又無他才，衆人見其容貌，因而輕之，不足以振所學！」見《與錢魯斯序》凡所論議，逐迹窮源，次取其語，足備考覽。

養一齋文集十九卷補遺一卷

武進李兆洛字申耆撰。兆洛，嘉慶進士，官安徽鳳臺縣知縣，以通儒碩望有聞州部，藏書卷逾五萬，皆手加丹鉛，校義脫，正錯悟，矢口舉《十三經》辭，無遺失，上自漢唐，下及近世諸儒說，條別得失，不檢本。尤嗜輿地學，備購各省通志，較互千餘年來水地之書，證以正史，刊定顧祖禹《讀史方輿紀要》之與原史不符者。同時交好，如涇縣包世臣、仁和龔自珍，斂手交推。集首冠《李鳳臺傳》，即出包世臣手。晚年主江陰之暨陽書院，余伯祖蔭湘公，諱維樾余祖榕初公，諱維楨皆受業爲弟子。集中《錢君鑒遠傳》，即余高祖，諱士鏡而卒之曰：「子浩，能守其業，而潤達如之，延名師課子，盡其敬。維樾、維楨皆補弟子員矣，喜然進取，所至未可量也！」又系贊曰：「食其報者，其在維樾、維楨矣！」又《似山居圖記》爲余曾祖觀濤公作，諱即浩也，文中稱「使令子維楨，索余記之。」又《跋恆星圖》云：「命江陰六生承如、宋生景昌、六生嚴、徐生思緒、無錫錢生維樾，謹遵《欽定儀象考》，成《歲差加減表》。」又《陸傳嚴元鼎易參跋》云：「無錫錢生蔭湘家藏是書，持以示余。」兆洛與桐城方東樹、姚瑩、新城陳用光、宜興吳德旋，上下議論，四人者，皆治桐城家言，而兆洛不囿於其說，其論文以不分駢散，導源漢魏，實開同光以來不立宗派古文家法脈，張之洞《書目答問》古文家有「不立宗派」古文家一目，包世臣所爲傳，謂「時論盛推歸方，崇散行而薄駢偶，君則謂唐宋傳作，皆導源秦漢，秦漢之駢偶，實唐宋散行之祖」者也，以故集中所錄，駢散雜出，然議

論非不俊偉，而誦所作，殊未成家！駢文氣敝色黯，絕無光響。散文體竄辭膚，不見精悍。時欲爲魏晉之朗潤，而無其風華，亦有放歐蘇之機利，而遜其氣調，左支右詘，無適而可；視張惠言，無其骨重，比之惲敬，又嫌氣薄，陽湖三家，不無蛇足之誚！觀集中《復陳石士侍講書》曰：「兆洛質僅中人，學乖深造，雖不廢誦讀，而以粗致駁，以駁致陋，迄無所就；至所爲詩文，類多牽率酬應，閱時見之，未嘗不赧然汗下也！況敢自彰露以播其惡哉！」則亦未嘗無自知之明，然其至者，亦復矜平躁釋，自然和雅。而遺集編錄，出之及門，徒以多爲貴。《初刊本》，爲咸豐二年高承鉅哀輯同門所藏，以聚珍板排印爲二十六卷，尤卑弱猥瑣，且有私意竄改糅雜其間，識者病之！此二十卷，爲光緒四年戊寅，兆洛之曾孫曰陽者所重刊本，云已刪汰譌僞，然猶有未盡善者！采錄可誦，篇目如左。

序跋類 駢體文鈔序 鳳臺縣志序 鳳臺食貨志序 鳳臺溝洫志序 鳳臺選舉志序 鳳臺人物志序

蔬園詩序 鳳氏經說序 皇朝文典序 舊言集序 鷗亭詩集序 太玄闡祕序 周官記序 詩

古微序 詒經堂續經解序 兩漢五經博士考序 珍藝先生遺書序 小湖詩鈔序 鄒道鄉先生集

序 鄭愿廷先生集序 趙厚子岱頂看雲圖序 姚石甫文集序 天籟集序 愛石圖題辭續編序

十三經斷句序 詩經申義序 過學齋詩鈔序 南漢紀序 抱經堂詩鈔序 說文述誼序 後漢三

公年表序 楊舍郭氏宗譜序 夢游圖序 師竹軒賦鈔序 跋咸淳昆陵志 跋孫文介公書 跋孫

虔禮書景福殿賦 跋惲南田書 跋吳山子游小幕山記後 跋米襄陽書高渤海詩真蹟 書完白翁

傳後 唐荆川先生墨蹟書後 跋楊忠烈公手札 跋左忠毅公手札 跋張子琴齋封 藏文衡山札

跋唐營若千字文 皇明修文備史書後 跋惲南田楷書杜詩 跋鄧完白真書 跋方彥聞隸書

跋祝京兆小草書杜詩卷 跋元人畫卷 鵝羣帖跋 自題草書臨本後

奏疏類 謝賜平定教匪紀略疏代

書牘類 與祝子常三首 答陶雲汀宮保 答湯子壘 與方植之 與鄧生守之三首 答穆鶴舫中堂

贈序類 送沈俠侯學博歸老序 鄧守之字說

傳狀類 伯兄五初先生行述 江蘇學政辛公行述 光祿寺卿康公行狀 孝廉方正祝君行狀 附監生

考取州吏目莊君行狀 明登萊巡撫陶朗先傳 桐城姚氏薑塢惜抱兩先生傳 莊珍藝先生傳 循

吏靜溪康公傳 外祖奚蕉峯先生傳 無心居士小傳 沈君夢塘傳 董君方立傳 禮部劉君傳

張君翰風傳 陸君劭文傳 方君彥聞傳 祝君廣廳家傳 賢令黃君仁山傳 管生孝逸傳 黃潛

夫家傳 沙生慎之小傳 舊言集詩人小傳

碑誌類 永康州知州方君墓誌銘 慶陽府知府盛君墓誌銘 東湖縣知縣洪君墓誌銘 旌德縣知縣陳

君墓誌銘 石如鄧君墓誌銘 北江鄒君祠版文 署禮部左侍郎康公太夫人顧氏神道碑 魏母符

宜人墓誌銘 湖南巡撫左公墓誌銘 貴溪縣知縣陸君墓誌銘 慶陽府知府薛君墓誌銘 澗賓顧

君墓誌銘

雜記類 墨石潭順濟龍王廟碑記 瑪瑙泉別墅記 移建奎星閣碑記 修鳳臺縣署續記 懷遠縣重修

文廟碑 修承賢館記 趙收庵先生行藥圖記 同車圖記 季仙九天香常伴圖記 陶氏復園記

隱真居記 康竹吾主客圖記 似山居圖記 游浮山記

箴銘類 鳳臺廳壁二箴 淮南舊壘甃銘 製古磚硯櫺其扉 閒咏齋銘 墨磨銘 端硯銘 燈屏銘

周忠毅公遺印銘 筆箴銘

頌贊類 皇上六旬萬壽恭頌 再爲宜興史自怡題蒲團小照 題汪稚山獨立大師禪話 題東魏永平四

年玉佛造像本偶

哀詠類 趙菴菴先生誄辭 青州府同知趙公沈宜人哀讚 蕭母吳太宜人誄 江蘇學使辛筠谷先生誄

右文一百三十四篇。論文不分駢散，論學兼綜漢宋。其論治經之法曰：「無獨是之見者，不可與治經，蔽於所不見也，衆喙若雷，此挽彼推，頽靡而已。守獨是之見者，不可與治經，蔽於其所見也，盛氣所鑠，不顧迂錯，虛詭而已。」見《詩古微序》是故治經之途有二：一曰專家，確守一師之法，尺寸不敢違越，唐以前諸儒類然。一曰心得，通之以理，空所依傍，惟求乎己之所安，唐以後諸儒類然。孔子曰：「述而不作，信而好古。」專家是也。孟子曰：「以意逆志，是謂得之。」心得是也。能守專家者，莫如鄭氏康成，而其於經也，泛濫博涉，彼此通會，故能集一代之長。能發心得者，莫如朱子，而其於經也，搜採衆說，惟是之從，故能爲百世之宗。孟子曰：「博學而詳說之，將以反說約也。」不約，不足以成學。不博，則約於何施！彼治專家而遂欲盡廢後來之說，矜心得而遂欲悉屏前人之言，皆專己守殘，自益其孤陋者也！」見《論經堂讀經解序》嘗謂漢宋紛紜，亦事勢相激使然！明代以八股取士，學士低首束縛於集注之日久，久則厭而思遁！一二才智之士，鑿空造奇，一通而之子，再遁而之史，然皆不能越集注範圍。漢學興，於是乎以注攻注，以爲得計，其實非爲解經，爲八股耳！一二君子倡之於前，無識者乃藉以取名，或甚以此希取富貴，波流至今日而極，而掇拾愈細，其味愈薄，亦稍有厭之者矣！」見《與方植之》

其論治經必先斷句曰：「授句讀，童子師事也，言學者或略焉！夫經之爲書，託於文字，傳於聲音，

顯於訓詁，定於章句，因文以記音，音別而後求訓焉，累文以成句，句別而後求章焉。獨文爲訓，連文而殊。孤句立解，累句而異。句者，文字聲音詁訓之會，而發揮事理，斐然成章之所始也。故大學始事，卽曰離經，離之而後合之也。獨字不可誦，句而後可誦，聲之引也。聲之引資乎氣，當諷誦時，緩急出入周疏遲速高下之節出焉，而氣隨之，而心之解悟因之。善諷誦者，句讀明而義理自見，入於耳而不煩於言，氣爲之也。氣之所爲眇矣，能授諸神而達之於心。古人誦詩卽以學樂，卽詩之句讀，而樂之曲直，繁縟節奏，一以貫之也。古人之文，如其口語，句讀卽其辭氣云爾。辭氣得，則誦其文，如聞其語。故《殷鑒》《周誥》，號爲詰屈，諷誦之久，心神爽然，有心能領之而口不能傳之者焉！至於義理之釋，憑於字句，一字之上屬下屬，一句之或絕或連，其差甚微，違迕斯大！劉歆移讓博士，已有分文析字之譏，虎觀諸儒，此類彌廣。康成以下經師競出新致，幾於望文生義，各以意屬，而持之成理，或末師賢於往古。此又多師之藉也，而徒以爲童子師之事乎哉！」見《十三經斷句序》。

其論古文之出於駢以駢末流曰：「天地之道，陰陽而已，奇偶也，方圓也，皆是也。陰陽相並俱生，故奇偶不能相離，方圓必相爲用。道奇而物偶，氣奇而形偶，神奇而識偶。孔子曰：『道有變動，故曰爻。爻有等，故曰物。物相離，故曰文。』」又曰：「分陰分陽，迭用柔剛，故《易》六位而成章。」相雜而迭用，文章之用，其盡於此乎！六經之文，班班具存，自秦迄隋，其體遞變，而文無異名。自唐以來，始有古文之目，而目六朝之文爲駢儷，而爲其學者，亦以是爲與古文殊路。既歧奇與偶爲二，而於偶之中，又歧六朝與唐與宋爲三。夫苟第較其字句，獵其影響而已，則豈徒二焉三焉而已，以爲萬有不同可也。夫氣有厚薄，天爲之也。學有純駁，人爲之也。體格有變遷，人與天參焉者也。義理無殊途，天與人合

焉者也。得其厚薄純雜之故，則於其體格之變，可以知世焉；於其義理之無殊，可以知文焉。文之體，至六代而其變盡矣，沿其流極而泝之以至乎其源，則其所出者一也。吾甚惜夫歧奇偶而二之者之毗於陰陽也！毗陽則躁剽，毗陰則沉隄，理所必至也！於相雜迭用之旨，均無當也！」見《駢體文鈔序》。古之言文者，吾聞之矣，曰雲漢之倬也，虎豹之文也，郁郁也，彬彬也，非是謂之野！今之言文者，吾聞之矣，曰孤行一意也，空所依傍也，不求工也，不使事也，不隸詞也，非是謂之駢！唐以前，爲文者必宗秦漢，唐以後皆曰宗韓退之。退之亦宗秦漢者也，而裴晉公之譏退之也，曰：「恃其絕足，往往奔放，不以文立律制，而以文爲戲。」又曰：文之異，在氣骨之高下，思致之深淺，不在磔裂章句，墮廢聲韻也。」昔之病退之者，病其才之強，今之宗退之者，則又病其才之弱矣！然則今之所謂文，毋乃開蔑古而便枵腹矣乎！業此者，既畏駢之名而避之，或又甘乎駢之名，而遂以齊梁爲宗。夫文果有二宗乎？吾欲人知駢之本出於古也，爲選以式之，而名之曰《駢體文鈔》，亦欲使人知古者之未離乎駢也。」見《答莊卿附代作駢體文鈔序》。今之古文家，但言宗唐宋，而不敢宗兩漢，所謂宗唐宋者，又止宗其輕淺薄弱之作，一挑一剔，一含一詠，口牙小慧，謾隨庸詞，稍可上口，已足標異，於是家家有集，人人著書，其於古則未敢知，而於文則已難言之。竊以後人欲宗兩漢，非自駢體入不可。今日之所謂駢體以爲不美之名也，而不知秦漢子書，無不駢體也！竊不欲人避駢體之名，故因流以溯其源，豈第屈、司馬、諸葛以爲駢而已，將推而至老子、管子、韓非子等，皆駢之也，今試指老子、管子爲駢，人必不能辭也，而乃欲爲司馬、諸葛避駢之名哉！《報任安書》，謝朓、江淹諸書之藍本也，《出師表》，晉宋諸奏疏之藍本也，皆從流溯源之所不能不及焉者也。其餘所收秦漢諸文，大率皆如此，可篇篇以此意求之者也。」見《答莊卿附代文章之道》，君子之

逞也，貴近信，貴遠暴慢，貴遠鄙倍。矯飾造作，不信也。張脈憤興，暴也。任意指揮，慢也。談謔難至，鄙也。不應經法，倍也。蓋辭而曰氣，則容貌顏色皆舉之矣。古無古文之名，昌黎始發之，六代衰颯，昌黎振之也，其振之者，變其容貌顏色耳，辭氣未嘗有所易。後之爲昌黎者日益衰，并辭氣而易之，作意奮迅者，非暴則慢，率情抒寫者，非鄙則倍。「見《李卓吾先生集文鈔序》」其實古所謂文者，溫潤縝密，有至德焉，未有佻佼鄙俚躁剽而可以爲文者也！然昌黎惟序記之作，逞其筆勢，小乖體裁，而隄防一壞，狂瀾乘之，不可復挽，此亦風會使然！「見《答屈促甫》」至於古文義法之說，自望溪張之。私謂義充則法自具，不當歧而二之。文之有法，始自昌黎，蓋以酬應投贈之義無可立，假於法以立之，便文自營而已。習之者遂藉法爲文，幾於以文爲戲矣！宋之諸儒，矯之以義，而講章語錄之文出焉，則又非也！荀子曰：「多言而類」，茲毋乃不類矣乎？八股，義取語錄，法卽古文之流弊。今又徒存其法，則不類之尤者也！抱此鄙陋，故每有所述，稱心而言，意盡輒止，不足與於古文之數也，然猶牽率時俗，爲不衷之言，祇益赧然！「見《答高雨農》」

其論駢體曰：「齊梁綺麗，都非正聲。末學競趨，由纖入俗，縱或類鳧，終遠大雅！施之制作，益乖其方。文章之家，遂相詬病！竊謂導源《國語》及先秦諸子，而歸之張、蔡、二陸，輔之以子建、蔚宗，庶幾風骨高嚴，文質相附。要之此事雅有實詣，非可貌襲。學不博，則不足以綜蕃變之理，詞不備，則不足以達蘊結之情，思不極，則不足以振風雲之氣。」「見《答湯子壺》」

其論律賦曰：「文之製，大小惟其稱。大宜宏深，小宜清省。大宜密麗，小宜疏雋。律賦體裁，尤當辨此，一語失當，全篇減色。小試之式，同於館閣，而題益纖瑣，惟有濬發巧思，加意吐屬，所謂爭價一

字，得意數聯者也。」見《師竹軒賦鈔序》。

其論書法曰：「草書紹源於漢張芝，皇象始著精能，逮於二王，其體彌備。原其形用，厥有二端：或法天地之迴旋，或象龍蛇之夭矯。迴旋者其用圓，夭矯者其勢長。右軍之作，取圓者多；大令之章，於長爲近。其在唐人，孫虔禮得法於右軍者也，長史《藏真》，得法於大令者也。自爾以外，合作蓋寡！晉唐名賢，墨迹既不復可得，摹刻則往往失真，其或長短乖方，點畫倒置，以斯傳習，遂墮迷津，非悉心追求，冥心體會，略其皮毛，取其精神，固未易語於此道矣！至於用筆之法，則虔禮所云：『始求平正，繼追險絕，終歸平正。』斯言不可易也！」見《自題草書臨本後》。世傳《黃庭內景小楷》，爲是右軍換鵝書。《外景楷》，則香光以爲楊羲和書，唐以前，別未聞有右軍草書《黃庭》。宋徽宗乃刻此自題之，而宋以後，選刻家亦無及者，故前人品評無得而詳。余偶得此，甚祕之，示涇包慎伯，絕歎賞，以流傳無緒，疑黃山谷贋爲之。予謂其瘦勁則山谷能之，古奧則山谷不能。懷素《自叙》，似得此法，而肆而不靖。道君《絳霄文》亦有意，而俗而不淳。《戲鴻》所刻謝客詩頓掣，不若此流行自在，且其筆中時挾篆籀遺法，當非右軍不能！吳江吳山子以予言爲然！江陰陳學博子珊驚異此帖，借以屬孔君省吾，雙鉤重刻。省吾竭數月之力，始成之，極得真際，蓋唐人碑版，今人無從擬似；宋人之作，尚有牆壁可傍也，自是此帖遂得不泯於世。」見《鵝羣帖跋》。「宋曾開之《跋孫虔禮書景福殿賦》曰：『用筆淳古，有漢魏之風。』可謂妙會！又云：『見《書譜》真蹟，與此賦極相類似。』未然也！《書譜》以雋拔取神韻，全法大王，此賦以堅勁出淳古，專追章草，用筆結字，截然分途，各詣其極！學《書譜》者，或姿媚涉俗。學此賦，則雄渾靜深，自然古異，而流傳不廣，亦自知之者稀！」見《跋孫虔禮書景福殿賦》。「米書出於褚。褚拙剛爲柔，宛轉蘊藉。米恐流爲軟媚，盡出

其鋒稜，明其使轉盤旋之力，則風韻稍卑矣，然奪門而出，正是智過其師！真蹟不可得，得之能細審之，即可悟血脈所自。」見跋米襄陽書高渤海詩真蹟。「文衡山先生導源誠懸，氣體峭勁，而不免鼓努取勢。行書則肆力懷仁《聖教》，左宮右社，動合方圓。先生喜書，作之不倦，而年又難高，故吳中傳流極夥。」見跋張子琴藏文衡山札。「作書小楷難，小草尤難。楷以法勝，草以神勝，法可勉強合，神非絕迹無行地，不能超脫。八法之外，游行九宮之中。唐褚登善《陰符經》。參以《急就》。以楷法行之，遂爲千古絕作，其後無聞焉！祝京兆大草，深得右軍神理而時露俗氣，小草則未之見，獨見瞿君子雍所藏京兆《小草書杜詩卷》，風骨開展，頓宕純和，行間茂密，而風致蕭遠，所錄杜詩至四十餘首，豈非希世之奇！」見跋祝京兆小草書杜詩卷。「籀史之製遠矣！今存者惟《獵碣》，其文融會六書，而增損變通之，惜許氏僅存數字，而《汗簡》、《四聲韻》等，多鑿空虛造，不可依準也！鄧完白翁《籀篆陰符經書》，乃僅見之作，意取參古文小篆而用之，行筆則一以《獵碣》爲法，可爲後來作籀書者軌範。」見完白翁籀篆陰符經書後。「完白真書，深於六朝人，蓋以篆隸用筆之法行之，姿媚中別饒古澤，固非近今所有！」見跋鄧完白真書。「方彥聞之爲學善變。其爲駢體也，初愛北江洪先生，效齊梁之體，綺雋相逮矣，已而曰：「此不足以盡筆勢！」則改爲初唐人規格，雄肆亦復逮之，自以爲未成也！其爲隸書，慕完白鄧先生，爲之傳贊，精心仿之，既又以不能出完白上，思別出一奇，變爲古瘦，亦未成也！方其學完白時所爲，體勢畢肖，而古俊之氣，流溢毫端，要能自成其家。」見跋方彥聞隸書，於書法源流正變，縷悉如指上螺紋，尤足備後來考論云！

龍壁山房文集五卷

馬平王拯字定甫撰。拯，元名錫振，號少鶴，道光二十一年進士，官至通政使。方清咸豐初，太平軍洪秀全發難廣西。清帝出大學士賽尚阿督師，拯以兵部曹郎隨參軍務。集中有《復前教授唐先生書》，於廣西當日兵事利鈍，言之綦詳，諸將獨推向榮、姚瑩方以宿望爲按察使，總理南北兩軍，拯書中亦致不滿，謂「姚公虛聲士耳，老昏荒怪，與官民齟齬，竟不爲用」，足備史料之考論。而其文章爲梅曾亮所賞，至以歸熙甫相許。嘗自刻《龍壁山房詩集》，而文集五卷，都凡九十八篇，乃光緒癸未仲冬，善化向萬鏞刻於平南官舍，記稱「此其手錄，擇存率經上元梅伯言郎中訂正」，冠以長沙徐楨立序，而以山陽秦煥一跋殿焉。煥跋稱：「獲睹《龍壁山房詩集》，纏綿沈著，詞響杜陵。」惜未之見！今誦其文，雖詞筆未臻潔淨精微，而氣調則頗倜儻岸異，在唐宋八家中，氣體於柳子厚、蘇東坡爲近，特爲子厚之警邁，而無其雅練；數東坡之議論，面遜其疏快，而亦時喜爲閒情眇狀，以爲歸氏學史之遺，而意味不深長辭趣不雋永！采錄可誦，寫目如左。

論說類 汲黯論

序跋類 武夷山志序 泰山紀游圖序 存恕堂遺詩序 先大父端溪硯說後序 嬰礪課誦圖序

書牘類 復前教授唐先生書 與朱濂甫侍御書 答彭子穆書

贈序類 送龍翰臣典試粵東序 送陳伯淵赴官東河序 送范伯崇教諭萬縣序 送蘇虛谷序 送汪仲

穆序 彭母甘太孺人壽詩序 張母王太夫人六十壽詩序 劉母蔣太宜人壽詩序

傳狀類 計叅龍傳 袁樂忠傳 戶部江南司郎中湯君行狀

碑誌類 休致直隸廣平府知府楊君墓表 陳冀子先生墓表 翰林院編修曾君墓表 翰林院檢討時君

墓表 彭子穆墓表 東城兵馬司副指揮劉君墓誌銘 湖北松滋縣知縣張君墓誌銘 廣東遂溪縣

知縣曹君墓誌銘 龔孝先墓誌銘

雜記類 獨曜齋記 待蘇樓記 游百泉記 游衡山記 游石魚山記 游七星巖記 游天湖山記 波

羅觀日記 羅浮觀瀑記

哀祭類 張亨甫哀詞 賴子瑩哀詞 黃香甫哀詞

右文四十一篇，集中與梅伯言先生書，謂：「熙甫之文，昌黎、廬陵而後，殆數百年一人而已！」「我朝二百年間，繼有明歸熙甫氏起者，惟方靈臯氏、姚姬傳氏。彼其所爲，皆上承先聖所遺，中有關於人心學術之大，而下可徵於來世。」而與陳抱潛書，則謂：「方氏以文章爲當世宗，觀其治經，能得古聖微言大義，不爲叢瑣固僻之談，而於《周官》《儀禮》，尤能剖析真僞，發微闡幽，舉劉歆等竄亂之罪，啓千古之蒙。其爲文章，篤雅淳厚，去一時才人策士鄉塾裨官之習，心誠好之！比來京師，稍見當時賢豪者所爲文章，或博辯而多詭難，或澹泊而實空疏，或俗俚之見，未去於胸，則其言恆卑鄙而背道，求其趨向之正，無與方氏比者！獨惜其規軸微隘，而文采勿彰，未能兼采古人，如老、莊、淮南、列禦寇、孫、吳、賈、朝之衆長，出以彈壓一世高才博學之士，此其未竟之緒，有賢哲者衍而充之，去其隘以卽於宏，俾天下長短鉅細魁衰奇特之衆長，咸樂就吾之徑途而一出於正，此爲功於聖賢立言之道甚鉅，所日企之而未見也！」卽此可闕論文之宗趣焉。

經德堂文內集四卷外集二卷別集二卷經籍舉要一卷漢南春柳詞一卷附梅神吟

館詩草一卷

臨桂龍啓瑞字翰臣撰。附《梅神吟館詩草》一卷，則啓瑞繼室善化何慧生字蓮因撰。啓瑞，道光二十一年進士一甲第一人，授修撰，累官江西布政使。曾國藩《歐陽生文集序》稱：「乾隆之末，桐城姚姬傳先生簞，善爲古文辭，慕效其鄉先輩方望溪侍郎之所爲，而受法於劉君大槐及其世父編修君範，治其術益精，由是學者多歸嚮桐城，號桐城派。其不列弟子籍，同時服膺，有新城魯仕驥絜非，宜興吳德旋仲倫。仲倫與永福呂璜月滄交友。月滄之鄉人，有臨桂朱琦伯韓、龍啓瑞翰臣、馬平王拯定甫，皆步趨吳氏呂氏，而益求廣其術於梅伯言，由是桐城宗派，流衍於廣西矣。」方啓瑞仕宦京朝，與朱琦王拯論文，必以梅氏爲宗。啓瑞《上梅伯言先生書》，至云：「比嘗與少鶴言，繼自今吾黨有所作，當一以寄正於先生。」是於梅氏爲親接，於桐城爲轉手。今誦其文，條達疏暢，意盡則言止，詞足而理明，與王拯《龍壁山房文集》伯仲之間，而不同桐城之含茹吞吐，有餘不敢盡。大抵明暢差似東坡，而遜其警闢，拗折亦數半山，而無其瘦硬。《外集》後附駢文，其原出於庾信，頗爲排蕩開闊，而意欠警鍊，詞未朗秀。《別集》及《經籍舉要》，則視學湖北時條教，誥誡諸生而作。詞工小令，淒麗清婉，頗得晏殊父子之遺焉。其子繼棟以光緒四年刊於京師，文集前有吾邑鄉薦鶴序，而檢詞後有繼棟跋，知尚有《詩內集》三卷，《別集外集》各一卷，與《文別集》同時刊，惜軼未見。采錄可誦，寫目如左：

駢文 跋長沙黃虎痴先生所藏顏帖後 徵和美聘女史絕命詩啓 題明茶陵陳氏文選補遺後

論說類 明論 隱公論 伊尹五就桀解 病說

序跋類 張氏說文諧聲譜序 湛雲帆詩序 彭子穆遺稿序 粵西團練輯略序 讀曹參傳書後

書牘類 到任告示 致曾滌生侍郎書

贈序類 贈潛山李大令序 送顧太守序 贈呂介存南游序 贈周熙橋序 贈唐子實序 韋壽巖先生

五十壽序 座師王雁汀先生五十壽序

傳狀類 麻公家傳 何兩人家傳 皮韉和尚傳 老僕秦壽傳

碑誌類 兵部侍郎都察院右副都御史江南河道總督楊公神道碑 陳梓丞墓誌銘 穀城縣知縣表兄黎

君墓誌銘

雜記類 勸學記 過鐸山記 月牙山記 東鄉桐子縣先塋記 大岡埠團練公局記 江亭聞笛記

哀祭類 祭座主杜文正公文 李鼎西哀辭 再祭劉恭人文

附詞 臨江仙 湘春夜月 秋燕 蝶戀花 秋海棠 如夢令 滿庭芳 江城子 綽約新嬌 生眼底 侵尋舊事 上眉尖 問君

別後愁多少 得似春潮夜夜添 此蔡君謨絕句也 余甚愛之 因作此詞以寄其意 洞仙歌 聽書聲 瑣窗寒 書中乾蝴蝶 踏莎

行 菩薩蠻 憶蘿月 攤破浣溪沙 望江南 雙調 南鄉子 又 摸魚兒 如夢令 探芳信 江

城子 蝶戀花 阮郎歸 臨江仙

右文三十四篇，詞二十二闕。大抵論學不廢考據，而不甚重考據；論文不廢義法，而不專重義法；

皆承桐城家言之緒論。

其論朱子《詩集傳》曰：「自來說《詩》之家，厥有二道：漢儒多墨守經師之古訓。宋後儒者，始務競

心得，掃蕩舊說，而以己意測古人於千百載之上，其能得古人之意者，固時有之，而其空疏無據者，亦往往然矣！自朱子《集傳》出，乃克舊衆說而折其衷。觀其集中與門人言作書之大意，實與孟子以意逆志，不以辭害志者若合符節，舉凡漢儒膠固拘滯之蔽，是書出，始一洗而空之；有宋諸儒之說，亦至是始得所論定。故自春秋以來，善讀《詩》者，惟孟子，而善會孟子之言，則朱子一人而已矣！後之言漢學者，以其毀斥《小序》過甚，又解詁多不從古義，遂致不滿之詞。不知朱子當日精擇詳辯於漢儒之堂奧，固已足履而身親之，特其所見以爲如此，聖經至重，不敢遷就以自成一家之說，然其教門人看《集傳》者必兼讀古注，是知朱子之心，原未嘗因己有成書而遂廢儒先之說，乃欲人並習儒先之說以知己求是之意也。近世學者於毛鄭傳箋，概置高閣。不知古賢傳授淵源具在，而朱子取舍之意，亦藉是以識別於其間。嚮擬輯爲一書，以朱子《集傳》大旨標舉於各章之下，復引《小序》而下，漢儒專門之說附焉，使學者知《集傳》之外，古說詩者之家法如是，又可知朱子慎擇之意之所存，名曰《詩經今義證》。」見《復閔鶴子書》。

其論古韻以《詩三百》爲準曰：「平上去入四聲，始於永明，而定於梁陳之世，當日沈約諸人精通音律，製爲四聲以括天下之字，蓋有必不可得而增，必不可得而減者。今以《三百篇》驗之：平上去三聲多通協，入聲輒多獨用，中惟上去二音所辨甚微，蓋其高下抑揚之間，亦如平聲之有陰陽也。而陰陽之分，如物之有表裏，上去之辨，如音之有節奏，表裏同是一物，舉其表而裏卽在，節奏非是一聲，欲廢其一，則音不全；此陰平陽平之部，可以不立，而上去二聲，必不可得而併也！凡人聲字用平聲旁紐，故凡有入聲之部，皆須轉音，然後得入。儻有人聲在本部，而與平聲爲正紐者，皆非其人聲字之正音也。以

今音讀之，如之止志職爲正紐，則職當讀如摺，朱主住蜀爲正紐，則蜀當讀如灑之類。又如之部之直，支部之益，以今音皆與本部平上去三聲正紐，以古音求之，則二字皆爲去聲，以入聲於本部無正紐也。餘並仿此。入聲，古所謂急語，又所謂短言，並見《何休公羊解詁》。蓋其字多由平聲矢口而得，如登爲得川爲祝之類，卽山上去轉者亦然，如趣之爲促，害之爲曷，惡惡度度之類，皆以兩字相切而成。中間更無樞紐，不經過上去二聲，卽可由平得入。上去二聲，由平聲長言詠歎，乃可識其節族。惟入聲則不然。又凡平上去三聲，皆可相引而長，至入聲則戛然而止，此其謂急與短之義也。凡四聲相配，惟平上去可謂之疊韻，而入卽謂之雙聲。蓋平上去三聲之字，其形與聲皆相承而下，惟入聲字不然，故皆形在此而聲在彼者，爲其聲皆轉然後得，故謂之爲入，入者，言自乎此而入乎彼者也。轉聲之字無常，故可以數韻之平而共此一韻入聲之字。轉聲之用又無定，故以此部之偏旁，攙入他部而不爲嫌也。凡平上去之偏旁皆有自甲之乙者，必爲轉聲，以此推之，入聲之爲雙聲益信。近之言古韻者，每謂某韻有平無上，或有平上而無去入，或有去入而無平上。吾不知所謂無者，特就古人所用之韻及《說文》諧聲之字驗之乎？抑將以四聲遞轉求之乎？如以四聲遞轉求之，則天下有有聲無字者，斷未有無字而並無其聲者，試以《等韻》求之，可見也。如謂此字古不經見，或有此字而古未嘗用爲此聲，遂謂某部某聲，理當廢絕。不知古人製字之時，原未嘗求其聲字俱備。且如未有四聲之時，則平聲可讀上，上聲可讀平，去入聲皆可讀若平上，而又何有平上而無去入，有去入而無平上之可言乎？以四聲較之，惟入聲音節迫促，疑古韻中自爲一類，其與平上去三聲通用者絕少，《說文》偏旁之字，亦多與三聲不合。又有偏旁之字，只有三聲而無人聲者，此人聲無正紐之說，又有得聲之字在此部，而其聲多轉他部者，此人聲有旁紐之說，故亭林顧氏謂古無人聲。而入聲偏旁，又多從去聲而轉，此段茂堂古無去聲之說所由來。要而論之，以今音證

古音，以古書證古韻，其所得者已十之七，但謂某部中古無某聲之字則可，謂某部中古無某聲則不可也。論古韻者，自亭林以前失之疏，自茂堂以後過於密，江慎修氏酌乎其中，而亦未爲盡善。亭林規模已備，中間營衛未立，小小越畔，時或有之，其考據精確，則不可磨也！茂堂細筋入骨，分肌擘理，其分之脂支三部，能發前人所未發，餘所分者，求之古經，率多可據，其分配入聲，未極精審，不免千慮之失，然而分合周備，條理井然。後之陽湖張氏、高郵王氏、曲阜孔氏、歙江氏諸子之學，皆博足以綜其蕃變，精足以定其指歸。要之諸家愈分愈密，皆由茂堂氏精而求之以極於無以復加之地。間嘗取其書讀之，則張皐文氏之分爲二十一部者，與高郵王氏略同。張氏言：「凡言古韻者，分之不嫌密，合之不嫌廣。惟分之密，其合之也，脈絡分明，不至因一字而疑各韻可通，亦不至因各韻而疑一字之不可通。」其依據《說文》，折衷經韻。」見《古韻通說總論》。「以《詩》韻爲經，以《說文》爲緯，其於韻也，則絲聯繩引，如祖孫父子，必有譜系之可尋，其於字也，則類聚羣分，如主伯亞旅，各有部居而不越。因韻以考其字之偏旁，而知同形者，古音必同部，因字以考其韻之通轉，而知異用者古韻必異音。其部分標目，以詩中先出字爲建首，一洗紛紜膠葛之習，其書較段氏爲密而不失之拘。嗣是劉申甫有《詩聲衍》之作，分部較詳，然皆推張氏之意而廣之，未有能加密於此者！蓋談古韻之書，至此爲集其大成也！」見《張氏說文譜聲譜序》。「惟《詩經》中有明知爲韻而齟齬不合者，如沖陰，諶終，調同，造士之類，顧氏江氏以爲方音，或曰通用假借，段則以爲合韻。三者之說，段爲近理，而未爲盡善！夫言方音者，無論聖人修辭立誠，何至於樂操土音！卽謂方音可用，如《桑柔》以東韻慙，《小戎》以中韻驂，《雲漢》以蟲宮宗躬韻臨，江氏以爲皆西周及秦之詩，當日關中固有此音矣，何以夫子傳《易》，於屯，於比，於艮，其用韻復與《詩》合？試思魯地去

關中千有餘里，果其兩地相同，即不得謂之方音，此固不待辯而明矣！段氏分部最嚴，於古韻所不可通者，皆謂之合韻，不止於沖陰謀終等也；而皆不至如顧氏江氏之無說。且其合韻多以異平同入爲樞紐，即聲近相轉之例，於文字音韻之理，實能洞見本原，特不宜以合韻加之古人。夫古人之韻，吾既不得而見之矣，又安知何者之爲合耶？宜乎篤守亭林十部之學者，羣起而議之也！夫合韻不外乎轉聲，轉聲不外雙聲，今人所謂雙聲，即漢儒所謂聲相近也。凡聲近者皆可轉，而不近者不能爲。今試取《三百篇》之韻，而論之，有一不出於雙聲者不？段氏知此理而不肯以立言，顧爲合韻之說以自遁。夫言韻，則有一定之限，故出此人彼，人皆得以越畔讖之。言聲，則遞轉而無窮，即又何必以實係可轉之音，而樂就乎渺不可知之韻？故今之言古韻，言方音，不如言合韻，言合韻，不如言轉聲。轉聲之說，自錢竹汀詹事發之。詹事《聲類》一書，近罕流傳，故其說人多不省及；而實開字學音學之奧窔。《詩》之以雙聲爲韻者，《賓筵》四章以嘏韻，嘏，即轉嘏之音如疑；嘏，疑，雙聲也；嘏不與微韻，而疑與微韻矣。《谷風》三章以怨韻，怨，即轉怨之音如謂；怨，謂雙聲也；怨不與萎韻，而謂與萎韻矣。《桑柔》八章以瞻韻，即轉瞻之音如章。瞻，章，雙聲也；瞻不與相韻，而章與相韻矣。推之羣經諸子，用難韻之處，無不皆然。大抵古人作詩，兼用轉韻。試以時音譬之；如東董洞獨既是正韻，則登等嶝德即是轉韻。今人但知東董洞獨可爲一韻，而不知登與東，等與董，亦可爲韻；嶝德與洞獨亦可互通爲韻也。然古人用正韻之時多，而用轉韻之時少，即其可通轉者，亦必有通轉之法，而今不可識矣，尚可考音於許氏《說文》，偏旁諧聲之字，往往得之。夫諸聲必取諸本韻，夫人而知之也，至有取諸轉聲者，小徐旁紐之說，略發其端緒；近日茂堂段氏注中屢言之，茲友王氏又於《說文釋例》中詳言之，而拘者未之信。試以數字明

之；如曼，冒聲也；冒音如帽，又讀如墨，帽與墨皆曼雙聲，今必謂曼不與冒韻，當從又冒，刪聲字，則他處恐有不能盡刪者矣。『萑，萑聲也；萑許書讀若和，而萑讀如桓，桓與和雙聲也；今必謂此兩字當讀爲一韻，則未知當從萑入歌韻乎？抑從萑入寒韻乎？此兩文之異讀，不始於今日矣！推之散從古，雙聲，近有謂從古聲者，其說非是。凡雙聲爲聲之字，較之疊韻尤爲親切，以疊韻是旁行，其類尚寬，雙聲爲直射，其法更密，非深思不悟。汎從八，雙聲；叢從取，雙聲；壯從土，雙聲；莧從首，雙聲；輟從軛，雙聲；汨從冥，雙聲；憲從害省，雙聲；充從育省，雙聲；忤從作省，雙聲；神明變化之中，仍復條分縷析。又可證者，凡或體中所從之字，多與小篆雙聲遞變。如𠂔本日聲也，而或從刃作𠂔，則刃與日雙聲矣。𦍋本肥聲也，或從𦍋作𦍋，則肥與𦍋雙聲矣。𦍋本比聲也，而夏書從賓作𦍋，則賓與比雙聲矣。如斯之類，不可勝言。又凡古今音韻之流變，皆由雙聲遞轉，無論假借通用與夫習譌傳訛及五方言語不齊，皆可於雙聲求之。許書中有讀音讀同之例，雖非盡三代以前之韻，亦非漢以後之音，其間以雙聲遞轉者，如姐，本且聲也，而讀若左；操，本臬聲也，而讀若戴；𠂔，本刀聲也，而讀若兀；𦍋，本翼聲也，而讀若靡；此亦可推尋其故者。凡漢儒解經，多通其音義以爲訓詁。鄭注《禮器》，擯之爲言𦍋也；𦍋與擯爲雙聲，蓋𦍋之本音如殊，音稍之讀若𦍋者可證；而𦍋之轉音又如衫，有𦍋之讀若𦍋者可證。鄭注若用𦍋之轉音，則𦍋擯疊韻；若用𦍋之本音，則𦍋擯又爲雙聲；此亦如《儀禮·士虞禮》注，以禪服之禪爲導，《考工記》注，旆，先鄭讀爲甫，後鄭讀爲放，蓋因禪與導雙聲，甫與放雙聲，可通借互用也。然此豈惟鄭注；許君說解固恆有之，如八，別也，粵，于也，木，冒也，鼓，郭也，𦍋，飲也之類，開卷卽是，不假思索；又如打本丁聲也，而今讀答上聲，則頂與打雙聲也；西本先音也，而今讀人齊韻，則西與先雙聲也。推之喁，𦍋，旂，斤，𦍋，升，風凡之類，又無不皆然。昔者由

本音而變爲轉韻，今也即可由轉韻而知其本音。且閩人讀舉如鬼，讀人如靈，舉鬼，人靈，雙聲也。秦人讀風如分，讀宗如租，風分，宗租，雙聲也。凡南人人聲之字，今北人多轉爲去，由其所轉推之，固亦無不雙聲也。故知雙聲之爲用不窮，然後可以推古音之原本，可以識今音之流變，可以訂方音之譌誤。讀《詩》而不知雙聲可爲韻，將有本韻而謂爲非韻者，讀《說文》而不知雙聲可爲聲，將有本聲而謂爲非聲者，其誤豈小小哉！」見《古韻通說總論》

其論司馬光《通鑑考異》朱子《韓文考異》曰：「《通鑑考異》《韓文考異》，雖善本，然非今日學者之急務。蓋此等書，不過刊正訛謬，辯別同異，於全書大致，無甚損益，在學業有成者，樂藉之以爲考核之助，否則初學讀《通鑑》，便當明於治亂安危之故，讀《韓集》，便當學其卓然自命之志，超然越俗之文，卽不觀考異，未爲大失！近日考據家，爭持於一字半句間，往往逐其末而失其本，此二書經大賢先儒手定，固與凡經生書有別，然以云導引初學，有益後進，似尚未可也！」見《復邵蕙西書》

其論古文義法曰：「竊怪今之文所以靡弱而不逮於古者，則亦有故焉。自漢班、馬、賈、董之儔，其人皆篤學早成，因以其餘著書而傳後世，故其文成法立，非有所規摹結束而爲之也。逮唐之韓柳，宋之歐蘇者出，其文乃始有法，然皆灑脫放曠，務盡其中之所欲言，且人人自爲面目，初未嘗畫爲一途，謂天下之文盡出於是也！自明歸震川氏出，而論文之道，始歸於一。夫歸氏之文，其於韓、柳、歐、蘇，誠未知何如，要可謂具體而微者也。特其生當有明文運衰薄之後，一二荒經蔑古者踳駁敗壞之餘，於是尋古人之墜緒，而一一以法示之，彼其心誠救時之弊耳，然而其才或有所蓄而不敢盡也！繼歸而起者，爲本朝方靈皋侍郎，其於義法乃益深邃。方之後爲劉爲姚，要皆衍其所傳之緒，而繩尺所裁，斷斷然如恐失

之，故論文於今日，昭然如黑白之判於目，犁然如輕重長短之決於衡度也，雖高才博學之士，苟欲背而馳，其勢有所不能！吁！後有作者，習歸方之所傳而擴而大之，可也，如專守其門徑而不能追溯其淵源所自，且兢兢焉惟成迹之是循，是束縛天下後世之人才而趨於隘也！揆諸古人待後之意，庸有當耶！然其中又有不可強者。當歸方之時，求韓、柳、歐、蘇不可得，而況於班、馬、賈、董乎！而況於百餘年之後，守歸、方之義法而聆姚、劉之緒論者乎！夫文之盡而至於無所用力，苟徒循文以求之，亦終見其虧苦難成而居古作者之後已！此意未可與不學者道也！」見致唐子實書。

其論韓昌黎詩曰：「公古近詩四百一十餘首，所存最精，常語皆有光彩，淡語皆有古味，故能拔出李杜之外而獨樹一幟！後之文人爲詩者自公始，柳子厚弗能及也！有宋東坡才力傑出，縱橫跌宕，然後文人之理，無不可以入詩，詩之教至此而始大，其爲用亦於此始宏，較之有唐以專門名詩者，益覺其隘矣，而其源實自公發之！公之揀辭造言，屈鬱盤勁，雖東坡亦不逮也！」見書所選昌黎詩後。

其論近人楊性農詩文曰：「所作詩文皆有標舉出塵之致，而古文尤卓然爲今世之所希。大約古澹而味彌長，質直悽惻而情益永，蓋學臨川幾得神似，而清微澹遠，則又震川學史記之文也。」見復楊性農。其論詞曰：「近之詞家，專取曼聲弱字，以爲不如此則不得謂之當行，此亦如古文家之守繩尺，異已者則謂之不工也！安得一才力大，宗法正者，起其衰而返諸古乎！」見復王少鶴書。要刪其語以俟考論。

怡志堂文初編六卷詩初編八卷

桂林朱琦字伯韓撰。琦舉道光辛卯鄉試第一，乙未成進士，由翰林歷官御史，章數上，有直聲。太

平軍洪秀全起廣西，琦以清廷命在籍辦團練。張家祥之來降也，官吏多疑之，琦獨識其人忠果可任，力保無他，後更名國樑，卒爲名將。琦以團練勞，議敘道員，隨浙江巡撫王有齡幕游杭州，總辦團練局。既而李秀成以太平軍襲陷杭州，琦死焉。琦之古文，嘗奉手梅曾亮，集中有《柏枧山房文集書後》，稱：「梅伯言先生，道光壬午進士，不樂外吏，以貴人爲戶部郎，居京師二十年，篤老嗜學，名益重。」時朝彥歸之，自曾滌生、邵位西、余小頗、劉椒雲、陳藝叔、龍翰臣、王少鶴之屬，悉以所業來質，或從容譚讌竟日。琦識先生差早，迹雖友而心師之。先生亦謂琦曰：「自吾交子，天下之士益附，而治古文辭者日益進。」觀琦爲文，長於持論，文機疏快似東坡，筆情拗瘦出半山，在桂人士中，與王拯龍啓瑞差相伯仲，而琦之規模稍隘。詩則自謂得法杜韓，而五七言古出入蘇黃，詞勁以達，律則渾脫瀏亮，不爲昌黎山谷之硬語拗體。獨其集中《詠古》十首之八云：「宋詩從韓出，歐梅頗深造。荆公獨峭折，硬語自陵蹕。詩教根性情，觀人殊靜躁。湖陰坐吟賞，於我亦私好。」又集中《答友人論詩》七古一章，有云：「古聲淡泊味者少，自提一律歸精堅。平生宗法有數子，李、杜、韓、白、蘇、黃、元。」又《六月十二日集林穎叔寓齋爲山谷道人作生日》五古云：「西江派自別，晁張軍久斂。汗下奉瓣香，萬古此壇坫。」又《月夜過潤臣汀鷺次前韻》第二首云：「抗今誇詩膽，望古忽儒斂。蘇黃無軒輊，北宋兩崇坫。」又可想見宗趣所在矣！其《詩文集》，以同治甲子冬刊於京師，而《文集》前有咸豐七年十月潘曾綬，同治七年三月譚獻兩人序，後有同治四年小陽中浣倭仁跋及《兩浙忠義錄》中《朱御史傳》，《詩集》前有咸豐七年八月，陽湖楊傳第序，後有鍾秀及其宗人鑑成書後。采錄可誦，寫目如左。

詩類：羣玉巖 兵書峽 浯溪鏡石 瀑安河 飲湯海秋師寓齋讀近稿賦呈 范將軍輓歌 官誡十六

首 酬余小頗農部 古意一首和楊紫卿 秋感八首 酬曾潌生學士十首 林菊史移居城東出種竹圖索詩 九月十日發通州 上灘五首 上灘續得三首 暮秋氣漸寒作懷人詩五章寄粵中諸子 同友人飲舟中二首 同王子章羅以村遊隆中謁武侯祠二首 梁園三先生詩 至京館翰臣寓齋葉潤臣思歸不得作江漢歸舟圖示意 亦梅索題天竹齋圖 繡山致經堂圖 潤臣出示犀角槎杯席間索句 蕭薌泉舊藏尺五莊探雪圖筆意疏淡展玩久之因感昔時春游漫題數語圖爲萬廉山作西江高手也以上五言古 同竹軒宗老游隱山 石門道中 大雪示陳藝叔并簡梅伯言農部 酬馮魯川比部 老兵歎 朱副將戰歿他鎮兵遂潰詩以哀之 校正亨甫遺集作詩誌哀 張受之空齋畫靜圖子貞太史既用東坡墨妙亭韻爲題一詩又云受之名辛善篆刻欲得余詩鐫兩印見貽余感其意爲次前韻奉酬 況芝房炊雪圖 子壽將歸作螺洲曲見志余爲廣其意得七章 和湯敦甫師相游龍杖歌 劉寬夫侍御招集同人壽東坡先生忽忽今數月矣爲補此詩 馮少渠大令空山吟趣圖 招集錢石葉飲藉園臨別贈之以詩 越日湖口風未息示何鏡海 湖上觀打魚再次前韻 建陽懷古寄子壽比部並呈展雲廉舫 司馬繡谷善繪事醉後尤奇席間出采芝圖索詩 黃少蘭司馬自江南來席間話張殿臣鎮軍戰事歌以紀之 酬王少摩大令卽送之官豫中 符南樵索題半畝園訂詩圖越日復招子貞潤臣同飲 同潤臣仲穆至極樂寺看海棠因游萬壽寺而歸 潤臣席上食筍甚美戲爲長句並呈汀鸞錢南園侍御畫馬詩爲潤臣閣讀作以上七言古 新鏡歌四十章 狼兵收寧波失利書憤 浮丘子輓歌 長安兩少年行和湘帆農部卽贈逸齋叔起並簡子壽 錢冬士破車圖歌 題金陵被難記抒憤 長沙官吏祭軍門塔齊布詩以紀哀 讀王子壽論史詩爲廣其意得七章 陳凝甫舍人出示尊甫九香大

令紫雲研冊 四月三日葉潤臣孔繡山招集同人於慈仁寺爲展襖之會是日先致祭顧先生祠然後與會 繡山尊人宰瓢城有惠政作瓢城吏歌美之 六月廿一日歐陽文忠生日林穎叔水部同少鶴農部招集松筠菴拜公絹本遺像潤臣舍人亦攜詩龕摹本張壁間圖爲穎叔所藏上有乾隆御墨並晁李二跋分得宜字 安園古松歌以上雜言古 陳東橋招飲秋廬 寄楊紫卿零陵集杜五首 當陽道中 長阪瞻關坡遺迹 晨起 元夕獨坐憶弟 月下再寄舍弟容菴以上五言律 彰德道中同友人作 馮展雲有詩僕歐陽泰持詩送行聊答其意 飲豐樂酒自嘲 胡新泉出示石臣姻丈遺墨山水長卷自題云零落人間一角山和者多次韻適余亦編次先大夫遺詩感題卷末 移居蕭鄉泉侍御紫藤山館雨後簡仲穆並示陳凝甫中翰 夜雨次前韻寄魯同甫以上七言律 李小廬招飲藤花館賞藤花三首 雜詠十五首 湘中雜詠九首以上七言絕

論說類 辨學上中下 孟子說二四三首 名實說

序跋類 讀貨殖傳 讀酷吏傳 藤花館詩序 蔡霖齋太史詩集序 王少參遺疏書後 書歐陽永叔答

師魯書後 自記所藏古文辭類纂舊本 書鄭比部四策後 潘四農手札書後 書黃鵠山人詩卷後

右詩二百又三首，文十七篇。集中《自記所藏古文辭類纂傳本》曰：「自桐城方望溪侍郎以義法爲

文。劉耕南學博繼之。而姚先生以所聞授門人管異之、梅伯言，爲《古文辭類纂》七十五卷，爲類十三，曰論辨，序跋，奏議，書說，贈序，詔令，傳狀，碑誌，雜記，箴銘，贊頌，詞賦，哀祭，一類內而爲用不同，又別之爲上下篇。先生每類自爲之說，分隸簡首，自明去取之意，而於先秦兩漢自唐宋諸家以及本朝，尤究極端委，綜覈正變，故曰：「學而至者，神合焉。學而不至者，貌存焉。」學者守是，猶工之有繩墨，家之

有律令也，無可疑者！惟碑誌類云：「誌銘不分爲二，不得呼前誌爲序。」南雷《金石文例》頗主此說。琦謂古有有誌而無銘者，亦有有銘而別屬他人爲誌者，似誌銘亦當有別。古人於敘事之文，恆曰志，志者誌也，不獨銘墓。若謂前誌不可呼爲序，必別書有序二字，此則昌黎亦不盡然，非歐公不能辦也。又先生於唐以後所取稍隘，雖李習之僅錄《復性書》下篇，其他存者蓋尠矣，而於方劉之作，所收甚多，豈修其師門耶？同時業古文者，有無錫秦小峴、武進張臯文，於桐城爲近。而新城陳碩士最篤信師說，其學初求之魯山、木，又有朱梅崖、惲子居，亦好爲文，聲名藉甚。山木喜稱說梅崖，而材稍犷，子居材肆矣，間入僞體。故至今言文，必曰桐城。先生弟子，今存者梅伯言。伯言文與異之上下，而勁悍或過。異之惜早逝！伯言居京師久，文益老而峻，吾黨多從之游，四方求碑版者走集其門。先是吾鄉呂先生以文倡粵中，自浙罷官，講於秀峯十年。先生自言得之吳仲倫，仲倫亦私淑姚先生。是時同里諸君如王定甫、龍翰臣、彭子穆、唐子實輩，益知講學，在京師，又皆昵伯言爲文字飲，日夕講摩。當是時，海內英俊，皆知求姚先生遺書讀之，然獨吾鄉嗜之者多！伯言嘗笑謂琦曰：「文章其萃於嶺西乎！」此可以見桐城文學流行廣西之端緒焉。」又《鄉撫軍所藏林文忠公遺詩書後》稱：「鄉言：『過南昌時，與林文忠師弟一再見，重以姻好，且曰『毋以恆儀聘！』昔歐陽子居穎，於門下士篤愛蘇長公，以女妻其子邁，今豈異是耶！故於納采，不以他物，而僱以兩《文忠集》。林公顧而笑樂。』鄉，即吾邑鄉壯節公鳴鶴也。前輩風流，令人神往！」

邵位西遺文一冊

仁和邵懿辰字位西撰。懿辰，道光舉人，官內閣中書，遷刑部員外郎，充軍機章京。咸豐十一年十一月，太平軍陷杭州，被繫不屈死。湘鄉曾國藩集中有《仁和邵君墓誌銘》，謂：「位西之學，初以安溪李文貞公桐城方侍郎爲則，擯斥近世漢學家言，爲文章務先義理，不事縝色繁聲，旁徵雜引以追時好。至京師，與上元梅曾亮伯言、臨桂朱琦伯韓數輩游處，博覽國故朝章，其文益奧美盤折。亂後，僅得文三十餘首，刻之淮安。」卽此冊也，同治四年，盱眙吳棠刊而敘之，又有山陽丁晏一序。其文凡三十五篇，大抵於梅曾亮爲親接，於姚桐城爲轉手，所以辭筆頗能拗折，氣息未極渾古，有時緊峭沈摯，如王半山之令人竦動，亦有紆徐往復，如歸震川之發人低徊，惜其拗峭而未能盤鬱，則餘於勁而促於氣，澹蕩而未能簡雋，則枵於辭而膏於神，然亦桐城家之支與流裔也！采錄可誦，寫目如左。

論說類 文人少達多窮

序跋類 書靳文襄生財裕餉第一疏後 書太史公自序後 題寒機夜課圖後

碑誌類 吳子樸墓誌銘 前福建水師提督許公墓表 葛壯節公墓表 錢子方墓表 易安人墓表

傳狀類 孝子王立齋先生傳 戴文節公行狀

雜記類 儀宋堂記 儀宋堂後記 記汶上劉公撫浙事

右文十三首。此冊每首有墨筆批識，尾署作人弟龐祖文拜讀，不知何人，錄以俟考。

寓庸室遺稿一冊

諸暨余坤字小頗撰。坤，道光進士，累官雅州府知府。方在京曹，以詩古文與梅曾亮相切磋。文

章學韓，未臻雄渾，而瘦硬拗折，逼真荆公，所造在邵懿辰之上。而詩則五七言古排募振蕩，由韓學杜，而不爲韓之槎枿；律體則以宋人之筋節，運唐賢之格調，乃衍惜抱翁一脈，思銳而律渾。此爲坤手稿，有梅曾亮、姚瑩、朱琦、楊彝珍及吾邑秦細業同時諸公圈點評語。其曾孫重耀以民國七年戊午，在南昌付石印。采錄可誦，寫目如左：

詩類 題友人蘭室 南國有佳人行 歸寧篇 題楊檢齋湖口攬勝圖 不寐作 偶述 三哀詩 以上五言

古 駿馬行 古從軍行 對雪 李大令畫雞歌 卽事 晨以職事入禁廷車中作 以上七言古 微醉

夜過伯韓 贈姚石甫觀察 以上五言律 登龍山望海亭 感興十二首 散直 夜坐述懷用伯言夜

話見示元韻卽奉答三首 以上七言律 詠蘭 以上五言絕 德勝門外 以上七言絕

文類 駱東溪墓表 書周贈君行狀後 雙卷竹筆筩銘

右詩三十七首，文三篇。

梓湖文集十二卷

巴陵吳敏樹字南屏撰。敏樹，道光壬辰舉人，官瀏陽縣訓導。集中《記鈔本震川文後》曰：「余既別鈔震川之文而序之，後三年甲辰，攜之京師。同年友武陵楊彝珍性農從余借去。閱數日，瑞安項孝廉傳霖來訪余，蓋從性農所見此書，袖以來，而乞鈔其序目云。因爲余言京師名能古文者，有江南梅郎中曾亮其人也。又數日，余往答項君，而梅先生適來，因相見於其座。余自是始識梅先生。梅先生既見余此書，因以語朱御史琦、邵舍人懿辰、王戶部拯，皆京師古文學者。諸君皆來識余，皆以此書故。」顧曾

亮最爲老宿，方以桐城文派之說啓導後進，其言由桐城姚、劉、方三氏，上溯明歸震川氏以嗣音唐宋，爲古文正宗。敏樹顧謂文必得力於古書，不當建先生之言以自隘。其後曾國藩爲《歐陽生文集序》，敘述桐城流派所衍，稱引及敏樹。敏樹遂與友人書極論之，所以自別異其力，卽集中《與篠岑論文派書》，是也。其集爲光緒癸巳仲夏思賢講舍開雕，冠以長沙王先謙序，湘陰郭嵩燾《墓表》，杜貴墀《傳》。《墓表》謂：「是時上元梅郎中曾亮倡古文義法京師，傳其師桐城姚先生之說，唐宋以後治古文者，獨明崑山歸氏，國朝桐城方氏劉氏相嬗爲正宗。君少習爲制藝，應科舉，獨喜應試之文，崇尚歸氏，聞歸氏有古文，求得其書，擇其紀事可喜者，哀然錄之成冊，不知其時尚也。游京師，有見者以聞於梅郎中，於是君能爲古文之名日盛於京師。而君言古文，顧獨不喜歸氏，以爲《詩》《書》六藝，皆文也，其流爲司馬遷，得遷之奇者，韓氏耳！歐陽公又學韓氏而得其逸，而自言爲文能得歐陽氏之逸。歸氏之文，同得之歐陽氏，而語其極未逮也！故於當時宗派之說，不以自居。」又云：「湖南二百年文章之盛，推曾文正公及君。」《傳》則云：「厭薄時人以搖曳取媚爲歸體，著《史記別鈔》以正之。近今稱古文者，必首曾文正及先生。」而《曾文正公集》有《復吳南屏書》，謂：「大集古文謹讀一過，視昔年僅見零簡斷幅者，尤爲卓絕！大抵節節頓挫，不矜奇辭奧句，而字字若履危石而下，落紙乃遲重絕倫，其中閒適之文，清曠自怡，蕭然物外，如《說鈞》、《雜說》、《程日新傳》、《屠禹甸序》之類，若翱翔於雲表，俯視而有至樂！國藩嘗好讀陶公及韋、白、蘇、陸閒適之詩，觀其博攬物態，逸趣橫生，栩栩焉神愉而體輕，令人欲棄百事而從之游；而借古文家少此恬適之一種。獨柳子厚山水記，破空而游，并物我而納諸大適之域，非他家所可及！今乃於尊集數數遺之，故編中雖兼衆長，而僕視此等尤高也。」今觀其文，體潔而氣舒，志和而音雅，而亦不能無

爲閒情眇狀，搖曳其聲以取姿媚，如《雜說》一首，氣感而鳴不息起句《李公蓋詩序》、《歐陽功甫遺集序》、《毛西垣詩序》、《與熊秋佩書》、《序意贈西垣》、《何慇菴外兄壽詩序》、《屠禹甸夫妻八十壽序》、《業師兩先生傳》、《郭依永傳》、《郡中三詩人傳》、《南屏山齋記》諸篇，皆是也，其體實出歸有光，而於姚鼐爲同調，乃多自謂能與歐陽永叔同風，以得太史公之逸，多見其不知量也！時亦潤澤以《楚騷》之聲逸，而能節止淫濫，不如曾國藩之聞見雜博，喜自姿肆。國藩理修而辭溢，敏樹則文潔而體清。姚鼐響逸而味永，敏樹則趣昭而事博。別有《梓湖詩錄》，惜未之見，而就選家所錄，則爲黃山谷體，造語瘦硬，而其氣震盪，其味醇深，則與曾國藩爲同調，而亦衍姚鼐之一脈者也！采錄可誦，寫目如左。

論說類 舜避南河論上中下 文敝 行軍私議 雜說一首氣感而鳴不息起句

序跋類 李公蓋詩序 歐陽功甫遺集序 毛西垣詩序 蒼莧集詩序 陽湖趙氏先世圖序 趙悔廬先

生岱頂看雲圖序 仙亭倚醉圖序 白書金革無避論後 記鈔本震川文後 劉霞仙中丞游君山

詩序

書牘類 與歐陽篠岑書 與篠岑論文派書 與楊性農書 再與性農書 又與性農 上曾侍郎書 己

未上曾侍郎 與梅伯言先生書 與熊秋佩書 答李香洲書 與王雲湖書

贈序類 送六弟退菴往游軍中序 序意贈西垣 述別贈趙惠甫黎莚齋吳塾甫 爲守齋五叔父暨張叔

母五旬雙慶之序 何慇菴外兄壽詩序 孫田菴六十壽序 屠禹甸夫妻八十壽序 方君山壽序

傳狀類 業師兩先生傳 方稼軒傳 孫劬吾先生家傳 黃特軒傳 太常徐先生傳 郭依永傳 郡中

三詩人傳 書謝御史 亡弟雲松事狀

碑誌類 屈子廟碑 新牆洞庭神廟碑 萬石岡阡碑 秦石畬先生墓表 福建候補通判何君墓表 翰

林院侍讀孫君墓表 從叔守齋府君墓表 毛西垣墓誌銘 歐陽功甫墓誌銘 先妣氏墓道述

雜記類 南屏山齋記 移蘭記 聽雨樓記 北莊記 樊園記 游大雲山記 寬樂廬記 新修呂仙亭

記 君山月夜泛舟記 定香室記 半芳齋記 恬園游記

辭賦類 釋議 勵志賦

哀祭類 羅懶農哀辭 夢二友辭 祭毛西垣文 祭姊氏文

右文七十二篇。觀其所以自敘述，謂：「少讀書，喜文事，弱冠忽若有悟文章之爲者，讀《易》《書》

《詩》，皆以文讀之。」見《記鈔本震川文後記尾》「讀《孟子》本文，及見孟子之書，實所自著，與《論語》集自門人

者不同，而章間皆有孟子曰字，殆不宜爾，意其爲傳書者分章所加，因試置去，別寫讀之，則見其文意本

相連屬。」見《孟子考義發序》「自是落筆爲時文輒高異，而古文之道，且躍然胸中矣！時文獨高明之震川歸

氏及本朝方舟百川以爲超絕，真得古人文章之意。間從塾童《古文觀止》選本，見歸氏文數篇，心獨異

之！思窺全稿，而湖南書肆無之，及託書賈購之吳門，而掇錄其可喜者，以意評騭，且敘論焉。」見《記鈔本

震川文後記尾》「攜之京師，江南梅郎中曾亮既見其書，爲言：歸氏之學，自桐城方靈皋氏後，姚姬傳氏得

之。曾亮蓋親受學於姚氏，而爲文之道各異。」見《記鈔本震川文後》「因鈔取梅氏文數篇以歸案頭，用潔紙

正書之，卽見其多不足者。」見《梓湖文錄序》「而見時學古文者，必趨梅先生以求歸方之所傳，心竊隘薄，以

爲文必古於詞，則自我求之古人而已，奚近時宗派之云！」見《梅伯言先生諫辭》「乃日書韓文碑誌，細註而

讀之，鈔孟書，評《史記》，文且至矣！」見《梓湖文錄序》「乃歎近時爲古文以倣歸氏，故喜爲閒情眇狀，摇曳

其聲，以爲歸氏學《史》之遺，而文章始衰矣！是以有《史記別鈔》之選，欲正之也！韓子云：「無定體，惟其是而已。」又曰：「辭不備，不可以成文。」又曰：「惟陳言之務去，憂憂乎其難哉！」後百餘年，宋有歐陽子，宗韓子，而風神獨妙，又非韓之所有！余以身居野逸，爲文不免類歐，且喜且慙！歸氏特與我同此性質耳，焉可爲天下倡乎！歐有舊本韓文，珍之如異寶，而爲文輒不類之，真豪傑矣！是可師也。」（見《記鈔本震川文後記尾》）

其論桐城文派曰：「文章藝術之有流派，此風氣大略之云爾，其間實不必皆相師，或甚有不同，而往往自無能之人，假是名以私立門戶，震動流俗，反爲世所詬厲，而以病其所宗主之人。如江西詩派，始稱山谷、后山，而爲之圖，列號傳嗣者，則呂居仁、居仁、非山谷、后山之比也！今之所稱桐城文派者，始自乾隆間，姚郎中姬傳稱私淑於其鄉先輩望溪方先生之門人劉海峯，又以望溪接續明人歸震川，而爲《古文辭類纂》一書，直以歸、方續八家，劉氏嗣之，其意蓋以古今文章之傳繫之己也。然姚氏特呂居仁之比爾，劉氏更無所置之，其文之深淺美惡，人自知之，不可以口舌爭也！歸氏之文，高者在神境，而稍病虛，聲幾欲下。望溪之文，厚於理，深於法，而或未工於言。然此二者者，皆斷然爲一代之文，而莫能尚焉者也！其所以能爾者，皆自其心得之於古，可以發人，而非發於人者！自來古文之家，必皆得力於古書，蓋文體壞而後古文興。唐之韓、柳，承八代之衰而挽之於古，始有此名。柳不師韓而與之並起。宋以後，則皆以韓爲大宗，而其爲文所以自成就者，亦非直取之韓也。韓尚不可爲派，況後人乎！烏有建一先生之言以爲門戶塗轍，而可自達於古人者哉！」

其論爲詩必本言志曰：「古今作詩之旨，實盡於虞廷言志之一語，而自建安以下人，始以詩名家，至

唐而其體大備。宋人遂頗軼出聲律。元明漸返其流。我朝分馳唐宋，各爲派別。余謂可一切無論也，要其爲詩之善者，能自言其志而已！人之有其身於天地之間，其所遭值於家國各有分地，不與今世他人相同；亦竟無與古人盡合者，乃至耳目之所感觸，山川草木，春秋歲序，居處行旅之所更歷，皆一人自爲一人之事，不可以相假代。而今之爲詩者，率爲衆人通同之言，鮮有能於己事深切而著明之者，是以雖力爲新異而終歸臭腐也。若能各詩其所應有之詩，則無問所模倣體格何代，所依用聲調何人，要之爲其一人之詩也。抑唐人承漢、魏、六朝之後，爲詩雖備諸體，尚皆尊重古之五言，諸家之集，此體爲多，而以開露性情，包括人事，亦莫如此體爲宜！古人中如曹子建、阮嗣宗、陶淵明，可謂善言其志者，而康樂、宣城，二謝山水，清真之趣，邈焉可懷！」見十月復至君山歸與退菴

其論爲詩必謹造句曰：「古人爲詩，尤喜論句，以杜陵之聖而自道其爲詩之力，則曰：『爲人性癖耽佳句，語不驚人死不休。』其稱李白曰：『李侯有佳句，往往似陰鏗。』及以清新俊逸，比之庾鮑，皆句之云也。今之詞人，動喜狂放，句之不圖，而務崇其體，使人望之，靡然廓然，及取而讀之，終篇而未有得焉，終卷而未有得焉，豈其詩之固難知耶？何其與古人爲詩之道相謬也！得非競於名而眩於實者耶！欲以才質於人而務張之者耶！宜吾之所疑而不敢與也！」見毛西垣書

其自序所爲詩曰：「由甘人苦，出苦得甘，如是有年。章句甫脫，若意得，然書且誦之，有易者，又屢寫之數日乃已，及其定也，如其意也，而非其初草矣，如是有年。」見梓湖詩錄序可以想見其境詣焉。

移芝室詩古文合編內詩四卷古文附家傳一卷

武陵楊彝珍字性農撰。在清道咸間，湘楚以南，以詩古文有名而不囿於桐城家言者，惟彝珍與吳敏樹。彝珍，道光三十年進士，散館授主事，走詣侍郎曾國藩，欲告歸。國藩留之曰：「子遂無意於斯世乎？」彝珍曰：「吾居澗谷崎嶇之間，因高下累岩石作塹，四阻以爲固。環村居民數十家，多悍少，習勇技，與言戰鬪，輒攘臂起，吾歸部署其衆爲守禦，無事俾各散處力田作。以視浮沈郎署，無涓埃之補於國者何如也！」其在京師，嘗奉手梅曾亮，而自以意爲詩古文，不盡用其法。又與吳敏樹齊名，而古文蹊逕亦不同。敏樹澹逸近歐歸，彝珍刻鍊數韓柳，大抵下筆緊健出韓，而無其雄大，造語雕飾似柳，而遜其警秀，轉不如吳敏樹之載其清靜，怡然有以自得。至於詩則自組麗雕飾中來，而造於古淡，自然高綺，突過其文，大抵得陶之意興，杜之體氣，蘇之波瀾，而五言古出入陶謝，尤臻超豔。詩文皆自序，而詩則有監利王柏心序，及吾邑薛福成跋。采錄可誦，寫目如左。

詩類 詠懷三首 春曉泛南川 舟中寄家人 登嚴子陵釣臺 桐廬舟中 偕何子毅由輞光陟北高峯

望海歸宿僧房作 庚子九月十八日夜下作 古詩 山居雜詩六首 雜詩二首 冬日 羣兒 辰

州道中紀事 寄朱伯韓侍御 乙巳歲暮感事 四責詩犬貓家難 宿山家 感事一首仍次前韻 移

居三首 自丁未夏孟與獨山莫子偲孝廉遇於澧城一面卽別已踰五載今春忽蒙枉集見示開帙急讀
譬如聞韶幾有不圖之歎愛而不置難已於言因奉簡一首卽次集中贈黃虎癡教諭詩韻 癸丑夏日用

淵明擬古九首詩韻寄王子壽比部 賊退示鄰里六首 觀園叟藝蔬和淵明始春懷古田舍韻二首

酬薛曉驪大令見贈之作 撫屏顧余山中用前韻示之 感事用前韻 海門前輩以晨燈酬唱集見示

卽次其韻奉贈以上五言古 送余小頗出守雅州兼簡姚石甫年丈 六月於役辰州欲游桃源洞不果

澤國歎六首 鄂城哀 寄鄭子尹廣文卽次其集中窅字詩韻 仍用前韻簡莫子偲黔中 予夙不喜

金石頃讀鄭子尹取盧豐碑石歌頗有欣然之意適劉子重廣以所拓河間獻王君子館八磚墨本索題因

爲長歌兼以志感以上七言古 贈傅青餘孝廉健兒二首 烏雅兵以上雜言古 道中 曉征孝感道中

以上五言律 客舍除夕以上七言律 北歸以上五言長律

論說類 正師 治生

贈序類 贈族子序 送林少穆制府引疾還里序 送張東墅觀黎守 永順序

傳狀類 誥授振威將軍湖南提督喀屯巴圖魯子謚忠武塔公行狀 太宜人行略 先伯兄仲兄事略 先

從兄海樵傳 亡室周孺人事略 繼室金安人事略

碑誌類 蝙蝠嶺墓表 女蘭壙志銘

雜記類 移芝室記 重至湘上園記 柚村記 求闕齋餞別記 河湫樵署記 書事五則 瑞芝室記

哀祭類 祭賀侍御文

右詩七十五首文二十一篇。

後記

一

吳忠匡

作者錢基博(1887——1957)，字子泉，號潛廬，江蘇無錫人。是我國老一代的著名學者，畢生致力於古文學理論、評論和文學史的研究。這方面的重要著作，已經出版的有《現代中國文學史》、《韓愈志》、《韓愈文讀》、《明代文學》等。又《江漢炳靈文談》、《讀清人集別錄》，散見各報刊。

《中國文學史》是他晚年任教國立師範學院時期教授文學史課程時編著的講稿，是在廣泛研讀古今專集的基礎上撰寫成的。溯源別派，殊多創獲。雖是解放前的一部舊著，今天仍然有它的參考價值，能加深學者對歷代文學作品的理解能力和鑒賞程度。

作者繼承并發揚了我國古史家「知人論世」的優秀傳統，并本清代史學家章學誠《文史通義》之旨，「比類」、「比次」之說，就作家所處的時代環境、政治思潮、社會思想等狀況，著重考察歷代文章的利病與其升降得失的歷史根源，在評論歷代文學理論與其作品的同時，運用排比綜合的方法，揭示它的發展、演變與其流別。

例如評論西漢史學家司馬遷的《史記》文章時，作者論析說：

文章之道，時爲大。卽以《左傳》、《史記》而論，《左傳》先經以始事，後經以終義，依經以辨理，錯經以合異，而太史公善敘事理，或由本以之末，或操末以續類，或繁條而約言，或一傳而數事，夾

敘夾議，於左氏法已不移而具。惟與時爲消息，故不同、正所以同也。而「於學無所不窺」，「善指事類情」，太史公以是傳莊子，亦自況也。其文如雲龍霧豹，出沒隱現，變化無方，此莊、《騷》、太史所同。

這裏指出，《左傳》以體會經的義理爲主，結合事例來加以錯綜變化，以極文章之能事。《史記》成一家之言，以事理爲主，結合情事，有繁簡比次的不同。《莊子》以情事爲主，結合事理，加以奇思幻想，以成文章。三家既有其同以情理爲主，又各有其結合事類而加以神明變化。這一介紹和論斷，絕無模糊影響之談，使讀者不僅對於《史記》與其作者，同時對《左傳》與其作者，也都有了比較深切的理解和賞會。

又例如宋代文學，作者指出：

曾鞏、王安石以平實發浩瀚，得西漢董仲舒、劉向之意，此宋人之學漢人文；蘇洵以廉悍爲疏縱，有先秦孟軻、韓非之風，此宋人之學周人文。惟歐陽修之容與閒易，蘇軾之條達疏暢，抑揚爽朗，行所無事，此則宋人之所特長，而開前古未有之蹊徑者。

這裏指出宋文的成就，有突破唐文而上繼先秦西漢的。有不同於韓愈、柳宗元的兼採辭賦，而以平易見長的。認爲這才是宋文的本色。

詩則歐陽修以韓學杜，以文爲詩，仗氣愛奇，蘇軾抑揚爽朗，天生健筆，有必達之辭，無難顯之情，意到筆隨，無不如己所欲出。而以俗爲雅，以故爲新，蘇軾爲其易，黃庭堅爲其難，蘇軾抒以疏快，黃庭堅欲爲生拗。要之以文爲詩，以韓學杜，則固一脈相行，於是宋詩之體以成。

詞則歐陽修以蜀詞化南唐，抒深婉以疏俊，清新閑逸。而蘇軾抗首高歌，蹊徑盡脫，以散行縱橫之筆，盤屈而爲詞，跌宕俊邁，不可以方物，一變唐五代之舊格，而浸浸乎以文爲詞。於是宋詞之體以成。

作者總結說：「有宋文學之所以繼往開來而自成一代者，歐陽修、蘇軾或推之，或挽之，後先繼美有以成功。」其本著繼承、發展的觀點，博學周覽，涵詠辭章，作通漢、唐、宋上下、前後、平行和縱直的比合研討，於同中求異，於異中見同，來尋求文學演變的軌跡，使文學史研究達到了較高的深度和廣度，這對編著文學史，應該說是極爲重要的方法。

在評論南北朝時期文學中，作者於北朝周的蘇綽而外，加入了不爲人注重的宇文護其人：「護與母閭，自幼離散，母被幽繫於齊。其後護居宰輔，遣使尋求，齊人許還朝，令人爲閭作書寄護。」護性至孝，得書，悲不自勝，左右莫能仰視。」作者錄其報母書，并評論說：

一味情真，字字滴淚，而精神愷惻，爲北朝第一篇文字，足與李密《陳情表》并垂千古。兩文均以質意勝，李表卻正於質處具風度，宇文則轉於質處見道變。一則意儘迫切而辭則優游緩節，一則筆極緊健而意則歷亂多端。李表之氣舒，宇文之情激。而閭姬先報一書，不知何人代筆，家常絮語，的是老嫗口吻。然以絮碎出神雋，以懇惻發岸異，雖不如護之道鍊，然篇碎而神完，語絮而情切，蓋脫胎《史記·外戚世家》絳竇皇后弟竇廣國一段文字者乎？足與護書稱珠聯璧合矣。

認爲無論就其內容或形式，這兩封書信都是真正的藝術作品。以上的舉例，說明這一編《中國文學史》是有它的顯著特色的。

作者於書中對我國數千年來傳統的文藝批評所產生的大量文談、詩詞曲賦話、書論、畫說以及各歷史時期的民風、土俗、工藝等，也多所介紹與評述，涉及的面較廣，對於今天的文藝學和文學史家提供了有益的資料和啟示。

我們據一九三九年前國立師範學院鉛字排印本重行刊印，原缺清代一編。在整理出版過程中，由華中師範大學石聲淮同志校閱全書，對所引文盡可能查對原書，改正了一些錯漏。

二

周振甫

錢子泉師的《中國文學史》，是一部按照傳統的文學概念來著作的《中國文學史》。魯迅在《魏晉風度及文章與藥及酒之關係》裏說：「曹丕的一個時代可說是『文學的自覺時代』」。這個「文學的自覺時代」的文學，從曹丕的《典論·論文》看，就是指詩賦和文。班固在《兩都賦序》裏說：「賦者，古詩之流也。」這樣，當時的所謂文學，主要是指詩文說的，這就是傳統的所謂文學。《三國志·魏書·邯鄲淳傳》注引《魏略》稱：「太祖遣淳詣（曹）植。」植「誦俳優小說數千言」。曹植要在邯鄲淳前顯示他的才華，其中一項即背誦「俳優小說數千言」。可見在當時，俳優小說已經被認為可以顯示才華的一種文體，但曹丕在《典論·論文》裏卻不談它。到了晉代，干寶的《搜神記》更有名。但作為文學自覺時代的蕭統《文選》裏，選的還是詩文和賦，不選小說，即不以小說為文學。劉勰《文心雕龍》的「諸隱篇譬『九流之小說』」，而當時小說已成流別，譯經早具文體，劉氏皆付諸不論不議之列，卻于符、簿之屬，盡加以文

翰之目，當是薄小說之品卑而病譁經之爲異域風格歟。」（錢鍾書《管錐編》1175—1178頁）錢師按照傳統文學概念來著作的這部《中國文學史》，即以詩文爲主，包括賦和詞的文學史。

錢師的《中國文學史》裏對小說並非完全不談，如在晉代文學裏談到干寶的《搜神記》，在唐代文學裏談到張說的《虬髯客傳》，談到段成式《酉陽雜俎》中的小說。在明代文學裏更談到南曲，談到高則誠的《琵琶記》、徐渭的《四聲猿》，那末小說、散曲、戲劇都談到了。可是錢師在明代文學裏談到曲時說：「吾友吳瞿安先生梅有專書備論之，茲不具述。」因爲吳梅有《顧曲塵談》等書是專論曲的，所以錢師在元代文學裏就不談元曲了，在明代文學裏對散曲和戲劇只是簡單的提一下。這裏是不是顯示錢師這部《中國文學史》的另一特點。章學誠《文史通義·答客問上》稱：「史之大原，本乎《春秋》，《春秋》之義，昭乎筆削，筆削之義，不僅事具始末，文成規矩已也。以夫子「義則竊取」之旨觀之，固將綱紀天人，推明大道，所以通古今之變，而成一家之言者，必有詳人之所略，異人之所同，重人之所輕，而忽人之所謹。繩墨之所不可得而拘，類例之所不可得而泥，而後微茫杪忽之際，有以獨斷於一心。」錢師指出吳梅已有專書論曲，認爲吳梅的論曲，具有「別識心裁」，所以錢師可以不論。錢師這部《中國文學史》，把重點放在詩詞文上，對小說、戲劇和元人散曲都不談，對明代的散曲和戲劇只點一下，不就因爲這些部分的別識心裁，已有別的著作作了闡述嗎？這樣，這部《中國文學史》把重點放在詩詞和散文駢文上，談了錢師對這些方面的別識心裁，這正是「詳人之所略，異人之所同，重人之所輕，而忽人之所謹」，「而後微茫杪忽之際，有以獨斷於一心。」以下就錢師在這些方面的別識心裁，簡略地談一下。

錢師論詩，如論李白杜甫，稱：

李白得明遠（鮑照）之倣詭，含元亮（陶潛）之曠真，風調高渾，格力道古。杜甫則協子建（曹植）之風力，擅開府（庾信）之靡漫，骨氣奇高，辭采華茂。而後來韓愈、黃庭堅得其拗怒，白居易、蘇軾得其疏宕，杜牧、李商隱得其瞻麗，皆衍甫之一體者也。盛唐詩宗，駢稱李杜，而繼往開來，厥推杜甫。一傳而爲元和，得韓愈、白居易焉，皆學杜甫者也。特韓更欲高，白更欲卑，韓得其峻，白得其平。自白衍而益爲綺，則爲溫庭筠、李商隱，爲宋之西崑。自韓流而入於拗，則爲孟郊、賈島，爲宋之西江焉。

又稱：「白富于想像，運以逸氣，而甫工爲敘述，尤擅議論。」漢魏以前，詩格簡古，世間一切瑣事猥語，皆著不得，卽李白詩酒軼蕩，懷奇負氣，亦不屑意世故。獨杜甫抒所欲言，意到筆隨，以盡天下之情事，逢源而泛應。」詩以言志。漢魏六朝人詩，多寫景抒情，而罕議論記事。杜甫天挺雄豪，境界獨開，敘事則氣勢排蕩，而出以沈鬱頓挫，如太史公書，議論則跌宕昭彰，而抒以流淚太息，似賈太傅疏。大力控搏，奇趣洋溢。」

錢師論李白杜甫詩，既講了他們有所繼承，又講了他們各自所具有的特色，更其對杜甫詩，講了他對後世的影響，這不正是「通古今之變」嗎？杜甫《春日憶李白》：「清新庾開府，俊逸鮑參軍。」這是說李白詩的風格有如庾信的清新，鮑照的俊逸。可是錢師卻指出李白詩「得明遠之倣詭，含元亮之曠真」，有了新的提法。一般講李白是浪漫主義，杜甫是現實主義。錢師除指出李白「富于想像」外，又加上「運以逸氣」。稱杜甫「工爲敘述」外，又加上「尤擅議論」。並指出杜甫反映現實生活的特色，卽不同于「世間一切瑣事猥語，皆著不得」，而能「盡天下之情事」。又指出杜甫詩敘事如太史公書，議論似賈太

傳疏。一般認為杜甫敘事詩的「卽事名篇，無復依傍」，影響元稹白居易的新樂府詩，杜甫反映現實生活的詩篇，影響李商隱的《行次西部一百韻》，杜甫沉鬱的風格，影響李商隱、黃庭堅的一些詩。錢師指出「韓愈、黃庭堅得其拗怒，白居易、蘇軾得其疏宕，杜牧、李商隱得其贍麗。」「韓得其峻，白得其平。」錢師論李杜詩，確有別識心裁，這不正是「成一家之言」嗎？

再看錢師的論詞，如論高觀國詞：

陳慥序其詞曰：「高竹屋（觀國）與史梅溪（達祖），皆出周（邦彥）秦（觀）之詞，所作要是不經人道語。其妙處，少游（秦觀）、美成（周邦彥）亦未及也。」人謂推崇過當，我嫌流別欠明。秦觀自爲史達祖與觀國之所宗，而觀國特潤澤以周邦彥之華藻，達祖則與邦彥異趣。而論詞者好揭舉清真（邦彥）以繩墨諸家，不知清真詞剪裁古語，鎔鑄已出，而神情未盡傳合，特如詩家之有黃庭堅耳。」「惟古於詞必已出，降而不能乃剽賊」，山谷（黃庭堅）之詩，清真之詞，皆所謂「降而不能」者也。陳師道學山谷而不至，遂成硬砌。吳文英學清真而不至，亦爲堆垛。陳師道生吞活剥，而病未嚼碎；吳文英碎珠零玦，而苦無片段，所蔽不同，而失之鉅釘，一也。若論思路之雋，能出新意，化堆垛爲烟雲，梅溪、竹屋之視清真，自較後來居上耳。

南宋詞家，如張孝祥，如辛棄疾，則學蘇軾，如劉過，如劉克莊，又學辛棄疾，由俊邁而粗豪，由感慨而叫囂，變本加厲。物極攸反，至姜夔、周密、史達祖、高觀國之倫，則以叫囂非敦厚，粗豪非溫柔，蹤迹秦七（觀），上攀晏（殊）歐（陽修），未能敦厚，且先溫柔，蘊藉而不爲柳永、秦觀之褻譁，朗麗而亦異周邦彥、吳文英之鉅釘，風流婉約，自然雋致，以易張脈憤興之叫囂，一張一弛，勢之自

然也。乃論者動以清真相譽，求形似於字句，而昧於大體。如陳廷焯《白雨齋詞話》，至謂「白石（姜夔）、梅溪，皆祖清真。」又云：「周公謹（密）詞，刻意學清真。」不知名家後出，多識前言，一字一句，偶相形似；而神色氣味，或別有會。苟非好學深思，心知其意，固難為淺見寡聞道也。

在這裏，錢師从批評陳澧序高觀國詞的流別欠明，談到高觀國、史達祖詞和周邦彥詞的異趣。由此引出南北宋詞的演變，即由蘇軾、辛棄疾詞的俊邁感慨，變到劉過、劉克莊詞的粗豪叫囂，自然造成姜夔、周密、史達祖、高觀國的趨向蘊藉朗麗，風流婉約，從而批評陳廷焯的詞論，歸結到姜夔、史達祖等詞與周邦彥詞異趣。這樣講南北宋詞的流變，不正是「通古今之變」嗎？錢師的別識心裁，不同于陳澧、陳廷焯，不正是「成一家之言」嗎？

再看錢師論散文，如論蘇軾文：

爲文章不拘一格，大體可得而論者有二：其一調適而鬯逆，抒其胸次之高曠。……博覽物態，清曠自怡。而短札小記，涉筆成趣，著墨不多，自然韻流。……蕭然物外，逸趣橫生，栩栩焉神愉而體輕，令人欲棄百事而從之遊焉。其一深切以往復，發其議論之宏辯。……指陳利害，議論出入今古，事取理當，而筆力雄偉，抒詞高朗，極縱蕩變化之能，不可羈勒，而落韻甚輕，若行所無事。……其長處在援引史實，屬辭比事，尤善譬喻，巧於構想。他人所百思不到者，既讀之，而適爲人人意中所有。軒爽洞達，如與曉事人語，表裏粲然，中邊俱徹。蘇洵以申韓之峭刻，變蘇張之縱橫，其氣放，其筆拗，軾則以莊生之駘宕，化孟子之激切，其辭達，其勢曠。蘇洵瘦硬通神，軾則瀟灑自得。……若韓愈喜稱揚雄，爲文力著心追，而軾則以艱深文淺易識之，不以奇字奧句爲尚，

此宋文之所以異於唐，而軾之別出於韓以自名家者也。然軾之文，工於策論，疏於碑傳。策論則橫放側出，實能以條鬣雄姿，焯有波瀾。碑傳則平鋪直敘，未能以振提出精神，實傷冗絮。

錢師論蘇軾散文，跟韓愈的散文比，指出唐宋散文的差異。又跟蘇洵散文比，指出兩家風格的不同，一以莊周之駘宕化孟子之激切，一以中韓之峭刻變蘇張之縱橫。這當屬於「通古今之變」。錢師又指出蘇軾散文的兩種，一種富有情韻之美，跟胸次高曠結合。一種議論宏辯，善譬喻，巧構思，指出蘇軾散文的特點。這樣的別識心裁，正屬於「成一家之言」。

錢師論駢文，如講庾信，稱：

然其才華富有，綺麗之作，本自青年漸染南朝數百年之靡。及其流轉入周，重以飄泊之感，調以北方清健之音，故中年以後之作，能瀟灑宮體之綺麗，而特見蒼涼。隨事著色，善於數揚，流連篇章，感慨興廢，景自衰颯，語必清華，發愀愴之詞，擅雕蟲之功。尤善用事，據古況今，屬辭比事，而出之以沉鬱頓挫，所以堆砌化為烟雲。才藻宏富，自然健舉，植骨不高而氣則雄。舉止軒昂，動多振絕，所以麗典新聲，絡繹奔會，而不傷於贅積。余嘗謂韓愈之古文，於渾灝中見矜重，而信之駢文，於整麗中出疏蕩。韓愈雄而不快，而信密而能疏，組織出以流美，健筆寓於綺錯。蓋上摩漢魏辭賦之壘，下啓唐宋四六之途，實以信管其樞也。

錢師論庾信駢文，既指出他「漸染南朝數百年之靡」，「調以北方清健之音」，又推究他「上摩漢魏辭賦之壘，下啓唐宋四六之途」。又認為庾信駢文的特點，景的衰颯與語的清華結合，「於整麗中出疏蕩」，也是「通古今之變，成一家之言」，顯示出別識心裁之論。

錢師在講《中國文學史》中又多講歷代文論，如論《詩品》，稱：

而嶸出風入雅以評詩，撰成《詩品》三卷……至於品藻衆家，則以骨氣爲主，以辭采爲輔。……與其文勝，毋寧氣過。氣過，則厥旨淵放，忘其鄙近。文勝，則務爲妍冶，流入淫靡。此其較也。匡時砥俗，顧曰知言，所以謂篇章之繩墨，文采之權量。然魏武（曹操）悲壯，范曄華瞻，屈居下第，元亮陶淵明清遠，鮑照道麗，不列上品，銓次未允，頗有遺議。又所推原出於誰何，加以抑揚，第出以臆，而不必衷於情實。

錢師在論建安七子時，稱《詩品》評詩不必衷於情實道：

而（曹）植則異氣稟之魏武，茂彩過於難兄（曹丕），兼擅父兄之美，獨出冠時，足以上繼古詩枚（乘）李（陵），下開盛唐李（白）杜（甫）。然古詩枚李，不假思索，而植則起調軼蕩，噴薄以出。古詩枚李，不假烹鑄，而植則使字尖穎，時時琢鍊。古詩枚李，不調平仄，而植則宮羽克諧，漸露唐律。此漢魏之所以判也，然結體行氣，尚不失西漢之舊。

七子詩以陳琳徐幹爲最，而琳則骨勁而辭少雕潤，幹則辭婉而氣不道爽。……而鍾嶸《詩品》，乃以植而下，劉楨獨步，謂「仗氣愛奇，動多振絕，真骨陵霜，高風跨俗，但氣過其文，雕潤恨少」。今觀楨所作，乃知舉過其實。如楨《公讌詩》《贈五官中郎詩》四首，語頗腴而意不深，何嘗「雕潤恨少」。《贈徐幹》一首，氣較爽而語多率，豈遽「氣過其文」。《贈從弟》稍勁健而氣則促，亦不見所謂「仗氣愛奇，動多振絕，真骨陵霜，高風跨俗」也。乃云「自陳思以下，楨稱獨步」，其然豈其然乎？以楨之視陳思，何啻跛鼈之與騏驎。

王粲《詠史》《七哀》諸詩，直道所見，更不著一綺靡語，蒼勁有骨力，不爲文秀，特徵氣勁。……而《詩品》謂其「文秀質羸」，想見胸中全無涇渭。應瑒《侍五官中郎將建章臺集》詩，不爲頌諛，別起一波，脫去公讌恆徑，而以旅雁爲比興，音調悲切而瀏亮。《別詩》兩首，亦悽悲道激。其源出于李陵，於七子中與王粲爲近，惟粲澤以文秀，而瑒得其古直。應璩，應瑒之弟，所爲《百一詩》、《雜詩》，得諷諭之旨，不如乃兄之鮮明緊健，亦異魏文之洋洋清綺，特爲殷勤婉薦。而《詩品》謂其祖襲魏文，亦所不解也。

錢師對《詩品》的評論，既指出它「以骨氣爲主，以辭采爲輔」的優點，又指出它的推原與抑揚的不衷於情實。就推原說，錢師認爲《詩品》說曹植詩「其源出於《國風》」，又說「情兼雅怨」，即認爲源于風雅是不够的。光說曹植的五言詩源于四言詩風雅，不談它跟五言詩的關係，所以不够，還該指出他的詩跟父兄比有什麼特色，談它對後世的影響，這正是「通古今之變」的看法。錢師又指出《詩品》對劉楨、徐幹、王粲、應璩詩的評價都不符合實際。又指出《詩品》對建安七子中的應瑒無一字道及的不公，作了補充。這裏見出錢師的評論《詩品》，是結合它所論作家的作品來的，具有實事求是的精神。從這裏也看出錢師的別識心裁，是「成一家之言」的。

錢師這部《中國文學史》還有幾個特點在這裏略說一下。錢師認爲他對作家的評價，是通讀作家的全集得來的。因此要理解他對作家的評價，光讀他在本書中所引的作品是不够的。所以錢師對重要的作家，除引用他的作品外，還列舉了不少作品的篇目。希望讀者進一步去讀他所列舉篇目的作品，才能更好地理解錢師對作者的評價。錢師的評價作品，也注意作品的思想性，突出的表現在論宋

王沂孫的詞，既稱引他的《綺羅香·秋思》、《掃花遊·秋聲》爲亡國後「羈北而思南之作」，又引《齊天樂·冷煙殘水》爲「寄懷遺民貞士之隱遁不仕元」之作，又引《水龍吟·白蓮》「以喻貞臣遺老」，引《無悶·雪意》「喻宋遺民之潔己以遁」，引《一萼紅·石屋探梅》「喻謝枋得之孤芳獨抱，屢薦不起，而繼之以死也」。引《疏影·詠梅影》「以梅爲兩喻，如謝枋得其人也」。引《一萼紅·玉嬋娟》「爲謝枋得作」，引《一萼紅·紅梅》諷「宋遺民而仕元」。引《水龍吟·牡丹》諷留夢炎「以宋狀元宰相」，而「如垂風楊柳，依違取容」。因稱「自有沂孫而詞乃尊，以風花雪月之詞，而有家國滄桑之感，意內言外，真得《離騷》之意」。錢師反復稱引王沂孫詞，極力推重他的思想性。跟這相反的，錢師對元代漢族文人，對蒙古鐵騎的殘毀南宋名城數十百，屠戮漢族軍民幾百萬，「而譽凶人以爲元勳，修屠僂以張德威」，「斯誠民族之奇恥，斯文之敗類已」。反映錢師反民族壓迫的強烈精神。

最後再談一點，錢師在明代文學中列入「八股文」一節。八股文一般認爲代聖賢立言，沒有作者自己的思想感情，只有一種形式。錢師卻從中看出作者化朽腐爲神奇，在代聖賢立言中，反映了強烈的反民族壓迫精神。引丘義於明亡後被迫應試，作《之其所哀矜而辟焉》的八股文，稱：「更取匹耦而穢亂之，夫繆而妻不寡，取耄倪而僕隸之，父獨而子不孤。」即屠門覆祀，不敢仇也。」又哀夫恣胸行臆，擠人於可哀可矜而自爲愉快者，又哀夫助虐相淫，陷萬家於可哀可矜而僅奉一人歡笑者。蓋至此而荼毒攢心，無可告訴，徒飲痛銜恤而已。豈非「之其所哀矜而辟乎」！錢師稱：「怨恫憤盈，溢於紙墨。提學道閱度閱而判曰：『文心如此，何必應試！』除名免責。榜揭而諸生譁然，取原卷爭相傳寫，一時紙貴。亦可見人心不死，情到真處，無不感孚也。」錢師的《中國文學史》，從它在「詳人之所略」，「重人之所輕」

裏，顯示錢師的別識心裁，而後「微茫杪忽之際，有以獨斷於一心」哩。

這部《中國文學史》是錢師晚年在國立師範學院講授時編著的，撰成從先秦到元代的文學史。錢師先已撰成《明代文學》，前有《自序》，今作爲明代文學史列入。錢師的清代文學史，寫在他的論學日記裏，不及錄出修訂，在文化大革命中論學日記全部被毀。錢師在《現代中國文學史·編首》裏敘述近代文學，其中有敘述清代文學部分，今用爲清代文學綱要，附於後。錢師有《讀清人集別錄》，主要對清代桐城派作家作了較詳的論述，屬於清代文學史資料，附於後。也可見錢師對清代文學論述的一斑。

三

錢鍾霞

抗日戰爭方殷，余侍先父寓湖南安化縣藍田鎮今漣源縣治。時先父任前國立師範學院教授，編著《中國文學史》爲教材。自一九三九年春至一九四二年秋，成《先秦兩漢魏晉南北朝文學史》、《唐代文學史》、《宋金文學史》、《元代文學史》。吳忠匡君實襄佐之，余亦間與校讎繕寫。日本帝國侵略軍一九四四年經長沙市大舉南侵，偏師抄寇至湘鄉縣境內，去藍田才百許里。前國立師範學院徙於溁浦。余侍先父暫寓安化橋頭河。嗣亦到溁浦。播遷之餘，板屋苦葺，一切苟簡。《中國文學史》之著，不得不輟。抗日戰爭勝利，一九四六年秋，先父到武昌，先後任前私立華中大學、華中師範學院教授。續撰《清代文學史》，錄於論學日記內，未及成書。一九五七年以食道癌不治。彌留之日，以白一九三七年任教前國立浙江大學起，所著論學日記，歷時逾二十年，都數百萬言，及其他手稿付余。一九三七年以前之日

記，則以抗戰初未及運出而喪失。一九六六年遭罹浩劫，坐視先父僅存之手澤燬而不能救，毒楚何如。而《清代文學史》遂無一字遺留。氣稜既廓，天宇澄明。先父弟子馬厚文、周振甫、吳忠匡、彭祖年諸君求先父著述於焚燎之餘，擬先印上述諸文學史，咸謂此書有獨至之處。夫婿石聲淮出其在藍田之鉛印教材，中有先父增損改易、命余繕寫者。但缺《元代文學史》，宋金部分亦紙破多處。祖年君馳書大江南北諸同門蒐尋別本，不可得。最後於中南民族學院副院長嚴學窘教授處，得其夫人張志遠同志在文化大革命中轉移保存之珍本，與聲淮校定補苴之。續以先父一九三三年版《明代文學》商務印書館印，收入《萬有文庫》第一集中。《明代文學》體例略異，今合爲一書，亦稱《明代文學史》，蓋一九四二年，先父用爲前國立師範學院教材，以接《元代文學史》也。馬厚文諸君於此書刊行，關注甚切，而祖年君多方訪求，俾成完璧，均爲可感。又先父門人王紹曾君方於雜誌上搜輯先父《清人文集敘錄》，擬彙編付印，則先父之《清代文學史》著錄於論學日記中者雖不可見，於《敘錄》中可略窺大體矣。

一九八三年十二月錢鍾霞記於武昌華中村

封面設計：王增寅



定價 37.00 元

ISBN 7-101-00618-3/I·90